



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>



on 18.72
MONTAIGNE COLLECTION




Harvard College Library

FROM THE LIBRARY OF
FERDINAND BÔCHER, A.M.
INSTRUCTOR IN FRENCH, 1861-1865
PROFESSOR OF MODERN LANGUAGES, 1870-1902

GIFT OF
JAMES HAZEN HYDE
OF NEW YORK
(Class of 1898)

Received April 17, 1903



LES ESSAIS
de Montaigne



LES ESSAIS
de Montaigne



LES ESSAIS
de
Montaigne

*Accompagnés d'une Notice sur sa vie & ses ouvrages,
d'une Étude bibliographique, de Variantes, de
Notes, de Tables & d'un Glossaire,*

Par
E. COURBET & CH. ROYER.

Tome troisième.



PARIS
ALPHONSE LEMERRE, ÉDITEUR
31, PASSAGE CHOISEUL, 31

M. DCCC. LXXV.

mon 18.72
~~70~~

Harvard University Library
Department of Library of
Theological Studies
Gift of James H. Hyde
1917, 1918



LIVRE SECOND.

(SVITE)

De la gloire.

CHAPITRE XVI.



Ly a le nom & la chose : le nom, c'est vne voix qui remerque & signifie la chose : le nom, ce n'est pas vne partie de la chose, ny de la substance : c'est vne piece estrangere ioincte à la chose, & hors d'elle. Dieu qui est en soy toute plenitude, & le comble de toute perfection, il ne peut s'augmenter & accroistre au dedans : mais son nom se peut augmenter & accroistre, par la benediction & loüange, que nous donnons à ses ourages extérieurs. Laquelle loüange, puis que nous ne la pouuons incorporer en luy, d'autant qu'il n'y peut auoir accession de bien, nous l'attribuons à son nom,

qui est la piece hors de luy, la plus voisine. Voylà comment c'est à Dieu seul, à qui gloire & honneur appartient. Et n'est rien si esloigné de raison, que de nous en mettre en queste pour nous : car estans indigens & necessiteux au dedans, nostre essence estant imparfaicte, & ayant continuellement befoing d'amélioration, c'est là, à quoy nous nous deuons traualier. Nous sommes tous creux & vuides : ce n'est pas de vent & de voix que nous auons à nous remplir : il nous faut de la substance plus solide à nous reparer. Vn homme affamé seroit bien simple de chercher à se pouruoir plustost d'un beau vestement, que d'un bon repas : il faut courir au plus pressé. Comme disent nos ordinaires prieres, *Gloria in excelsis Deo, & in terra pax hominibus*. Nous sommes en disette de beauté, santé, sagesse, vertu, & telles parties essentielles : les ornemens externes se chercheront apres que nous aurons proueu aux choses necessaires. La theologie traite amplement & plus pertinemment ce subiect, mais ie n'y suis guere versé. Chrysippus & Diogenes ont esté les premiers auteurs & les plus fermes du mespris de la gloire. Et entre toutes les voluptez, ils disoient qu'il n'y en auoit point de plus dangereuse, ny plus à fuir, que celle qui nous vient de l'approbation d'autrui. De vray l'experience nous en fait sentir plusieurs trahisons bien dommageables. Il n'est chose qui empoisonne tant les Princes que la flatterie, ny rien par où les meschans gaignent plus aisément credit autour d'eux : ny maquerelage si propre & si ordinaire à corrompre la chasteté des femmes, que de les paistre & entretenir de leurs louanges. Le premier enchantement que les Sirenes employent à piper Vlysses, est de cette nature :

*Deça vers nous, deça, ô tresflouable Vlyffe,
Et le plus grand honneur dont la Grece fleurisse.*

Ces philosophes là disoient, que toute la gloire du monde ne meritoit pas qu'un homme d'entendement estendist seulement le doigt pour l'acquérir :

Gloria quantalibet quid erit, si gloria tantum est?

Je dis pour elle seule : car elle tire souvent à sa suite plusieurs commoditez, pour lesquelles elle se peut rendre desirable : elle nous acquiert de la bienveillance : elle nous rend moins exposez aux iniuries & offenses d'autrui, & choses semblables. C'estoit aussi des principaux dogmes d'Epicurus : car ce precepte de sa secte, *CACHE TA VIE*, qui deffend aux hommes de s'empescher des charges & negociations publiques, presuppose aussi necessairement qu'on mesprise la gloire : qui est vne approbation que le monde fait des actions que nous mettons en euidence. Celuy qui nous ordonne de nous cacher, & de n'auoir soing que de nous, & qui ne veut pas que nous soyons connus d'autrui, il veut encores moins que nous en soyons honorez & glorifiez. Aussi conseille il à Idomeneus, de ne regler aucunement ses actions, par l'opinion ou reputation commune : si ce n'est pour éviter les autres incommoditez accidentales, que le mespris des hommes luy pourroit apporter. Ces discours là sont infiniment vrais, à mon aduis, & raisonnables. Mais nous sommes, ie ne sçay comment, doubles en nous mesmes, qui fait que ce que nous croyons, nous ne le croyons pas : & ne nous pouuons deffaire de ce que nous condamnons. Voyons les dernieres paroles d'Epicurus, & qu'il dit en mourant : elles sont grandes & dignes d'un tel philosophe :

mais si ont elles quelque merque de la recommandation de son nom, & de cette humeur qu'il auoit descriée par ses preceptes. Voicy vne lettre qu'il dicta vn peu auant son dernier soufpir.

EPICVRVS A HERMACHVS SALVT.

Ce pendant que ie passois l'heureux, & celuy-là mesmes le dernier iour de ma vie, i'escrui cecy, accompagné toutesfois de telle douleur en la vessie & aux intestins, qu'il ne peut rien estre adiousté à sa grandeur. Mais elle estoit compensée par le plaisir qu'apportoit à mon ame la souuenance de mes inuentions & de mes discours. Or toy comme requiert l'affection que tu as eu dès ton enfance enuers moy, & la philosophie, embrasse la protection des enfans de Metrodorus.

Voila sa lettre. Et ce qui me fait interpreter que ce plaisir qu'il dit sentir en son ame, de ses inuentions, regarde aucunement la reputation qu'il en esperoit acquerir apres sa mort, c'est l'ordonnance de son testament, par lequel il veut que Aminomachus & Timocrates ses heritiers, fournissent pour la celebration de son iour natal tous les mois de Ianuier, les frais que Hermachus ordonneroit : & aussi pour la despence qui se feroit le vingtiesme iour de chasque lune, au traitement des philosophes ses familiers, qui s'assembleroient à l'honneur de la memoire de luy & de Metrodorus. Carneades a esté chef de l'opinion contraire : & a maintenu que la gloire estoit pour elle mesme desirable, tout ainsi que nous embrassons nos posthumes pour eux mesmes, n'en ayans aucune cognoissance ny iouyssance. Cette opinion n'a pas failly d'estre plus communement suyue, comme

font volontiers celles qui s'accroissent le plus à nos inclinations. Aristote luy donne le premier rang entre les biens externes : Ensuite, comme deux extremes vicieux, l'immoderation, & à la rechercher, & à la fuir. Je croy que si nous avions les livres que Cicero avoit escrit sur ce subiect, il nous en conteroit de belles : car cet homme là fut si forcené de cette passion, que s'il eust osé, il fust, ce croif-ie, volontiers tombé en l'excez où tomberent d'autres, que la vertu mesme n'estoit desirable, que pour l'honneur qui se tenoit tousiours à sa fuite :

*Paulum sepultæ distat inertia
Celata virtus.*

Qui est vn' opinion si fauce, que ie suis dépit qu'elle ait iamais peu entrer en l'entendement d'homme, qui eust cet honneur de porter le nom de philosophe. Si cela estoit vray, il ne faudroit estre vertueux qu'en public : & les operations de l'ame, où est le vray siege de la vertu, nous n'aurions que faire de les tenir en regle & en ordre, sinon autant qu'elles deburoient venir à la cognoissance d'autrui. N'y va il donc que de faillir finement & subtilement ? Si tu sçais, dit Carneades, vn serpent caché en ce lieu, auquel sans y pensér, se va seoir celuy, de la mort duquel tu esperes profit : tu fais meschamment, si tu ne l'en aduertis : & d'autant plus que ton action ne doit estre cogneuë que de toy. Si nous ne prenons de nous mesmes la loy de bien faire : si l'impunité nous est iustice, à combien de sortes de meschancetez auons nous tous les iours à nous abandonner ? Ce que S. Peducus fit, de rendre fidelement cela que C. Plotius avoit commis à sa seule science, de

ses richesses, & ce que i'en ay fait souuent de mesme, ie ne le trouue pas tant louable, comme ie trouueroy execrable, que nous y eussions failly. Et trouue bon & vtile à ramenteuoir en noz iours, l'exemple de P. Sextilius Ruffus, que Cicero accuse pour auoir recueilly vne heredité contre sa conscience : non seulement, non contre les loix, mais par les loix mesmes. Et M. Crassus, & Q. Hortensius, lesquels à cause de leur autorité & puissance, ayants esté pour certaines quotitez appelez par vn estranger à la succession d'un testament faux, à fin que par ce moyen il y establist sa part : se contenterent de n'estre participants de la fauceté, & ne refuserent d'en tirer du fruit : assez couuerts, s'ils se tenoient à l'abry des accusations, & des tesmoins, & des loix. *Meminerint Deum se habere testem, id est, vt ego arbitror, mentem suam.* La vertu est chose bien vaine & frivole, si elle tire sa recommandation de la gloire. Pour neant entreprendrions nous de luy faire tenir son rang à part, & la déioindrions de la Fortune : car qu'est-il plus fortuite que la reputation ? *Profectò fortuna in omni re dominatur : ea res cunctas ex libidine magis quàm ex vero celebrat obscuratque.* De faire que les actions soyent cognues & veuës, c'est le pur ouurage de la Fortune. C'est le sort qui nous applique la gloire, selon sa temerité. Ie l'ay veuë fort souuent marcher auant le merite : & souuent outrepasser le merite d'une longue mesure. Celuy qui premier s'aduisa de la ressemblance de l'ombre à la gloire, fit mieux qu'il ne vouloit. Ce sont choses excellemment vaines. Elle va aussi quelque fois deuant son corps : & quelque fois l'excede de beaucoup en longueur. Ceux qui apprennent à la noblesse de ne chercher en la vaillance que l'honneur : *quasi non sit honestum*

quod nobilitatum non fit : que gaignent-ils par là, que de les instruire de ne se hasarder iamais, si on ne les voit, & de prendre bien garde, s'il y a des tefmoins, qui puissent rapporter nouuelles de leur valeur, là où il se presente mille occasions de bien faire, sans qu'on en puisse estre remerqué? Combien de belles actions particulieres s'enfeueliffent dans la foule d'une bataille? Quiconque s'amuse à contreroller autrui pendant une telle mefflée, il n'y est guere embefoigné : & produit contrefoy mesmes le tefmoignage qu'il rend des deportemens de ses compaignons. *Vera & sapiens animi magnitudo, honestum illud quod maxime naturam sequitur, in factis positum, non in gloria, iudicat.* Toute la gloire, que ie pretens de ma vie, c'est de l'auoir vefcue tranquille. Tranquille non selon Metrodorus, ou Arcesilas, ou Aristippus, mais selon moy. Puisque la philosophie n'a sceu trouuer aucune voye pour la tranquillité, qui fust bonne en commun, que chacun la cherche en son particulier. A qui doiuent Cæsar & Alexandre cette grandeur infinie de leur renommée, qu'à la Fortune? Combien d'hommes a elle esteint, sur le commencement de leur progrès, desquels nous n'auons aucune cognoissance, qui y apportoiert mesme courage que le leur, si le malheur de leur sort ne les eust arrestez tout court, sur la naissance mesme de leurs entreprinfs? Au trauers de tant & si extremes dangers il ne me souuient point auoir leu que Cæsar ait esté iamais blessé. Mille sont morts de moindres perils, que le moindre de ceux qu'il franchit. Infinies belles actions se doiuent perdre sans tefmoignage, auant qu'il en vienne une à profit. On n'est pas tousiours sur le haut d'une bresche, ou à la teste d'une armée, à la veüe de son general, comme sur vn eschaffaut. On est surpris entre la haye & le

foffé : il faut tenter fortune contre vn poullailler : il faut dénicher quatre chetifs harquebusiers d'une grange : il faut seul s'escarter de la troupe & entreprendre seul, selon la necessité qui s'offre. Et si on prend garde, on trouuera, à mon aduis, qu'il aduient par experience, que les moins esclatantes occasions sont les plus dangereuses : & qu'aux guerres, qui se sont passées de nostre temps, il s'est perdu plus de gens de bien, aux occasions legeres & peu importantes, & à la contestation de quelque bicoque, qu'és lieux dignes & honorables. Qui tient sa mort pour mal employée, si ce n'est en occasion signalée : au lieu d'illustre sa mort, il obscurcit volontiers sa vie : laissant eschapper ce pendant plusieurs iustes occasions de se hasarder. Et toutes les iustes sont illustres assez : sa conscience les trompétant suffisamment à chacun. *Gloria nostra est, testimonium conscientiae nostrae.* Qui n'est homme de bien que par ce qu'on le sçaura, & par ce qu'on l'en estimera mieux, apres l'auoir sçeu, qui ne veut bien faire qu'en condition que sa vertu vienne à la cognoissance des hommes, celuy-là n'est pas personne de qui on puisse tirer beaucoup de seruice.

*Credo ch'el resto di quel verno, cose
Faceffe degne di tener ne conto,
Ma fur fin'à quel tempo si nascose,
Che non è colpa mia s'hor'non le conto,
Perche Orlando a far'opre virtuose
Piu ch'à narrar le poi sempre era pronto,
Ne mai fu alcun'de li suoi fatti espresso,
Senon quando hebbe i testimonij appresso.*

Il faut aller à la guerre pour son deuoir, & en attendre cette recompense, qui ne peut faillir à toutes belles

actions, pour occultes qu'elles foyent, non pas mesmes aux vertueuses pensées : c'est le contentement qu'une conscience bien réglée reçoit en foy, de bien faire. Il faut estre vaillant pour foy-mesmes, & pour l'avantage que c'est d'avoir son courage logé en une affiette ferme & asseurée, contre les assauts de la Fortune.

*Virtus repulsæ nescia sordida,
Intaminatis fulget honoribus :
Nec sumit aut ponit secures
Arbitrio popularis auræ.*

Ce n'est pas pour la montre, que nostre ame doit iouer son rolle, c'est chez nous au dedans, où nuls yeux ne donnent que les nostres : là elle nous couure de la crainte de la mort, des douleurs & de la honte mesme : elle nous assure là, de la perte de nos enfans, de nos amis, & de nos fortunes : & quand l'opportunité s'y presente, elle nous conduit aussi aux hazards de la guerre. *Non emolumento aliquo, sed ipfius honestatis decore.* Ce profit est bien plus grand, & bien plus digne d'estre souhaité & esperé, que l'honneur & la gloire, qui n'est autre chose qu'un favorable iugement qu'on fait de nous. Il faut trier de toute une nation, une douzaine d'hommes, pour iuger d'un arpent de terre, & le iugement de nos inclinations, & de nos actions, la plus difficile matiere, & la plus importante qui soit, nous la remettons à la voix de la commune & de la tourbe, mere d'ignorance, d'iniustice, & d'inconstance. Est-ce raison de faire dependre la vie d'un sage, du iugement des fols? *An quidquam stultius, quàm quos singulos contemnas, eos aliquid putare esse uniuersos?* Quiconque vise à leur plaisir, il n'a iamais fait, c'est une bute qui n'a ny forme ny prise. *Nil tam inæstimabile est,*

quàm animi multitudinis. Demetrius disoit plaifamment de la voix du peuple, qu'il ne faisoit non plus de recette, de celle qui luy sortoit par en haut, que de celle qui luy sortoit par en bas. Celuy la dit encore plus : *Ego hoc iudico, si quando turpe non fit, tamen non esse non turpe, quum id à multitudine laudetur.* Null' art, nulle souplesse d'esprit pourroit conduire nos pas à la fuite d'un guide si desuoyé & si defreglé. En cette confusion venteuse de bruits de rapports & opinions vulgaires, qui nous poussent, il ne se peut establir aucune route qui vaille. Ne nous proposons point vne fin si flotante & volage : allons constamment apres la raison : que l'approbation publique nous suyue par là, si elle veut : & comme elle despend toute de la Fortune, nous n'auons point loy de l'esperer plustost par autre voye que par celle là. Quand pour sa droiture ie ne suyurois le droit chemin, ie le suyurois pour auoir trouué par experience, qu'au bout du compte, c'est communement le plus heureux, & le plus vtile. *Dedit hoc prouidentia hominibus munus, vt honesta magis iuuarent.* Le marinier ancien disoit ainsin à Neptune, en vne grande tempeste : O Dieu tu me sauueras si tu veux, si tu veux tu me perdras : mais si tiendray-ie tousiours droit mon timon. I'ay veu de mon temps mill'hommes souples, mestis, ambigus, & que nul ne doubtoit plus prudents mondains que moy, se perdre où ie me suis sauué :

Rifi successu posse carere dolos.

Paul Æmyle allant en sa glorieuse expedition de Macedoine, aduertit sur tout le peuple à Rome, de contenir leur langue de ses actions, pendant son absence. Que la licence des iugements, est vn grand

destourbier aux grands affaires ! D'autant que chacun n'a pas la fermeté de Fabius à l'encontre des voix communes, contraires & iniurieuses : qui ayma mieux laisser desmembrer son autorité aux vaines fantasies des hommes, que faire moins bien sa charge, avec fauorable reputation, & populaire consentement. Il y a ie ne sçay quelle douceur naturelle à se sentir louer, mais nous luy prestons trop de beaucoup.

*Laudari haud metuum, neque enim mihi cornea fibra est,
Sed recti finemque extremumque esse recuso
Euge tuum & bellè.*

Ie ne me soucie pas tant, quel ie fois chez autrui, comme ie me soucie quel ie fois en moy-mesme. Ie veux estre riche par moy, non par emprunt. Les estrangers ne voyent que les euenemens & apparences externes : chacun peut faire bonne mine par le dehors, plein au dedans de fiebure & d'effroy. Ils ne voyent pas mon cœur, ils ne voyent que mes contenance. On a raison de descrier l'hypocrisie, qui se trouue en la guerre : car qu'est il plus aisé à vn homme pratic, que de gauchir aux dangers, & de contre-faire le mauuais, ayant le cœur plein de mollesse ? Il y a tant de moyens d'éuiter les occasions de se hazarder en particulier, que nous aurons trompé mille fois le monde, auant que de nous engager à vn dangereux pas : & lors mesme, nous y trouuant empétrez, nous sçaurons bien pour ce coup, couvrir nostre ieu d'un bon visage, & d'une parole asseurée, quoy que l'ame nous tremble au dedans. Et qui auroit l'usage de l'anneau Platonique, rendant inuisible celuy qui le portoit au doigt, si on luy donnoit le tour vers le plat de la main : assez de gents souuent se cacheroient, où il se faut presenter le plus : & se repen-

tiroyent d'estre placez en lieu si honorable, auquel la necessité les rend asseurez.

*Falsus honor iuuat, & mendax infamia terret
Quem nisi mendosum & mendacem?*

Voyla comment tous ces iugemens qui se font des apparences externes, sont merueilleusement incertains & douteux : & n'est aucun si asseuré tesmoing, comme chacun à soy-mesme. En celles là combien auons nous de goujats, compagnons de nostre gloire? Celuy qui se tient ferme dans vne tranchée descouuerte, que fait il en cela, que ne facent deuant luy cinquante pauvres pionniers, qui luy ouurent le pas, & le couurent de leurs corps, pour cinq sols de paye par iour?

*non quicquid turbida Roma
Eleuet, accedas, examénque improbum in illa
Castiges trutina, nec te quæfueris extrâ.*

Nous appellons aggrandir nostre nom, l'estendre & semer en plusieurs bouches : nous voulons qu'il y soit receu en bonne part, & que cette sienne accroissance luy vienne à profit : voyla ce qu'il y peut auoir de plus excusable en ce dessein. Mais l'exces de cette maladie en va iusques là, que plusieurs cherchent de faire parler d'eux en quelque façon que ce soit. Trogus Pompeius dit de Herostratus, & Titus Liuius de Manlius Capitolinus, qu'ils estoient plus desireux de grande, que de bonne reputation. Ce vice est ordinaire. Nous nous soignons plus qu'on parle de nous, que comment on en parle : & nous est assez que nostre nom coure par la bouche des hommes, en quelque condition qu'il y coure. Il semble que l'estre conneu, ce soit aucunement auoir sa vie & sa durée

en la garde d'autrui. Moy, ie tiens que ie ne suis que chez moy, & de cette autre mienne vie qui loge en la cognoissance de mes amis, à la considerer nuë, & simplement en foy, ie sçay bien que ie n'en sens fruit ny iouyssance, que par la vanité d'une opinion fantastique. Et quand ie seray mort, ie m'en resenteray encores beaucoup moins. Et si perdray tout net, l'usage des vrayes vtilitez, qui accidentalement la suyuent par fois : ie n'auray plus de prise par où saisir la reputation : ny par où elle puisse me toucher ny arriuer à moy. Car de m'attendre que mon nom la reçoïue : premierement ie n'ay point de nom qui soit assez mien : de deux que i'ay, l'un est commun à toute ma race, voire encore à d'autres. Il y a une famille à Paris & à Montpellier, qui se surnomme Montaigne : une autre en Bretagne, & en Xaintonge, de la Montaigne. Le remuement d'une seule syllabe, meslera noz fusées, de façon que i'auray part à leur gloire, & eux à l'adventure à ma honte. Et si, les miens se font autresfois surnommer Eyquem, surnom qui touche encore une maison cogneuë en Angleterre. Quant à mon autre nom, il est, à quiconque aura enuie de le prendre. Ainsi i'honoreray peut estre, un crocheteur en ma place. Et puis quand i'aurois une merque particulière pour moy, que peut elle merquer quand ie n'y suis plus ? peut elle designer & fauorir l'inanité ?

*nunc leuior cippus non imprimit ossa.
Landat posteritas, nunc non è manibus illis,
Nunc non è tumulo fortunatæque fauilla
Nascuntur violæ ?*

Mais de cecy i'en ay parlé ailleurs. Au demeurant en toute une bataille où dix mill'hommes sont stropiez

ou tuez, il n'en est pas quinze dequoy lon parle. Il faut que ce soit quelque grandeur bien eminente, ou quelque consequence d'importance, que la Fortune y ait iointe, qui face valoir vn'action priuée, non d'un harquebuzier seulement, mais d'un Capitaine : car de tuer un homme, ou deux, ou dix, de se presenter courageusement à la mort, c'est à la verité quelque chose à chacun de nous, car il y va de tout : mais pour le monde, ce sont choses si ordinaires, il s'en voit tant tous les iours, & en faut tant de pareilles pour produire un effect notable, que nous n'en pouvons attendre aucune particuliere recommandation.

*casus multis hic cognitus, ac iam
Tritus, & à medio fortunæ ductus aceruo.*

De tant de miliaffes de vaillans hommes qui sont morts depuis quinze cens ans en France, les armes en la main, il n'y en a pas cent, qui soyent venus à nostre cognoissance. La memoire non des chefs seulement, mais des batailles & victoires est enseuelie. Les fortunes de plus de la moitié du monde, à faute de registre, ne bougent de leur place, & s'esuanoüissent sans durée. Si i'auois en ma possession les euenemens incognus, i'en penserois tresfacilement supplanter les cognus, en toute espece d'exemples. Quoy, que des Romains mesmes, & des Grecs, parmy tant d'escriuains & de tesmoins, & tant de rares & nobles exploits, il en est venu si peu iusques à nous?

Ad nos vix tenuis famæ perlabitur aura.

Ce fera beaucoup si d'icy à cent ans on se souuiet en gros, que de nostre temps il y a eu des guerres ciuiles en France. Les Lacedemoniens sacrifioient aux

Muses entrans en bataille, afin que leurs gestes fussent bien & dignement escrits, estimants que ce fust vne faueur diuine, & non commune, que les belles actions trouuassent des tesmoins qui leur sceussent donner vie & memoire. Pensons nous qu'à chasque harquebusade qui nous touche, & à chasque hazard que nous courons, il y ait soudain vn greffier qui l'enrolle ? & cent greffiers outre cela le pourront escrire, desquels les commentaires ne dureront que trois iours, & ne viendront à la veuë de personne. Nous n'auons pas la milliesme partie des escrits anciens ; c'est la Fortune qui leur donne vie, ou plus courte, ou plus longue, selon sa faueur : & ce que nous en auons, il nous est loisible de doubter, si c'est le pire, n'ayans pas veu le demeurant. On ne fait pas des histoires de choses de si peu : il faut auoir esté chef à conquerir vn Empire, ou vn Royaume, il faut auoir gaigné cinquante deux batailles assignées, tousiours plus foible en nombre, comme Cæsar. Dix mille bons compagnons & plusieurs grands Capitaines, moururent à sa suite, vaillamment & courageusement, desquels les noms n'ont duré qu'autant que leurs femmes & leurs enfans vesquirent :

quos fama obscura recondit.

De ceux mesme, que nous voyons bien faire, trois mois, ou trois ans apres qu'ils y sont demeurez, il ne s'en parle non plus que s'ils n'eussent iamais esté. Quiconque considerera avec iuste mesure & proportion, de quelles gens & de quels faits, la gloire se maintient en la memoire des liures, il trouuera qu'il y a de nostre siecle, fort peu d'actions, & fort peu de personnes, qui y puissent pretendre nul droit. Com-

bien auons nous veu d'hommes vertueux, suruiure à leur propre reputation, qui ont veu & souffert esteindre en leur presence, l'honneur & la gloire tres-iustement acquise en leurs ieunes ans? Et pour trois ans de cette vie fantastique & imaginaire, allons nous perdant nostre vraye vie & essentielle, & nous engager à vne mort perpetuelle? Les sages se proposent vne plus belle & plus iuste fin, à vne si importante entreprise. *Rectè facti, fecisse merces est : Officij fructus, ipsum officium est.* Il feroit à l'aduanture excusable à vn peintre ou autre artisan, ou encores à vn rhetoricien ou grammairien, de se traualier pour acquerir nom, par ses ouurages : mais les actions de la vertu, elles sont trop nobles d'elles mesmes, pour rechercher autre loyer, que de leur propre valeur : & notamment pour la chercher en la vanité des iugemens humains. Si toute-fois cette fauce opinion sert au public à contenir les hommes en leur deuoir : si le peuple en est esueillé à la vertu : si les Princes sont touchez, de voir le monde benir la memoire de Traian, & abominer celle de Neron : si cela les esmeut ; de voir le nom de ce grand pendart, autresfois si effroyable & si redoubté, maudit & outragé si librement par le premier escolier qui l'entreprend : qu'elle accroisse hardiment, & qu'on la nourrisse entre nous le plus qu'on pourra. Et Platon employant toutes choses à rendre ses citoyens vertueux, leur conseille aussi, de ne mespriser la bonne estimation des peuples. Et dit, que par quelque diuine inspiration il aduiant, que les meschans mesmes scauent souuent tant de parole, que d'opinion, iustement distinguer les bons des mauuais. Ce personnage & son pedagogue sont merueilleux, & hardis ouuriers à faire ioindre les operations & reuelations diuines

tout par tout où faut l'humaine force. Et pour cette cause peut estre, l'appelloit Timon en l'iniuriant, le grand forgeur de miracles. *Vt trajci poetæ confugiunt ad Deum, cùm explicare argumenti exitum non possunt.* Puis que les hommes par leur insuffisance ne se peuvent assez payer d'une bonne monnoye, qu'on y employe encore la fauce. Ce moyen a esté practiqué par tous les législateurs : & n'est police, où il n'y ait quelque mélange, ou de vanité ceremonieuse, ou d'opinion mensongere, qui serue de bride à tenir le peuple en office. C'est pour cela que la plupart ont leurs origines & commencemens fabuleux, & enrichis de mysteres supernaturels. C'est cela, qui a donné credit aux religions bastardes, & les a faictes fauorir aux gens d'entendement. Et pour cela, que Numa & Sertorius, pour rendre leurs hommes de meilleure creance, les païssoient de cette sottise, l'un que la nymphe Egeria, l'autre que sa biche blanche, luy apportoit de la part des Dieux, tous les conseils qu'il prenoit. Et l'autorité que Numa donna à ses loix sous tiltre du patronage de cette Deesse, Zoroastre législateur des Bactriens & des Perses, la donna aux siennes, sous le nom du Dieu Oromazis : Trismegiste des Égyptiens, de Mercure : Zamolxis des Scythes, de Vesta : Charondas des Chalcides, de Saturne : Minos des Candiot, de Iuppiter : Lycurgus des Lacedemoniens, d'Apollo : Dracon & Solon des Atheniens, de Minerue. Et toute police a un Dieu à sa teste : fausement les autres : veritablement celle, que Moïse dressa au peuple de Judée forty d'Égypte. La religion des Bedoins, comme dit le sire de Iouinville, portoit entre autres choses, que l'ame de celuy d'entre eux qui mouroit pour son Prince, s'en alloit en un autre corps plus heureux, plus beau & plus fort que

le premier : au moyen dequoy ils en hazardoyent beaucoup plus volontiers leur vie;

*In ferrum mens prona viris, animæque capaces
Mortis, & ignaum est reditura parcere vitæ.*

Voilà vne creance tressalutaire, toute vaine qu'elle soit. Chasque nation a plusieurs tels exemples chez soy : mais ce subiect meritoit vn discours à part. Pour dire encore vn mot sur mon premier propos : ie ne conseille non plus aux Dames, d'appeller honneur, leur deuoir, *ut enim consuetudo loquitur, id solum dicitur honestum, quod est populari fama gloriosum* : leur deuoir est le marc : leur honneur n'est que l'escorce. Ny ne leur conseille de nous donner cette excuse en payement de leur refus : car ie presuppose, que leurs intentions, leur desir, & leur volonté, qui sont pieces où l'honneur n'a que voir, d'autant qu'il n'en paroist rien au dehors, soyent encore plus réglées que les effects.

Quæ, quia non liceat, non facit, illa facit.

L'offence & enuers Dieu, & en la conscience, seroit aussi grande de le desirer que de l'effectuer. Et puis ce sont actions d'elles mesmes cachées & occultes, il seroit bien-aysé qu'elles en desrobassent quelqu'une à la cognoissance d'autrui, d'où l'honneur depend, si elles n'auoyent autre respect à leur deuoir, & à l'affection qu'elles portent à la chasteté, pour elle mesme. Toute personne d'honneur choisit de perdre plus tost son honneur, que de perdre sa conscience.



De la presumption.

CHAPITRE XVII.



L y a vne autre forte de gloire, qui est vne trop bonne opinion, que nous conceuons de nostre valeur. C'est vn' affection inconsiderée, dequoy nous nous cherissons, qui nous represente à nous mesmes, autres que nous ne sommes. Comme la passion amoureuse preste des beautez, & des graces, au subiect qu'elle embrasse, & fait que ceux qui en sont espris, trouuent d'un iugement trouble & alteré, ce qu'ils ayment, autre & plus parfait qu'il n'est. Je ne veux pas, que de peur de faillir de ce costé là, vn homme se mescognoisse pourtant, ny qu'il pense estre moins que ce qu'il est : le iugement doit tout par tout maintenir son droit. C'est raison qu'il voye en ce subiect comme ailleurs, ce que la verité luy presente. Si c'est Cæsar, qu'il se treuve hardiment le plus grand Capitaine du monde. Nous ne sommes que ceremonie, la ceremonie nous emporte, & laissons la substance des choses : nous nous tenons aux branches & abandonnons le tronc & le corps. Nous auons appris aux Dames de rougir, oyants seulement nommer, ce qu'elles ne craignent

aucunement à faire : nous n'osons appeller à droit noz membres, & ne craignons pas de les employer à toute sorte de desbauche. La ceremonie nous deffend d'exprimer par parolles les choses licites & naturelles, & nous l'en croyons : la raison nous deffend de n'en faire point d'illicites & mauuaises, & personne ne l'en croit. Je me trouue icy empestreé és loix de la ceremonie : car elle ne permet, ny qu'on parle bien de soy, ny qu'on en parle mal. Nous la laissons là pour ce coup. Ceux de qui la Fortune, bonne ou mauuaise qu'on la doie appeller, a fait passer la vie en quelque eminent degré, ils peuuent par leurs actions publiques tesmoigner quels ils sont. Mais ceux qu'elle n'a employez qu'en foule, & de qui personne ne parlera, si eux mesmes n'en parlent, ils sont excusables, s'ils prennent la hardiesse de parler d'eux, mesmes enuers ceux qui ont interest de les cognoistre ; à l'exemple de Lucilius :

*Ille velut fidis arcana sodalibus olim
Credebat libris, neque si malè cesserat, vsquam
Decurrens alio, neque si benè : quo fit, vt omnis
Votiua pateat veluti descripta tabella
Vita sentis.*

Celuy la commettoit à son papier ses actions & ses pensées, & s'y peignoit tel qu'il se sentoit estre. *Nec id Rutilio & Scauro citra fidem, aut obtrectioni fuit.* Il me souuient donc, que dès ma plus tendre enfance, on remerquoit en moy ie ne sçay quel port de corps, & des gestes tesmoignants quelque vaine & forte fierté. I'en veux dire premierement cecy, qu'il n'est pas inconuenient d'auoir des conditions & des propensions, si propres & si incorporées en nous, que nous n'ayons pas moyen de les sentir & reco-

gnoistre. Et de telles inclinations naturelles, le corps en retient volontiers quelque ply, sans nostre sçeu & consentement. C'estoit vne affetterie consente de sa beauté, qui faisoit vn peu pancher la teste d'Alexandre sur vn costé, & qui rendoit le parler d'Alcibiades mol & gras : Iulius Cæsar se grattoit la teste d'un doigt, qui est la contenance d'un homme remply de pensemens penibles : & Cicero, ce me semble, auoit accoustumé de rincer le nez, qui signifie vn naturel mocqueur. Tels mouuemens peuuent arriuer imperceptiblement en nous. Il y en a d'autres artificiels, dequoy ie ne parle point. Comme les salutations, & reuerences, par où on acquiert le plus souuent à tort, l'honneur d'estre bien humble & courtois : on peut estre humble de gloire. Je suis assez prodigue de bonnetades, notamment en esté, & n'en reçois iamais sans reuence, de quelque qualité d'hommes que ce soit, s'il n'est à mes gages. Je desirasse d'aucuns Princes que ie cognois, qu'ils en fussent plus espargnans & iustes dispensateurs ; car ainsin indistinctement espanduës, elles ne portent plus de coup : si elles sont sans esgard ; elles sont sans effect. Entre les contenances desreglées, n'oublions pas la morgue de l'Empereur Constantius, qui en publicq tenoit tousiours la teste droicte, sans la contourner ou flechir ny çà ny là, non pas seulement pour regarder ceux qui le saluoient à costé, ayant le corps planté immobile, sans se laisser aller au branle de son coche, sans ofer ny cracher, ny se moucher, ny essuyer le visage deuant les gens. Je ne sçay si ces gestes qu'on remerquoit en moy, estoient de cette premiere condition, & si à la verité i'auoy quelque occulte propension à ce vice ; comme il peut bien estre : & ne puis pas respondre des branles du corps. Mais quant aux

branfles de l'ame, ie veux icy confeffer ce que i'en fens. Il y a deux parties en cette gloire : ſçauoir eſt, de ſ'eſtimer trop, & n'eſtimer pas aſſez autrui. Quant à l'vne, il me ſemble premierement, ces conſiderations deuoir eſtre miſes en compte. Ie me ſens preſſé d'vne erreur d'ame, qui me deſplaist, & comme inique, & encore plus comme importune. L'eſſaye à la corriger : mais l'arracher ie ne puis. C'eſt, que ie diminue du iuſte prix des choſes, que ie poſſede : & hauſſe le prix aux choſes, d'autant qu'elles ſont eſtrangeres, abſentes, & non miennes. Cette humeur ſ'eſpand bien loing. Comme la prerogatiue de l'autorité fait, que les maris regardent les femmes propres d'un vicieux deſdein, & pluſieurs peres leurs enfans : ainſi fay-ie : & entre deux pareils ouurages, poiſeroy tousiours contre le mien. Non tant que la ialouſie de mon auancement & amendement trouble mon iugement, & m'empêche de me ſatisfaire, comme que, d'elle meſme la maiſtriſe engendre méſpris de ce qu'on tient & regente. Les polices, les mœurs loingtaines me flattent, & les langues. Et m'apperçoy que le Latin me pippe par la faueur de ſa dignité, au delà de ce qui luy appartient, comme aux enfans & au vulgaire. L'œconomie, la maiſon, le cheual de mon voiſin, en egale valeur, vault mieux que le mien, de ce qu'il n'eſt pas mien. Dauantage, que ie ſuis tres-ignorant en mon faiët : i'admire l'aſſurance & promeſſe, que chacun a de ſoy : là où il n'eſt quaſi rien que ie ſçache ſçauoir, ny que i'oſe me reſpondre pouuoir faire. Ie n'ay point mes moyens en propoſition & par eſtat : & n'en ſuis inſtruit qu'apres l'effect : autant douteux de ma force que d'vne autre force. D'où il aduient, ſi ie rencontre louablement en vne beſongne, que ie le donne plus à ma fortune, qu'à

mon industrie : d'autant que ie les desseigne toutes au hazard & en crainte. Pareillement i'ay en general cecy, que de toutes les opinions que l'ancienneté a eues de l'homme en gros, celles que i'embrasse plus volontiers, & auxquelles ie m'attache le plus, ce sont celles qui nous mesprisent, auilissent, & aneantissent le plus. La philosophie ne me semble iamais auoir si beau ieu, que quand elle combat nostre présomption & vanité; quand elle recognoist de bonne foy son irresolution, sa foiblesse, & son ignorance. Il me semble que la mere nourrice des plus fausses opinions, & publiques & particulieres, c'est la trop bonne opinion que l'homme a de soy. Ces gens qui se perchent à cheuauchons sur l'epicycle de Mercure, qui voient si auant dans le ciel, ils m'arrachent les dents : car en l'estude que ie fay, duquel le subiect, c'est l'homme, trouuant vne si extreme varieté de iugemens, vn si profond labyrinthe de difficultez les vnes sur les autres, tant de diuersité & incertitude, en l'eschole mesme de la sapience : vous pouuez penser, puis que ces gens là n'ont peu se refoudre de la cognoissance d'eux mesmes, & de leur propre condition, qui est continuellement presente à leurs yeux, qui est dans eux; puis qu'ils ne sçauent comment branle ce qu'eux mesmes font branler, ny comment nous peindre & deschiffrer les ressorts qu'ils tiennent & manient eux mesmes, comment ie les croirois de la cause du flux & reflux de la riuere du Nil. La curiosité de cognoistre les choses, a esté donnée aux hommes pour fleau, dit la sainte Esriture. Mais pour venir à mon particulier, il est bien difficile, ce me semble, qu'aucun autre s'estime moins, voire qu'aucun autre m'estime moins, que ce que ie m'estime. Je me tien de la commune sorte, sauf en

ce que ie m'en tiens : coupable des deffectuosités plus basses & populaires : mais non defaduouées, non excusées. Et ne me prise seulement que de ce que ie sçay mon prix. S'il y a de la gloire, elle est infuse en moy superficiellement, par la trahison de ma complexion : & n'a point de corps, qui comparoisse à la veuë de mon iugement. I'en fais arrosé, mais non pas teint. Car à la verité, quant aux effects de l'esprit, en quelque façon que ce soit, il n'est iamais party de moy chose qui me contentast. Et l'approbation d'autrui ne me paye pas. I'ay le iugement tendre & difficile, & notamment en mon endroit. Ie me sens flotter & fleschir de foiblesse. Ie n'ay rien du mien, dequoy satisfaire mon iugement : i'ay la veue assez claire & reglée, mais à l'ouurer elle se trouble : comme i'essaye plus euidemment en la poésie. Ie l'ayme infiniment ; ie me cognois assez aux ouurages d'autrui : mais ie fay à la verité l'enfant quand i'y veux mettre la main ; ie ne me puis souffrir. On peut faire le sot par tout ailleurs, mais non en la poésie.

mediocribus esse poetis

Non dij, non hominēs, non cōcessere columnæ.

Pleust à Dieu que cette sentence se trouuast au front des boutiques de tous noz imprimeurs, pour en deffendre l'entrée à tant de versificateurs.

verum

Nil securius est malo poeta.

Que n'auons nous de tels peuples ? Dionysius le pere n'estimoit rien tant de foy, que sa poésie. A la saison des jeux Olympiques, avec des chariots surpassant tous autres en magnificence, il enuoya aussi des poètes

& des musiciens, pour presenter ses vers, avec des tentes & pauillons dorez & tapissez royalement. Quand on vint à mettre ses vers en auant, la faueur & excellence de la prononciation attira sur le commencement l'attention du peuple. Mais quand par apres il vint à poiser l'ineptie de l'ouurage, il entra premierement en mespris : & continuant d'aigrir son iugement, il se ietta tantost en furie, & courut abbattre & deschirer par despit tous ces pauillons. Et ce que ces chariots ne feirent non plus, rien qui vaille en la course, & que la nauiure, qui rapportoit ses gents, faillit la Sicile, & fut par la tempeste pouffée & fraccassée contre la coste de Tarante : il tint pour certain que c'estoit l'ire des Dieux irritez comme luy, contre ce mauuais poëme : & les mariniers mesmes, eschappez du naufrage, alloient secondant l'opinion de ce peuple : à laquelle, l'oracle qui predict sa mort, sembla aussi aucunement soubscrire. Il portoit, que Dionysius feroit pres de sa fin, quand il auroit vaincu ceux qui vaudroyent mieux que luy. Ce qu'il interpreta des Carthaginois, qui le surpassoyent en puissance. Et ayant affaire à eux, gauchissoit souuent la victoire, & la temperoit, pour n'encourir le sens de cette prediction. Mais il l'entendoit mal : car le Dieu marquoit le temps de l'aduantage, que par faueur & iniustice il gaigna à Athenes sur les poëtes tragiques, meilleurs que luy : ayant fait iouer à l'enuy la sienne, intitulée les Leneïens. Soudain apres laquelle victoire, il trespassa : & en partie pour l'excessiue ioye, qu'il en conceut. Ce que ie treuve excusable du mien, ce n'est pas de foy, & à la verité : mais c'est à la comparaison d'autres choses pires, auxquelles ie voy qu'on donne credit. Je suis enuieux du bon-heur de ceux, qui se sçauent resiouyr & grati-

fier en leur besongne; car c'est vn moyen ayfé de se donner du plaisir, puis qu'on le tire de foy-mesmes. Specialement s'il y a vn peu de fermeté en leur opiniastrife. Ie scay vn poëte, à qui fort & foible, en foulle & en chambre, & le ciel & la terre, crient qu'il n'y entend guere. Il n'en rabat pour tout cela rien de la mesure à quoy il s'est taillé. Tousiours recommence, tousiours reconsulte : & tousiours persiste, d'autant plus ahurté en son aduis, qu'il touche à luy seul, de le maintenir. Mes ouurages, il s'en faut tant qu'ils me rient, qu'autant de fois que ie les retafte, autant de fois ie m'en despite.

*Cùm relego, scripsisse pudet, quia plurima cerno,
Me quoque qui feci, iudice, digna lini.*

I'ay tousiours vne idée en l'ame, qui me presente vne meilleure forme, que celle que i'ay mis en besongne, mais ie ne la puis saisir ny exploicter. Et cette idée mesme n'est que du moyen estage. L'argumente par là, que les productions de ces riches & grandes ames du temps passé, font bien loing au delà de l'extreme estenduë de mon imagination & souhaiët. Leurs esclris ne me satisfont pas seulement & me remplissent, mais ils m'estonnent & transissent d'admiration. Ie iuge leur beauté, ie la voy, sinon iusques au bout, au moins si auant qu'il m'est impossible d'y aspirer. Quoy que i'entreprenne, ie doibs vn sacrifice aux Graces, comme dit Plutarque de quelqu'un, pour practiquer leur faueur.

*si quid enim placet,
Si quid dulce hominum sensibus influit,
Debentur lepidis omnia Gratiis.*

Elles m'abandonnent par tout. Tout est grossier chez moy, il y a faute de poliffure & de beauté. Je ne fçay faire valoir les choses pour le plus que ce qu'elles valent. Ma façon n'ayde rien à la matiere. Voyla pourquoy il me la faut forte, qui aye beaucoup de prise, & qui luyse d'elle mesme. Quand i'en faisi des populaires & plus gayes, c'est pour me suiure, moy, qui n'aime point vne sagesse ceremonieuse & triste, comme fait le monde : & pour m'egayer, non pour egayer mon stile, qui les veut plustost graues & seueres. Aumoins si ie doy nommer stile, vn parler informe & sans regle : vn iargon populaire, & vn proceder sans definition, sans partition, sans conclusion, trouble, à la façon de celuy d'Amasius & de Rabirius. Je ne fçay ny plaire, ny resiouyr, ny chatouiller. Le meilleur compte du monde se seche entre mes mains, & se ternit. Je ne fçay parler qu'en bon escient. Et suis du tout desnudé de cette facilité, que ie voy en plusieurs de mes compagnons, d'entretenir les premiers venus, & tenir en haleine toute vne troupe, ou amuser sans se lasser, l'oreille d'un Prince, de toute sorte de propos ; la matiere ne leur faillant iamais, pour cette grace qu'ils ont de sçauoir employer la premiere venue, & l'accommoder à l'humeur & portée de ceux à qui ils ont affaire. Les Princes n'ayment guere les discours fermes, ny moy à faire des comptes. Les raisons premieres & plus aisées, qui sont communément les mieux prinſes, ie ne fçay pas les employer. Mauuais prescheur de commune. De toute matiere ie dy volontiers les plus extremes choses, que i'en fçay. Cicero estime, qu'és traictez de la philosophie, le plus difficile membre soit l'exorde. S'il est ainsi, ie me prens à la conclusion sagement. Si faut-il sçauoir relascher la corde à

toute sorte de tons : & le plus aigu est celuy qui vient le moins souuent en ieu. Il y a pour le moins autant de perfection à releuer vne chose vuide, qu'à en soustenir vne poissante. Tantost il faut superficiellement manier les choses, tantost les profonder. Je sçay bien que la plus part des hommes se tiennent en ce bas estage, pour ne conceuoir les choses que par cette premiere escorfe. Mais ie sçay aussi que les plus grands maistres, & Xenophon & Platon, on les void souuent se relascher à cette basse façon, & populaire, de dire & traiter les choses, la soustenans des graces qui ne leur manquent iamais. Au demeurant mon langage n'a rien de facile & fluide : il est aspre, ayant ses dispositions libres & desreglées. Et me plaist ainsi; sinon par mon iugement, par mon inclination. Mais ie sens bien que par fois ie m'y laisse trop aller, & qu'à force de vouloir euitier l'art & l'affection, i'y retombe d'une autre part ;

*breuis esse laboro,
Obscurus fio.*

Platon dit, que le long ou le court, ne sont proprietés qui ostent ny qui donnent prix au langage. Quand i'entreprendrois de suiure cet autre stile æquable, vny & ordonné, ie n'y sçaurois aduenir. Et encore que les coupures & cadences de Saluste reuiennent plus à mon humeur, si est-ce que ie treuve Cæsar & plus grand, & moins aisé à représenter. Et si mon inclination me porte plus à l'imitation du parler de Senèque, ie ne laisse pas d'estimer dauantage celuy de Plutarque. Comme à taire, à dire aussi, ie suy tout simplement ma forme naturelle. D'où c'est à l'aduanture que ie puis plus, à parler qu'à escrire.

Le mouuement & action animent les parolles, notamment à ceux qui se remuent brusquement, comme ie fay, & qui s'eschauffent. Le port, le visage, la voix, la robbe, l'affiette, peuuent donner quelque prix aux choses, qui d'elles mesmes n'en ont guere, comme le babil. Messala se plaint en Tacitus de quelques accoustremens estroits de son temps, & de la façon des bancs où les orateurs auoient à parler, qui affoiblissoient leur eloquence. Mon langage François est alteré, & en la prononciation & ailleurs, par la barbarie de mon creu. Je ne vis iamais homme des contrées de deçà, qui ne sentist bien euidemment son ramage, & qui ne blessast les oreilles qui sont pures Françoises. Si n'est-ce pas pour estre fort entendu en mon Perigourdin : car ie n'en ay non plus d'usage que de l'Allemand; & ne m'en chault gueres. C'est vn langage, comme sont autour de moy d'une bande & d'autre, le Poiteuin, Xaintongeois, Angoulemoisin, Lymosin, Auvergnat, brode, trainant, espoiré. Il y a bien au dessus de nous, vers les montagnes, vn Gascon, que ie treuve singulierement beau, sec, bref, signifiant, & à la verité vn langage malle & militaire, plus qu'aucun autre, que j'entende : autant nerueux, & puissant, & pertinent, comme le François est gracieux, delicat, & abundant. Quant au Latin, qui m'a esté donné pour maternel, j'ay perdu par desaccoustumance, la promptitude de m'en pouuoir seruir à parler : oui, & à escrire, en quoy autrefois ie me faisoys appeller maistre Iean. Voylla combien peu ie vaux de ce costé là. La beauté est vne piece de grande recommandation au commerce des hommes. C'est le premier moyen de conciliation des vns aux autres; & n'est homme si barbare & si rechigné, qui ne se sente aucunement frappé de sa douceur. Le corps a

vne grand'part à nostre estre, il y tient vn grand rang : ainsi sa structure & composition sont de bien iuste consideration. Ceux qui veulent desprendre noz deux pieces principales, & les sequestrer l'vne de l'autre, ils ont tort. Au rebours, il les faut r'accoupler & reioindre. Il faut ordonner à l'ame, non de se tirer à quartier, de s'entretenir à part, de mespriser & abandonner le corps (aussi ne le scauroit elle faire que par quelque singerie contrefaicté) mais de se r'allier à luy, de l'embrasser, le cherir, luy assister, le contreroller, le conseiller, le redresser, & ramener quand il fouruoie; l'espouser en somme, & luy seruir de mary : à ce que leurs effects ne paroissent pas diuers & contraires, ains accordans & vni-formes. Les Chrestiens ont vne particuliere instruction de cette liaison, car ils scauent, que la iustice diuine embrassé cette societé & ioincture du corps & de l'ame, iusques à rendre le corps capable des recompenses eternelles : & que Dieu regarde agir tout l'homme, & veut qu'entier il reçoie le chastiment. ou le loyer, selon ses demerites. La secte Peripatetique, de toutes sectes la plus sociable, attribue à la sagesse ce seul soing, de pouruoir & procurer en commun, le bien de ces deux parties associées : & montre les autres sectes, pour ne s'estre assez attachées à la consideration de ce meslange, s'estre partializées, cette-cy pour le corps, cette autre pour l'ame, d'vne pareille erreur : & auoir escarté leur subiect, qui est l'homme; & leur guide, qu'ils aduoient en general estre Nature. La premiere distinction, qui aye esté entre les hommes, & la premiere consideration, qui donna les præminences aux vns sur les autres, il est vray-semblable que ce fut l'aduantage de la beauté.

*agros diuisere atque dedere
Pro facie cuiusque & viribus ingenioque :
Nam facies multum valuit, virisque vigeant.*

Orie fuis d'une taille un peu au dessous de la moyenne. Ce deffaut n'a pas seulement de la laideur, mais encore de l'incommodité : à ceux mesmement, qui ont des commandements & des charges : car l'autorité que donne une belle presence & majesté corporelle, en est à dire. C. Marius ne receuoit pas volontiers des soldats, qui n'eussent six pieds de hauteur. Le Courtisan a bien raison de vouloir pour ce Gentilhomme qu'il dresse, une taille commune, plustost que toute autre : & de refuser pour luy, toute estrangeté, qui le face montrer au doigt. Mais de choisir, s'il faut à cette mediocrité, qu'il soit plustost au deçà, qu'au delà d'icelle, ie ne le ferois pas, à un homme militaire. Les petits hommes, dit Aristote, sont bien iolis, mais non pas beaux : & se cognoist en la grandeur, la grande ame, comme la beauté, en un grand corps & hault. Les Æthiopes & les Indiens, dit-il, elisants leurs Roys & Magistrats, auoyent esgard à la beauté & procerité des personnes. Ils auoient raison : car il y a du respect pour ceux qui le suiuent, & pour l'ennemy de l'effroy, de voir à la teste d'une troupe, marcher un chef de belle & riche taille :

*Ipse inter primos præstanti corpore Turnus
Vertitur, arma tenens, & toto vertice supra est.*

Nostre grand Roy diuin & celeste, duquel toutes les circonstances. doiuent estre remerquées avec soing, religion & reuerence, n'a pas refusé la recommandation corporelle, *speciosus forma præ filiis hominum*. Et Platon avec la temperance & la fortitude, desire la

beauté aux conseruateurs de sa republique. C'est vn grand despit qu'on s'adresse à vous parmy voz gens, pour vous demander où est Monsieur : & que vous n'ayez que le reste de la bonnetade, qu'on fait à vostre barbier ou à vostre secretaire. Comme il aduint au pauure Philopœmen : estant arriué le premier de sa troupe en vn logis, où on l'attendoit, son hostesse, qui ne le cognoissoit pas, & le voyoit d'assez mauuaise mine, l'employa d'aller vn peu aider à ses femmes à puiser de l'eau, ou attiser du feu, pour le seruice de Philopœmen. Les Gentils-hommes de sa suite estans arriuez, & l'ayants surpris embefongné à cette belle vacation, car il n'auoit pas failly d'obeir au commandement qu'on luy auoit fait, luy demanderent ce qu'il faisoit-là : Je paie, leur respondit-il, la peine de ma laideur. Les autres beautez, sont pour les femmes : la beauté de la taille, est la seule beauté des hommes. Où est la petiteffe, ny la largeur & rondeur du front, ny la blancheur & douceur des yeux, ny la mediocre forme du nez, ny la petiteffe de l'oreille, & de la bouche, ny l'ordre & blancheur des dents, ny l'espaisseur bien vnüe d'une barbe brune à escorce de chataigne, ny le poil releué, ny la iuste proportion de teste, ny la fraischeur du teint, ny l'air du visage agreable, ny vn corps sans senteur, ny la iuste proportion de membres, peuuent faire vn bel homme. l'ay au demeurant, la taille forte & ramassée, le visage, non pas gras, mais plein, la complexion entre le iouial & le melancholique, moyennement sanguine & chaude,

Vnde rigent fetis mihi crura, & pectora villis :

la santé, forte & allegre, iusques bien auant en mon

aage, rarement troublée par les maladies. J'estois tel, car ie ne me confidere pas à cette heure, que ie suis engagé dans les auenues de la vieillesse, ayant pieça franchy les quarante ans.

*minutatim vires & robur adultum
Frangit, & in partem peiorem liquitur etas.*

Ce que ie seray dorefnauant, ce ne sera plus qu'un demy estre : ce ne sera plus moy. Je m'eschappe tous les iours, & me defrobbe à moy :

Singula de nobis anni prædantur euntes.

D'adresse & de disposition, ie n'en ay point eu ; & si suis fils d'un pere disposé, & d'une allegresse qui luy dura iusques à son extreme vieillesse. Il ne trouua guere homme de sa condition, qui s'egalast à luy en tout exercice de corps : comme ie n'en ay trouué guere aucun, qui ne me surmontast ; sauf au courir, en quoy j'estoy des mediocres. De la musique, ny pour la voix, que j'y ay tres-inepte, ny pour les instrumens, on ne m'y a iamais sceu rien apprendre. A la danse, à la paulme, à la lûte, ie n'y ay peu acquerir qu'une bien fort legere & vulgaire suffisance : à nager, à escrimer, à voltiger, & à saulter, nulle du tout. Les mains, ie les ay si gourdes, que ie ne sçay pas escrire seulement pour moy ; de façon, que ce que j'ay barbouillé, j'ayme mieux le refaire que de me donner la peine de le demesler, & ne ly guere mieux. Je me sens poiser aux escoutans : autrement bon clerc. Je ne sçay pas clorre à droit une lettre, ny ne sçeuiz iamais tailler plume, ny trancher à table, qui vaille, ny equipper un cheual de son harnois, ny porter à point un oyseau, & le lascher :

ny parler aux chiens, aux oyseaux, aux cheuaux. Mes conditions corporelles sont en somme tresbien accordantes à celles de l'ame, il n'y a rien d'allegre : il y a seulement vne vigueur pleine & ferme. Je dure bien à la peine, mais i'y dure, si ie m'y porte moy-mesme, & autant que mon desir m'y conduit :

Molliter austerum studio fallente laborem.

Autrement, si ie n'y suis alleché par quelque plaisir, & si i'ay autre guide que ma pure & libre volonté, ie n'y vaults rien. Car i'en suis là, que fauf la fanté & la vie, il n'est chose pourquoy ie vueille ronger mes ongles, & que ie vueill' acheter au prix du tourment d'esprit, & de la contrainte :

tanti mihi non fit opaci

Omnis arena Tagi, quòdque in mare voluitur aurum.

Extremement oisif, extremement libre, & par nature & par art. Je presteroy aussi volontiers mon sang, que mon foing. I'ay vne ame libre & toute sienne, accoustumée à se conduire à sa mode. N'ayant eu iufques à cett' heure ny commandant ny maistre forcé, i'ay marché aussi auant, & le pas qu'il m'a pleu. Cela m'a amolli & rendu inutile au seruice d'autrui, & ne m'a fait bon qu'à moy. Et pour moy, il n'a esté besoin de forcer ce naturel poissant, paresseux & fay-neant. Car m'estant trouué en tel degré de fortune dès ma naissance, que i'ay eu occasion de m'y arrester : (vne occasion pourtant, que mille autres de ma cognoissance eussent prinse, pour planche plustost, à se passer à la queste, à l'agitation & inquietude) ie n'ay rien cherché, & n'ay aussi rien pris :

Non agimur tumidis ventis Aquilone secundo,

*Non tamen aduersis ætatem ducimus æstis :
Viribus, ingenio, specie, virtute, loco, re,
Extremi primorum, extremis vsque priores.*

Je n'ay eu besoin que de la suffisance de me contenter. Qui est toutesfois vn reglement d'ame, à le bien prendre, esgalement difficile en toute sorte de condition, & que par vsage, nous voyons se trouuer plus facilement encores en la disette qu'en l'abondance. D'autant, à l'aduanture, que selon le cours de noz autres passions, la faim des richesses est plus aiguësée par leur vsage, que par leur besoin : & la vertu de la moderation, plus rare, que celle de la patience. Et n'ay eu besoin que de iouyr doucement des biens que Dieu par sa liberalité m'auoit mis entre mains. Je n'ay gousté aucune sorte de travail ennuyeux. Je n'ay eu guere en maniemment que mes affaires : ou, si i'en ay eu, ç'a esté en condition de les manier à mon heure & à ma façon : commis par gents, qui s'en foyent à moy, & qui ne me pressoyent pas, & me cognoissoient. Car encore tirent les experts, quelque seruice d'un cheual restif & pouffif. Mon enfance mesme a esté conduite d'une façon molle & libre, & lors mesme exempte de subjection rigoureuse. Tout cela m'a donné vne complexion delicate & incapable de sollicitude ; iusques là, que i'ayme qu'on me cache mes pertes, & les desordres qui me touchent. Au chapitre de mes mises, ie loge ce que ma nonchalance me couste à nourrir & entretenir :

*hæc nempe supersunt,
Quæ dominum fallunt, quæ profint furibus.*

I'ayme à ne sçauoir pas le compte de ce que i'ay, pour sentir moins exactement ma perte. Je prie ceux

qui vivent avec moy, où l'affection leur manque, & les bons effects, de me pippet & payer de bonnes apparances. A faute d'auoir assez de fermeté, pour souffrir l'importunité des accidens contraires, auxquels nous sommes subjects, & pour ne me pouoir tenir tendu à regler & ordonner les affaires, ie nourris autant que ie puis en moy cett' opinion : m'abandonnant du tout à la Fortune, de prendre toutes choses au pis; & ce pis là, me refoudre à le porter doucement & patiemment. C'est à cela seul, que ie traualle, & le but auquel i'achemine tous mes discours. A vn danger, ie ne songe pas tant comment i'en eschapperay, que combien peu il importe que i'en eschappe. Quand i'y demeurerois, que seroit ce? Ne pouuant regler les euenemens, ie me regle moy-mesme : & m'applique à eux, s'ils ne s'appliquent à moy. Je n'ay guere d'art pour sçauoir gauchir la Fortune, & luy eschapper, ou la forcer; & pour dresse & conduire par prudence les choses à mon point. I'ay encore moins de tolerance, pour supporter le soing aspre & penible qu'il faut à cela. Et la plus penible assiete pour moy, c'est estre suspens és choses qui pressent, & agité entre la crainte & l'esperance. Le deliberer, voire és choses plus legeres, m'importune. Et sens mon esprit plus empesché à souffrir le bransle, & les secouffes diuerses du doute, & de la consultation, qu'à se rassoir & refoudre à quelque party que ce soit, apres que la chance est liurée. Peu de passions m'ont troublé le sommeil, mais des deliberations, la moindre me le trouble. Tout ainsi que des chemins, i'en euite volontiers les costez pendans & gliffans, & me iette dans le battu, le plus bouëux, & enfondrant, d'où ie ne puisse aller plus bas, & y cherche seurté. Aussi i'ayme les malheurs

tous purs, qui ne m'exercent & tracassent plus, apres l'incertitude de leur rabillage: & qui du premier saut me poussent droitement en la souffrance.

dubia plus torquent mala.

- Aux euenemens, ie me porte virilement, en la conduite puerilement. L'horreur de la cheute me donne plus de fiebure que le coup. Le ieu ne vaut pas la chandelle. L'auaritieux a plus mauuais conte de sa passion, que n'a le pauvre: & le ialoux, que le cocu. Et y a moins de mal souuent, à perdre sa vigne, qu'à la plaider. La plus basse marche, est la plus ferme: c'est le siege de la constance. Vous n'y auez besoing que de vous. Elle se fonde là, & appuye toute en soy. Cet exemple, d'un Gentilhomme que plusieurs ont cogneu, a il pas quelque air philosophique? Il se maria bien auant en l'aage, ayant passé en bon compaignon sa ieunesse, grand diseur, grand gaudisseur. Se souuenant combien la matiere de cornardise luy auoit donné dequoy parler & se moquer des autres: pour se mettre à couuert, il espousa vne femme, qu'il print au lieu, où chacun en trouue pour son argent, & dressa avec elle ses alliances: Bon iour putain, bon iour cocu: & n'est chose dequoy plus souuent & ouuertement, il entretint chez luy les furuenans, que de ce sien dessein: par où il bridait les occultes caquets des moqueurs, & esmouffoit la pointe de ce reproche. Quant à l'ambition, qui est voisine de la presumption, ou fille plustost, il eust fallu pour m'aduancer, que la Fortune me fust venu querir par le poing: car de me mettre en peine pour vn' esperance incertaine, & me soubmettre à toutes les difficultez, qui accompagnent ceux qui cherchent à se pousser

en credit, sur le commencement de leur progresz,
ne l'eusse sçeu faire,

Spem pretio non emo.

Ie m'attache à ce que ie voy, & que ie tiens, &
m'eslongne guere du port :

Alter remus aquas, alter tibi radat arenas.

Et puis on arriue peu à ces auancements, qu'
hazardant premierement le sien. Et ie suis d'adu
que si ce qu'on a, suffit à maintenir la condition
laquelle on est nay, & dressé, c'est folie d'en lascer
la prise, sur l'incertitude de l'augmenter. Celuy
qui la Fortune refuse dequoy planter son pie
& establir vn estre tranquille & reposé, il est pard
nable s'il iette au hazard ce qu'il a, puis qu'ai
comme ainsi la necessité l'enuoye à la queste.

Capienda rebus in malis præcepta via est.

Et l'excuse plustost vn cabdet, de mettre sa legitim
au vent, que celuy à qui l'honneur de la maison
en charge, qu'on ne peut point voir necessiteux qu'
sa faute. J'ay bien trouué le chemin plus coi
& plus aisé, avec le conseil de mes bons amis
temps passé, de me défaire de ce desir, & de
tenir coy :

Cui fit conditio dulcis, sine puluere palma.

Iugeant aussi bien sainement, de mes forces, qu'el
n'estoient pas capables de grandes choses. Et
souuenant de ce mot du feu Chancelier Oliui

que les François semblent des guenons, qui vont grim pant contremont vn arbre, de branche en branche, & ne cessent d'aller, iusques à ce qu'elles soyent arriuées à la plus haute branche : & y montrent le cul, quand elles y font.

*Turpe est quòd nequeas capiti committere pondus,
Et pressum inflexo mox dare terga genu.*

Les qualitez mesmes qui font en moy non reprochables, ie les trouuois inutiles en ce siecle. La facilité de mes mœurs, on l'eust nommée lascheté & foiblesse : la foy & la conscience s'y feussent trouuées scrupuleuses & superstitieuses : la franchise & la liberté, importune, inconsiderée & temeraire. A quelque chose fert le mal'heur. Il fait bon naistre en vn siecle fort depraué : car par comparaison d'autrui, vous estes estimé vertueux à bon marché. Qui n'est que parricide en nos iours & sacrilege, il est homme de bien & d'honneur :

*Nunc si depositum non inficiatur amicus,
Si reddat veterem cum tota ærugine follem,
Prodigiosa fides, & Thuscis digna libellis,
Quæque coronata lustrari debeat agna.*

Et ne fut iamais temps & lieu, où il y eust pour les Princes loyer plus certain & plus grand, proposé à la bonté, & à la iustice. Le premier qui s'auisera de se pouffer en faueur, & en credit par cette voye là, ie suis bien deceu si à bon compte il ne deuance ses compaignons. La force, la violence, peuuent quelque chose : mais non pas tousiours tout. Les marchans, les iuges de village, les artisans, nous les voyons aller à pair de vaillance & science mili-

taire, avec la noblesse. Ils rendent des combats honorables & publiques & prieuz : ils battent, ils defendent villes en noz guerres presentes. Vn Prince estouffe sa recommandation emmy cette presse. Qu'il reluise d'humanité, de verité, de loyauté, de temperance, & sur tout de iustice : marques rares, inconnuës & exilées. C'est la seule volonté des peuples dequoy il peut faire ses affaires : & nulles autres qualitez ne peuuent attirer leur volonté comme celles là : leur estants les plus viles. *Nihil est tam populare quàm bonitas*. Par cette proportion ie me fusse trouué grand & rare : comme ie me trouue pygmée & populaire, à la proportion d'aucuns siecles passez : ausquels il estoit vulgaire, si d'autres plus fortes qualitez n'y konkurroient, de veoir vn homme moderé en ses vengeancees, mol au ressentiment des offences, religieux en l'obseruance de sa parolle : ny double ny souple, ny accommodant sa foy à la volonté d'autrui & aux occasions. Plustost lairroisie rompre le col aux affaires, que de plier ma foy pour leur seruice. Car quant à cette nouvelle vertu de faintise & dissimulation, qui est à cett' heure si fort en credit, ie la hay capitalement : & de tous les vices, ie n'en trouue aucun qui tesmoigne tant de lascheté & basseffe de cœur. C'est vn' humeur coïarde & seruile de s'aller desguiser & cacher sous vn masque, & de n'oser se faire veoir tel qu'on est. Par là nos hommes se dressent à la perfidie. Estans duiets à produire des parolles fauces, ils ne font pas conscience d'y manquer. Vn cœur genereux ne doit point desmentir ses pensées : il se veut faire voir iusques au dedans : tout y est bon, ou au moins, tout y est humain. Aristote estime office de magnanimité, hayr & aymer à descouuert : iuger, parler

avec toute franchise : & au prix de la verité, ne faire cas de l'approbation ou reprobation d'autrui. Apollonius disoit que c'estoit aux serfs de mentir, & aux libres de dire verité. C'est la premiere & fondamentale partie de la vertu. Il la faut aymer pour elle mesme. Celuy qui dit vray, par ce qu'il y est d'ailleurs obligé, & par ce qu'il sert : & qui ne craind point à dire mensonge, quand il n'importe à personne, il n'est pas veritable suffisamment. Mon ame de sa complexion refuit la menterie, & haït mesme à la penser. L'ay vn' interne vergongne & vn remors piquant, si par fois elle m'eschappe, comme par fois elle m'eschappe, les occasions me surprénans & agitans impremeditement. Il ne faut pas tousiours dire tout, car ce seroit sottise. Mais ce qu'on dit, il faut qu'il soit tel qu'on le pense : autrement, c'est meschanceté. Je ne sçay quelle commodité ils attendent de se faindre & contrefaire sans cesse : si ce n'est, de n'en estre pas creus, lors mesmes qu'ils disent verité. Cela peut tromper vne fois ou deux les hommes : mais de faire profession de se tenir couuert : & se vanter, comme ont fait aucuns de nos Princes, qu'ils ietteroient leur chemise au feu, si elle estoit participante de leurs vraies intentions, qui est vn mot de l'ancien Metellus Macedonicus : & qui ne sçait se faindre, ne sçait pas regner : c'est tenir aduertis ceux qui ont à les practiquer, que ce n'est que piperie & mensonge qu'ils disent. *Quo quis versutior & callidior est, hoc inuisior & suspectior, detracta opinione probitatis.* Ce seroit vne grande simpletse à qui se lairroit amuser ny au visage ny aux parolles de celuy, qui fait estat d'estre tousiours autre au dehors, qu'il n'est au dedans : comme faisoit Tibere. Et ne sçay quelle part telles gens

peuvent auoir au commerce des hommes, ne produisans rien qui soit receu pour comptant. Qui est desloyal enuers la verité, l'est aussi enuers le menfonge. Ceux qui de nostre temps ont considéré en l'establissement du deuoir d'un Prince, le bien de ses affaires seulement : & l'ont preferé au soing de sa foy & conscience, diroyent quelque chose à un Prince, de qui la Fortune auroit rengé à tel point les affaires, que pour tout iamais il les peust establir par un seul manquement & faute à sa parole. Mais il n'en va pas ainsi. On rechet souuent en pareil marché : on fait plus d'une paix, plus d'un traité en sa vie. Le gain, qui les conuie à la premiere desloyauté, & quasi tousiours il s'en presente, comme à toutes autres meschancetez : les sacrileges, les meurtres, les rebellions, les trahisons, s'entreprennent pour quelque espee de fruit : mais ce premier gain apporte infinis dommages suyuant : iettant ce Prince hors de tout commerce, & de tout moyen de negotiation par l'exemple de cette infidelité. Solyman de la race des Ottomans, race peu soigneuse de l'obseruance des promesses & paches, lors que de mon enfance, il fit descendre son armée à Otrante, ayant sceu que Mercurin de Gratinare, & les habitants de Castro, estoient détenus prisonniers, apres auoir rendu la place, contre ce qui auoit esté capitulé par ses gens avec eux, manda qu'on les relaschaft : & qu'ayant en main d'autres grandes entreprises en cette contrée là, cette desloyauté, quoy qu'elle eust apparence d'utilité presente, luy apporteroit pour l'aduenir, un descri & une defiance d'infini preiudice. Or de moy i'ayme mieux estre importun & indiscret, que flateur & dissimulé. l'aduouie qu'il se peut meller

quelque pointe de fierté, & d'opiniaftreté, à se tenir ainfin entier & ouuert comme ie suis sans consideration d'autrui. Et me semble que ie deuens vn peu plus libre, où il le faudroit moins estre : & que ie m'eschauffe par l'opposition du respect. Il peut estre aussi, que ie me laisse aller apres ma nature à faute d'art. Presentant aux grands cette mesme licence de langue, & de contenance que i'apporte de ma maison : ie sens combien elle decline vers l'indiscrétion & inciuilité. Mais outre ce que ie suis ainfi fait, ie n'ay pas l'esprit assez souple pour gauchir à vne prompte demande, & pour en eschapper par quelque destour : ny pour feindre vne verité, ny assez de memoire pour la retenir ainfi feinte : ny certes assez d'affurance pour la maintenir : & fais le braue par foiblesse. Parquoy ie m'abandonne à la nayfueté, & à tousiours dire ce que ie pense, & par complexion, & par dessein : laissant à la Fortune d'en conduire l'euenement. Aristippus disoit le principal fruit, qu'il eust tiré de la philosophie, estre, qu'il parloit librement & ouuertement à chacun. C'est vn outil de merueilleux seruice, que la memoire, & sans lequel le iugement fait bien à peine son office : elle me manque du tout. Ce qu'on me veut proposer, il faut que ce soit à parcelles : car de respondre à vn propos, où il y eust plusieurs diuers chefs, il n'est pas en ma puissance. Je ne sçauois receuoir vne charge sans tablettes. Et quand i'ay vn propos de consequence à tenir, s'il est de longue haleine, ie suis reduit à cette vile & miserable necessité, d'apprendre par cœur mot à mot ce que i'ay à dire : autrement ie n'auroy ny façon, ny affurance, estant en crainte que ma memoire vint à me faire vn mauuais tour. Mais ce moyen m'est

non moins difficile. Pour apprendre trois vers, il m'y faut trois heures. Et puis en vn propre ouurage la liberté & autorité de remuer l'ordre, de changer vn mot, variant sans cesse la matiere, la rend plus malaifée à arrefter en la memoire de son autheur. Or plus ie m'en defie, plus elle se trouble : elle me sert mieux par rencontre, il faut que ie la folicite nonchalamment : car si ie la presse, elle s'estonne : & depuis qu'ell' a commencé à chanceler, plus ie la fonde, plus elle s'empestre & embarrasse : elle me sert à son heure, non pas à la mienne. Cecy que ie sens en la memoire, ie le sens en plusieurs autres parties. Je fuis le commandement, l'obligation, & la contrainte. Ce que ie fais aysément & naturellement, si ie m'ordonne de le faire, par vne expresse & prescrite ordonnance, ie ne sçay plus le faire. Au corps mesme, les membres qui ont quelque liberté & iurisdiction plus particuliere sur eux, me refusent par fois leur obeyssance, quand ie les destine & attache à certain poinct & heure de seruice necessaire. Cette preordonnance contraincte & tyrannique les rebute : ils se croupissent d'effroy ou de despit, & se transissent. Autresfois estant en lieu, où c'est discourtoisie barbarefque, de ne respondre à ceux qui vous conuient à boire : quoy qu'on m'y traitast avec toute liberté, i'essaïay de faire le bon compaignon, en faueur des Dames qui estoient de la partie, selon l'vsage du pays. Mais il y eut du plaisir : car cette menasse & preparation, d'auoir à m'efforcer outre ma coustume, & mon naturel, m'estoupa de maniere le gosier, que ie ne sçeuз aualler vne seule goutte : & fus priué de boire, pour le besoing mesme de mon repas. Je me trouuay faoul & defalteré, par tant de breuuage que mon imagi-

nation auoit preoccupé. Cet effai& est plus apparent en ceux qui ont l'imagination plus vehemente & puissante : mais il est pourtant naturel : & n'est aucun qui ne s'en ressentent aucunement. On offroit à vn excellent archer condamné à la mort, de luy sauuer la vie, s'il vouloit faire voir quelque notable preuue de son art : il refusa de s'en essayer, craignant que la trop grande contention de sa volonté, luy fist fouruoyer la main, & qu'au lieu de sauuer sa vie, il perdist encore la reputation qu'il auoit acquise au tirer de l'arc. Vn homme qui pense ailleurs, ne faudra point, à vn pouffe pres, de refaire tousiours vn mesme nombre & mesure de pas, au lieu où il se promene : mais s'il y est avec attention de les mesurer & compter, il trouuera que ce qu'il faisoit par nature & par hazard, il ne le fera pas si exactement par dessein. Ma librairie, qui est des belles entre les librairies de village, est assise à vn coin de ma maison : s'il me tombe en fantasie chose que i'y vueille aller chercher ou escrire, de peur qu'elle ne m'eschappe en trauerfant seulement ma cour, il faut que ie la donne en garde à quelqu'autre. Si ie m'enhardis en parlant, à me destourner tant soit peu, de mon fil, ie ne faux iamais de le perdre : qui fait que ie me tiens en mes discours, contrain&ct, sec, & resserré. Les gens, qui me seruent, il faut que ie les appelle par le nom de leurs charges, ou de leur pays : car il m'est tres-malaisé de retenir des noms. Ie diray bien qu'il a trois syllabes, que le son en est rude, qu'il commence ou termine par telle lettre. Et si ie durois à viure long temps, ie ne croy pas que ie n'oubliaffe mon nom propre, comme ont fait d'autres. Messala Coruinus fut deux ans n'ayant trace aucune de memoire. Ce qu'on dit aussi de

George Trapezonce. Et pour mon interest, ie rumine souuent, quelle vie c'estoit que la leur : & si sans cette piece, il me restera assez pour me soustenir avec quelque aisance. Et y regardant de pres, ie crains que ce defect, s'il est parfait, perde toutes les fonctions de l'ame.

Plenus rimarum sum, hac atque illac per fluo.

Il m'est adueni plus d'une fois, d'oublier le mot que j'auois trois heures au parauant donné ou receu d'un autre : & d'oublier où j'auoy caché ma bourse, quoy qu'en die Cicero. Je m'ayde à perdre, ce que ie ferre particulièrement. *Memoria certè non modò philosophiam, sed omnis vitæ vsum, omnesque artes, vna maxime continet.* C'est le receptacle & l'estuy de la science, que la memoire : l'ayant si deffaillante ie n'ay pas fort à me plaindre, si ie ne sçay guere. Je sçay en general le nom des arts, & ce dequoy ils traittent, mais rien au delà. Je feuillète les liures, ie ne les estudie pas. Ce qui m'en demeure, c'est chose que ie ne reconnoy plus estre d'autrui. C'est cela seulement, dequoy mon iugement a fait son profit : les discours & les imaginations, dequoy il s'est imbu. L'auteur, le lieu, les mots, & autres circonstances, ie les oublie incontinent. Et suis si excellent en l'oubliance, que mes escripts mesmes & compositions, ie ne les oublie pas moins que le reste. On m'allegue tous les coups à moy-mesme, sans que ie le sente. Qui voudroit sçauoir d'où sont les vers & exemples, que j'ay icy entassez, me mettroit en peine de le luy dire : & si ne les ay mendiez qu'és portes cognuës & fameuses : ne me contentant pas qu'ils fussent riches, s'ils ne venoient encore de

main riche & honorable : l'autorité y concurre quant & la raison. Ce n'est pas grande merueille si mon liure fuit la fortune des autres liures : & si ma memoire desempare ce que i'escry, comme ce que ie ly : & ce que ie donne, comme ce que ie reçoÿ. Outre le deffaut de la memoire, i'en ay d'autres, qui aydent beaucoup à mon ignorance. I'ay l'esprit tardif, & mouffe, le moindre nuage luy arreste sa poincte : en façon que, pour exemple, ie ne luy proposay iamais enigme si aisé, qu'il sceust desuelopper. Il n'est si vaine subtilité qui ne m'empefche. Aux ieux, où l'esprit a sa part, des échets, des cartes, des dames, & autres, ie n'y comprens que les plus grossiers traicts. L'apprehension, ie l'ay lente & embrouillée : mais ce qu'elle tient vne fois, elle le tient bien, & l'embrasse bien vniuersellement, estroitement & profondement, pour le temps qu'elle le tient. I'ay la veüe longue, saine & entiere, mais qui se lasse aisément au trauail, & se charge. A cette occasion ie ne puis auoir long commerce avec les liures, que par le moyen du seruice d'autrui. Le ieune Pline instruira ceux qui ne l'ont essayé, combien ce retardement est important à ceux qui s'adonnent à cette occupation. Il n'est point ame si chetifue & brutale, en laquelle on ne voye reluire quelque faculté particuliere : il n'y en a point de si enseuelie, qui ne face vne faillie par quelque bout. Et comment il aduienne qu'une ame aueugle & endormie à toutes autres choses, se trouue vifue, claire, & excellente, à certain particulier effect, il s'en faut enquerir aux maistres. Mais les belles ames, ce sont les ames vniuerselles, ouuertes, & prestes à tout : si non instruites, au moins instruifables. Ce que ie dy pour accuser la mienne. Car soit par foiblesse ou noncha-

lance (& de mettre à nonchaloir ce qui est à nos pieds, ce que nous auons entremains, ce qui regarde de plus pres l'usage de la vie, c'est chose bien esloignée de mon dogme) il n'en est point vne si inepte & si ignorante que la mienne, de plusieurs telles choses vulgaires, & qui ne se peuuent sans honte ignorer. Il faut que i'en conte quelques exemples. Je suis né & nourry aux champs, & parmy le labourage : i'ay des affaires, & du mesnage en main, depuis que ceux qui me deuançoient en la possession des biens que ie iouys, m'ont quitté leur place. Or ie ne sçay conter ny à get, ny à plume : la plupart de nos monnoyes ie ne les connoy pas : ny ne sçay la difference de l'un grain à l'autre, ny en la terre, ny au grenier, si elle n'est par trop apparente : ny à peine celle d'entre les choux & les laiëtues de mon iardin. Je n'entens pas seulement les noms des premiers outils du mesnage, ny les plus grossiers principes de l'agriculture, & que les enfans sçauent : moins aux arts mechaniques, en la trafique, & en la cognoissance des marchandises, diuersité & nature des fruiëts, de vins, de viandes : ny à dresseur vn oiseau, ny à medeciner vn cheual, ou vn chien. Et puis qu'il me faut faire la honte toute entiere, il n'y a pas vn mois qu'on me surprint ignorant dequoy le leuain seruoit à faire du pain ; & que c'estoit que faire cuuer du vin. On coniectura anciennement à Athenes, vne aptitude à la mathematique, en celuy à qui on voyoit ingenieusement agencer & fagotter vne charge de broffailles. Vrayement on tireroit de moy vne bien contraire conclusion : car qu'on me donne tout l'apprest d'une cuisine, me voila à la faim. Par ces traits de ma confession, on en peut imaginer d'autres à mes despens. Mais quel que ie

me face cognoître, pourueu que ie me face cognoître tel que ie suis, ie fay mon effect. Et si ne m'excuse pas, d'oser mettre par escrit des propos si bas & friuoles que ceux-cy. La bassesse du fuiet m'y contrainct. Qu'on accuse si on veut mon proiection, mais mon progresz, non. Tant y a que sans l'aduertissement d'autrui, ie voy assez le peu que tout cecy vaut & poise, & la folie de mon dessein. C'est prou que mon iugement ne se deffere point, duquel ce sont icy les essais.

*Nasutus sis vsque licet, sis denique nasus,
Quantum noluerit ferre rogatus Atlas :
Et possis ipsum tu deridere Latinum,
Non potes in nugas dicere plura meas,
Ipse ego quàm dixi : quid dentem dente iuuabit
Rodere? carne opus est, si satur esse velis.
Ne perdas operam, qui se mirantur, in illos
Virus habet, nos hæc nouimus esse nihil.*

Ie ne suis pas obligé à ne dire point de sottises, pourueu que ie ne me trompe pas à les cognoître. Et de faillir à mon escient, cela m'est si ordinaire, que ie ne faux guere d'autre façon, ie ne faux guere fortuitement. C'est peu de chose de prester à la temerité de mes humeurs les actions ineptes, puis que ie ne me puis pas deffendre d'y prester ordinairement les vicieuses. Ie vis vn iour à Barleduc, qu'on presentoit au Roy François second, pour la recommandation de la memoire de René Roy de Sicile, vn pourtrait qu'il auoit luy-mesmes fait de soy. Pourquoi n'est-il loisible de mesme à vn chacun, de se peindre de la plume, comme il se peignoit d'un creon? Ie ne veux donc pas oublier encor cette cicatrice, bien mal propre à produire en

public. C'est l'irresolution : defaut tref-incommode à la negociation des affaires du monde. Je ne ſçay pas prendre party és entreprinſes douteuſes :

Ne ſi, ne no, nel cor mi ſuona intero.

Je ſçay bien ſouſtenir vne opinion, mais non pas la choiſir. Par ce qu'és choſes humaines, à quelque bande qu'on panche, il ſe preſente force apparences, qui nous y confirment : & le philoſophe Chryſippus diſoit, qu'il ne vouloit apprendre de Zenon & Cleanthez ſes maiſtres, que les dogmes ſimplement : car quant aux preuues & raiſons, il en fourniroit aſſez de luy meſme. De quelque coſté que ie me tourne, ie me fournis touſiours aſſez de cauſe & de vray-ſemblance pour m'y maintenir. Ainſi l'arrete chez moy le doute, & la liberté de choiſir, iuſques à ce que l'occafion me preſſe. Et lors, à confeſſer la verité, ie iette le plus ſouuent la plume au vent, comme on dit, & m'abandonne à la mercy de la Fortune. Vne bien legere inclination & circonſtance m'emporte.

Dum in dubio eſt animus, paulo momento huc atque illuc impellitur.

L'incertitude de mon iugement, eſt ſi également balancée en la pluſpart des occurrences, que ie compromettrois volontiers à la deciſion du fort & des dets. Et remarque avec grande conſideration de noſtre foibleſſe humaine, les exemples que l'hiſtoire diuine meſme nous a laiſſé de cet vſage, de remettre à la Fortune & au hazard, la determination des eſlections és choſes douteuſes : *Sors cecidit ſuper Marthiam*. La raiſon humaine eſt vn glaiue double

& dangereux. Et en la main mesme de Socrates son plus intime & plus familier amy : voyez à quants de bouts c'est vn baston. Ainsi, ie ne suis propre qu'à fuyure, & me laisse aysement emporter à la foule. Je ne me fie pas assez en mes forces, pour entreprendre de commander, ny guider. Je suis bien ayse de trouuer mes pas traitez par les autres. S'il faut courre le hazard d'un choix incertain, j'ayme mieux que ce soit sous tel, qui s'affeure plus de ses opinions, & les espouse plus, que ie ne fay les miennes, ausquelles ie trouue le fondement & le plant glissant. Et si ne suis pas trop facile pourtant au change, d'autant que j'apperçois aux opinions contraires vne pareille foiblesse. *Ipsa consuetudo assentiendi periculosa esse videtur, & lubrica.* Notamment aux affaires politiques, il y a vn beau champ ouuert au branle & à la contestation.

*Iusta pari premitur veluti cum pondere libra,
Prona nec hac plus parte sedet, nec surgit ab illa.*

Les discours de Machiauel, pour exemple, estoient assez solides pour le subiect, si y a-il eu grand'aissance à les combattre : & ceux qui l'ont fait, n'ont pas laissé moins de facilité à combattre les leurs. Il s'y trouueroit tousiours à vn tel argument, dequoy y fournir responce, dupliques, repliques, tripliques, quadrupliques, & cette infinie contexture de débats, que nostre chicane a alongé tant qu'elle a peu en faueur des procez :

Cedimur, & totidem plagis consumimus hostem :

les raisons n'y ayant guere autre fondement que l'experience, & la diuersité des euenemens humains,

nous présentant infinis exemples à toutes fortes de formes. Vn sçauant personnage de nostre temps, dit qu'en nos almanacs, où ils disent chaud, qui voudra dire froid, & au lieu de sec, humide : & mettre tousiours le rebours de ce qu'ils pronostiquent, s'il deuoit entrer en gageure de l'euenement de l'un ou l'autre, qu'il ne se soucieroit pas quel party il prinist, sauf és choses où il n'y peut escheoir incertitude : comme de promettre à Noël des chaleurs extremes, & à la saint Iean, des rigueurs de l'huyet. I'en pense de mesmes de ces discours politiques : à quelque rolle qu'on vous mette, vous auez aussi beau ieu que vostre compagnon, pourueu que vous ne veniez à choquer les principes trop grossiers & apparens. Et pourtant, selon mon humeur, és affaires publiques, il n'est aucun si mauuais train, pourueu qu'il aye de l'aage & de la constance, qui ne vaille mieux que le changement & le remuement. Nos mœurs sont extremement corrompues, & panchent d'une merueilleuse inclination vers l'empirement : de nos loix & vsances, il y en a plusieurs barbares & monstrueuses : toutesfois pour la difficulté de nous mettre en meilleur estat, & le danger de ce croullement, si ie pouuoys planter une cheuille à nostre rouë, & l'arrester en ce poinct, ie le ferois de bon cœur.

*nunquam adeo fœdis adeoque pudendis
Vtimur exemplis, vt non peiora supersint.*

Le pis que ie trouue en nostre estat, c'est l'instabilité : & que nos loix, non plus que nos vestemens, ne peuuent prendre aucune forme arrestée. Il est bien ayisé d'accuser d'imperfection une police : car toutes choses mortelles en sont pleines : il est bien

ayfé d'engendrer à vn peuple le meſpris de ſes anciennes obſeruances : iamais homme n'entreprint cela, qui n'en vinſt à bout : mais d'y reſtablir vn meilleur eſtat en la place de celuy qu'on a ruiné, à cecy pluſieurs ſe ſont morfondus, de ceux qui l'auoient entrepris. Je fay peu de part à ma prudence, de ma conduite : ie me laiſſe volontiers mener à l'ordre public du monde. Heureux peuple, qui fait ce qu'on commande, mieux que ceux qui commandent, ſans ſe tourmenter des cauſes : qui ſe laiſſe mollement rouller apres le roulement celeſte. L'obeyſſance n'eſt iamais pure ny tranquille en celuy, qui railonne & qui plaide. Somme pour reuenir à moy, ce ſeul, par où ie m'eſtime quelque choſe, c'eſt ce, en quoy iamais homme ne s'eſtima deffailant : ma recommandation eſt vulgaire, commune, & populaire : car qui a iamais cuidé auoir faute de ſens ? Ce ſeroit vne propoſition qui impliqueroit en ſoy de la contradiction. C'eſt vne maladie, qui n'eſt iamais où elle ſe voit : elle eſt bien tenace & forte, mais laquelle pourtant, le premier rayon de la veuë du patient, perce & diſſipe : comme le regard du ſoleil vn brouillas opaque. S'accuſer, ce ſeroit s'accuſer en ce ſubieſt là : & ſe condamner, ce ſeroit s'abſoudre. Il ne fut iamais crocheteur ny femmelette, qui ne penſaſt auoir aſſez de ſens pour ſa prouiſion. Nous recognoiſſons ayſément és autres, l'aduantage du courage, de la force corporelle, de l'experience, de la diſpoſition, de la beauté : mais l'aduantage du iugement ; nous ne le cedons à perſonne. Et les railons qui partent du ſimple diſcours naturel en autruy, il nous ſemble qu'il n'a tenu qu'à regarder de ce coſté là, que nous ne les ayons trouuees. La ſcience, le ſtile, & telles parties,

que nous voyons és ourages estrangers, nous touchons bien aysément si elles surpassent les nostres : mais les simples productions de l'entendement, chacun pense qu'il estoit en luy de les rencontrer toutes pareilles, & en apperçoit malaisément le poids & la difficulté, si ce n'est, & à peine, en vne extreme & incomparable distance. Et qui verroit bien à clair la hauteur d'un iugement estranger, il y arriueroit & y porteroit le sien. Ainsi, c'est vne sorte d'exercitation, de laquelle on doit esperer fort peu de recommandation & de loüange, & vne maniere de composition, de peu de nom. Et puis, pour qui escriuez vous ? Les sçauants, à qui appartient la iurisdiction liuresque, ne cognoissent autre prix que de la doctrine ; & n'aduoüent autre proceder en noz esprits, que celui de l'erudition, & de l'art. Si vous auez prins l'un des Scipions pour l'autre, que vous reste il à dire, qui vaille ? Qui ignore Aristote, selon eux, s'ignore quand & quand foy-mesme. Les ames grossieres & populaires ne voyent pas la grace d'un discours delié. Or ces deux especes occupent le monde. La tierce, à qui vous tombez en partage, des ames réglées & fortes d'elles mesmes, est si rare, que iustement elle n'a ny nom, ny rang entre nous : c'est à demy temps perdu, d'aspirer, & de s'efforcer à luy plaire. On dit communément que le plus iuste partage que Nature nous aye fait de graces, c'est celui du sens : car il n'est aucun qui ne se contente de ce qu'elle luy en a distribué, n'est-ce pas raison ? qui verroit au delà, il verroit au delà de sa veuë. Je pense auoir les opinions bonnes & saines, mais qui n'en croit autant des siennes ? L'une des meilleures preuues que j'en aye, c'est le peu d'estime que ie fay de moy. car si elles n'eussent esté

bien assurées, elles se fussent aisément laissé piper à l'affection que ie me porte, singuliere, comme celuy qui la ramene quasi toute à moy, & qui ne l'espands gueres hors de là. Tout ce que les autres en distribuent à vne infinie multitude d'amis, & de cognoissans, à leur gloire, à leur grandeur, ie le rapporte tout au repos de mon esprit, & à moy. Ce qui m'en eschappe ailleurs, ce n'est pas proprement de l'ordonnance de mon discours :

mihî nempe valere & viuere doctus.

Or mes opinions, ie les trouue infiniment hardies & constantes à condamner mon insuffisance. De vray c'est aussi vn subiect, auquel i'exerce mon iugement autant qu'à nul autre. Le monde regarde tousiours vis à vis : moy, ie replie ma veuë au dedans, ie la plante, ie l'amuse là. Chacun regarde deuant soy, moy ie regarde dedans moy. Ie n'ay affaire qu'à moy, ie me considere sans cesse, ie me contrerolle, ie me gouste. Les autres vont tousiours ailleurs, s'ils y pensent bien : ils vont tousiours auant,

nemo in sese tentat descendere :

moy, ie me roule en moy-mesme. Cette capacité de trier le vray, quelle qu'elle soit en moy, & cett'humour libre de n'affubiection aysément ma creance, ie la dois principalement à moy : car les plus fermes imaginations que i'aye, & generalles, sont celles qui par maniere de dire, nasquirent avec moy : elles sont naturelles, & toutes miennes. Ie les produisis crues & simples, d'une production hardie & forte, mais vn peu trouble & imparfaicte : depuis ie les ay

establies & fortifiées par l'autorité d'autrui, & par les sains exemples des anciens, auxquels ie me suis rencontré conforme en iugement. Ceux-là m'en ont asseuré de la prinse, & m'en ont donné la iouissance & possession plus claire. La recommandation que chacun cherche, de viuacité & promptitude d'esprit, ie la pretends du reglement, d'une action esclatante & signalée, ou de quelque particuliere suffisance : ie la pretends de l'ordre, correspondance, & tranquillité d'opinions & de mœurs. *Omnino si quidquam est decorum, nihil est profectò magis quàm æquabilitas vniuersæ vitæ, tum singularum actionum : quam conseruare non possis, si aliorum naturam imitans, omittas tuam.* Voyla donq iusques où ie me sens coupable de cette premiere partie, que ie disois estre au vice de la presomption. Pour la seconde, qui consiste à n'estimer point assez autrui, ie ne sçay si ie m'en puis si bien excuser : car quoy qu'il me couste, ie delibere de dire ce qui en est. A l'aduenture que le commerce continuel que i'ay avec les humeurs anciennes, & l'idée de ces riches ames du temps passé, me dégoust, & d'autrui, & de moy-mesme : ou bien qu'à la verité nous viuons en vn siecle qui ne produict les choses que bien mediocres. Tant y a que ie ne connoy rien digne de grande admiration. Aussi ne connoy-ie guere d'hommes, avec telle priuauté, qu'il faut pour en pouoir iuger : & ceux auxquels ma condition me melle plus ordinairement, sont pour la plupart, gens qui ont peu de soing de la culture de l'ame, & auxquels on ne propose pour toute beatitude que l'honneur, & pour toute perfection, que la vailance. Ce que ie voy de beau en autrui, ie le louë & l'estime tres-volontiers. Voire i'enrichis souuent

sur ce que i'en pense, & me permets de mentir iusques là. Car ie ne sçay point inuenter vn subiect faux. Ie tesmoigne volontiers de mes amis, par ce que i'y trouue de louable. Et d'un pied de valeur, i'en fay volontiers vn pied & demy. Mais de leur prester les qualitez qui n'y sont pas, ie ne puis : ny les defendre ouuertement des imperfections qu'ils ont. Voyre à mes ennemis, ie rends nettement ce que ie dois de tesmoignage d'honneur. Mon affection se change, mon iugement non. Et ne confons point ma querelle avec autres circonstances qui n'en sont pas. Et suis tant ialoux de la liberté de mon iugement, que mal-aysément la puis-je quitter pour passion que ce soit. Ie me fay plus d'iniure en mentant, que ie n'en fay à celuy, de qui ie mens. On remarque cette louable & genereuse coustume de la nation Persienne, qu'ils parloient de leurs mortels ennemis, & à qui ils faisoient la guerre à outrance, honorablement & equitablement autant qu'e portoit le merite de leur vertu. Ie connoy des hommes assez, qui ont diuerses parties belles : qui l'esprit, qui le cœur, qui l'adresse, qui la conscience, qui le langage, qui vne science, qui vn'autre : mais de grand homme en general, & ayant tant de belles pieces ensemble, ou vne, en tel degré d'excellence, qu'on le doie admirer, ou le comparer à ceux que nous honorons du temps passé, ma fortune ne m'en a fait voir nul. Et le plus grand que i'aye conneu au vif, ie di des parties naturelles de l'ame, & le mieux né, c'estoit Estienne de la Boitie : c'estoit vrayement vn' ame pleine, & qui monstroient vn beau visage à tout sens : vn' ame à la vieille marque : & qui eust produit de grands effects, si sa fortune l'eust voulu : ayant beaucoup adiousté à ce riche naturel, par

science & estude. Mais ie ne sçay comment il aduient, & si aduient sans doubte, qu'il se trouue autant de vanité & de foiblesse d'entendement, en ceux qui font profession d'auoir plus de suffisance, qui se mellent de vacations lettrées, & de charges qui dependent des liures, qu'en nulle autre sorte de gens. Ou bien par ce que lon requiert & attend plus d'eux, & qu'on ne peut excuser en eux les fautes communes : ou bien que l'opinion du sçauoir leur donne plus de hardiesse de se produire, & de se descouurir trop auant, par où ils se perdent, & se trahissent. Comme vn artisan tesmoigne bien mieux sa bestise, en vne riche matiere, qu'il ait entre mains, s'il l'acommode & melle sottement, & contre les regles de son ouurage, qu'en vne matiere vile : & s'offence lon plus du defect, en vne statue d'or, qu'en celle qui est de plastre. Ceux cy en font autant, lors qu'ils mettent en auant des choses qui d'elles mesmes, & en leur lieu, seroyent bonnes : car ils s'en seruent sans discretion, faisans honneur à leur memoire, aux despens de leur entendement : & faisans honneur à Cicero, à Galien, à Vlpian, & à saint Hierosme, pour se rendre eux ridicules. Ie retombe volontiers sur ce discours de l'ineptie de nostre institution. Elle a eu pour sa fin, de nous faire, non bons & sages, mais sçauans : elle y est arriüée. Elle ne nous a pas appris de suyure & embrasser la vertu & la prudence : mais elle nous en a imprimé la deriuation & l'etymologie. Nous sçauons decliner vertu, si nous ne sçauons l'aymer. Si nous ne sçauons que c'est que prudence par effect, & par experience, nous le sçauons par iargon & par cœur. De nos voisins, nous ne nous contentons pas d'en sçauoir la

race, les parentelles, & les alliances, nous les voulons auoir pour amis, & dressez avec eux quelque conuersation & intelligence : elle nous a appris les definitions, les diuisions, & partitions de la vertu, comme des furnoms & branches d'une genealogie, sans auoir autre soing de dressez entre nous & elle, quelque pratique de familiarité, & priuée accointance. Elle nous a choisi pour nostre apprentissage, non les liures qui ont les opinions plus saines & plus vraies, mais ceux qui parlent le meilleur Grec & Latin : & parmy les beaux mots, nous a fait couler en la fantasie les plus vaines humeurs de l'antiquité. Vne bonne institution, elle change le iugement & les mœurs : comme il aduint à Polemon : ce ieune homme Grec desbauché, qui estant allé ouïr par rencontre, vne leçon de Xenocrates, ne remerqua pas seulement l'eloquence & la suffisance du lecteur, & n'en rapporta pas seulement en la maison, la science de quelque belle matiere : mais vn fruit plus apparent & plus solide : qui fut, le soudain changement & amendement de sa premiere vie. Qui a iamais senti vn tel effect de nostre discipline ?

*faciasne quod olim
Murtus Polemon, ponas insignia morbi,
Fasciolas, cubital, focalia, potus vt ille
Dicitur ex collo furtim carpsisse coronas,
Postquam est impransu correptus voce magistri?*

La moins dedaignable condition de gents, me semble estre, celle qui par simpleste tient le dernier rang : & nous offrir vn commerce plus réglé. Les mœurs & les propos des payfans, ie les trouue communement plus ordonnez selon la prescription de la.

vraye philosophie, que ne sont ceux de noz philosophes. *Plus sapit vulgus, quia tantum, quantum opus est, sapit.* Les plus notables hommes que j'aye iugé, par les apparences externes, car pour les iuger à ma mode, il les faudroit esclairer de plus pres, c'ont esté, pour le fait de la guerre, & suffisance militaire, le Duc de Guyse, qui mourut à Orleans, & le feu Marechal Strozzi. Pour gens suffisans, & de vertu non commune, Oliuier, & l'Hospital Chanceliers de France. Il me semble aussi de la poésie qu'elle a eu sa vogue en nostre siecle. Nous auons abondance de bons artifans de ce mestier-là, Aurat, Beze, Buchanan, l'Hospital, Mont-doré, Turnebus. Quant aux François, ie pense qu'ils l'ont montée au plus haut degré où elle sera iamais : & aux parties, en quoy Ronfart & du Bellay excellent, ie ne les treuve gueres esloignez de la perfection ancienne. Adrianus Turnebus sçauoit plus, & sçauoit mieux ce qu'il sçauoit, qu'un homme qui fust de son siecle, ny loing au delà. Les vies du Duc d'Albe dernier mort, & de nostre Connestable de Mommorancy, ont esté des vies nobles, & qui ont eu plusieurs rares ressemblances de fortune. Mais la beauté, & la gloire de la mort de cettuy-cy, à la veuë de Paris, & de son Roy ; pour leur seruice contre ses plus proches ; à la teste d'une armée victorieuse par sa conduite ; & d'un coup de main, en si extreme vieillesse, me semble meriter qu'on la loge entre les remarquables euenemens de mon temps. Comme aussi, la constante bonté, douceur de mœurs, & facilité consciencieuse de Monsieur de la Nouë, en une telle iniustice de parts armées, vraye eschole de trahison, d'inhumanité, & de brigandage, où tousiours il s'est nourry, grand homme de guerre,

& tres-experimenté. J'ay pris plaisir à publier en plusieurs lieux, l'esperance que j'ay de Marie de Gournay le Iars ma fille d'alliance : & certes aymée de moy beaucoup plus que paternellement, & enue-
loppée en ma retraite & solitude, comme l'une des meilleures parties de mon propre estre. Je ne regarde plus qu'elle au monde. Si l'adolescence peut donner presage, cette ame fera quelque iour capable des plus belles choses, & entre autres de la perfection de cette tressainte amitié, où nous ne lisons point que son sexe ait peu monter encores : la sincerité & la solidité de ses mœurs, y font desia bastantes, son affection vers moy plus que sur-abondante : & telle en somme qu'il n'y a rien à souhaiter, sinon que l'apprehension qu'elle a de ma fin, par les cinquante & cinq ans auxquels elle m'a rencontré, la travaillast moins cruellement. Le iugement qu'elle fit des premiers Essays, & femme, & en ce siecle, & si ieune, & seule en son quartier, & la vehemence fameuse dont elle m'ayma & me desira long temps sur la seule estime qu'elle en print de moy, auant m'auoir veu, c'est vn accident de tres-digne consideration. Les autres vertus ont eu peu, ou point de mise en cet aage : mais la vaillance, elle est deuenue populaire par noz guerres ciuiles : & en cette partie, il se trouue parmy nous, des ames fermes, iusques à la perfection, & en grand nombre, si que le triage en est impossible à faire. Voila tout ce que j'ay cognu, iusques à cette heure, d'extraordinaire grandeur & non commune.



Du desmentir.

CHAPITRE XVIII.



VOIRE mais, on me dira, que ce dessein de se servir de foy, pour subiect à escrire, seroit excusable à des hommes rares & fameux, qui par leur reputation auroyent donné quelque desir de leur cognoissance. Il est certain, ie l'aduoüe, & sçay bien que pour voir vn homme de la commune façon, à peine qu'un artisan leue les yeux de sa besongne : là où pour voir vn personnage grand & signalé, arriuer en vne ville, les ouuoirs & les boutiques s'abandonnent. Il messiet à tout autre de se faire cognoistre, qu'à celuy qui a dequoy se faire imiter; & duquel la vie & les opinions peuuent seruir de patron. Cæsar & Xenophon ont eu dequoy fonder & fermir leur narration, en la grandeur de leurs faicts, comme en vne baze iuste & solide. Ainsi sont à souhaiter les papiers iournaux du grand Alexandre, les Commentaires qu'Auguste, Caton, Sylla, Brutus, & autres auoyent laissé de leurs gestes. De telles gens, on ayme & estudie les figures, en cuyure mesmes & en pierre. Cette remontrance est tres-vraye; mais elle ne me touche que bien peu.

*Non recito cuiquam, nisi amicis, idque rogatus.
Non ubiuis, corámve quibusbilibet. In medio qui
Scripta foro recitent sunt multi, quique lauantes.*

Je ne dresse pas icy vne statue à planter au carrefour d'une ville, ou dans vne eglise, ou place publique :

*Non equidem hoc studeo bullatis vt mihi nugis
Pagina turgescat :
Secreti loquimur.*

C'est pour le coin d'une librairie, & pour en amuser vn voisin, vn parent, vn amy qui aura plaisir à me raconter & repratiquer en cett' image. Les autres ont pris cœur de parler d'eux, pour y auoir trouué le subiect digne & riche; moy au rebours, pour l'auoir trouué si sterile & si maigre, qu'il n'y peut eschoir soupçon d'ostentation. Je iuge volontiers des actions d'autrui : des miennes, ie donne peu à iuger, à cause de leur nihilité. Je ne trouue pas tant de bien en moy, que ie ne le puisse dire sans rougir. Quel contentement me seroit-ce d'ouyr ainfi quelqu'un, qui me recitast les mœurs, le visage, la contenance, les plus communes parolles, & les fortunes de mes ancestres, combien i'y serois attentif. Vrayement cela partiroit d'une mauuaise nature, d'auoir à mespris les portraits mesmes de noz amis & predecesseurs, la forme de leurs vestemens, & de leurs armes. I'en conserue l'escriture, le feing & vne espée peculiere : & n'ay point chassé de mon cabinet, des longues gaules, que mon pere portoit ordinairement en la main. *Paterna vestis & annulus, tanto charior est posteris, quanto erga parentes maior affectus.* Si toutesfois ma posterité est d'autre

appetit, i'auray bien dequoy me reuencher : car ils ne sçauroyent faire moins de comte de moy, que i'en feray d'eux en ce temps là. Tout le commerce que i'ay en cecy avec le publicq, c'est que i'emprunte les vtils de son escriture, plus soudaine & plus aisée. En recompense, i'empescheraý peut estre, que quelque coin de beurre ne se fonde au marché.

*Ne toga cordyllis, ne penula destit olimis,
Et laxas scombris sæpe dabo tunicas.*

Et quand personne ne me lira, ay-ie perdu mon temps, de m'estre entretenu tant d'heures oisües, à pensements si vtils & agreables? Moulant sur moy cette figure, il m'a fallu si fouuent me testonner & composer, pour m'extraire, que le patron s'en est fermý, & aucunement formé soy-mesme. Me peignant pour autruý, ie me suis peint en moy, de couleurs plus nettes, que n'estoyent les miennes premieres. Je n'ay pas plus fait mon liure, que mon liure m'a fait. Liure consubstantiel à son autheur : d'une occupation propre : membre de ma vie : non d'une occupation & fin, tierce & estrangere, comme tous autres liures. Ay-ie perdu mon temps, de m'estre rendu compte de moy, si continuellement; si curieusement? Car ceux qui se repaissent par fantasie seulement, & par langue, quelque heure, ne s'examinent pas si primement, ny ne se penetrent, comme celuy, qui en fait son estude, son ouurage, & son mestier : qui s'engage à vn registre de durée, de toute sa foy, de toute sa force. Les plus delicieux plaisirs, si se digerent ils au dedans : fuyent à laisser trace de soy : & fuyent la veuë, non seulement du peuple, mais d'un autre. Combien de fois

m'a cette besongne diuertie de cogitations ennuyeuses & doiuent estre comptées pour ennuyeuses toutes les friuoles. Nature nous a estrenez d'une large faculté à nous entretenir à part : & nous y appelle souuent, pour nous apprendre, que nous nous deuons en partie à la société, mais en la meilleure partie, à nous. Aux fins de rengier ma fantasie, à refuer mesme, par quelque ordre & proiection, & la garder de se perdre & extrauaguer au vent, il n'est que de donner corps, & mettre en registre, tant de menues pensées, qui se presentent à elle. L'escoute à mes refueries, par ce que i'ay à les enroller. Quantes-fois, estant marry de quelque action, que la ciuilité & la raison me prohiboient de reprendre à descouuert, m'en suis-je icy desgorgé, non sans dessein de publique instruction ! Et si ces verges poétiques :

*Zon sus l'œil, zon sur le groin,
Zon sur le dos du Sagoin,*

s'impriment encore mieux en papier, qu'en la chair viue. Quoy si ie preste vn peu plus attentiuement l'oreille aux liures, depuis que ie guette, si i'en pourray friponner quelque chose dequoy esmailler ou estayer le mien ? Ie n'ay aucunement estudié pour faire vn liure : mais i'ay aucunement estudié, pour ce que ie l'auoy fait : si c'est aucunement estudier, qu'effleurer & pincer, par la teste, ou par les pieds, tantost vn autheur, tantost vn autre : nullement pour former mes opinions : ouï, pour les assister, pieça formées, seconder & seruir. Mais à qui croirons nous parlant de foy, en vne faison si gasteée ? veu qu'il en est peu, ou point, à qui nous puissions croire parlants d'autrui, où il y a moins

d'intérêt à mentir. Le premier trait de la corruption des mœurs, c'est le bannissement de la vérité; car comme disoit Pindare, l'estre véritable, est le commencement d'une grande vertu, & le premier article que Platon demande au gouverneur de sa republique. Nostre vérité de maintenant, ce n'est pas ce qui est, mais ce qui se persuade à autrui : comme nous appellons monnoye, non celle qui est loyale seulement, mais la fauce aussi, qui a mise. Nostre nation est de long temps reprochée de ce vice. Car Saluianus Massiliensis, qui estoit du temps de l'Empereur Valentinian, dit qu'aux François le mentir & se pariurer n'est pas vice, mais une façon de parler. Qui voudroit encherir sur ce témoignage, il pourroit dire que ce leur est à present vertu. On s'y forme, on s'y façonne, comme à un exercice d'honneur : car la dissimulation est des plus notables qualitez de ce siècle. Ainsi j'ay souvent considéré d'où pouuoit naistre cette coustume, que nous obseruons si religieusement, de nous sentir plus aigrement offencé du reproche de ce vice, qui nous est si ordinaire, que de nul autre : & que ce soit l'extreme iniure qu'on nous puisse faire de parole, que de nous reprocher la mensonge. Sur cela, ie treuve qu'il est naturel, de se deffendre le plus, des deffaux, dequoy nous sommes le plus entachés. Il semble qu'en nous ressentans de l'accusation, & nous en esmouuans, nous nous deschargeons aucunement de la coulpe : si nous l'auons par effect, aumoins nous la condamnons par apparence. Seroit-ce pas aussi, que ce reproche semble enueller la couardise & lascheté de cœur ? En est-il de plus expresse, que se deffdire de sa parole ? quoy se deffdire de sa propre science ? C'est un vilain vice,

que le mentir ; & qu'un ancien peint bien honteusement, quand il dit, que c'est donner tesmoignage de mespriser Dieu, & quand & quand de craindre les hommes. Il n'est pas possible d'en représenter plus richement l'horreur, la vilité, & le defreglement. Car que peut on imaginer plus vilain, que d'estre couart à l'endroit des hommes, & braue à l'endroit de Dieu ? Nostre intelligence se conduisant par la seule voye de la parolle, celui qui la fauce, trahit la societé publique. C'est le seul vil, par le moyen duquel se communiquent noz volonteés & noz pensées : c'est le truchement de nostre ame : s'il nous faut, nous ne nous tenons plus, nous ne nous entrecognoissons plus. S'il nous trompe, il rompt tout nostre commerce, & dissout toutes les liaisons de nostre police. Certaines nations des nouvelles Indes (on n'a que faire d'en remarquer les noms, ils ne sont plus ; car iusques à l'entier abolissement des noms, & ancienne cognoissance des lieux, s'est estendue la desolation de cette conquête, d'un merueilleux exemple, & inouy) offroyent à leurs Dieux, du sang humain, mais non autre, que tiré de leur langue, & oreilles, pour expiation du peché de la mensonge, tant ouye que prononcée. Ce bon compagnon de Grece disoit, que les enfans s'amusaient par les osselets, les hommes par les parolles. Quant aux diuers vsages de noz desmentirs, & les loix de nostre honneur en cela, & les changemens qu'elles ont reçu, ie remets à une autre-fois d'en dire ce que j'en sçay ; & apprendray cependant, si ie puis, en quel temps print commencement cette coustume, de si exactement poiser & mesurer les parolles, & d'y attacher nostre honneur : car il est aisé à iuger qu'elle n'estoit pas anciennement entre les Romains

& les Grecs. Et m'a semblé souuent nouveau & estrange, de les voir se dementir & s'iniurier, sans entrer pourtant en querelle. Les loix de leur deuoir, prenoient quelque autre voye que les nostres. On appelle Cæsar, tantost voleur, tantost yurongue à sa barbe. Nous voyons la liberté des inuectiues, qu'ils font les vns contre les autres; ie dy les plus grands chefs de guerre, de l'une & l'autre nation, où les parolles se reuenchent seulement par les parolles, & ne se tirent à autre consequence.





De la liberté de conscience.

CHAPITRE XIX.



I. est ordinaire, de voir les bonnes intentions, si elles sont conduites sans moderation, pouffer les hommes à des effets trefvitieux. En ce desbat, par lequel la France est à present agitée de guerres ciuiles, le meilleur & le plus sain party, est sans doubtte celuy, qui maintien & la religion & la police ancienne du pays. Entre les gens de bien toutesfois, qui le suyuent (car ie ne parle point de ceux, qui s'en seruent de pretexte, pour, ou exercer leurs vengeances particulieres, ou fournir à leur auarice, ou suiure la faueur des Princes : mais de ceux qui le font par vray zele enuers leur religion, & sainte affection, à maintenir la paix & l'estat de leur patrie) de ceux-cy, dis-ie, il s'en voit plusieurs, que la passion pouffe hors les bornes de la raison, & leur faict par fois prendre des conseils iniustes, violents, & encore temeraires. Il est certain, qu'en ces premiers temps, que nostre religion commença de gaigner autorité avec les loix, le zele en arma plusieurs contre toute sorte de liures payens; dequoy les gens de lettre souf-

frent vne merueilleuse perte. l'estime que ce desordre ait plus porté de nuyfance aux lettres, que tous les feux des barbares. Cornelius Tacitus en est vn bon tesmoing : car quoy que l'Empereur Tacitus son parent, en eust peuplé par ordonnances expressees toutes les librairies du monde : toutes-fois vn seul exemplaire entier n'a peu eschapper la curieuse recherche de ceux qui desiroient l'abolir, pour cinq ou six vaines clauses, contraires à nostre creance. Ils ont aussi eu cecy, de prester aisément des louanges fauces, à tous les Empereurs, qui faisoient pour nous, & condamner vniuersellement toutes les actions de ceux, qui nous estoient aduersaires, comme il est aisé à voir en l'Empereur Iulian, surnommé l'Apostat. C'estoit à la verité vn tres-grand homme & rare; comme celuy, qui auoit son ame viuement tainte des discours de la philosophie, auxquels il faisoit profession de regler toutes ses actions : & de vray il n'est aucune sorte de vertu, dequoy il n'ait laissé de tres-notables exemples. En chasteté, de laquelle le cours de sa vie donne bien clair tesmoignage, on lit de luy vn pareil traitt, à celuy d'Alexandre & de Scipion, que de plusieurs tresbelles captiues, il n'en voulut pas seulement voir vne, estant en la fleur de son aage : car il fut tué par les Parthes aagé de trente vn an seulement. Quant à la iustice, il prenoit luy-mesme la peine d'ouyr les parties : & encore que par curiosité il s'informast à ceux qui se presentoient à luy, de quelle religion ils estoient : toutes-fois l'inimitié qu'il portoit à la nostre, ne donnoit aucun contrepoix à la balance. Il fit luy mesme plusieurs bonnes loix, & retrancha vne grande partie des subides & impositions, que leuoient ses predecesseurs. Nous auons deux bons

historiens tesmoins oculaires de ses actions : l'un desquels, Marcellinus, reprend aigrement en diuers lieux de son histoire, cette sienne ordonnance, par laquelle il deffendit l'escole, & interdit l'enseigner à tous les rhetoriciens & grammairiens Chrestiens, & dit, qu'il souhaiteroit cette sienne action estre enseuelie sous le silence. Il est vray-semblable, s'il eust fait quelque chose de plus aigre contre nous, qu'il ne l'eust pas oublié, estant bien affectionné à nostre party. Il nous estoit aspre à la verité, mais non pourtant cruel ennemy. Car noz gens mesmes recitent de luy cette histoire, que se promenant vn iour autour de la ville de Chalcedoine, Maris Euesque du lieu, osa bien l'appeller meschant, traistre à Christ, & qu'il n'en fit autre chose, sauf luy respondre : Va miserable, pleure la perte de tes yeux : à quoy l'Euesque encore repliqua : Je rends graces à Iesus Christ, de m'auoir osté la veuë, pour ne voir ton visage impudent : affectant en cela, disent-ils, vne patience philosophique. Tant y a que ce fait là, ne se peut pas bien rapporter aux cruantez qu'on le dit auoir exercées contre nous. Il estoit, dit Eutropius mon autre tesmoing, ennemy de la Chrestienté, mais sans toucher au sang. Et pour reuenir à sa iustice, il n'est rien qu'on y puisse accuser, que les rigueurs, dequoy il vfa au commencement de son empire, contre ceux qui auoyent suiuy le party de Constantius son predecesseur. Quant à sa sobrieté, il viuoit tousiours vn viure soldatesque : & se nourrissoit en pleine paix, comme celuy qui se preparoit & accoustumoit à l'austerité de la guerre. La vigilance estoit telle en luy, qu'il departoit la nuit à trois ou à quatre parties, dont la moindre estoit celle qu'il donnoit au sommeil : le reste, il

l'employoit à visiter luy mesme en personne, l'estat de son armée & ses gardes, ou à estudier : car entre autres siennes rares qualitez, il estoit tref-excellent en toute sorte de literature. On dit d'Alexandre le grand, qu'estant couché, de peur que le sommeil ne le desbauchast de ses pensemens, & de ses estudes, il faisoit mettre vn bassin ioignant son liét, & tenoit l'une de ses mains au dehors, avec vne boulette de cuire : affin que le dormir le surprenant, & relaschant les prises de ses doigts, cette boulette par le bruit de sa cheutte dans le bassin, le reueillaist. Cettuy-cy auoit l'ame si tendue à ce qu'il vouloit, & si peu empeschée de fumées, par sa singuliere abstinence, qu'il se passoit bien de cet artifice. Quant à la suffisance militaire, il fut admirable en toutes les parties d'un grand Capitaine : aussi fut-il quasi toute sa vie en continuel exercice de guerre : & la plupart, avec nous, en France contre les Allemands & Francons. Nous n'auons guere memoire d'homme, qui ait veu plus de hazards, ny qui ait plus souuent fait preuue de sa personne. Sa mort a quelque chose de pareil à celle d'Epaminondas : car il fut frappé d'un traict, & effaya de l'arracher, & l'eust fait, sans ce que le traict estant tranchant, il se couppa & affoiblit la main. Il demandoit incessamment qu'on le repportast en ce mesme estat, en la meslée, pour y encourager ses soldats ; lesquels contesterent cette bataille sans luy, trefcourageusement, iusques à ce que la nuit separa les armées. Il deuoit à la philosophie, vn singulier mespris, en quoy il auoit sa vie, & les choses humaines. Il auoit ferme creance de l'eternité des ames. En matiere de religion, il estoit vicieux par tout ; on l'a surnommé l'Apostat, pour auoir abandonné la

nostre : toutesfois cette opinion me semble plus vray-semblable, qu'il ne l'auoit iamais eue à cœur, mais que pour l'obeissance des loix il s'estoit feint iusques à ce qu'il tint l'empire en sa main. Il fut si superstitieux en la sienne, que ceux mesmes qui en estoient de son temps, s'en mocquoient : & disoit-on, s'il eust gagné la victoire contre les Parthes, qu'il eust fait tarir la race des bœufs au monde, pour satisfaire à ses sacrifices. Il estoit aussi embabouyné de la science diuinatrice, & donnoit autorité à toute façon de prognostics. Il dit entre autres choses, en mourant, qu'il sçauoit bon gré aux Dieux & les remercioit, dequoy ils ne l'auoyent pas voulu tuer par surprise, l'ayant de long temps aduertie du lieu & heure de sa fin, ny d'une mort molle ou lasche, mieux conuenable aux personnes oyseuses & delicates, ny languissante, longue & douloureuse : & qu'ils l'auoyent trouué digne de mourir de cette noble façon, sur le cours de ses victoires, & en la fleur de sa gloire. Il auoit eu une pareille vision à celle de Marcus Brutus, qui premierement le menassa en Gaule, & depuis se representa à luy en Perse, sur le point de sa mort. Ce langage qu'on luy fait tenir, quand il se sentit frappé : Tu as veincu, Nazareen : ou, comme d'autres, Contente toy, Nazareen ; à peine eust il esté oublié, s'il eust esté creu par mes tesmoins : qui estants presens en l'armée ont remarqué iusques aux moindres mouuements & parolles de sa fin : non plus que certains autres miracles, qu'on y attache. Et pour venir au propos de mon theme : il couuoit, dit Marcellinus, de long temps en son cœur, le paganisme ; mais par ce que toute son armée estoit de Chrestiens, il ne l'osoit descouvrir. En fin, quand il

se vit assez fort pour oser publier sa volonté, il fit ouvrir les temples des Dieux, & s'effaya par tous moyens de mettre sus l'idolatrie. Pour paruenir à son effect, ayant rencontré en Constantinople, le peuple descoufu, avec les prelatz de l'Eglise Chrestienne diuisez, les ayant faitz venir à luy au palais, les admonesta instamment d'assoupir ces dissensions ciuiles, & que chacun sans empeschement & sans crainte seruist à la religion. Ce qu'il sollicitoit avec grand soing, pour l'esperance que cette licence augmenteroit les parts & les brigues de la diuision, & empescheroit le peuple de se reünir, & de se fortifier par consequent, contre luy, par leur concorde, & vnanime intelligence : ayant essayé par la cruauté d'aucuns Chrestiens, qu'il n'y a point de beste au monde tant à craindre à l'homme, que l'homme. Voyla ses mots à peu pres : en quoy cela est digne de consideration, que l'Empereur Iulian se sert pour attiser le trouble de la dissention ciuile, de cette mesme recepte de liberté de conscience, que noz Roys viennent d'employer pour l'estaindre. On peut dire d'un costé, que de lascher la bride aux pars d'entretenir leur opinion, c'est espandre & semer la diuision, c'est prester quasi la main à l'augmenter, n'y ayant aucune barriere ny coërcition des loix, qui bride & empesche sa course. Mais d'autre costé, on diroit aussi, que de lascher la bride aux pars d'entretenir leur opinion, c'est les amollir & relascher par la facilité, & par l'aisance, & que c'est esmousser l'eguillon qui s'affine par la rareté, la nouuelleté, & la difficulté. Et si croy mieux, pour l'honneur de la deuotion de noz Roys; c'est, que n'ayans peu ce qu'ils vouloient, ils ont fait semblant de vouloir ce qu'ils pouuoient.



Nous ne goustons rien de pur.

CHAPITRE XX.



LA foiblesse de nostre condition, fait que les choses en leur simplicité & pureté naturelle ne puissent pas tomber en nostre vſage. Les elemens que nous iouyſſons, ſont alterez : & les metaux de meſme, & l'or, il le faut empirer par quelque autre matiere, pour l'accommoder à nostre ſeruice. Ny la vertu ainſi ſimple, qu'Ariſton & Pyrrho, & encore les Stoiciens faiſoient fin de la vie, n'y a peu ſeruir ſans compoſition : ny la volupté Cyrenaique & Ariſtippique. Des plaiſirs, & biens que nous auons, il n'en eſt aucun exempt de quelque meſlange de mal & d'incommodité :

medio de fonte leporum

Sargit amari aliquid, quod in ipſis floribus angat.

Noſtre extreme volupté a quelque air de gemiſſement, & de plainte. Diriez vous pas qu'elle ſe meurt d'angoiſſe ? Voire quand nous en forgeons l'image en ſon excellence, nous la fardons d'epithetes & qualitez maladiſues, & douloureuſes : lan-

gueur, mollesse, foiblesse, deffailance, *morbidezza*, grand tefmoignage de leur confanguinité, & confubstantialité. La profonde ioye a plus de feuerité, que de gayeté. L'extreme & plein contentement, plus de raffis que d'enioué. *Ipsa felicitas, se nifi temperat, premis*. L'aïse nous mafche. C'est ce que dit vn verfet Grec ancien, de tel fens : Les Dieux nous vendent tous les biens qu'ils nous donnent : c'est à dire, ils ne nous en donnent aucun pur & parfait, & que nous n'achetions au prix de quelque mal. Le trauail & le plaifir, tres-diffemblables de nature, s'affocient pourtant de ie ne fçay quelle ioincture naturelle. Socrates dit, que quelque Dieu effaya de mettre en mafse, & confondre la douleur & la volupté : mais, que n'en pouuant fortir, il s'aduifa de les accoupler au moins par la queue. Metrodorus difoit qu'en la triftesse, il y a quelque alliage de plaifir. Je ne fçay s'il vouloit dire autre chose; mais moy, i' imagine bien, qu'il y a du defsein, du consentement, & de la complaifance, à se nourrir en la melancholie. Je dis outre l'ambition, qui s'y peut encore meller : il y a quelque ombre de friandise & delicateffe, qui nous rit & qui nous flatte, au giron mefme de la melancholie. Y a-il pas des complexions qui en font leur aliment ?

est quædam flere voluptas.

Et dit vn Attalus en Seneque, que la memoire de noz amis perdus nous aggrée comme l'amer au vin trop vieil :

*Minister veteris puer falerni
Ingere mi calices amariores :*

& comme des pommes doucement aigres. Nature

nous descouvre cette confusion. Les peintres tiennent, que les mouuemens & plis du visage, qui seruent au pleurer, seruent aussi au rire. De vray, auant que l'un ou l'autre soyent acheuez d'exprimer, regardez à la conduite de la peinture, vous estes en doute, vers lequel c'est qu'on va. Et l'extrémité du rire se mesle aux larmes. *Nullum sine auroramento malum est.* Quand l' imagine l'homme assiégué de commoditez désirables : mettons le cas, que tous ses membres fussent saisis pour tousiours, d'un plaisir pareil à celui de la generation en son point plus excessif : ie le sens fondre sous la charge de son aise : & le voy du tout incapable de porter vne si pure, si constante volupté, & si vniuerselle. De vray il fuit, quand il y est, & se haste naturellement d'en eschapper, comme d'un pas, où il ne se peut fermir, où il craint d'enfondrer. Quand ie me confesse à moy religieusement, ie trouue que la meilleure bonté que j'aye, a quelque teinture vicieuse. Et crains que Platon en sa plus nette vertu (moy qui en suis autant sincere & loyal estimateur, & des vertus de semblable marque, qu'autre puisse estre) s'il y eust escouté de pres (& il y escoutoit de pres) il y eust senty quelque ton gauche, de mixtion humaine : mais ton obscur, & sensible seulement à soy. L'homme en tout & par tout, n'est que rappiessement & bigarrure. Les loix mesmes de la iustice, ne peuuent subsister sans quelque meslange d'iniustice. Et dit Platon, que ceux-là entreprennent de couper la teste de Hydra, qui pretendent oster des loix toutes incommoditez & inconueniens. *Omne magnum exemplum habet aliquid ex iniquo, quod contra singulos utilitate publica rependitur*, dit Tacitus. Il est pareillement

vray, que pour l'usage de la vie, & service du commerce public, il y peut auoir de l'excez en la pureté & perspicacité de noz esprits. Cette clarté penetrante, a trop de subtilité & de curiosité. Il les faut appesantir & esmouffer, pour les rendre plus obeissans à l'exemple & à la pratique; & les espeffir & obscurcir, pour les proportionner à cette vie tenebreuse & terrestre. Pourtant se trouuent les esprits communs & moins tendus, plus propres & plus heureux à conduire affaires. Et les opinions de la philosophie esleuées & exquisés, se trouuent ineptes à l'exercice. Cette pointue viuacité d'ame, & cette volubilité souple & inquiete, trouble nos negotiations. Il faut manier les entreprises humaines, plus grossierement & superficiellement; & en laisser bonne & grande part, pour les droits de la Fortune. Il n'est pas besoin d'esclairer les affaires si profondement & si subtilement. On s'y perd, à la consideration de tant de lustres contraires & formes diuerses, *volutantibus res inter se pugnantes, obtorpuerant animi*. C'est ce que les anciens disent de Simonides : par ce que son imagination luy presentoit sur la demande que luy auoit fait le Roy Hieron, pour à laquelle satisfaire il auoit eu plusieurs iours de pensément, diuerses considerations, aiguës & subtiles : doubtant laquelle estoit la plus vray-semblable, il desespera du tout de la verité. Qui en recherche & embrasse toutes les circonstances, & consequences, il empesche son election. Vn engin moyen, conduit egallement, & suffit aux executions, de grand, & de petit poix. Regardez que les meilleurs mesnagers, sont ceux qui nous sçauent moins dire comme ils le font; & que ces suffisans conteurs, n'y font le plus souuent rien qui

vaille. Je ſçay vn grand diſeur, & trefexcellent peintre de toute ſorte de meſnage, qui a laiffé bien piteuſement, couler par ſes mains, cent mille liures de rente. I'en ſçay vn autre, qui dit, qu'il conſulte mieux qu'homme de ſon conſeil, & n'eſt point au monde yne plus belle montre d'ame, & de ſuffiſance, toutesfois aux effets, ſes ſeruiteurs trouuent, qu'il eſt tout autre; ie dy ſans mettre le malheur en conte.





Contre la faineantise.

CHAPITRE XXI.



L'EMPEREUR Vespasien estant malade de la maladie, dont il mourut, ne laissoit pas de vouloir entendre l'estat de l'Empire : & dans son liét mesme, despeschoit sans cesse plusieurs affaires de consequence : & son medecin l'en tançant, comme de chose nuisible à sa santé : Il faut, disoit-il, qu'un Empereur meure debout. Voila vn beau mot, à mon gré, & digne d'un grand Prince. Adrian l'Empereur s'en seruit depuis à ce mesme propos : & le deuroit on souuent ramenteuoir aux Roys, pour leur faire sentir, que cette grande charge, qu'on leur donne du commandement de tant d'hommes, n'est pas vne charge oisive ; & qu'il n'est rien qui puisse si iustement desgouster vn subiect, de se mettre en peine & en hazard pour le seruice de son Prince, que de le voir appoltronny cependant luy-mesme, à des occupations lasches & vaines : & d'auoir soing de sa conseruation, le voyant si nonchalant de la nostre. Quand quelqu'un voudra maintenir, qu'il vaut mieux que le Prince conduise ses guerres par autre que par soy : la For-

tune luy fournira assez d'exemples de ceux, à qui leurs lieutenans ont mis à chef des grandes entreprises : & de ceux encore desquels la presence y eust esté plus nuisible, qu'utile. Mais nul Prince vertueux & courageux pourra souffrir, qu'on l'entretienne de si honteuses instructions. Soubs couleur de conserver sa teste, comme la statue d'un saint, à la bonne fortune de son estat, ils le dégradent de son office, qui est tout en action militaire, & l'en declarent incapable. L'en sçay vn, qui aymeroit bien mieux estre battu, que de dormir, pendant qu'on se battoit pour luy : & qui ne vid iamais sans ialousie, ses gens mesmes, faire quelque chose de grand en son absence. Et Selym premier disoit avec raison, ce me semble, que les victoires, qui se gagnent sans le maistre, ne sont pas completes. De tant plus volontiers eust-il dit, que ce maistre deuroit rougir de honte, d'y pretendre part pour son nom, n'y ayant embesogné que sa voix & sa pensée. Ny cela mesme, veu qu'en telle besongne, les aduis & commandemens, qui apportent l'honneur, sont ceux-là seulement, qui se donnent sur le champ, & au propre de l'affaire. Nul pilote n'exerce son office de pied ferme. Les Princes de la race Hottomane, la premiere race du monde en fortune guerriere, ont chaudement embrassé cette opinion. Et Baiazet second avec son filz, qui s'en despartirent, s'amusants aux sciences & autres occupations casanieres, donnerent aussi de bien grands soufflets à leur Empire : & celuy qui regne à present, Ammurath troisieme, à leur exemple, commence assez bien de s'en trouver de mesme. Fust-ce pas le Roy d'Angleterre, Edouard troisieme, qui dit de nostre Roy Charles cinquiesme, ce mot ? Il n'y eut onques

Roy, qui moins s'armaist, & si n'y eut onques Roy, qui tant me donnaist à faire. Il auoit raison de le trouuer estrange, comme vn effect du fort, plus que de la raison. Et cherchent autre adherent, que moy, ceux qui veulent nombrer entre les belliqueux & magnanimes conquerants, les Roys de Castille & de Portugal, de ce qu'à douze cents lieues de leur oisue demeure, par l'escorte de leurs facteurs, ils se sont rendus maistres des Indes d'une & d'autre part : desquelles c'est à sçauoir, s'ils auroient seulement le courage d'aller iouyr en presence. L'Empereur Iulian difoit encore plus, qu'un philosophe & vn galant homme, ne deuoient pas seulement respirer : c'est à dire, ne donner aux necessitez corporelles, que ce qu'on ne leur peut refuser ; tenant tousiours l'ame & le corps embefongnez à choses belles, grandes & vertueuses. Il auoit honte si en public on le voyoit cracher ou suer (ce qu'on dit aussi de la ieunesse Lacedemonienne, & Xenophon de la Persienne) par ce qu'il estimoit que l'exercice, le trauail continuel, & la sobriété, deuoient auoir cuit & asseché toutes ces superfluités. Ce que dit Seneque ne ioin dra pas mal en cet endroit, que les anciens Romains maintenoient leur ieunesse droite : ils n'apprennent, dit-il, rien à leurs enfans, qu'ils deussent apprendre assés. C'est vne genereuse enuie, de vouloir mourir mesme vilement & virilement : mais l'effect n'en gist pas tant en nostre bonne resolution, qu'en nostre bonne fortune. Mille ont proposé de vaincre, ou de mourir en combattant, qui ont failli à l'un & à l'autre : les blesseurs, les prisons, leur trauerfant ce dessein, & leur prestant vne vie forcée. Il y a des maladies, qui atterrent iusques à nos desirs, & nostre cognoissance. Fortune ne

deuoit pas seconder la vanité des legions Romaines, qui s'obligerent par serment, de mourir ou de vaincre. *Victor, Marce Fabi, reuertar ex acie : Si fallo, Iouem patrem Gradiuumque Martem aliòsque iratos inuoco Deos.* Les Portugais disent, qu'en certain endroit de leur conquête des Indes ils rencontrèrent des soldats, qui s'estoyent condamnez avec horribles execrations, de n'entrer en aucune composition, que de se faire tuer, ou demeurer victorieux : & pour marque de ce vœu, portoyent la teste & la barbe rase. Nous auons beau nous hasarder & obstiner. Il semble que les coups fuyent ceux, qui s'y presentent trop alaigrement : & n'arriuent volontiers à qui s'y presente trop volontiers, & corrompt leur fin. Tel ne pouuant obtenir de perdre sa vie, par les forces aduerfaires, apres auoir tout essayé, a esté contraint, pour fournir à sa resolution, d'en r'apporter l'honneur, ou de n'en rapporter pas la vie : se donner foy mesme la mort, en la chaleur propre du combat. Il en est d'autres exemples. Mais en voicy vn. Philistus, chef de l'armée de mer du ieune Dionysius contre les Syracusains, leur presenta la bataille, qui fut asprement contestée, les forces estants pareilles. En icelle il eut du meilleur au commencement, par sa prouesse. Mais les Syracusains se reneans autour de sa galere, pour l'inuestir, ayant fait grands faicts d'armes de sa personne, pour se defuelopper, n'y esperant plus de ressource, s'osta de sa main la vie, qu'il auoit si liberalement abandonnée, & frustratoirement, aux mains ennemies. Moley Moluch, Roy de Fais, qui vient de gagner contre Sebastian Roy de Portugal, cette iournée, fameuse par la mort de trois Roys, & par la transmission de cette grande couronne, à celle de Ca-

stille : se trouua griueusement malade dès lors que les Portugalois entrèrent à main armée en son estar; & alla tousiours depuis en empirant vers la mort, & la preuoyant. Iamais homme ne se seruit de soy plus vigoureuusement, & brauement. Il se trouua foible, pour soustenir la pompe ceremonieuse de l'entrée de son camp, qui est selon leur mode, pleine de magnificence, & chargée de tout plein d'action : & resigna cet honneur à son frere. Mais ce fut aussi le seul office de Capitaine qu'il resigna : tous les autres necessaires & vtils, il les fait tres-glorieusement & exactement. Tenant son corps couché : mais son entendement, & son courage, debout & ferme, iusques au dernier soupir : & aucunement adela. Il pouuoit miner ses ennemis, indiscretement aduancez en ses terres : & luy poisa merueilleusement, qu'à faute d'un peu de vie, & pour n'auoir qui substituer à la conduite de cette guerre, & affaires d'un estat troublé, il eust à chercher la victoire sanglante & hazardeuse, en ayant vne autre pure & nette entre ses mains. Toutesfois il mesnagea miraculeusement la durée de sa maladie, à faire consumer son ennemy, & l'attirer loing de son armée de mer, & des places maritimes qu'il auoit en la coste d'Afrique : iusques au dernier iour de sa vie, lequel par dessein, il employa & reserua à cette grande iournée. Il dressa sa bataille en rond, affiegeant de toutes pars l'ost des Portugais; lequel rond venant à se courber & serrer, les empecha non seulement au conflict, qui fut tres aspre par la valeur de ce ieune Roy assaillant, veu qu'ils auoient à montrer visage à tous sens : mais aussi les empecha à la fuite apres leur routte. Et trouuants toutes les issues faibles, & closes; furent contrains de se

reietter à eux mesmes : *coacéruanturque non solum cæde, sed etiam fuga*, & s'amonceller les vns sur les autres, fournissans aux vaincueurs vne tres-meurtriere victoire, & tres-entiere. Mourant, il se feit porter & tracasser où le besoing l'appelloit : & coulant le long des files, enhortoit ses Capitaines & soldats, les vns apres les autres. Mais vn coing de fa bataille se laissant enfoncer, on ne le peut tenir, qu'il ne montast à cheual l'espée au poing. Il s'efforçoit pour s'aller mesler, ses gents l'arrestants, qui par la bride, qui par sa robbe, & par ses estriers. Cet effort acheua d'accabler ce peu de vie, qui luy restoit. On le recoucha. Luy se resuscitant comme en sursaut de cette pasmoison, toute autre faculté luy deffaillant; pour aduertir qu'on teust sa mort (qui estoit le plus necessaire commandement, qu'il eust lors à faire, affin de n'engendrer quelque desespoir aux siens, par cette nouvelle) expira, tenant le doigt contre sa bouche close : signe ordinaire de faire silence. Qui vescu oncques si long temps, & si auant en la mort, qui mourut oncques si debout? L'extreme degré de traitter courageusement la mort, & le plus naturel, c'est la veoir, non seulement sans estonnement, mais sans soucy : continuant libre le train de la vie, iusques dedans elle. Comme Caton, qui s'amusoit à estudier & à dormir, en ayant vne violente & sanglante, presente en son cœur, & la tenant en sa main.





Des Postes.

CHAPITRE XXII.



N n'ay pas esté des plus foibles en cet exercice, qui est propre à gens de ma taille, ferme & courte : mais i'en quitte le mestier : il nous essaye trop, pour y durer long temps. Je lisois à cette heure, que le Roy Cyrus, pour recevoir plus facilement nouvelles de tous les costez de son Empire, qui estoit d'une fort grande estenduë, fit regarder combien vn cheual pouuoit faire de chemin en vn iour, tout d'une traicte, & à cette distance il establit des hommes, qui auoient charge de tenir des cheuaux prests, pour en fournir à ceux qui viendroient vers luy. Et disent aucuns, que cette vistesse d'aller, reuint à la mesure du vol des gruës. Cæsar dit que Lucius Vibulus Rufus, ayant haste de porter vn aduertissement à Pompeius, s'achemina vers luy iour & nuict, changeant de cheuaux, pour faire diligence. Et luy mesme, à ce que dit Suetone, faisoit cent mille par iour, sur vn coche de louage. Mais c'estoit vn furieux courrier : car où les riuieres luy tranchoient son chemin, il les franchissoit à nage : & ne se destourna iamais pour querir vn pont, ou

vn gué. Tiberius Nero allant voir son frere Drufus, malade en Allemaigne, fit deux cens mille, en vingt quatre heures, ayant trois coches. En la guerre des Romains contre le Roy Antiochus, T. Sempronius Gracchus, dit Tite-Liue, *per dispositos equos propè incredibili celeritate ab Amphiffa tertio die Pellam peruenit* : & appert à yeoir le lieu, que c'estoient postes assises, non freschement ordonnées pour cette course. L'inuention de Cecinna à renuoyer des nouuelles à ceux de sa maison, auoit bien plus de promptitude : il emporta quand & foy des arondelles, & les relaschoit vers leurs nids, quand il vouloit r'enuoyer de ses nouuelles, en les teignant de marque de couleur propre à signifier ce qu'il vouloit, selon qu'il auoit concerté avec les siens. Au theatre à Rome, les maistres de famille, auoient des pigeons dans leur sein, auxquels ils attachoyent des lettres, quand ils vouloient mander quelque chose à leurs gens au logis : & estoient dressez à en rapporter responce. D. Brutus en vfa assiegé à Mutine, & autres ailleurs. Au Peru, ils couroyent sur les hommes, qui les chargeoient sur les espaules à tout des portoirs, par telle agilité, que tout en courant, les premiers porteurs reiettoient aux seconds leur charge, sans arrester vn pas. T'entends que les Valachi, courriers du grand Seigneur, font des extremes diligences : d'autant qu'ils ont loy de desmonter le premier passant qu'ils trouuent en leur chemin, en luy donnant leur cheual recreu. Pour se garder de lasser, ils se serrent à trauers le corps bien estroittement, d'vne bande large comme font assez d'autres. Je n'ay trouué nul seiour à cet vsage.



Des mauuais moyens employez à bonne fin.

CHAPITRE XXIII.



L se trouue vne merueilleuse relation & correspondance, en cette vniuerselle police des ouurages de Nature : qui montre bien qu'elle n'est ny fortuite ny conduite par diuers maistres. Les maladies & conditions de nos corps, se voyent aussi aux estats & polices : les royaumes, les republiques naissent, fleurissent & fanissent de vieillesse, comme nous. Nous sommes subiects à vne repletion d'humeurs inutile & nuisible, soit de bonnes humeurs, (car cela mesme les medecins le craignent : & par ce qu'il n'y a rien de stable chez nous, ils disent que la perfection de santé trop allegre & vigoureuse, il nous la faut effimer & rabatre par art, de peur que nostre nature ne se pouuant rassoir en nulle certaine place, & n'ayant plus où monter pour s'ameliorer, ne se recule en arriere en desordre & trop à coup : ils ordonnent pour cela aux atletes les purgations & les saignées, pour leur soustraire cette superabondance de santé) soit repletion de mauuaises humeurs, qui est l'ordinaire cause des maladies. De semblable repletion se

voyent les estats fouuent malades : & a lon accoustumé d'vser de diuerfes sortes de purgation. Tantost on donne congé à vne grande multitude de familles, pour en descharger le païs, lesquelles vont chercher ailleurs où s'accommoder aux despens d'autrui. De cette façon nos anciens Francons partis du fons d'Alemaigne, vindrent se saisir de la Gaule, & en deschasser les premiers habitans : ainsi se forgea cette infinie marée d'hommes, qui s'escoula en Italie sous Brennus & autres : ainsi les Gots & Vandalas : comme aussi les peuples qui possèdent à present la Grece, abandonnerent leur naturel païs pour s'aller loger ailleurs plus au large : & à peine est il deux ou trois coins au monde, qui n'ayent senty l'effect d'un tel remuement. Les Romains bastissoient par ce moyen leurs colonies : car sentans leur ville se grossir outre mesure, ils la deschargeoient du peuple moins necessaire, & l'enuoyoient habiter & cultiuer les terres par eux conquises. Par fois aussi ils ont à escient nourry des guerres avec aucuns leurs ennemis, non seulement pour tenir leurs hommes en haleine, de peur que l'oysiueté mere de corruption, ne leur apportast quelque pire inconuenient :

*Et patimur longæ pacis mala, sæuior armis
Luxuria incumbit.*

Mais aussi pour seruir de saignée à leur Republique, & esuanter vn peu la chaleur trop vehemente de leur ieunesse : escourter & esclaircir le branchage de ce tige abondant en trop de gaillardise : à cet effect se font ils autrefois seruis de la guerre contre les Carthaginois. Au traité de Bretigny, Edoüard troi-

siesme Roy d'Angleterre, ne voulut comprendre en cette paix generale, qu'il fit avec nostre Roy, le different du Duché de Bretaigne, affin qu'il eust où se descharger, de ses hommes de guerre, & que cette foule d'Anglois, dequoy il s'estoit seruy aux affaires de deça, ne se reiettaist en Angleterre. Ce fut l'une des raisons, pourquoy nostre Roy Philippe consentit d'enuoyer Jean son fils à la guerre d'outremer : à fin d'emmener quand & luy vn grand nombre de ieunesse bouillante, qui estoit en sa gendarmerie. Il y en a plusieurs en ce temps, qui discourent de pareille façon, souhaitent que cette esmotion chaleureuse, qui est parmy nous, se peust deriuier à quelque guerre voisine, de peur que ces humeurs peccantes, qui dominant pour cette heure nostre corps, si on ne les escouille ailleurs, maintiennent nostre siebure tousiours en force, & apportent en fin nostre entiere ruine. Et de vray, vne guerre estrangere est vn mal bien plus doux que la ciuile : mais ie ne croy pas que Dieu fauorifast vne si iniuste entreprise, d'offencer & quereler autrui pour nostre commodité.

*Nil mihi tam valdè placeat Rhamnusia virgo,
Quòd temerè inuitis suscipiatur heris.*

Toutesfois la foiblesse de nostre condition, nous pousse souuent à cette necessité, de nous seruir de mauuais moyens pour vne bonne fin. Lycurgus, le plus vertueux & parfait legiflateur qui fut onques, inuenta cette tres-iniuste façon, pour instruire son peuple à la temperance, de faire enyurer par force les Elotes, qui estoient leurs serfs : à fin qu'en les voyant ainsi perdus & enseuelis dans le vin, les

Spartiates prinſent en horreur le deſbordement de ce vice. Ceux là auoyent encore plus de tort, qui permettoient anciennement que les criminels, à quelque ſorte de mort qu'ils fuſſent condamnez, fuſſent deſchirez tous viſs par les medecins, pour y voir au naturel nos parties interieures, & en eſtablir plus de certitude en leur art : car s'il ſe faut deſbaucher, on eſt plus excuſable, le faiſant pour la ſanté de l'ame, que pour celle du corps : comme les Romains dreſſoient le peuple à la vaillance & au meſpris des dangers, & de la mort, par ces furieux ſpectacles de gladiateurs & eſcrimeurs à outrance, qui ſe combattoient, détailloient, & entretuyoient en leur preſence :

*Quid veſani aliud ſibi vult ars impia ludi,
Quid mortes iuuenum, quid ſanguine paſta voluptas?*

Et dura cet vſage iuſques à Theodoſius l'Empe-
reur.

*Arripe dilatam tua dux in tempora famam,
Quodque patris ſupereſt ſucceſſor laudis habeto,
Nullus in vrbe cadat, cuius ſit pœna voluptas,
Iam ſolis contenta feris infamis arena,
Nulla cruentatis homicidia ludat in armis.*

C'eſtoit à la verité vn merueilleux exemple, & de tref-grand fruit, pour l'inſtitution du peuple, de voir tous les iours en ſa preſence, cent, deux cents, voire mille coupplés d'hommes armez les vns contre les autres, ſe hacher en pieces, avec vne ſi extreme fermeté de courage, qu'on ne leur viſt laſcher vne parole de foibleſſe ou commiſeration, iamais tourner le dos, ny faire ſeulement vn mouuement laſche, pour

gauchir au coup de leur aduerfaire : ains tendre le col à son espee, & se presenter au coup. Il est aduenu à plusieurs d'entre eux, estans blesez à mort de force playes, d'enuoyer demander au peuple, s'il estoit content de leur deuoir, auant que se coucher pour rendre l'esprit sur la place. Il ne falloit pas seulement qu'ils combattissent & mourussent constamment, mais encore allegrement : en maniere qu'on les hurloit & maudissoit, si on les voyoit estriuer à recevoir la mort. Les filles mesmes les incitoient :

*consurgit ad iñtus,
Et quoties victor ferrum iugulo inserit, illa
Delitias ait esse suas, peñúsque iacentis
Virgo modesta iubet conuerso pollice rumpi.*

Les premiers Romains employoyent à cet exemple les criminels. Mais depuis on y employa des serfs innocens, & des libres mesmes, qui se vendoyent pour cet effect : iusques à des Senateurs & Cheualiers Romains : & encores des femmes :

*Nunc caput in mortem vendunt, & funus arene,
Atque hostem sibi quisque parat cum bella quiescunt.
Hos inter fremitus nouósque lusus,
Stat sexus rudis insciúsque ferri,
Et pugnas capit improbus viriles.*

Ce que ie trouuerois fort estrange & incroyable, si nous n'estions accoustumez de voir tous les iours en nos guerres, plusieurs miliaffes d'hommes estrangers, engageants pour de l'argent leur sang & leur vie, à des querelles, où ils n'ont aucun interest.



De la grandeur Romaine.

CHAPITRE XXIIII.



E ne veux dire qu'un mot de cet argument infiny, pour montrer la simpleſſe de ceux, qui appartiennent à celle là, les chetives grandeurs de ce temps. Au ſeptieſme liure des epiſtres familiares de Cicero (& que les grammairiens en oſtent ce ſurnom, de familiares, ſ'ils veulent, car à la verité il n'y eſt pas fort à propos : & ceux qui au lieu de familiares y ont ſubſtitué *ad familiares*, peuuent tirer quelque argument pour eux, de ce que dit Suetone en la vie de Cæſar, qu'il y auoit vn volume de lettres de luy *ad familiares*) il y en a vne, qui ſ'adreſſe à Cæſar eſtant lors en la Gaule, en laquelle Cicero reſcrit ces mots, qui eſtoient ſur la fin d'un autre lettre, que Cæſar luy auoit eſcrit : Quant à Marcus Furius, que tu m'as recommandé, ie le feray Roy de Gaule, & ſi tu veux, que l'aduance quelque autre de tes amis, enuoye le moy. Il n'eſtoit pas nouueau à vn ſimple citoyen Romain, comme eſtoit lors Cæſar, de diſpoſer des Royaumes, car il oſta bien au Roy Deiotarus le ſien, pour le donner à vn Gentil-homme de

la ville de Pergame nommé Mithridates. Et ceux qui escriuent sa vie enregistrent plusieurs Royaumes par luy vendus : & Suetone dit qu'il tira pour vn coup, du Roy Ptolomæus, trois millions six cens mill' escus, qui fut bien pres de luy vendre le sien.

Tot Galatæ, tot Pontus eat, tot Lydia nummis.

Marcus Antonius disoit que la grandeur du peuple Romain ne se monroit pas tant, par ce qu'il prenoit, que par ce qu'il donnoit. Si en auoit il quelque siecle auant Antonius, osté vn entre autres, d'autorité si merueilleuse, qu'en toute son histoire, ie ne sçache marque, qui porte plus haut le nom de son credit. Antiochus possedoit toute l'Ægypte, & estoit apres à conquerir Cypre, & autres demeurants de cet empire. Sur le progrez de ses victoires, C. Popilius arriua à luy de la part du Senat : & d'abordée, refusa de luy toucher à la main, qu'il n'eust premierement leu les lettres qu'il luy apportoit. Le Roy les ayant leuës, & dict, qu'il en delibereroit : Popilius circonscrit la place où il estoit avec sa baguette, en luy disant : Ren moy responce, que ie puisse rapporter au Senat, auant que tu partes de ce cercle. Antiochus estonné de la rudesse d'un si pressant commandement, apres y auoir vn peu songé : Ie feray, dit-il, ce que le Senat me commande. Lors le salua Popilius, comme amy du peuple Romain. Auoir renoncé à vne si grande Monarchie, & cours d'une si fortunée prosperité, par l'impression de trois traits d'écriture ! Il eut vraiment raison, comme il fit, d'enuoyer depuis dire au Senat par ses ambassadeurs, qu'il auoit receu leur ordonnance, de mesme respect, que si elle fust venuë des Dieux immortels.

Tous les Royaumes qu'Auguste gagna par droit de guerre, il les rendit à ceux qui les auoyent perdus, ou en fit present à des estrangers. Et sur ce propos Tacitus parlant du Roy d'Angleterre Cogidunus, nous fait sentir par vn merueilleux traict cette infinie puissance. Les Romains, dit-il, auoyent accoustumé de toute ancienneté, de laisser les Roys, qu'ils auoyent surmontez, en la possession de leurs Royaumes, sous leur autorité : à ce qu'ils eussent des Roys mesmes, vtils de la seruitude : *Vt haberent instrumenta seruitutis & reges*. Il est vray-semblable, que Solymán, à qui nous auons veu faire liberalité du Royaume d'Hongrie, & autres estats, regardoit plus à cette consideration, qu'à celle qu'il auoit accoustumé d'alleguer; Qu'il estoit saoul & chargé, de tant de Monarchies & de domination, que sa vertu, ou celle de ses ancestres, luy auoyent acquis.





De ne contrefaire le malade.

CHAPITRE XXV.



L y a vn epigramme en Martial qui est des bons, car il y en a chez luy de toutes sortes : où il recite plaisamment l'histoire de Cælius, qui pour fuir à faire la cour à quelques grans à Rome, se trouuer à leur leuer, les assister & les suyure, fit la mine d'auoir la goutte : & pour rendre son excuse plus vray-semblable, se faisoit oindre les iambes, les auoit enuolopees, & contrefaisoit entierement le port & la contenance d'un homme gouteux. En fin la Fortune luy fit ce plaisir de l'en rendre tout à fait.

*Tantum cura potest & ars doloris,
Desit fingere Cælius podagram.*

L'ay veu en quelque lieu d'Appian, ce me semble, vne pareille histoire, d'un qui voulant eschapper aux proscriptions des triumvirs de Rome, pour se defrober de la cognoissance de ceux qui le poursuyuoient, se tenant caché & trauesti, y adiousta encore cette inuention, de contre-faire le borgne : quand il vint à recouurer vn peu plus de liberté, & qu'il voulut

deffaire l'emplatre qu'il auoit long temps porté sur son œil, il trouua que sa veuë estoit effectuellement perdue sous ce masque. Il est possible que l'action de la veuë s'estoit hebetée, pour auoir esté si long temps sans exercice, & que la force visue s'estoit toute reietée en l'autre œil. Car nous sentons euidentement que l'œil que nous tenons couuert, r'en-uoie à son compaignon quelque partie de son effect : en maniere que celuy qui reste, s'en grossit & s'en enfle. Comme aussi l'oisiueté, avec la chaleur des liaisons & des medicamens, auoit bien peu attirer quelque humeur podagrique au gouteux de Martial. Lisant chez Froissard, le vœu d'une troupe de ieunes Gentils-hommes Anglois, de porter l'œil gauche bandé, iusques à ce qu'ils eussent passé en France, & exploité quelque faict d'armes sur nous : ie me suis souuent chatouillé de ce pensément, qu'il leur eust pris, comme à ces autres, & qu'ils se fussent trouuez tous éborgnez au reuoir des maistresses, pour lesquelles ils auoyent faict l'entreprise. Les meres ont raison de tancer leurs enfans, quand ils contrefont les borgnes, les boiteux & les bicles, & tels autres defauts de la personne : car outre ce que le corps ainsi tendre en peut receuoir vn mauuais ply, ie ne sçay comment il semble que la Fortune se ioüe à nous prendre au mot : & i'ay ouy reciter plusieurs exemples de gens deuenus malades ayant deffigné de feindre l'estre. De tout temps i'ay apprins de charger ma main & à cheual & à pied, d'une baguette ou d'un baston : iusques à y chercher de l'elegance, & m'en feiourner, d'une contenance affectée. Plusieurs m'ont menacé, que Fortune tourneroit vn iour cette mignardise en necessité. Ie me fonde sur ce que ie seroy le premier gouteux de ma

race. Mais alongeons ce chapitre & le bigarrons d'une autre piece, à propos de la cecité. Pline dit d'un, qui songeant estre aueugle en dormant, se le trouua l'endemain, sans aucune maladie precedente. La force de l'imagination peut bien ayder à cela, comme i'ay dit ailleurs, & semble que Pline soit de cet aduis : mais il est plus vray-semblable, que les mouuemens que le corps sentoit au dedans, desquels les medecins trouueront, s'ils veulent, la cause, qui luy ostioient la veuë, furent occasion du songe. Adioufftons encore un' histoire voisine de ce propos, que Senèque recite en l'une de ses lettres : Tu sçais, dit-il, escriuant à Lucilius, que Harpaxte la folle de ma femme, est demeurée chez moy pour charge hereditaire : car de mon goust ie suis ennemy de ces monstres, & si i'ay enuie de rire d'un fol, il ne me le faut chercher guere loing, ie ris de moy-mesme. Cette folle, a subitement perdu la veuë. Je te recite chose estrange, mais veritable : elle ne sent point qu'elle soit aueugle, & presse incessamment son gouverneur de l'emmener, par ce qu'elle dit que ma maison est obscure. Ce que nous rions en elle, ie te prie croire, qu'il aduiant à chacun de nous : nul ne cognoist estre auare, nul conuoiteux. Encore les aueugles demandent un guide, nous nous fouruoions de nous mesmes. Je ne suis pas ambitieux, disons nous, mais à Rome on ne peut viure autrement : ie ne suis pas sumptueux, mais la ville requiert une grande despence : ce n'est pas ma faute, si ie suis cholere, si ie n'ay encore establi aucun train affeuré de vie, c'est la faute de la ieunesse. Ne cherchons pas hors de nous nostre mal, il est chez nous : il est planté en nos entrailles. Et cela mesme, que nous ne sentons pas estre malades, nous rend la

guerifon plus malaifée. Si nous ne commençons de bonne heure à nous penfer, quand aurons nous pourueu à tant de playes & à tant de maux? Si auons nous vne tref-douce medecine, que la philofophie : car des autres, on n'en fent le plaifir, qu'apres la guerifon, cette cy plaift & guerit enfemble. Voyla ce que dit Seneque, qui m'a emporté hors de mon propos : mais il y a du profit au change.





De pulchre

CHAPITRE XXIV



TOUTES VOIES que parmy cer-
tains Roys barbares. pour faire
vne imagination affectée, leur
manière estoit de joindre estroi-
tement leurs mains droites l'une
à l'autre. & s'entrelasser les
pouces : & quand à force de les
presser le sang en estoit mené au bout, ils les blef-
sèrent de quelque légère poigne. & puis se les entre-
suyrent. Les médecins disent que les pouces sont
les maistres doigts de la main. & que leur etymologie
Latine vient de *pollex*. Les Grecs l'appellent *δακτύλος*,
comme qui estoit vne autre main. Et il semble
que par fois les Latins les prennent aussi en ce sens,
de main entière :

*Sed nec vocibus excutit blandis,
Molli pollice nec rogata surgit.*

C'estoit à Rome vne signification de faueur, de com-
primer & baiffer les pouces :

Fautor utroque tam laudabit pollice ludum :

& de desfaueur de les hauffer & contourner au dehors :

*conuerso pollice vulgi
Quemlibet occidunt populariter.*

Les Romains dispensoient de la guerre, ceux qui estoient bleffez au pouce, comme s'ils n'auoient plus la prise des armes assez ferme. Auguste confisqua les biens à vn Cheualier Romain, qui auoit par malice couppe les pouces à deux siens ieunes enfans, pour les excuser d'aller aux armées : & auant luy, le Senat du temps de la guerre Italique, auoit condamné Caius Vatienus à prison perpetuelle, & luy auoit confisqué tous ses biens, pour s'estre à escient couppe le pouce de la main gauche, pour s'exempter de ce voyage. Quelqu'un, dont il ne me souuiet point, ayant gaigné vne bataille nauale, fit couper les pouces à ses ennemis vaincus pour leur oster le moyen de combatre & de tirer la rame. Les Atheniens les firent couper aux Æginetes, pour leur oster la preference en l'art de marine. En Lacedemone le maistre chastioit les enfans en leur mordant le pouce.





Couardise mere de la cruauté.

CHAPITRE XXVII.



'AY souuent ouy dire, que la couardise est mere de la cruauté : & si ay par experience apperceu, que cette aigreur, & aspreté de courage malitieux & inhumain, s'accompagne coustumierement de mollesse feminine. I'en ay veu des plus cruels, subiets à pleurer aisément, & pour des causes friuoles. Alexandre tyran de Pheres, ne pouuoit souffrir d'ouyr au theatre le ieu des tragedies, de peur que ses cytoyens ne le vissent gemir aux malheurs d'Hecuba, & d'Andromache, luy qui sans pitié, faisoit cruellement meurtrir tant de gens tous les iours. Seroit-ce foiblesse d'ame qui les rendist ainsi ployables à toutes extremitez ? La vaillance, de qui c'est l'effect de s'exercer seulement contre la resistance,

Nec nisi bellantis gaudet ceruice iuuenti,

s'arreste à voir l'ennemy à sa mercy. Mais la pusillanimité, pour dire qu'elle est aussi de la feste, n'ayant peu se mesler à ce premier rolle, prend

pour sa part le second, du massacre & du sang. Les meurtres des victoires, s'exercent ordinairement par le peuple, & par les officiers du bagage. Et ce qui fait voir tant de cruauté inouïes aux guerres populaires, c'est que cette canaille de vulgaire s'aguerrit, & le gendarme, à s'ensanglanter jusques aux coudes, & deschiqueter vn corps à ses pieds, n'ayant ressentiment d'autre vaillance.

*Et lupus & turpes instant morientibus vrsi,
Et quæcunque minor nobilitate fera est.*

Comme les chiens couïards, qui deschirent en la maison, & mordent les peaux des bestes sauvages, qu'ils n'ont osé attaquer aux champs. Qu'est-ce qui fait en ce temps, nos querelles toutes mortelles ? & que là où nos peres auoyent quelque degré de vengeance, nous commençons à cette heure par le dernier : & ne se parle d'arriué que de tuer ? Qu'est-ce, si ce n'est couïardise ? Chacun sent bien, qu'il y a plus de brauerie & desdain, à battre son ennemy, qu'à l'acheuer, & de le faire bouquer, que de le faire mourir. D'auantage que l'appetit de vengeance s'en assouuit & contente mieux : car elle ne vise qu'à donner ressentiment de foy. Voyla pourquoy, nous n'attaquons pas vne beste, ou vne pierre, quand elle nous blesse, d'autant qu'elles sont incapables de sentir nostre reuence. Et de tuer vn homme, c'est le mettre à l'abry de nostre offence. Et tout ainsi comme Bias crioit à vn meschant homme, Je sçay que tost ou tard tu en seras puny, mais ie crains que ie ne le voye pas : & plaingnoit les Orchomeniens, de ce que la penitence que Lyciscus eut de la trahison contre eux commise, venoit en saison, qu'il

n'y auoit personne de reste, de ceux qui en auoient esté interessez, & ausquels deuoit toucher le plaisir de cette penitence. Tout ainsin est à plaindre la vengeance, quand celuy enuers lequel elle s'employe, pert le moyen de la souffrir. Car comme le vengeur y veut voir, pour en tirer du plaisir, il faut que celuy sur lequel il se venge, y voye aussi, pour en receuoir du desplaisir, & de la repentance. Il s'en repentira, disons nous. Et pour luy auoir donné d'une pistolade en la teste, estimons nous qu'il s'en repente ? Au rebours, si nous nous en prenons garde, nous trouuerons qu'il nous fait la mouë en tombant. Il ne nous en sçait pas seulement mauuais gré, c'est bien loing de s'en repentir. Et luy prestons le plus fauorable de tous les offices de la vie, qui est de le faire mourir promptement & insensiblement. Nous sommes à conniller, à trotter, & à fuir les officiers de la iustice, qui nous suyuent : & luy est en repos. Le tuer, est bon pour euitier l'offence à venir, non pour venger celle qui est faicte. C'est vne action plus de crainte, que de brauerie : de precaution, que de courage : de defense, que d'entreprinse. Il est apparent que nous quittons par là, & la vraye fin de la vengeance, & le soing de nostre reputation. Nous craignons, s'il demeure en vie, qu'il nous recharge d'une pareille. Ce n'est pas contre luy, c'est pour toy, que tu t'en deffais. Au Royaume de Narsingue cet expedient nous demoureroit inutile. Là, non seulement les gents de guerre, mais aussi les artisans, demeslent leurs querelles à coups d'espée. Le Roy ne refuse point le camp à qui se veut battre : & assiste, quand ce sont personnes de qualité : estrenant le victorieux d'une chaîne d'or : mais pour laquelle conquerir, le premier, à qui il en prend

enuie, peut venir aux armes avec celuy qui la porte. Et pour s'estre desfai&t d'un combat, il en a plusieurs sur les bras. Si nous pensions par vertu estre toujours maistres de nostre ennemy, & le gourmander à nostre poste, nous serions bien marris qu'il nous eschappast, comme il fai&t en mourant. Nous voulons vaincre plus seurement qu'honorablement. Et cherchons plus la fin, que la gloire, en nostre querelle. Asinius Pollio, pour un honneste homme moins excusable, representa une erreur pareille : qui ayant escript des inuectives contre Plancus, attendoit qu'il fust mort, pour les publier. C'estoit faire la figue à un aueugle & dire des pouilles à un fourd, & offenser un homme sans sentiment plustost que d'encourir le hazard de son ressentiment. Aussi disoit on pour luy, que ce n'estoit qu'aux lutins de luitter les morts. Celuy qui attend à veoir trespasser l'auteur, duquel il veut combattre les escrits, que dit-il, sinon qu'il est foible & noisif? On disoit à Aristote, que quelqu'un auoit mesdit de luy : Qu'il face plus, dit-il, qu'il me fouët, pourueu que ie n'y soy pas. Nos peres se contentoyent de reuencher une iniure par un démenti, un démenti par un coup, & ainsi par ordre. Ils estoient assez valeureux pour ne craindre pas leur aduersaire, viuant, & outragé. Nous tremblons de frayeur, tant que nous le voyons en pieds. Et qu'il soit ainsi, nostre belle pratique d'aujourd'hui, porte elle pas de pourfuyure à mort, aussi bien celuy que nous auons offensé, que celuy qui nous a offencé? C'est aussi une espece de lâcheté, qui a introduit en nos combats singuliers, cet usage, de nous accompagner de seconds, & tiers, & quarts. C'estoit anciennement des duels, ce sont à cette heure rencontres, & batailles. La solitude

faisoit peur aux premiers qui l'inuenterent : *Quum in se cuique minimum fiducia esset*. Car naturellement quelque compagnie que ce soit, apporte confort, & soulagement au danger. On se seruoit anciennement de personnes tierces, pour garder qu'il ne s'y fît desordre & desloyauté, & pour tesmoigner de la fortune du combat. Mais depuis qu'on a pris ce train, qu'ils s'engagent eux mesmes, quiconque y est conuié, ne peut honnestement s'y tenir comme spectateur, de peur qu'on ne luy attribue, que ce soit faute ou d'affection, ou de cœur. Outre l'injustice d'une telle action, & vilenie, d'engager à la protection de vostre honneur, autre valeur & force que la vostre, ie trouue du desaduantage à vn homme de bien, & qui pleinement se fie de foy, d'aller mesler sa fortune, à celle d'un second : chacun court assez de hazard pour foy, sans le courir encore pour vn autre : & a assez à faire à s'asseurer en sa propre vertu, pour la deffence de sa vie, sans commettre chose si chere en mains tierces. Car s'il n'a esté expressement marchandé au contraire, des quatre, c'est vne partie liée. Si vostre second est à terre, vous en auez deux sus les bras, avec raison. Et de dire que c'est supercherie, elle l'est voirement : comme de charger bien armé, vn homme qui n'a qu'un tronçon d'espée; ou tout sain, vn homme qui est desia fort blessé. Mais si ce sont auantages, que vous ayez gaigné en combatant, vous vous en pouuez seruir sans reproche. La disparité & inegalité ne se poise & considere, que de l'estat en quoy se commence la meslée : du reste prenez vous en à la Fortune. Et quand vous en auez tout seul, trois sur vous, vos deux compaignons s'estant laissez tuer, on ne vous fait non plus de tort, que ie ferois

à la guerre, de donner vn coup d'espée à l'ennemy, que ie verrois attaché à l'vn des nostres, de pareil auantage. La nature de la societé porte, où il y a troupe contre troupe (comme où nostre Duc d'Orleans, deffia le Roy d'Angleterre Henry, cent contre cent, trois cents contre autant, comme les Argiens contre les Lacedemoniens : trois à trois, comme les Horatiens contre les Curiatiens) que la multitude de chascque part, n'est considerée que pour vn homme seul. Par tout où il y a compagnie, le hazard y est confus & meslé. I'ay interest domestique à ce discours. Car mon frere sieur de Matecoulom, fut conuié à Rome, à seconder vn Gentil-homme qu'il ne cognoissoit guere, lequel estoit deffendeur, & appellé par vn autre. En ce combat, il se trouua de fortune auoir en teste, vn qui luy estoit plus voisin & plus cogneu (ie voudrois qu'on me fist raison de ces loix d'honneur, qui vont si souuent choquant & troublant celles de la raison). Apres s'estre des-fait de son homme, voyant les deux maistres de la querelle, en pieds encores, & entiers, il alla des-charger son compaignon. Que pouuoit il moins ? deuoit-il se tenir coy, & regarder deffaire, si le sort l'eust ainsi voulu, celuy pour la deffence duquel, il estoit là venu ? Ce qu'il auoit fait iusques alors, ne seruoit rien à la besongne : la querelle estoit indecise. La courtoisie que vous pouuez, & certes deuez faire à vostre ennemy, quand vous l'auiez reduit en mauuais termes, & à quelque grand desaduantage, ie ne vois pas comment vous la puissiez faire, quand il va de l'interest d'autrui, où vous n'estes que fuiuant, où la dispute n'est pas vostre. Il ne pouuoit estre ny iuste, ny courtois, au hazard de celuy auquel il s'estoit presté. Aussi fut-il deliuré des pri-

sons d'Italie, par vne bien soudaine & solempne recommandation de nostre Roy. Indiscrette nation. Nous ne nous contentons pas de faire sçauoir nos vices, & folies, au monde, par reputation : nous allons aux nations estrangeres, pour les leur faire voir en presence. Mettez trois François aux deserts de Lybie, ils ne feront pas vn mois ensemble, sans se harceler & esgratigner. Vous diriez que cette peregrination, est vne partie dressée, pour donner aux estrangers le plaisir de nos tragedies : & le plus souuent à tels, qui s'eslouissent de nos maux, & qui s'en moquent. Nous allons apprendre en Italie à escrimer : & l'exerçons aux despends de nos vies, auant que de le sçauoir. Si faudroit-il suyuant l'ordre de la discipline, mettre la theorique auant la pratique. Nous trahissons nostre apprentissage :

*Primitiæ iuuenum miseræ, bellicque futuri
Dura rudimenta.*

Le sçay bien que c'est vn art vtile à la fin (au duel des deux Princes, cousins germains, en Hespaigne, le plus vieil, dit Tite Liue, par l'adresse des armes & par ruse, surmonta facilement les forces estourdies du plus ieune) & comme i'ay cognu par experience, duquel la cognoissance a grossi le cœur à aucuns, outre leur mesure naturelle. Mais ce n'est pas proprement vertu, puis qu'elle tire son appuy de l'adresse, & qu'elle prend autre fondement que de foy-mesme. L'honneur des combats consiste en la ialousie du courage, non de la science. Et pourtant ay-ie veu quelqu'un de mes amis, renommé pour grand maistré en cet exercice, choisir en ses querelles, des armes, qui luy ostassent le moyen de

cet aduantage : & lesquelles dépendoient entiere-
ment de la Fortune, & de l'assurance : à fin qu'on
n'attribuast sa victoire, plustost à son escrime, qu'à sa
valeur. Et en mon enfance, la noblesse fuyoit la
reputation de bon escrimeur comme iniurieuse :
& se desroboit pour l'apprendre, comme mestier
de subtilité, desfrogeant à la vraye & naïfue vertu.

*Non schiuar, non parar, non ritirarsi,
Vogliono costor, ne qui destrezza ha parte,
Non danno i colpi finti hor pieni, hor scarfi,
Toglie l'ira e il furor l'uso de l'arte,
Odi le spade horribilmente vrtarsi
A mezzo il ferro, il pie d'orma non parte,
Sempre è il pie fermo, è la man sempre in moto,
Ne scende taglio in van ne punta à voto.*

Les butes, les tournois, les barrieres, l'image des
combats guerriers, estoient l'exercice de nos peres.
Cet autre exercice, est d'autant moins noble, qu'il
ne regarde qu'une fin priuée : qui nous apprend à
nous entreruyner, contre les loix & la iustice : & qui
en toute façon, produit tousiours des effects dom-
mageables. Il est bien plus digne & mieux seant, de
s'exercer en choses qui assurent, non qui offensent
nostre police : qui regardent la publique seurté & la
gloire commune. Publius Rutilius Consus fut le
premier, qui instruisit le soldat, à manier ses armes
par adresse & science, qui conioignit l'art à la
vertu : non pour l'usage de querelle priuée, ce fut
pour la guerre & querelles du peuple Romain.
Escrime populaire & ciuile. Et outre l'exemple de
César, qui ordonna aux siens de tirer principale-
ment au visage des gensdarmes de Pompeius en la
bataille de Pharsale : mille autres chefs de guerre

se font ainfin aduifez , d'inuenter nouuelle forme d'armes, nouuelle forme de frapper & de se courrir, selon le befoing de l'affaire present. Mais tout ainfi que Philopœmen condamna la lufte, en quoy il excelloit, d'autant que les preparatifs qu'on employoit à cet exercice, estoient diuers à ceux, qui appartiennent à la discipline militaire, à laquelle feule il eftimoit les gens d'honneur, se deuoir amuser : il me femble auffi, que cette adrefse à quoy on façonne ses membres, ces deftours & mouuements, à quoy on dresse la ieunesse, en cette nouuelle efchole, font non feulement inutiles, mais contraires pluftoft, & dommageables à l'vfage du combat militaire. Auffi y employent communement noz gents, des armes particulieres, & peculierement destinées à cet vfage. Et i'ay veu, qu'on ne trouuoit guere bon, qu'un Gentil-homme, conuié à l'espée & au poignard, s'offrist en equipage de gendarme. Ny qu'un autre offrist d'y aller avec fa cape, au lieu du poignard. Il est digne de confideration, que Lachez, en Platon, parlant d'un apprentiffage de manier les armes, conforme au nostre, dit n'auoir iamais de cette efchole veu sortir nul grand homme de guerre, & nomméement des maistres d'icelle. Quant à ceux là, nostre experience en dit bien autant. Du reste, aumoins pouuons nous tenir que ce font fuffifances de nulle relation & correspondance. Et en l'institution des enfans de fa police, Platon interdit les arts de mener les poings, introduittes par Amycus & Epeius : & de luster, par Antæus & Cecyo : par ce qu'elles ont autre but, que de rendre la ieunesse apte au seruice bellique, & n'y conferent point. Mais ie m'en vois vn peu bien à gauche de mon theme. L'Empereur Maurice, estant aduerty

par songes, & plusieurs prognostiques, qu'un Phocas, soldat pour lors incognu, le devoit tuer : demandoit à son gendre Philippus, qui estoit ce Phocas, sa nature, ses conditions & ses mœurs : & comme entre autres choses Philippus luy dict, qu'il estoit lasche & craintif, l'Empereur conclud incontinent par là, qu'il estoit doncq meurtrier & cruel. Qui rend les tyrans si sanguinaires ? c'est le soing de leur seurte, & que leur lasche cœur, ne leur fournit d'autres moyens de s'asseurer, qu'en exterminant ceux qui les peuvent offencer, iusques aux femmes, de peur d'une esgratigneure.

Cuncta ferit dum cuncta timet.

Les premieres cruautéz s'exercent pour elles mesmes. de là s'engendre la crainte d'une iuste reuanche, qui produict apres une enfileure de nouuelles cruautéz, pour les estouffer les vnes par les autres. Philippus Roy de Macedoine, celuy qui eust tant de fusées à demesler avec le peuple Romain, agité de l'horreur des meurtres commis par son ordonnance : ne se pouuant refoudre contre tant de familles, en diuers temps offensées : print party de se saisir de tous les enfans de ceux qu'il auoit fait tuer, pour de iour en iour les perdre l'un apres l'autre, & ainssi establir son repos. Les belles matieres s'ient bien en quelque place qu'on les seme. Moy, qui ay plus de soyn du poids & vtilité des discours, que de leur ordre & suite, ne doy pas craindre de loger icy un peu à l'escart, une tres-belle histoire. Quand elles sont si riches de leur propre beauté, & se peuuent seules trop soustenir, ie me contente du bout d'un poil, pour les ioindre à mon propos. Entre les autres

condamnez par Philippus, auoit esté vn Herodicus, Prince des Theffaliens. Apres luy, il auoit encore depuis fait mourir ses deux gendres, laissant chacun vn fils bien petit. Theoxena & Archo estoient les deux veufues. Theoxena ne peut estre induite à se remarier, en estant fort pourfuyue. Archo espousa Poris, le premier homme d'entre les *Æniens*, & en eut nombre d'enfants, qu'elle laissa tous en bas age. Theoxena, espoisonnée d'une charité maternelle enuers ses nepueux, pour les auoir en sa conduite & protection, espousa Poris. Voicy venir la proclamation de l'edict du Roy. Cette courageuse mere, se deffiant & de la cruauté de Philippus, & de la licence de ses faellites enuers cette belle & tendre ieunesse, osa dire. qu'elle les tueroit plustost de ses mains, que de les rendre. Poris effrayé de cette protestation, luy promet de les desrober, & emporter à Athenes, en la garde d'aucuns siens hostes fidelles. Ils prennent occasion d'une feste annuelle, qui se celebroit à *Ænie* en l'honneur d'*Æneas*, & s'y en vont. Ayans assisté le iour aux ceremonies & banquet publique, la nuit ils s'escoulent en vn vaisseau préparé, pour gagner pais par mer. Le vent leur fut contraire : & se trouuans l'endemain à la veüe de la terre, d'où ils auoyent desmaré, furent suyuis par les gardes des ports. Au ioindre, Poris s'embejoignant à hafter les mariniers pour la fuite, Theoxena forcenée d'amour & de vengeance, se reiettant à sa premiere proposition, fait apprest d'armes & de poison, & les presentant à leur veüe : Or sus mes enfants, la mort est meshuy le seul moyen de vostre defense & liberté, & sera matiere aux Dieux de leur sainte iustice : ces espées traittes, ces coupes pleines vous en ouurent l'entrée. Courage.

Et toy mon fils, qui es plus grand, empoigne ce fer, pour mourir de la mort plus forte. Ayants d'un costé cette vigoureuse conseillère, les ennemis de l'autre, à leur gorge, ils coururent de furie chacun à ce qui luy fut le plus à main. Et demy morts furent iettez en la mer. Theoxena fiere d'auoir si glorieusement pourueu à la seureté de tous ses enfans; accolant chaudement son mary : Suyuons ces garçons, mon amy, & iouyffons de même sepulture avec eux. Et se tenants ainsin embrassez, se precipiterent : de maniere que le vaisseau fut ramené à bord, vuide de ses maistres. Les tyrans pour faire tous les deux ensemble, & tuer, & faire sentir leur colere, ils ont employé toute leur suffisance, à trouuer moyen d'allonger la mort. Ils veulent que leurs ennemis s'en aillent, mais non pas si viste, qu'ils n'ayent loisir de fauourer leur vengeance. Là dessus ils sont en grand peine : car si les tourmens sont violents, ils sont courts : s'ils sont longs, ils ne sont pas assez douloureux à leur gré : les voylà à dispenser leurs engins. Nous en voyons mille exemples en l'antiquité; & ie ne sçay si sans y penser, nous ne retenons pas quelque trace de cette barbarie. Tout ce qui est au delà de la mort simple, me semble pure cruauté. Nostre iustice ne peut esperer, que celui que la crainte de mourir & d'estre decapité, ou pendu, ne gardera de faillir; en soit empesché, par l'imagination d'un feu languissant, ou des tenailles, ou de la roue. Et ie ne sçay cependant, si nous les iettons au desespoir. Car en quel estat peut estre l'ame d'un homme, attendant vingt-quatre heures la mort, brisé sur vne rouë, ou à la vieille façon cloué à vne croix? Iosephe recite, que pendant les guerres des Romains en Iudée, passant où l'on auoit cru-

cifié quelques Juifs, trois iours y auoit, il recogneur trois de ses amis, & obtint de les offer de là; les deux moururent, dit-il, l'autre vescu encore depuis. Chalcondyle homme de foy, aux memoires qu'il a laiffé des choses aduenues de son temps, & pres de luy, recite pour extreme supplice, celuy que l'Empereur Mechmed pratiquoit souuent, de faire trancher les hommes en deux parts, par le faux du corps, à l'endroit du diaphragme, & d'un seul coup de simeterre : d'où il arriuait, qu'ils mourussent comme de deux morts à la fois : & voyoit-on, dit-il, l'une & l'autre part pleine de vie, se demener long temps apres pressée de tourment. Je n'estime pas, qu'il y eust grand'souffrance en ce mouuement. Les supplices plus hideux à voir, ne sont pas tousiours les plus forts à souffrir. Et trouue plus atroce ce que d'autres historiens en recitent contre des Seigneurs Epirotes, qu'il les fait escorcher par le menu, d'une dispensation si malicieusement ordonnée, que leur vie dura quinze iours à cette angoisse. Et ces deux autres. Crœsus ayant fait prendre un Gentilhomme fauori de Pantaleon son frere, le mena en la boutique d'un foullon, où il le fait gratter & carder, à coups de cardes & peignes de ce mestier, iusques à ce qu'il en mourut. George Sechel chef de ces payfans de Polongne, qui sous tiltre de la Croysade, firent tant de maux, deffaict en bataille par le Vayuode de Transiluanie, & prins, fut trois iours attaché nud sur un cheualet; exposé à toutes les manieres de tourmens que chacun pouuoit apporter contre luy : pendant lequel temps on fit ieufner plusieurs autres prisonniers. En fin, luy viuant & voyant, on abbreuua de son sang Lucat son cher frere, & pour le salut duquel seul il prioit, tirant

sur soy toute l'enuie de leurs meffaits : & fit on paistre vingt de ses plus fauoris Capitaines, deschirans à belles dents sa chair, & en engloutiffants les morceaux. Le reste du corps, & parties du dedans, luy expiré, furent mises bouillir, qu'on fit manger à d'autres de sa suite.





Toutes choses ont leur saison.

CHAPITRE XXVIII.



EVX qui appartient Caton le Censeur, au ieune Caton meurtrier de soy-mesme, appartient deux belles natures & de formes voisines. Le premier exploitta la sienne à plus de visages, & precelle en exploits militaires, & en vtilité de ses vacations publiques. Mais la vertu du ieune, outre ce que c'est blaspheme de luy en apparier nulle en vigueur, fut bien plus nette. Car qui deschargeroit d'enuie & d'ambition, celle du Censeur, ayant osé chocquer l'honneur de Scipion, en bonté & en toutes parties d'excellence, de bien loing plus grand que luy, & que tout autre homme de son siecle? Ce qu'on dit entre autres choses de luy, qu'en son extreme vieillesse, il se mit à apprendre la langue Grecque, d'un ardent appetit, comme pour assouvir vne longue soif, ne me semble pas luy estre fort honorable. C'est proprement ce que nous disons, retomber en enfantillage. Toutes choses ont leur saison, les bonnes & tout. Et ie puis dire mon patenostre hors de propos. Comme on defera T. Quintius Flaminius, de ce qu'estant gene-

ral d'armée, on l'auoit veu à quartier sur l'heure du conflict, s'amufant à prier Dieu, en vne bataille, qu'il gaigna.

Imponit finem sapiens & rebus honestis.

Eudemonidas voyant Xenocrates fort vieil s'empresser aux leçons de son escole : Quand sçaura certuy-cy, dit-il, s'il apprend encore ? Et Philopœmen, à ceux qui hault-louoyent le Roy Ptolomæus, de ce qu'il durcissoit sa personne tous les iours à l'exercice des armes : Ce n'est, dit-il, pas chose louable à vn Roy de son aage, de s'y exercer, il les deuoit hormais reellement employer. Le ieune doit faire ses apprests, le vieil en iouir, disent les sages. Et le plus grand vice qu'ils remerquent en nous, c'est que noz desirs raieuniissent sans cesse. Nous recommençons tousiours à viure. Nostre estude & nostre enuie deuroyent quelque fois sentir la vieillesse. Nous auons le pied à la fosse, & noz appetis & poursuites ne font que naistre.

*Tu secunda marmora
Locas sub ipsum funus, & sepulcri
Immemor, fruïs domos.*

Le plus long de mes desseins n'a pas vn an d'estenduë : ie ne pense desormais qu'à finir : me deffay de toutes nouuelles esperances & entreprinſes : prens mon dernier congé de tous les lieux, que ie laisse : & me deposse de tous les iours de ce que j'ay. *Olim iam nec perit quicquam mihi, nec acquiritur, plus superest viatici, quàm viæ.*

Vixi, & quem dederat cursum fortuna peregi.

C'est en fin tout le soulagement que ie trouue en ma vieillesse, qu'elle amortist en moy plusieurs desirs & soings, dequoy la vie est inquietée. Le soing du cours du monde, le soing des richesses, de la grandeur, de la science, de la santé, de moy. Cettuy-cy apprend à parler, lors qu'il luy faut apprendre à se taire pour iamais. On peut continuer à tout temps l'estude, non pas l'escholage. La forte chose, qu'un vieillard abecedaire !

*Diuerfos diuersa iuuant, non omnibus annis
Omnia conueniunt.*

S'il faut estudier, estudions un estude sortable à nostre condition : afin que nous puissions respondre, comme celuy, à qui quand on demanda à quoy faire ces estudies en sa decrepitude : A m'en partir meilleur, & plus à mon aise, respondit-il. Tel estude fut celuy du ieune Caton, sentant sa fin prochaine, qui se rencontra au discours de Platon, de l'eternité de l'ame. Non, comme il faut croire, qu'il ne fust de long temps garny de toute sorte de munition pour un tel deslogement. D'assurance, de volonté ferme, & d'instruction, il en auoit plus que Platon n'en a en ses escrits. Sa science & son courage estoient pour ce regard, au dessus de la philosophie. Il print cette occupation, non pour le seruice de sa mort, mais comme celuy qui n'interrompt pas seulement son sommeil, en l'importance d'une telle deliberation, il continua aussi sans choix & sans changement, ses estudies, avec les autres actions accoustumées de sa vie. La nuit, qu'il vint d'estre refusé de la Preture, il la passa à iouer. Celle en laquelle il deuoit mourir, il la passa à lire. La perte ou de la vie, ou de l'office, tout luy fut un.



De la vertu.

CHAPITRE XXIX.



L' trouue par experience, qu'il y a bien à dire entre les boutées & faillies de l'ame, ou vne resoluë & constante habitude : & voy bien qu'il n'est rien que nous ne puissions, voire iusques à surpasser la diuinité mesme, dit quelqu'un, d'autant que c'est plus, de se rendre impassible de foy, que d'estre tel, de sa condition originelle : & iusques à pouuoir ioinde à l'imbecillité de l'homme, vne resolution & assurance de Dieu. Mais c'est par secouffe. Et és vies de ces heros du temps passé, il y a quelque fois des traits miraculeux, & qui semblent de bien loing surpasser noz forces naturelles : mais ce sont traits à la verité : & est dur à croire, que de ces conditions ainsi esleuées, on en puisse teindre & abreuuer l'ame, en maniere, qu'elles luy deuiennent ordinaires, & comme naturelles. Il nous eschoit à nous mesmes, qui ne sommes qu'auortons d'hommes, d'eslancer par fois nostre ame, esueillée par les discours, ou exemples d'autrui, bien loing au delà de son ordinaire. Mais c'est vne espece de passion,

qui la pousse & agite, & qui la raut aucunement hors de soy : car ce tourbillon franchi, nous voyons, que sans y penser elle se desbande & relasche d'elle mesme, sinon iusques à la dernière touche ; au moins iusques à n'estre plus celle-là : de façon que lors, à toute occasion, pour vn oyseau perdu, ou vn verre cassé, nous nous laissons esmouuoir à peu pres comme l'un du vulgaire. Sauf l'ordre, la moderation, & la constance, i'estime que toutes choses soient faisables par vn homme bien manque & deffailant en gros. A cette cause disent les sages, il faut pour iuger bien à point d'un homme, principalement contreroller ses actions communes, & le surprendre en son à tous les iours. Pyrrho, celuy qui bastit de l'ignorance vne si plaisante science, essaya, comme tous les autres vrayement philosophes, de faire respondre sa vie à sa doctrine. Et par ce qu'il maintenoit la foiblesse du iugement humain, estre si extreme, que de ne pouoir prendre party ou inclination : & le vouloit suspendre perpetuellement balancé, regardant & accueillant toutes choses, comme indifferentes, on conte qu'il se maintenoit tousiours de mesme façon, & visage : s'il auoit commencé vn propos, il ne laissoit pas de l'acheuer, quand celuy à qui il parloit s'en fust allé : s'il alloit, il ne rompoit son chemin pour empeschement qui se presentast, conserué des precipices, du heurt des charrettes, & autres accidens par ses amis. Car de craindre ou euitier quelque chose, c'eust esté choquer ses propositions, qui estoient au sens mesmes, toute election & certitude. Quelquefois il souffrit d'estre incisé & cauterisé, d'une telle constance, qu'on ne luy en veit pas seulement siller les yeux. C'est quelque chose de ramener l'ame à ces

imagination, c'est plus d'y joindre les effets, toutes-fois il n'est pas impossible : mais de les joindre avec telle persévérance & constance, que d'en établir son train ordinaire, certes en ces entreprises si éloignées de l'usage commun, il est quasi incroyable qu'on le puisse. Voyla pourquoy comme il fust quelquefois rencontré en sa maison, tançant bien asprement avecques sa sœur, & luy étant reproché de faillir en cela à son indifférence : Quoy ? dit-il, faut-il qu'encore cette femmelette serue de tesmoignage à mes règles ? Vn'autre fois, qu'on le veit se défendre d'un chien : Il est, dit-il, tres-difficile de despouiller entièrement l'homme : & se faut mettre en deuoir, & efforcer de combattre les choses, premierement par les effets ; mais au pis aller par la raison & par les discours. Il y a environ sept ou huit ans, qu'à deux lieux d'icy, un homme de vilage, qui est encore vivant, ayant la teste de long temps rompue par la jalousie de sa femme, reuenant un iour de la besongne, & elle le bien-veignant de ses crialleries accoustumées, entra en telle furie, que sur le champ à tout la serpe qu'il tenoit encore en ses mains, s'estant moissonné tout net les piéces qui la mettoient en fièvre, les luy ietta au nez. Et il se dit, qu'un ieune Gentil-homme des nostres, amoureux & gaillard, ayant par sa persévérance amolli en fin le cœur d'une belle maîtresse, desesperé, de ce que sur le point de la charge, il s'estoit trouué mol luy mesmes & deffailly, & que,

non viriliter

Iners senile penis extulerat caput,

il s'en priua soudain reuenu au logis, & l'enuoya, cruelle & sanglante victime pour la purgation de

son offence. Si c'eust esté par discours & religion, comme les prestres de Cible, que ne dirions nous d'une si hautaine entreprise? Depuis peu de iours à Bragerac à cinq lieues de ma maison, contremont la riuere de Dordogne, vne femme, ayant esté tourmentée & battue le soir auant, de son mary chagrin & fascheux de sa complexion, delibera d'eschapper à sa rudesse au prix de sa vie, & s'estant à son leuer accointée de ses voisines comme de coustume, leur laissa couler quelque mot de recommandation de ses affaires, prit vne sienne sœur par la main, la mena avec elle sur le pont, & apres auoir pris congé d'elle, comme par maniere de ieu, sans montrer autre changement ou alteration, se precipita du hault en bas, en la riuere, où elle se perdit. Ce qu'il y a de plus en cecy, c'est que ce conseil meurt vne nuit entiere dans sa teste. C'est bien autre chose, des femmes Indiennes : car estant leur coustume aux maris d'auoir plusieurs femmes, & à la plus chere d'elles, de se tuer apres son mary, chacune par le dessein de toute sa vie, vise à gaigner ce point, & cet aduantage sur ses compagnes : & les bons offices qu'elles rendent à leur mary, ne regardent autre recompence que d'estre preferées à la compagnie de sa mort.

*vbi mortifero iacta est fax vltima letho,
Vxorum fufis stat pia turba comis :
Et certamen habent lethi, quæ viua sequatur
Coniugium, pudor est non licuisse mori :
Ardent viatrices, & flammæ pectora præbent,
Imponuntque suis ora perusta viris.*

Vn homme escrit encore en noz iours, auoir veu en ces nations Orientales, cette coustume en credit,

que non seulement les femmes s'enterrent apres leurs maris, mais auffi les esclaves, desquelles il a eu iouissance. Ce qui se fait en cette maniere. Le mary estant trespasfé, la vefue peut, si elle veut, mais peu le veulent, demander deux ou trois mois d'espace à disposer de ses affaires. Le iour venu elle monte à cheual, parée comme à nopces : & d'une contenance gaye, va, dit elle, dormir avec son espoux, tenant en sa main gauche vn miroüier, vne fiesche en l'autre. S'estant ainsi promenée en pompe, accompagnée de ses amis & parents, & de grand peuple, en feste, elle est tantost rendue au lieu public, destiné à tels spectacles. C'est vne grande place, au milieu de laquelle il y a vne fosse pleine de bois : & ioignant icelle, vn lieu releué de quatre ou cinq marches : sur lequel elle est conduite, & feruie d'un magnifique repas. Apres lequel, elle se met à baller & à chanter : & ordonne, quand bon luy semble, qu'on allume le feu. Cela fait, elle descent, & prenant par la main le plus proche des parents de son mary, ils vont ensemble à la riuere voisine, où elle se despouille toute nue, & distribue ses ioyaux & vestemens à ses amis, & se va plongeant en l'eau, comme pour y lauer ses pechez. Sortant de là, elle s'enveloppe d'un linge iaune de quatorze brasses de long, & donnant de rechef la main à ce parent de son mary, s'en reuont sur la motte, où elle parle au peuple, & recommande ses enfans, si elle en a. Entre la fosse & la motte, on tire volontiers vn rideau, pour leur oster la veüe de cette fournaise ardente : ce qu'aucunes deffendent, pour tesmoigner plus de courage. Finy qu'elle a de dire, vne femme luy presente vn vase plein d'huile à s'oindre la teste & tout le corps, lequel elle iette

dedans le feu, quand elle en a fait : & en l'instant s'y lance elle mesme. Sur l'heure, le peuple renuerse sur elle quantité de buſches, pour l'empeschcr de languir : & se change toute leur ioye en deuil & tristesse. Si ce sont personnes de moindre estoſſe, le corps du mort est porté au lieu où on le veut enterrer, & là mis en son seant, la vefue à genoux deuant luy, l'embrassant estroittement : & se tient en ce point, pendant qu'on bastit au tour d'eux, vn mur, qui venant à se hausser iufques à l'endroit des espaules de la femme, quelqu'un des siens par le derriere prenant sa teste, luy tort le col : & rendu qu'elle a l'esprit, le mur est soudain monté & clos, où ils demeurent enseuelis. En ce mesme païs, il y auoit quelque chose de pareil en leurs Gymnosophistes : car non par la contrainte d'autrui, non par l'impetuosité d'un humeur soudain : mais par expresse profession de leur regle, leur façon estoit, à mesure qu'ils auoyent atteint certain aage, ou qu'ils se voyoient menassez par quelque maladie, de se faire dresser vn bucher, & au dessus, vn liſt bien paré, & apres auoir festoyé ioyeusement leurs amis & cognoiffans, s'aller planter dans ce liſt, en telle resolution, que le feu y estant mis, on ne les viſt mouuoir, ny pieds ny mains : & ainsi mourut l'un d'eux, Calanus, en presence de toute l'armée d'Alexandre le Grand. Et n'estoit estimé entre eux, ny ſainct ny bien heureux, qui ne s'estoit ainsi tué : enuoyant son ame purgée & purifiée par le feu, apres auoir consommé tout ce qu'il y auoit de mortel & terrestre. Cette constante premeditation de toute la vie, c'est ce qui fait le miracle. Parmy noz autres disputes, celle du *Fatum*, s'y est meslée : & pour attacher les choses aduenir & nostre volonté mesmes,

à certaine & inévitable nécessité, on est encore sur cet argument, du temps passé : Puis que Dieu prevoit toutes choses devoir ainsi advenir, comme il fait, sans doute : il faut donc qu'elles adviennent ainsi. A quoy nos maîtres respondent, que le voir que quelque chose advienne, comme nous faisons, & Dieu de mesmes (car tout luy estant present, il voit plustost qu'il ne prevoit) ce n'est pas la forcer d'advenir : voire nous voyons, à cause que les choses adviennent, & les choses n'adviennent pas, à cause que nous voyons. L'advenement fait la science, non la science l'advenement. Ce que nous voyons advenir, advient : mais il pouvoit autrement advenir : & Dieu, au registre des causes des advenements qu'il a en sa prescience, y a aussi celles qu'on appelle fortuites, & les volontaires, qui despendent de la liberté qu'il a donné à nostre arbitrage, & sçait que nous faudrons, par ce que nous aurons voulu faillir. Or i'ay veu assez de gens encourager leurs troupes de cette nécessité fatale : car si nostre heure est attachée à certain point, ny les harquebuses ennemies, ny nostre hardiesse, ny nostre fuite & couraige, ne la peuvent avancer ou reculer. Cela est beau à dire, mais cherchez qui l'effectuera : & s'il est ainsi, qu'une forte & vive créance, tire apres soy les actions de mesme, certes cette foy, dequoy nous remplissons tant la bouche, est merueilleusement legere en nos siecles : sinon que le mespris qu'elle a des œuvres, luy face desdaigner leur compagnie. Tant y a, qu'à ce mesme propos, le sire de Joinville tesmoing croyable autant que tout autre, nous raconte des Bedoins, nation meslée aux Sarrazins, auxquels le Roy saint Louys eut affaire en la terre sainte, qu'ils croyoient si fermement en leur reli-

gion les iours d'un chacun estre de toute eternité prefix & contez, d'une preordonnance ineuitable, qu'ils alloient à la guerre nudz, sauf un glaiue à la turquesque, & le corps seulement couuert d'un linge blanc : & pour leur plus extreme maudisson, quand ils se courrouffoient aux leurs, ils auoyent tousiours en la bouche : Maudit fois tu, comme celuy, qui s'arme de peur de la mort. Voyla bien autre preuue de creance, & de foy, que la nostre. Et de ce rang est aussi celle que donnerent ces deux religieux de Florence, du temps de nos peres. Estans en quelque controuersé de science, ils s'accorderent, d'entrer tous deux dans le feu, en presence de tout le peuple, & en la place publique, pour la verification chacun de son party : & en estoient des-là les apprests tous faictz, & la chose iustement sur le point de l'exécution, quand elle fut interrompue par un accident improuueu. Un ieune Seigneur Turc, ayant faict un signalé fait d'armes de sa personne, à la veüe des deux batailles, d'Amurath & de l'Huniade, prestes à se donner : enquis par Amurath, qui l'auoit en si grande ieunesse & inexperience (car c'estoit la premiere guerre qu'il eust veu) remply d'une si genereuse vigueur de courage : respondit, qu'il auoit eu pour souuerain precepteur de vaillance, un lieure. Quelque iour estant à la chasse, dit-il, ie descouury un lieure en forme : & encore que i'eusse deux excellents leuriers à mon costé : si me sembla-il, pour ne le faillir point, qu'il valloit mieux y employer encore mon arc : car il me faisoit fort beau ieu. Je commençay à descocher mes flesches : & iusques à quarante, qu'il y en auoit en ma trouffe : non sans l'affener seulement, mais sans l'esueiller. Apres tout, ie descouplay mes leuriers apres, qui n'y

peurent non plus. L'apprins par là, qu'il auoit esté couuert par sa destinée : & que, ny les traits, ny les glaiues ne portent, que par le congé de nostre fatalité, laquelle il n'est en nous de reculer ny d'avancer. Ce compte doit seruir, à nous faire veoir en passant, combien nostre raison est flexible à toute forte d'images. Vn personnage grand d'ans, de nom, de dignité, & de doctrine, se vantoit à moy d'auoir esté porté à certaine mutation tres-importante de sa foy, par vne incitation estrangere, aussi bizarre : & au reste si mal concluante, que ie la trouuooy plus forte au reuers. Luy l'appelloit miracle : & moy aussi, à diuers sens. Leurs historiens disent, que la persuasion, estant populairement semée entre les Turcs de la fatale & imployable prescription de leurs iours, ayde apparemment à les asseurer aux dangers. Et ie cognois vn grand Prince, qui en fait heureusement son profit : soit qu'il la croye, soit qu'il la prenne pour excuse, à se hazarder extraordinairement : pourueu que Fortune ne se lasse trop tost, de luy faire espaule. Il n'est point aduenu de nostre memoire, vn plus admirable effect de resolution, que de ces deux qui conspirerent la mort du Prince d'Orenge. C'est merueille, comment on peut eschauffer le second, qui l'executa, à vne entreprinse, en laquelle il estoit si mal aduenu à son compagnon, y ayant apporté tout ce qu'il pouuoit. Et sur cette trace, & de mesmes armes, aller entreprendre vn Seigneur, armé d'une si fraiche instruction de defiance, puissant de suite d'amis, & de force corporelle, en sa sale, parmy ses gardes, en vne ville toute à sa deuotion. Certes il y employa vne main bien déterminée, & vn courage esmeu d'une vigoureuse passion. Vn poignard est plus seur, pour asse-

ner, mais d'autant qu'il a besoing de plus de mouuement, & de vigueur de bras, que n'a vn pistolet, son coup est plus subiect à estre gauchy, ou troublé. Que celuy là, ne courust à vne mort certaine, ie n'y fay pas grand doubte : car les esperances, dequoy on eust sceu l'amuser, ne pouuoient loger en entendement rassis : & la conduite de son exploit, montre, qu'il n'en auoit pas faute, non plus que de courage. Les motifs d'une si puissante persuation, peuuent estre diuers, car nostre fantasie fait de foy & de nous, ce qu'il luy plaist. L'execution qui fut faicte pres d'Orleans, n'eut rien de pareil, il y eut plus de hazard que de vigueur : le coup n'estoit pas à la mort, si la Fortune ne l'eust rendu tel : & l'entreprise de tirer estant à cheual, & de loing, & à vn qui se mouuoit au branle de son cheual, fut l'entreprise d'un homme, qui aymoît mieux faillir son effect, que faillir à se sauuer. Ce qui suyuit apres le montra. Car il se transist & s'enyura de la pensée de si haute execution, si qu'il perdit entierement son sens, & à conduire sa fuite, & à conduire sa langue, en ses responces. Que luy falloit-il, que recourir à ses amis au trauers d'une riuiere ? C'est vn moyen, où ie me suis ietté à moindres dangers, & que i'estime de peu de hazard, quelque largeur qu'ait le passage, pourueu que vostre cheual trouue l'entrée facile, & que vous preuoyez au delà, vn bord ayse selon le cours de l'eau. L'autre, quand on luy prononça son horrible sentence : I'y estois préparé, dit-il, ie vous estonneray de ma patience. Les Affassins, nation dependant de la Phoenicie, sont estimés entre les Mahumetans, d'une souueraine deuotion & pureté de mœurs. Ils tiennent, que le plus court chemin à gaigner Paradis, c'est de tuer quelqu'un de religion

contraire. Parquoy, on l'a veu souuent entreprendre, à vn ou deux, en pourpoint, contre des ennemis puiffans, au prix d'une mort certaine, & fans aucun foing de leur propre danger. Ainfi fut affaffiné (ce mot est emprunté de leur nom) nostre Comte Raimond de Tripoli, au milieu de fa ville : pendant noz entreprinſes de la guerre ſaincte. Et pareillement Conrad Marquis de Mont-ferrat, les meurtriers conduits au ſupplice, tous enflez & fiers d'un ſi beau chef d'œuvre.





D'un enfant monstrueux.

CHAPITRE XXX.



Ce conte s'en ira tout simple : car ie laisse aux medecins d'en discourir. Je vis auant hier vn enfant que deux hommes & vne nourrisse, qui se disoient estre le pere, l'oncle, & la tante, conduisoient, pour tirer quelque soul de le montrer, à cause de son estrangeté. Il estoit en tout le reste d'une forme commune, & se soustenoit sur ses pieds, marchoit & gasouilloit, enuiron comme les autres de mesme aage : il n'auoit encore voulu prendre autre nourriture, que du tetin de sa nourrisse : & ce qu'on essaya en ma presence de luy mettre en la bouche, il le maschoit vn peu, & le rendoit sans aualler : ses cris sembloient bien auoir quelque chose de particulier : il estoit aagé de quatorze mois iustement. Au dessoubs de ses tetins, il estoit pris & collé à vn autre enfant, sans teste, & qui auoit le conduit du dos estouppé, le reste entier : car il auoit bien l'un bras plus court, mais il luy auoit esté rompu par accident, à leur naissance : ils estoient ioints face à face, & comme si vn plus petit enfant en vouloit accoler vn plus grandet. La ioincture

& l'espace par où ils se tenoient n'estoit que de quatre doigts, ou environ, en maniere, que si vous retroussiez cet enfant imparfait, vous voyiez au dessous le nombril de l'autre : ainsi la cousture se faisoit entre les tetins & son nombril. Le nombril de l'imparfait ne se pouvoit voir, mais ouy bien tout le reste de son ventre. Voyez comme ce qui n'estoit pas attaché, comme bras, fessier, cuisses & jambes, de cet imparfait, demouroient pendants & branllans sur l'autre, & luy pouvoit aller sa longueur iusques à my jambe. La nourrice nous adioustoit, qu'il vrinait par tous les deux endroits : aussi estoient les membres de cet autre nourris, & vians, & en mesme point que les siens, sauf qu'ils estoient plus petits & menus. Ce double corps, & ces membres diuers, se rapportans à vne seule teste, pourroient bien fournir de fauorable prognostique au Roy, de maintenir sous l'vnion de ses loix, ces parts & pieces diuerses de nostre Estat. Mais de peur que l'euénement ne le desmente, il vaut mieux le laisser passer deuant : car il n'est que de deuiner en choses faictes, *Vt quum facta sunt, tum ad coniecturam aliqua interpretatione reuocantur* : comme on dit d'Epimenides qu'il deuinoit à reculons. Je vien de voir vn pastre en Medoc, de trente ans ou environ, qui n'a aucune montre des parties genitales : il a trois trous par où il rend son eau incessamment, il est barbu, a desir, & recherche l'attouchement des femmes. Ce que nous appellons monstres, ne le font pas à Dieu, qui voit en l'immensité de son ouvrage, l'infinité des formes, qu'il y a comprinses. Et est à croire, que cette figure qui nous estonne, se rapporte & tient, à quelque autre figure de mesme genre, incognu à l'homme. De sa toute sagesse, il ne part rien que bon, & commun,

& réglé : mais nous n'en voyons pas l'affortiment & la relation. *Quod crebrò videt, non miratur, etiam si, cur fiat nescit. Quod antè non vidit, id, si euenerit, ostentum esse censet.* Nous appellons contre Nature, ce qui aduient contre la coustume. Rien n'est que selon elle, quel qu'il soit. Que cette raison vniuerselle & naturelle, chasse de nous l'erreur & l'estonnement que la nouuelleté nous apporte.





De la cholere.

CHAPITRE XXXI.



LVTARQVE est admirable par tout : mais principalement, où il iuge des actions humaines. On peut voir les belles choses, qu'il dit en la comparaïson de Lycurgus, & de Numa, sur le propos de la grande simpleſſe que ce nous eſt, d'abandonner les enfans au gouuernement & à la charge de leurs peres. La plus part de noz polices, comme dit Ariſtote, laiſſent à chaſcun, en maniere des Cyclopes, la conduitte de leurs femmes & de leurs enfans, ſelon leur folle & indiſcrete fantaſie. Et quaſi les ſeules, Lacedemonienne & Cretenſe, ont commis aux loix la diſcipline de l'enſance. Qui ne voit qu'en vn Eſtat tout deſpend de ſon education & nourriture? & cependant ſans aucune diſcretion, on la laiſſe à la mercy des parens, tant fols & meſchants qu'ils ſoient. Entre autres choſes combien de fois m'a-il prins enuie, paſſant par nos ruës, de dreſſer vne farce, pour venger des garçons, que ie voyoy eſcorcher, aſſommer, & meurtir à quelque pere ou mere furieux, & forcenez de

colere ? Vous leur voyez sortir le feu & la rage des yeux,

*rabie iecur incendente feruntur
Præcipites, vt saxa iugis abrupta, quibus mons
Subtrahitur, cliuóque latus pendente recedit :*

(& selon Hippocrates les plus dangereuses maladies sont celles qui deffigurent le visage) à tout vne voix tranchante & esclatante, souuent contre qui ne fait que sortir de nourriffe. Et puis les voyla estroppez, eslourdis de coups : & nostre iustice qui n'en fait compte, comme si ces esboitements & eslochements n'estoient pas des membres de nostre chose publique.

*Gratum est quòd patriæ ciuem populoque adisti,
Si facis vt patriæ sit idoneus, vtilis agris,
Vtilis & bellorum & pacis rebus agendis.*

Il n'est passion qui esbranle tant la sincerité des iugemens, que la cholere. Aucun ne feroit doubte de punir de mort, le iuge, qui par cholere auroit condamné son criminel : pourquoy est-il non plus permis aux peres, & aux pedantes, de fouetter les enfans, & les chastier estans en cholere ? Ce n'est plus correction, c'est vengeance. Le chastiment tient lieu de medecine aux enfans ; & souffririons nous vn medecin, qui fust animé & courroucé contre son patient ? Nous mesmes, pour bien faire, ne deurions iamais mettre la main sur noz seruiteurs, tandis que la cholere nous dure. Pendant que le pouls nous bat, & que nous sentons de l'esmotion, remettons la partie : les choses nous sembleront à la verité autres, quand nous serons r'accoisez & refroidis. C'est la passion qui commande lors, c'est la passion qui parle, ce

n'est pas nous. Au trauers d'elle, les fautes nous appa-
roissent plus grandes, comme les corps au trauers
d'un brouillas. Celuy qui a faim, use de viande,
mais celuy qui veut user de chastiment, n'en doit
auoir faim ny soif. Et puis, les chastimens, qui se
font avec poix & discretion, se reçoient bien
mieux, & avec plus de fruit, de celuy qui les
souffre. Autrement, il ne pense pas auoir esté iuste-
ment condamné, par un homme agité d'ire & de
furie : & allegue pour sa iustification, les mouue-
ments extraordinaires de son maistre, l'inflammation
de son visage, les sermens inusitez, & cette sienne
inquietude, & precipitation temeraire.

*Ora tument ira, nigrescunt sanguine venæ,
Lumina Gorgoneo sæuius igne micant.*

Suetone recite, que Caius Rabirius, ayant esté con-
damné par Cæsar, ce qui luy seruit le plus enuers le
peuple (auquel il appella) pour luy faire gagner sa
cause, ce fut l'animosité & l'aspreté que Cæsar auoit
apporté en ce iugement. Le dire est autre chose que
le faire, il faut considerer le presche à part, & le
prescheur à part. Ceux-là se sont donnez beau ieu
en nostre temps, qui ont essayé de choquer la verité
de nostre Eglise, par les vices des ministres d'icelle :
elle tire ses tesmoignages d'ailleurs. C'est vne fotte
façon d'argumenter, & qui reietteroit toutes choses
en confusion. Un homme de bonnes mœurs, peut
auoir des opinions faulces, & un meschant peut
prescher verité, voire celuy qui ne la croit pas.
C'est sans doute vne belle harmonie, quand le
faire, & le dire vont ensemble : & ie ne veux pas
nier, que le dire, lors que les actions suyuent, ne

soit de plus d'autorité & efficace : comme disoit Eudamidas, oyant vn Philosophe discourir de la guerre ; Ces propos sont beaux, mais celuy qui les dit, n'en est pas croyable, car il n'a pas les oreilles accoustumées au son de la trompette. Et Cleomenes oyant vn rheteur harenguer de la vaillance, s'en print fort à rire : & l'autres'en scandalizant, il luy dit ; L'en ferois de mesmes, si c'estoit vne arondelle qui en parlast : mais si c'estoit vne aigle, ie l'orrois volontiers. L'apperçois, ce me semble, és escrits des anciens, que celuy qui dit ce qu'il pense, l'affene bien plus viuement, que celuy qui se contrefait. Oyez Cicero parler de l'amour de la liberté : oyez en parler Brutus, les escrits mesmes vous sonnent que cettuy-cy estoit homme pour l'achepter au prix de la vie. Que Cicero pere d'eloquence, traite du mespris de la mort, que Seneque en traite aussi, celuy là traine languissant, & vous sentez qu'il vous veut resoudre de chose, dequoy il n'est pas resolu. Il ne vous donne point de cœur, car luy-mesmes n'en a point : l'autre vous anime & enflamme. Ie ne voy iamais autheur, mesmement de ceux qui traitent de la vertu & des actions, que ie ne recherche curieusement quel il a esté. Car les Ephores à Sparte voyans vn homme dissolu proposer au peuple vn aduis vtile, luy commanderent de se taire, & prièrent vn homme de bien, de s'en attribuer l'inuention, & le proposer. Les escrits de Plutarque, à les bien sauouer, nous le descouurent assez ; & ie pense le cognoistre iusques dans l'ame : si voudrois-ie que nous eussions quelques memoires de sa vie. Et me suis ietté en ce discours à quartier, à propos du bon gré que ie sens à Aul. Gellius de nous auoir laissé par escrit ce compte de ses

mœurs, qui reuient à mon subiect de la cholere. Vn sien esclau mauuais homme & vicieux, mais qui auoit les oreilles aucunement abbreuüées des leçons de philosophie, ayant esté pour quelque sienne faute despouillé par le commandement de Plutarque; pendant qu'on le fouettoit, grondoit au commencement, que c'estoit sans raison, & qu'il n'auoit rien fait : mais en fin, se mettant à crier & iniurier bien à bon escient son maistre, luy reprochoit qu'il n'estoit pas philosophe, comme il s'en vantoit : qu'il luy auoit souuent ouy dire, qu'il estoit laid de se courroucer, voire qu'il en auoit fait vn liure : & ce que lors tout plongé en la colere, il le faisoit si cruellement battre, desmentoient entierement ses escrits. A cela Plutarque, tout froidement & tout rassis; Comment, dit-il, rustre, à quoy iuges tu que ie fois à cette heure courroucé ? mon visage, ma voix, ma couleur, ma parolle, te donne elle quelque tesmoignage que ie fois esmeu ? Je ne pense auoir ny les yeux effarouchez, ny le visage troublé, ny vn cry effroyable : rougis-ie ? escume-ie ? m'eschappe-il de dire chose, dequoy i'aye à me repentir ? tressaulx-ie ? fremis-ie de courroux ? car pour te dire, ce sont là les vrais signes de la cholere. Et puis se destournant à celuy qui fouettoit : Continuez, luy dit-il, tousiours vostre besongne, pendant que cettuy-cy & moy disputons. Voyla son conte. Archytas Tarentinus reuenant d'une guerre, où il auoit esté Capitaine general, trouua tout plein de mauuais mefnage en sa maison, & ses terres en friche, par le mauuais gouuernement de son receueur : & l'ayant fait appeller : Va, luy dit-il, que si ie n'estois en cholere, ie t'estrillerois bien. Platon de mesme, s'estant eschauffé contre l'un de ses esclaves, donna à Speusippus charge de

le chastier, s'excusant d'y mettre la main luy-mesme, sur ce qu'il estoit courroucé. Charillus Lacedemonien, à vn Elote qui se portoit trop insolemment & audacieusement enuers luy : Par les Dieux, dit-il, si ie n'estois courroucé, ie te ferois tout à cette heure mourir. C'est vne passion qui se plaist en soy, & qui se flatte. Combien de fois nous estans esbranlez sous vne fauce cause, si on vient à nous presenter quelque bonne deffence ou excuse, nous despitons nous contre la verité mesme & l'innocence ? l'ay retenu à ce propos vn merueilleux exemple de l'antiquité. Piso personnage par tout ailleurs de notable vertu, s'estant esmeu contre vn sien soldat, dequoy reuenant seul du fourrage, il ne luy scauoit rendre compte, où il auoit laissé vn sien compaignon, tint pour auéré qu'il l'auoit tué, & le condamna soudain à la mort. Ainsi qu'il estoit au gibet, voicy arriuer ce compaignon esgaré : toute l'armée en fit grand'feste, & apres force caresses & accollades des deux compaignons, le bourreau meine l'un & l'autre, en la presence de Piso, s'attendant bien toute l'assistance que ce luy seroit à luy-mesmes vn grand plaisir : mais ce fut au rebours, car par honte & despit, son ardeur qui estoit encore en son effort, se redoubla : & d'une subtilité que sa passion luy fournit soudain, il en fit trois coupables, par ce qu'il en auoit trouué vn innocent : & les fit depescher tous trois : Le premier soldat, par ce qu'il y auoit arrest contre luy : le second qui s'estoit esgaré, par ce qu'il estoit cause de la mort de son compaignon ; & le bourreau pour n'auoir obey au commandement qu'on luy auoit fait. Ceux qui ont à negocier avec des femmes testues, peuuent auoir essayé à quelle rage on les iette, quand on oppose à

leur agitation, le silence & la froideur, & qu'on desdaigne de nourrir leur courroux. L'orateur Celius estoit merueilleusement cholere de sa nature. A vn, qui souppoit en sa compagnie, homme de molle & douce conuersation, & qui pour ne l'esmouoir, prenoit party d'approuuer tout ce qu'il disoit, & d'y consentir : luy ne pouuant souffrir son chagrin, se passer ainsi sans aliment : Nie moy quelque chose, de par les Dieux, dit-il, affin que nous soyons deux. Elles de mesmes, ne se courroucent, qu'affin qu'on se contrecourrouce, à l'imitation des loix de l'amour. Phocion à vn homme qui luy troubloit son propos, en l'iniuriant asprement, n'y fit autre chose que se taire, & luy donner tout loisir d'espuiser sa cholere : cela faict, sans aucune mention de ce trouble, il recommença son propos, en l'endroiect où il l'auoit laissé. Il n'est replique si piquante comme est vn tel mespris. Du plus cholere homme de France (& c'est tousiours imperfection, mais plus excusable à vn homme militaire : car en cet exercice il y a certes des parties, qui ne s'en peuuent passer) ie dy souuent, que c'est le plus patient homme que ie cognoisse à brider sa cholere : elle l'agite de telle violence & fureur,

*magno veluti cum flamma sonore
Virgea suggeritur costis vndantis aheni,
Exultantque æstu latices, furit intus aquai
Fumidus atque altè spumis exuberat amnis,
Nec iam se capit vnda, volat vapor ater ad auras,*

qu'il faut qu'il se contraigne cruellement, pour la moderer. Et pour moy, ie ne sçache passion, pour laquelle couurir & soustenir, ie peusse faire vn tel effort. Je ne voudrois mettre la sagesse à si haut prix. Je ne regarde pas tant ce qu'il fait, que combien il

luy couste à ne faire pis. Vn autre se vantoit à moy, du reglement & douceur de ses mœurs, qui est, à la verité singuliere : ie luy disois, que c'estoit bien quelque chose, notamment à ceux, comme luy, d'eminente qualité, sur lesquels chacun a les yeux, de se presenter au monde tousiours bien temperez ; mais que le principal estoit de prouuoir au dedans, & à soy-mesme : & que ce n'estoit pas à mon gré, bien mesnager ses affaires, que de se ronger interieurement : ce que ie craignois qu'il fist, pour maintenir ce masque, & cette reglée apparence par le dehors. On incorpore la cholere en la cachant : comme Diogenes dit à Demosthenes, lequel de peur d'estre apperceu en vne tauerne, se reculoit au dedans : Tant plus tu te recules arriere, tant plus tu y entres. Ie conseille qu'on donne plustost vne buffe à la iouë de son valet, vn peu hors de saison, que de gehenner sa fantasie, pour représenter cette sage contenance. Et aymerois mieux produire mes passions, que de les couuer à mes despens. Elles s'alanguissent en s'esuantant, & en s'exprimant. Il vaut mieux que leur poincte agisse au dehors, que de la plier contre nous. *Omnia vitia in aperto leuiora sunt : & tunc perniciosissima, quum simulata sanitate subfidunt.* I'aduertis ceux, qui ont loy de se pouuoir courroucer en ma famille, premierement qu'ils mesnagent leur cholere, & ne l'espandent pas à tout prix : car cela en empesche l'effect & le poids. La criaillerie temeraire & ordinaire, passe en vsage, & fait que chacun la mesprise : celle que vous employez contre vn seruiteur pour son larcin, ne se sent point, d'autant que c'est celle mesme qu'il vous a veu employer cent fois contre luy, pour auoir mal riné vn verre, ou mal assis vne escabelle. Seconde-

ment, qu'ils ne se courroussent point en l'air, & regardent que leur réprehension arriue à celui de qui ils se plaignent : car ordinairement ils crient, auant qu'il soit en leur presence, & durent à crier vn siecle après qu'il est party,

Et secum petulans amentia certat.

Ils s'en prennent à leur ombre, & pouffent cette tempeste, en lieu, où personne n'en est ny chastié ny intéressé, que du tintamarre de leur voix, tel qui n'en peut mais. l'accuse pareillement aux querelles, ceux qui brauent & se mutinent sans partie : il faut garder ces Rodomontades, où elles portent.

*Mugitus veluti cum prima in praelia taurus
Terrificos ciet, atque irasci in cornua tentat,
Arboris obnixus trunco, ventosque laceffit
Ictibus, Et sparsa ad pugnam proludit arena.*

Quand ie me courrouce, c'est le plus vifvement, mais aussi le plus briefvement, & secretelement que ie puis : ie me pers bien en viftesse, & en violence, mais non pas en trouble : si que i'aille iettant à l'abandon, & sans choix, toute sorte de parolles iniurieuses, & que ie ne regarde d'affoir pertinentement mes pointes, où i'estime qu'elles blessent le plus : car ie n'y employe communement, que la langue. Mes valets en ont meilleur marché aux grandes occasions qu'aux petites. Les petites me suprennent : & le mal'heur veut, que depuis que vous estes dans le precipice, il n'importe, qui vous ayt donné le branle : vous allez tousiours iusques au fons. La cheute se presse, s'esmeut, & se haste d'elle mesme. Aux grandes occasions cela me paye, qu'elles sont si

iustes, que chacun s'attend d'en voir naistre vne raisonnable cholere : ie me glorifie à tromper leur attente : ie me bande & prepare contre celles cy, elles me mettent en ceruelle, & menassent de m'emporter bien loing si ie les suiuy. Aysément ie me garde d'y entrer, & suis assez fort, si ie l'attens, pour repousser l'impulsion de cette passion, quelque violente cause qu'elle aye : mais si elle me preoccupe, & saisit vne fois, elle m'emporte, quelque vaine cause qu'elle aye. Je marchande ainfin avec ceux qui peuuent contester avec moy : Quand vous me sentirez esmeu le premier, laissez moy aller à tort ou à droict, i'en feray de mesme à mon tour. La tempeste ne s'engendre que de la concurrence des choleres, qui se produisent volontiers l'une de l'autre, & ne naissent en vn point. Donnons à chacune sa course, nous voyla tousiours en paix. Vise ordonnance, mais de difficile execution. Par fois m'aduient il aussi, de représenter le courroucé, pour le reiglement de ma maison, sans aucune vraye emotion. A mesure que l'aage me rend les humeurs plus aigres, i'estudie à m'y opposer, & feray si ie puis que ie feray d'oresenauant d'autant moins chagrin & difficile, que i'auray plus d'excuse & d'inclination à l'estre : quoy que parcydeuant ie l'aye esté, entre ceux qui le font le moins. Encore vn mot pour clorre ce pas. Aristote dit, que la colere sert par fois d'armes à la vertu & à la vaillance. Cela est vray-semblable : toutesfois ceux qui y contredisent, respondent plaisamment, que c'est vn' arme de nouuel vsage : car nous remuons les autres armes, ceste cy nous remue : nostre main ne la guide pas, c'est elle qui guide nostre main : elle nous tient, nous ne la tenons pas.



Defence de Seneque & de Plutarque.

CHAPITRE XXXII.



LA familiarité que j'ay avec ces personnages icy, & l'assistance qu'ils font à ma vieillesse, & à mon liure maffonné purement de leurs despouilles, m'oblige à espouser leur honneur. Quant à Seneque, parmy vne miliaisse de petits liurets, que ceux de la Religion pretendue reformée font courir pour la deffence de leur cause, qui partent par fois de bonne main, & qu'il est grand dommage n'estre embesoignée à meilleur subiect, i'en ay veu autres-fois vn, qui pour alonger & remplir la similitude qu'il veut trouver, du gouvernement de nostre pauvre feu Roy Charles neufiesme, avec celuy de Neron, apparie feu Monsieur le Cardinal de Lorraine avec Seneque, leurs fortunes, d'auoir esté tous deux les premiers au gouvernement de leurs Princes, & quant & quant leurs mœurs, leurs conditions, & leurs deportemens. Enquoy à mon opinion il fait bien de l'honneur audict Seigneur Cardinal : car encore que ie soys de ceux qui estiment autant son esprit, son eloquence, son zele enuers sa religion & seruice de son Roy, & sa bonne fortune, d'estre

nay en vn siecle, où il fust si nouveau, & si rare, & quant & quant si necessaire pour le bien public, d'auoir vn personnage ecclesiastique de telle noblesse & dignité, suffisant & capable de sa charge : si est-ce qu'à confesser la verité, ie n'estime sa capacité de beaucoup pres telle, ny sa vertu si nette & entiere, ny si ferme, que celle de Seneque. Or ce liure, de-quoy ie parle, pour venir à son but, fait vne description de Seneque tres-iniurieuse, ayant emprunté ces reproches de Dion l'historien, duquel ie ne crois aucunement le tesmoignage. Car outre qu'il est inconstant, qui apres auoir appellé Seneque tres-sage tantost, & tantost ennemy mortel des vices de Neron, le fait ailleurs, auaritieux, vsurier, ambitieux, lasche, voluptueux, & contrefaisant le philosophe à fauces enseignes : sa vertu paroist si viue & vigoureuse en ses escrits, & la defence y est si claire à aucunes de ces imputations, comme de sa richesse & despence excessiue, que ie n'en croiroy aucun tesmoignage au contraire. Et d'auantage, il est bien plus raisonnable, de croire en telles choses les historiens Romains, que les Grecs & estrangers. Or Tacitus & les autres, parlent tres-honorablement, & de sa vie & de sa mort : & nous le peignent en toutes choses personnage tres-excellent & tres-vertueux. Et ie ne veux alleguer autre reproche contre le iugement de Dion, que cestuy-cy, qui est ineuitable : c'est qu'il a le sentiment si malade aux affaires Romaines, qu'il ose soustenir la cause de Iulius Cæsar contre Pompeius, & d'Antonius contré Cicero. Venons à Plutarque. Iean Bodin est vn bon auteur de nostre temps, & accompagné de beaucoup plus de iugement que la tourbe des escriuailleurs de son siecle, & merite qu'on le iuge & considere. Ie le

trouue vn peu hardy en ce passage de sa Methode de l'histoire, où il accuse Plutarque non seulement d'ignorance (surquoy ie l'eusse laissé dire : car cela n'est pas de mon gibier) mais aussi en ce que cet auteur escrit souuent des choses incroyables & entierement fabuleuses (ce sont ses mots). S'il eust dit simplement, les choses autrement qu'elles ne sont, ce n'estoit pas grande reprehension : car ce que nous n'auons pas veu, nous le prenons des mains d'autrui & à credit : & ie voy qu'à escient il recite par fois diuerfement mesme histoire : comme le iugement des trois meilleurs capitaines qui eussent onques esté, fait par Hannibal, il est autrement en la vie de Flaminius, autrement en celle de Pyrrhus. Mais de le charger d'auoir pris pour argent content, des choses incroyables & impossibles, c'est accuser de faute de iugement, le plus iudicieux auteur du monde. Et voicy son exemple : Comme, ce dit-il, quand il recite qu'un enfant de Lacedemone se laissa deschirer tout le ventre à vn renardeau, qu'il auoit desrobé, & le tenoit caché sous sa robe, iusques à mourir plustost que de descouurir son larcin. Je trouue en premier lieu cet exemple mal choisi : d'autant qu'il est bien malaisé de borner les efforts des facultez de l'ame, là où des forces corporelles, nous auons plus de loy de les limiter & cognoistre. Et à cette cause, si c'eust esté à moy à faire, i'eusse plustost choisi vn exemple de cette seconde sorte : & il y en a de moins croyables. Comme entre autres, ce qu'il recite de Pyrrhus, que tout blessé qu'il estoit, il donna si grand coup d'espée à vn sien ennemy armé de toutes pieces, qu'il le fendit du haut de la teste iusques au bas, si que le corps se partit en deux parts. En son exemple, ie n'y trouue pas grand miracle,

ny ne reçois l'excuse de quoy il couure Plutarque, d'auoir adiousté ce mot, comme on dit, pour nous aduertir, & tenir en bride nostre creance. Car si ce n'est aux choses receuës par aùthorité & reuerence d'ancienneté ou de religion, il n'eust voulu ny recevoir luy mesme, ny nous proposer à croire, choses de foy incroyables. Et que ce mot, comme on dit, il ne l'employe pas en ce lieu pour cet effect, il est aysé à voir par ce que luy mesme nous raconte ailleurs sur ce subiect de la patience des enfans Lacedemoniens, des exemples aduenuz de son temps plus malaisez à persuader. Comme celuy que Cicero a tesmoigné aussi auant luy, pour auoir, à ce qu'il dit, esté sur les lieux : Que iusques à leur temps, il se trouuoit des enfans en cette preuue de patience, à quoy on les essayoit deuant l'autel de Diane, qui souffroyent d'y estre fouëtés iusques à ce que le sang leur couloit par tout non seulement sans s'escrier, mais encores sans gemir, & aucuns iusques à y laisser volontairement la vie. Et ce que Plutarque aussi recite, avec cent autres tesmoins, qu'au sacrifice, vn charbon ardent s'estant coulé dans la manche d'un enfant Lacedemonien, ainsi qu'il encensoit, il se laissa brusler tout le bras, iusques à ce que la senteur de la chair cuyte en vint aux assistans. Il n'estoit rien selon leur coustume, où il leur allast plus de là reputation, ny dequoy ils eussent à souffrir plus de blafme & de honte, que d'estre surpris en larecin. Je suis si imbu de la grandeur de ces hommes là, que non seulement il ne me semble, comme à Bodin, que son conte soit incroyable, que ie ne le trouue pas seulement rare & estrange. L'histoire Spartaine est pleine de mille plus aspres exemples & plus rares : elle est à ce prix toute miracle. Marcellinus recite sur

griller la plante des pieds, ecraser le bout des doigts à tout le chien d'une pistole, pousser les yeux sanglants hors de la teste, à force d'avoir le front ferré d'une corde, avant que de s'estre seulement voulu mettre à rançon. L'en ay veu vn, laissé pour mort tout nud dans vn fossé, ayant le col tout meurtry & enflé, d'un licol qui y pendoit encore, avec lequel on l'auoit tirassé toute la nuit, à la queue d'un cheual, le corps percé en cent lieux, à coups de dague, qu'on luy auoit donné, non pas pour le tuer, mais pour luy faire de la douleur & de la crainte : qui auoit souffert tout cela, & iusques à y auoir perdu parole & sentiment, résolu, à ce qu'il me dit, de mourir plustost de mille morts (comme de vray, quant à sa souffrance, il en auoit passé vne toute entiere) avant que rien promettre : & si estoit vn des plus riches laboureurs de toute la contrée. Combien en a lon veu se laisser patiemment bruler & rotir, pour des opinions empruntées d'autrui, ignorées & incognues ? L'ay cogneu cent & cent femmes (car ils disent que les testes de Gascongne ont quelque prerogatiue en cela) que vous eussiez plustost fait mordre dans le fer chaud, que de leur faire desmordre vne opinion qu'elles eussent conceüe en cholere. Elles s'exasperent à l'encontre des coups & de la contrainte. Et celuy qui forgea le conte de la femme, qui pour aucune correction de menaces, & bastonnades, ne cessoit d'appeller son mary pouilleux, & qui précipitée dans l'eau haussioit encores en s'estouffant, les mains, & faisoit au dessus de sa teste, signe de tuer des poux : forgea vn conte, duquel en verité tous les iours, on voit l'image expresse en l'opiniastreté des femmes. Et est l'opiniastreté sœur de la constance, au moins en

vigueur & fermeté. Il ne faut pas iuger ce qui est possible, & ce qui ne l'est pas, selon ce qui est croyable & incroyable à nostre sens, comme j'ay dit ailleurs. Et est vne grande faute, & en laquelle toutesfois la plus part des hommes tombent : ce que ie ne dis pas pour Bodin : de faire difficulté de croire d'autrui, ce qu'eux ne sçauoient faire, ou ne voudroient. Il semble à chascun que la maistresse forme de l'humaine nature est en luy : selon elle, il faut regler tous les autres. Les allures qui ne se rapportent aux siennes, sont faintes & fauces. Luy propose lon quelque chose des actions ou facultez d'un autre : la premiere chose qu'il appelle à la consultation de son iugement, c'est son exemple : selon qu'il en va chez luy, selon cela va l'ordre du monde. O l'afnerie dangereuse & insupportable ! Moy ie considere aucuns hommes fort loing au dessus de moy, notamment entre les anciens : & encores que ie reconnoisse clairement mon impuissance à les suyure de mille pas, ie ne laisse pas de les suyure à veüe, & iuger les ressorts qui les haussent ainsi, desquels i'apperçoy aucunement en moy les semences : comme ie fay aussi de l'extreme bassesse des esprits, qui ne m'estonne, & que ie ne mescroy nont plus. Je voy bien le tour que celles là se donnent pour se monter, & i'admire leur grandeur : & ces eslanchemens que ie trouue tres-beaux, ie les embrasse : & si mes forces n'y vont, au moins mon iugement s'y applique tres-volontiers. L'autre exemple qu'il allegue des choses incroyables, & entierement fabuleuses, dictes par Plutarque : c'est qu'Agésilas fut multé par les Ephores pour auoir attiré à soy seul, le cœur & la volonté de ses citoyens. Je ne sçay quelle marque de fauceté il y treuve : mais tant y a, que Plutarque parle là des

choses qui luy deuoyent estre beaucoup mieux cognues qu'à nous : & n'estoit pas nouveau en Grece, de voir les hommes punis & exilez, pour cela seul, d'agreer trop à leurs citoyens : tefmoin l'Ostracisme & le Petalisme. Il y a encore en ce mesme lieu, vn' autre accusation qui me pique pour Plutarque, où il dit qu'il a bien afforty de bonne foy, les Romains, aux Romains, & les Grecs entre eux, mais non les Romains aux Grecz, tefmoin, dit-il, Demosthenes & Cicero, Caton & Aristides, Sylla & Lisander, Marcellus & Pelopidas, Pompeius & Agefilaus, estimant qu'il a fauorisé les Grecz, de leur auoir donné des compaignons si dispareils. C'est iustement attaquer ce que Plutarque a de plus excellent & louïable. Car en ses comparaisons (qui est la piece plus admirable de ses œuvres, & en laquelle à mon aduis il s'est autant pleu) la fidelité & sycerité de ses iugemens, esgale leur profondeur & leur poix. C'est vn philosophe, qui nous apprend la vertu. Voyons si nous le pourrons garentir de ce reproche de preuarication & fauceté. Ce que ie puis penser auoir donné occasion à ce iugement, c'est ce grand & esclatant lustre des noms Romains, que nous auons en la teste : il ne nous semble point, que Demosthenes puisse esgaler la gloire d'un consul, proconsul, & questeur de cette grande republique. Mais qui considerera la verité de la chose, & les hommes en eux mesmes, à quoy Plutarque a plus visé, & à balancer leurs mœurs, leurs naturels, leur suffisance, que leur fortune : ie pense au rebours de Bodin, que Ciceron & le vieux Caton, en doiuent de reste à leurs compaignons. Pour son dessein, i'eusse plustost choisi l'exemple du ieune Caton comparé à Phocion : car en ce pair, il se trouueroit vne plus vray-semblable

disparité à l'adavantage du Romain. Quant à Marcellus, Sylla, & Pompeius, ie voy bien que leurs exploits de guerre sont plus enflés, glorieux, & pompeux, que ceux des Grecs, que Plutarque leur apparie : mais les actions les plus belles & vertueuses, non plus en la guerre qu'ailleurs, ne sont pas toujours les plus fameuses. Je voy souuent des noms de capitaines, estouffez sous la splendeur d'autres noms, de moins de merite : tesmoin Labienus, Ventidius, Telestinus & plusieurs autres. Et à le prendre par là, si i'auois à me plaindre pour les Grecs, pourrois-je pas dire, que beaucoup moins est Camillus comparable à Themistocles, les Gracches à Agis & Cleomenes, Numa à Lycurgus ? Mais c'est folie de vouloir iuger d'un traict, les choses à tant de visages. Quand Plutarque les compare, il ne les esgale pas pourtant. Qui plus disertement & consciencieusement, pourroit remarquer leurs differences ? Vient-il à parangonner les victoires, les exploits d'armes, la puissance des armées conduites par Pompeius, & ses triumphes, avec ceux d'Agefilaus ? Je ne croy pas, dit-il, que Xenophon mesme, s'il estoit viuant, encore qu'on luy ait concedé d'escrire tout ce qu'il a voulu à l'adavantage d'Agefilaus, osast le mettre en comparaison. Parle-il de conferer Lyfander à Sylla : Il n'y a, dit-il, point de comparaison, ny en nombre de victoires, ny en hazard de batailles : car Lyfander ne gaigna seulement que deux batailles nauales, &c. Cela, ce n'est rien desrober aux Romains. Pour les auoir simplement presentez aux Grecz, il ne leur peut auoir fait iniure, quelque disparité qui y puisse estre. Et Plutarque ne les contrepoise pas entiers : il n'y a en gros aucune preference : il apparie les pieces & les circonstances, l'une apres l'autre, & les iuge

separément. Parquoy, si on le vouloit conuaincre de faueur, il falloit en esplucher quelque iugement particulier : ou dire en general, qu'il auroit failly d'af-
fortir tel Grec à tel Romain : d'autant qu'il y en auroit d'autres plus correspondans pour les apparier, & se rapportans mieux.





L'histoire de Spurina.

CHAPITRE XXXIII.



A philosophie ne pense pas auoir mal employé ses moyens, quand elle a rendu à la raison, la souveraine maistrise de nostre ame, & l'autorité de tenir en bride nos appetits. Entre lesquels ceux qui iugent qu'il n'en y a point de plus violens, que ceux que l'amour engendre, ont cela pour leur opinion, qu'ils tiennent au corps & à l'ame, & que tout l'homme en est possédé : en maniere que la santé mesmes en depend, & est la medecine par fois contrainte de leur servir de maquereillage. Mais au contraire, on pourroit aussi dire, que le meslange du corps y apporte du rabais, & de l'affoiblissement : car tels desirs sont subiects à fatieté, & capables de remedes materiels. Plusieurs ayans voulu deliurer leurs ames des alarmes continuelles que leur donnoit cet appetit, se sont seruis d'incision & deustranchement des parties esmeuës & alterées. D'autres en ont du tout abatu la force, & l'ardeur, par frequente application de choses froides, comme de neige, & de vinaigre. Les haires de nos aieulx estoient de cct usage : c'est vne matiere tissue de poil

de cheual, dequoy les vns d'entr'eux faisoient des chemises, & d'autres des ceintures à gehenner leurs reins. Vn Prince me disoit, il n'y a pas long temps, que pendant sa ieunesse, vn iour de feste solemne, en la cour du Roy François premier, où tout le monde estoit paré, il luy print enuie de se vestir de la haire, qui est encore chez luy, de monsieur son pere : mais quelque deuotion qu'il eust, qu'il ne sceut auoir la patience d'attendre la nuit pour se depouiller, & en fut long temps malade : adioustant qu'il ne pensoit pas qu'il y eust chaleur de ieunesse si aspre, que l'usage de cette recepte ne peust amortir : toutesfois à l'aduanture ne les a-il pas essayées les plus cuisantes. Car l'experience nous fait voir, qu'une telle esmotion, se maintient bien souuent sous des habits rudes & marmiteux : & que les haïres ne rendent pas tousiours heres ceux qui les portent. Xenocrates y proceda plus rigoureusement : car ses disciples pour essayer sa continence, luy ayants fourré dans son liect, Laïs, cette belle & fameuse courtisane toute nuë, sauf les armes de sa beauté & folastres apasts, ses phyltres : sentant qu'en despit de ses discours, & de ses regles, le corps reuesche commençoit à se mutiner, il se fit brusler les membres, qui auoient presté l'oreille à cette rebellion. Là où les passions qui sont toutes en l'ame, comme l'ambition, l'auarice, & autres, donnent bien plus à faire à la raison : car elle n'y peut estre secourue, que de ses propres moyens : ny ne sont ces appetits là, capables de satieté : voire ils s'esguisent & augmentent par la iouissance. Le seul exemple de Iulius Cæsar, peut suffire à nous montrer la disparité de ces appetits : car iamais homme ne fut plus addonné aux plaisirs amoureux. Le soin curieux qu'il

•

auoit de sa personne, en est vn tesmoignage, iusques à se seruir à cela, des moyens les plus lascifs qui fussent lors en vsage : comme de se faire pincer tout le corps, & farder de parfums d'vne extreme curiosité : & de soy il estoit beau personnage, blanc, de belle & allegre taille, le visage plein, les yeux bruns & vifs, s'il en faut croire Suetone : car les statues, qui se voyent de luy à Rome ne rapportent pas bien par tout, à cette peinture. Outre ses femmes, qu'il changea quatre fois, sans conter les amours de son enfance, avec le Roy de Bithynie Nicomedes, il eut le pucelage de cette tant renommée Royne d'Égypte, Cleopatra : tesmoin le petit Cæsarion, qui en naquit. Il fit aussi l'amour à Eunoé Royne de Mauritanie : & à Rome, à Posthumia, femme de Seruius Sulpitius : à Lollia, de Gabinius : à Tertulla, de Crassus, & à Mutia mesme, femme du grand Pompeius. Qui fut la cause, disent les historiens Romains, pourquoy son mary la repudia, ce que Plutarque confesse auoir ignoré. Et les Curions pere & fils reprocherent depuis à Pompeius, quand il espousa la fille de Cæsar, qu'il se faisoit gendre d'un homme qui l'auoit fait coqu, & que luy-mesme auoit accoustumé d'appeller *Ægysthus*. Il entretint outre tout ce nombre, Seruilia sœur de Caton, & mere de Marcus Brutus, dont chacun tient que proceda cette grande affection qu'il portoit à Brutus : par ce qu'il estoit nay en temps, auquel il y auoit apparence qu'il fust issu de luy. Ainsi i'ay raison, ce me semble, de le prendre pour homme extremement addonné à cette desbauche, & de complexion tres-amoureuse. Mais l'autre passion de l'ambition, dequoy il estoit aussi infiniment blessé, venant à combattre celle là, elle luy fit incontinent perdre place. Me ressouenant sur

•

ce propos de Mehemed, celui qui subiugua Constantinople, & apporta la finale extermination du nom Grec : ie ne sçache point où ces deux passions se trouuent plus egalelement balancées : pareillement indefatigable ruffien, & soldat. Mais quand en sa vie, elles se presentent en concurrence l'une de l'autre, l'ardeur querelleuse gourmande tousiours l'amoureuse ardeur. Et ceste-cy, encore que ce fust hors sa naturelle saison, ne regaigna pleinement l'autorité souveraine, que quand il se trouua en grande vieillesse, incapable de plus soutenir le faix des guerres. Ce qu'on recite pour vn exemple contraire de Ladislaus Roy de Naples, est remarquable : Que bon capitaine, courageux, & ambitieux, il se propoisoit pour fin principale de son ambition, l'exécution de sa volupté, & iouissance de quelque rare beauté. Sa mort fut de mesme. Ayant rengé par vn siege bien poursuiuy, la ville de Florence si à destroit, que les habitants estoient apres à composer de sa victoire : il la leur quitta pourueu qu'ils luy liurassent vne fille de leur ville dequoy il auoit ouy parler, de beauté excellente. Force fut de la luy accorder, & garantir la publique ruine par vne iniure priuée. Elle estoit fille d'un medecin fameux de son temps : lequel se trouuant engagé en si villaine nécessité, se resolut à vne haute entreprinse. Comme chacun paroit sa fille & l'attournoit d'ornemens & ioyaux, qui la peussent rendre agreable à ce nouuel amant, luy aussi luy donna vn mouchoir exquis en senteur & en ourage, duquel elle eust à se seruir en leurs premieres approches : meuble, qu'elles n'y oublient guere en ces quartiers là. Ce mouchoir empoisonné selon la capacité de son art, venant à se frotter à ces chairs esmeues & pores

ouverts, inspira son venin si promptement, qu'ayant soudain changé leur sueur chaude en froide, ils expirèrent entre les bras l'un de l'autre. Le m'en reuay à Cæsar. Ses plaisirs ne luy firent iamais defrober vne seule minute d'heure, ny destourner vn pas des occasions qui se presentoient pour son aggrandissement. Cette passion regenta en luy si souuerainement toutes les autres, & posseda son ame d'une autorité si pleine, qu'elle l'emporta où elle voulut. Certes i'en fuis despit : quand ie considere au demeurant, la grandeur de ce personnage, & les merueilleuses parties qui estoient en luy : tant de suffisance en toute sorte de sçauoir, qu'il n'y a quasi science en quoy il n'ait escrit : il estoit tel orateur, que plusieurs ont preferé son eloquence à celle de Cicero : & luy-mesmes, à mon aduis, n'estimoit luy deuoir guere en cette partie. Et ses deux Anticatons, furent principalement escrits pour contre-balancer le bien dire, que Cicero auoit employé en son Caton. Au demeurant, fut-il iamais ame si vigilante, si actiue, & si patiente de labeur que la sienne ? Et sans doubte, encore estoit elle embellie de plusieurs rares semences de vertu, ie dy viues, naturelles, & non contre-faites. Il estoit singulierement sobre, & si peu delicat en son manger, qu'Oppius recite, qu'un iour luy ayant esté présenté à table, en quelque sauce de l'huyle medecinée, au lieu d'huyle simple, il en mangea largement, pour ne faire honte à son hôte. Vne autrefois, il fit fouëtter son boulenger, pour luy auoir seruy d'autre pain que celui du commun. Caton mesme auoit accoustumé de dire de luy, que c'estoit le premier homme sobre, qui se fust acheminé à la ruyne de son pays. Et quant à ce que ce mesme Caton l'appella vn iour yurongne, cela aduint en

cette façon. Estans tous deux au Senat, où il se parloit du fait de la coniuration de Catilina, de laquelle Cæsar estoit soupçonné, on luy vint apporter de dehors, vn breuet à cachetes : Caton estimant que ce fust quelque chose, dequoy les coniurex l'aduertissent, le somma de le luy donner : ce que Cæsar fut contrainct de faire, pour euer vn plus grand soupçon. C'estoit de fortune vne lettre amoureuse, que Seruilia sœur de Caton luy escriuoit : Caton l'ayant leuë, la luy reietta, en luy disant : Tien yurongne. Cela, dis-je, fut plustost vn mot de desdain & de colere, qu'un expres reproche de ce vice : comme souuent nous iniurions ceux qui nous faschent, des premieres iniures qui nous viennent à la bouche, quoy qu'elles ne soyent nullement deuës à ceux à qui nous les attachons. Ioinct que ce vice que Caton luy reproche, est merueilleusement voisin de celuy, auquel il auoit surpris Cæsar : car Venus & Bacchus se conuiennent volontiers, à ce que dit le proverbe : mais chez moy Venus est bien plus allegre, accompagnée de la sobriété. Les exemples de sa douceur, & de sa clemence, enuers ceux qui l'auoient offensé sont infinis : ie dis outre ceux qu'il donna, pendant le temps que la guerre ciuile estoit encore en son progrès, desquels il fait luy-mesmes assez sentir par ses escrits, qu'il se seruoit pour amadouër ses ennemis, & leur faire moins craindre sa future domination & sa victoire. Mais si faut il dire que ces exemples là s'ils ne sont suffisans à nous tesmoigner sa naïue douceur, ils nous montrent au moins vne merueilleuse confiance & grandeur de courage, en ce personnage. Il luy est aduenü souuent, de renuoyer des armées toutes entieres à son ennemy, apres les auoir vaincues, sans daigner seulement les obliger par serment,

finon de le fauorifer, aumoins de se contenir fans luy faire la guerre : il a prins trois & quatre fois tels capitaines de Pompeius, & autant de fois remis en liberté. Pompeius declaroit ses ennemis, tous ceux qui ne l'accompaignoient à la guerre : & luy fit proclamer qu'il tenoit pour amis tous ceux qui ne bougeoient, & qui ne s'armoyent effectivement contre luy. A ceux de ses capitaines, qui se desfroboient de luy pour aller prendre autre condition, il r'enuoit encore les armes, cheuaux, & equipages. Les villes qu'il auoit prinſes par force, il les laissoit en liberté de suyure tel party qu'il leur plairoit, ne leur donnant autre garnison, que la memoire de sa douceur & clemence. Il deffendit le iour de sa grande bataille de Pharſale, qu'on ne mist qu'à toute extremité, la main sur les citoyens Romains. Voyla des traits bien hazardeux selon mon iugement : & n'est pas merueilles si aux guerres ciuiles, que nous sentons, ceux qui combattent, comme luy, l'estat ancien de leur pays, n'en imitent l'exemple. Ce sont moyens extraordinaires, & qu'il n'appartient qu'à la fortune de Cæſar, & à son admirable pouruoyance, d'heureusement conduire. Quand ie conſidere la grandeur incomparable de cette ame, i'excuse la victoire, de ne s'estre peu depeſtrer de luy, voire en cette tref-iniuſte & tref-inique cauſe. Pour reuenir à sa clemence, nous en auons plusieurs naiſs exemples, au temps de sa domination, lors que toutes choses estants reduites en sa main, il n'auoit plus à se feindre. Caius Memmius auoit eſcrit contre luy des oraifons tref-poingnantes, ausquelles il auoit bien aigrement reſpondu : si ne laissa-il bien tost apres d'ayder à le faire Conſul. Caius Caluus qui auoit fait plusieurs epigrammes iniurieux contre luy, ayant employé de ses amis

pour le reconcilier, Cæsar se conuia luy-mesme à luy escrire le premier. Et nostre bon Catulle, qui l'auoit testonné si rudement sous le nom de Mamurra, s'en estant venu excuser à luy, il le fit ce iour mesme soupper à sa table. Ayant esté aduertý d'aucuns qui parloient mal de luy, il n'en fit autre chose, que declarer en vne sienne harangue publique, qu'il en estoit aduertý. Il craignoit encore moins ses ennemis, qu'il ne les haïssoit. Aucunes coniurations & assembles, qu'on faisoit contre sa vie, luy ayants esté descouuertes, il se contenta de publier par edit qu'elles luy estoient cognuës, sans autrement en pourfuyure les auteurs. Quant au respect qu'il auoit à ses amis : Caius Oppius voyageant avec luy, & se trouuant mal, il luy quitta vn feul logis qu'il y auoit, & coucha toute la nuit sur la dure & au descouuert. Quant à sa iustice, il fit mourir vn sien seruiteur, qu'il aimoit singulierement, pour auoir couché avecques la femme d'un cheualier Romain, quoy que personne ne s'en plaignist. Iamais homme n'apporta, ny plus de moderation en sa victoire, ny plus de resolution en la fortune contraire. Mais toutes ces belles inclinations furent alterées & estouffées, par cette furieuse passion ambitieuse : à laquelle il se laissa si fort emporter, qu'on peut aisément maintenir, qu'elle tenoit le timon & le gouuernail de toutes ses actions. D'un homme liberal, elle en rendit vn voleur public, pour fournir à cette profusion & largesse, & luy fit dire ce vilain & tresiniuste mot, que si les plus meschans & perdus hommes du monde, luy auoyent esté fidelles, au seruice de son agrandissement, il les cheriroit & auanceroit de son pouuoir, aussi bien que les plus gens de bien : l'enyura d'une vanité si extreme, qu'il

oïoit se vanter en présence de ses concitoyens, d'avoir rendu cette grande Republique Romaine, vn nom sans forme & sans corps : & dire que ses responces deuoyent mesmuy seruir de loix : & recevoir assis, le corps du Senat venant vers luy : & souffrir qu'on l'adorast, & qu'on luy fist en sa presence des honneurs diuins. Somme, ce seul vice, à mon aduis, perdit en luy le plus beau, & le plus riche naturel qui fut onques : & a rendu sa memoire abominable à tous les gens de bien, pour auoir voulu chercher sa gloire de la ruyne de son pais, & subuersion de la plus puissante, & fleurissante chose publique que le monde verra iamais. Il se pourroit bien au contraire, trouuer plusieurs exemples de grands personnages, ausquels la volupté a faict oublier la conduite de leurs affaires, comme Marcus Antonius, & autres : mais où l'amour & l'ambition seroient en esgale balance, & viendroient à se choquer de forces pareilles, ie ne fay aucun doute, que ceste-cy ne gaignast le prix de la maistrise. Or pour me remettre sur mes brisées, c'est beaucoup de pouuoir brider nos appetits, par le discours de la raison, ou de forcer nos membres, par violence, à se tenir en leur deuoir. Mais de nous fouëtter pour l'interest de nos voisins, de non seulement nous deffaire de cette douce passion, qui nous chatouille, du plaisir que nous sentons de nous voir agreables à autry, & ayez & recherchez d'vn chascun : mais encore de prendre en haine, & à contre-cœur nos graces, qui en sont cause, & condamner nostre beauté, par ce que quelqu'autre s'en eschauffe, ie n'en ay veu guere d'exemples : cestuy-cy en est. Spurina ieune homme de la Toscane,

Qualis gemma micat fuluum quæ diuidit aurum,

*Aut collo decus aut capiti, vel quale per artem
Inclusum buxo aut Eriçia terebintho
Lucet ebur,*

estant doié d'une singuliere beauté, & si excessiue, que les yeux plus continents, ne pouuoient en souffrir l'esclat continement, ne se contentant point de laisser sans secours tant de fièvre & de feu, qu'il alloit attisant par tout, entra en furieux despit contre foy-mesmes, & contre ces riches presens, que Nature luy auoit faits : comme si on se deuoit prendre à eux, de la faute d'autrui : & détailla, & troubla à force de playes, qu'il se fit à escient, & de cicatrices, la parfaite proportion & ordonnance que Nature auoit si curieusement obseruée en son visage. Pour en dire mon aduis : i'admire telles actions, plus que ie ne les honnore. Ces excez sont ennemis de mes regles. Le dessein en fut beau, & consciencieux : mais, à mon aduis, vn peu manque de prudence. Quoy ? si sa laideur seruit depuis à en ietter d'autres au peché de mespris & de haine, ou d'enuie, pour la gloire d'une si rare recommandation : ou de calomnie, interpretant cette humeur, à vne forcenée ambition. Y a-il quelque forme, de laquelle le vice ne tire, s'il veult, occasion à s'exercer en quelque maniere ? Il estoit plus iuste, & aussi plus glorieux, qu'il fist de ces dons de Dieu, vn subiect de vertu exemplaire, & de reglement. Ceux, qui se desrobent aux offices communs, & à ce nombre infini de regles espineuses, à tant de visages, qui lient vn homme d'exacte preud'homme, en la vie ciuile : font, à mon gré, vne belle espargne : quelque pointe d'aspreté peculiere qu'ils s'enoignent. C'est aucument mourir, pour fuir la peine de bien viure. Ils peuent auoir autre prix, mais le prix de la diffi-

culté, il ne m'a iamais semblé qu'ils l'eussent. Ny qu'en malaifance, il y ait rien audelà, de se tenir droit emmy les flots de la presse du monde, respondant & satisfaisant loyalement à tous les membres de sa charge. Il est à l'adventure plus facile, de se passer nettement de tout le sexe, que de se maintenir deuëment de tout poinct, en la compagnie de sa femme. Et a l'on dequoy couler plus incurieusement, en la pauureté, qu'en l'abondance, iustement dispensée. L'vsage, conduit selon raison, a plus d'aspreté, que n'a l'abstinence. La moderation est vertu bien plus affaireuse, que n'est la souffrance. Le bien viure du ieune Scipion, a mille façons. Le bien viure de Diogenes, n'en a qu'une. Ceste-cy surpasse d'autant en innocence les vies ordinaires, comme les exquisés & accomplies la surpassent en vtilité & en force.





*Obferuation fur les moyens de faire la guerre,
de Iulius Cæfar.*

CHAPITRE XXXIIII.



N recite de plusieurs chefs de guerre, qu'ils ont eu certains liures en particuliere recommandation, comme le grand Alexandre, Homere : Scipion Aphricain, Xenophon : Marcus Brutus, Polybius : Charles cinquiesme, Philippe de Comines. Et dit-on de ce temps, que Machiauel est encores ailleurs en credit. Mais le feu Marefchal Stroffy, qui auoit pris Cæfar pour fa part, auoit fans doubte bien mieux choifi : car à la verité ce deuroit estre le breuiaire de tout homme de guerre, comme eftant le vray & fouuerain patron de l'art militaire. Et Dieu fçait encore de quelle grace, & de quelle beauté il a fardé cette riche matiere, d'une façon de dire si pure, si delicate, & si parfaicte, qu'à mon gouft, il n'y a aucuns efcris au monde, qui puiſſent estre comparables aux fiens, en cette partie. Je veux icy enregiſtrer certains traiçts particuliers & rares, fur le faiçt de ſes guerres, qui me ſont demeurez en memoire. Son armée eftant en quelque effroy, pour le bruit qui

couroit des grandes forces, que menoit contre luy le Roy Iuba, au lieu de rabattre l'opinion que ses soldats en auoyent prise, & appetisser les moyens de son ennemy, les ayant fait assembler pour les r'asseurer & leur donner courage, il print vne voye toute contraire à celle que nous auons accoustumé : car il leur dit qu'ils ne se missent plus en peine de s'enquerir des forces que menoit l'ennemy, & qu'il en auoit eu bien certain aduertissement : & lors il leur en fit le nombre surpassant de beaucoup, & la verité, & la renommée, qui en couroit en son armée. Suiuant ce que conseille Cyrus en Xenophon. D'autant que la tromperie n'est pas de tel interest, de trouuer les ennemis par effect plus foibles qu'on n'auoit esperé : que de les trouuer à la verité bien forts, apres les auoir iugez foibles par reputation. Il accoustumoit sur tout ses soldats à obeyr simplement, sans se mesler de contreroller, ou parler des desseins de leur Capitaine ; lesquels il ne leur communiquoit que sur le point de l'execution : & prenoit plaisir s'ils en auoyent descouuert quelque chose, de changer sur le champ d'aduis, pour les tromper : & souuent pour cet effect ayant assigné vn logis en quelque lieu, il passoit outre, & allongeoit la iournée, notamment s'il faisoit mauvais temps & pluuieux. Les Souiffes, au commencement de ses guerres de Gaule, ayans enuoyé vers luy pour leur donner passage au trauers des terres des Romains ; estant deliberé de les empescher par force, il leur contrefit toutesfois vn bon visage, & print quelques iours de delay à leur faire responce, pour se seruir de ce loisir, à assembler son armée. Ces pauvres gens ne sçauoyent pas combien il estoit excellent mesnager du temps : car il

redit maintes-fois, que c'est la plus souueraine partie d'un capitaine, que la science de prendre au point les occasions, & la diligence, qui est en ses exploits; à la verité, inouye & incroyable. S'il n'estoit pas fort conscientieux en cela, de prendre aduantage sur son ennemy, sous couleur d'un traicté d'accord : il l'estoit aussi peu, en ce qu'il ne requeroit en ses soldats autre vertu que la vaillance, ny ne punissoit guere autres vices, que la mutination, & la desobeyssance. Souuent apres ses victoires, il leur laschoit la bride à toute licence; les dispensant pour quelque temps des regles de la discipline militaire, adioustant à cela, qu'il auoit des soldats si bien creez, que tous parfumez & musquez, ils ne laissoient pas d'aller furieusement au combat. De vray, il ayroit qu'ils fussent richement armez, & leur faisoit porter des harnois grauez, dorez & argentez : afin que le soing de la conseruation de leurs armes, les rendist plus aspres à se deffendre. Parlant à eux, il les appelloit du nom de compagnons, que nous vsons encore : ce qu' Auguste son successeur reforma, estimant qu'il l'auoit fait pour la necessité de ses affaires, & pour flatter le cœur de ceux qui ne le suiuoient que volontairement :

Rheni mihi Cæsar in vndis

Dux erat, hic socius, facinus quos inquinat, æquat :

mais que cette façon estoit trop rabbaissée, pour la dignité d'un Empereur & general d'armée, & remit en train de les appeller seulement soldats. A cette courtoisie, Cæsar mesloit toutesfois vne grande seuerité, à les reprimer. La neuuesme legion s'estant mutinée au pres de Plaifance, il la cassa avec igno-

minie, quoy que Pompeius fust lors encore en pieds, & ne la reçeut en grace qu'avec plusieurs supplications. Il les rappaisoit plus par autorité & par audace, que par douceur. Là où il parle de son passage de la riuere du Rhin, vers l'Allemagne, il dit qu'estimant indigne de l'honneur du peuple Romain, qu'il passast son armée à nauires, il fit dresser vn pont, afin qu'il passast à pied ferme. Ce fut là, qu'il bastit ce pont admirable, dequoy il dechiffre particulièrement la fabrique : car il ne s'arreste si volontiers en nul endroit de ses faits, qu'à nous représenter la subtilité de ses inuentions; en telle sorte d'ouurages de main. I'y ay aussi remarqué cela, qu'il fait grand cas de ses exhortations aux soldats auant le combat : car où il veut montrer auoir esté surpris, ou pressé, il allegue tousiours cela, qu'il n'eut pas seulement loisir de haranguer son armée. Auant cette grande bataille contre ceux de Tournay; Cæsar, dict-il, ayant ordonné du reste, courut soudainement, où la fortune le porta, pour exhorter ses gens; & rencontrant la dixiesme legion, il n'eut loisir de leur dire, sinon, qu'ils eussent souuenance de leur vertu accoustumée, qu'ils ne s'estonnassent point, & soustignassent hardiment l'effort des aduersaires : & par ce que l'ennemy estoit des-ia approché à vn iect de trait, il donna le signe de la bataille : & de là estant passé soudainement ailleurs pour en encourager d'autres, il trouua qu'ils estoient des-ia aux prises : voyla ce qu'il en dit en ce lieu là. De vray, sa langue luy a fait en plusieurs lieux de bien notables seruices, & estoit de son temps mesme, son eloquence militaire en telle recommandation, que plusieurs en son armée recueilloient ses harangues : & par ce moyen, il en fut assemblé des

volumes, qui ont duré long temps apres luy. Son parler auoit des graces particulieres; si que ses familiers, & entre autres Auguste, oyant reciter ce qui en auoit esté recueilly, recognoissoit iusques aux phrasés, & aux mots, ce qui n'estoit pas du sien. La premiere fois qu'il sortit de Rome, avec charge publique, il arriua en huit iours à la riuere du Rhone, ayant dans son coche deuant luy vn secretaire ou deux qui escriuoient sans cesse, & derriere luy, celuy qui portoit son espée. Et certes quand on ne feroit qu'aller, à peine pourroit-on atteindre à cette promptitude, dequoy tousiours victorieux ayant laissé la Gaule, & suiuant Pompeius à Brindes, il subiuga l'Italie en dixhuit iours; reuint de Brindes à Rome; de Rome il s'en alla au fin fond de l'Espagne; où il passa des difficultez extremes, en la guerre contre Afranius & Petreius, & au long siege de Marseille: de là il s'en retourna en la Macedoine, battit l'armée Romaine à Pharsale; passa de là, suiuant Pompeius, en Ægypte, laquelle il subiuga; d'Ægypte il vint en Syrie, & au pays de Pont, où il combattit Pharnaces; de là en Afrique, où il deffit Scipion & Iuba; & rebroussa encore par l'Italie en Espagne, où il deffit les enfans de Pompeius.

*Ocior & cali flammis & tigride feta.
 Ac veluti montis saxum de vertice præcep
 Cum ruit auulsum vento, seu turbidus imber
 Proluit, aut annis soluit sublapsa vetustas,
 Fertur in abruptum magno mons improbus æstu,
 Exultatque solo, filuas, armenta, virósque,
 Inuoluens secum.*

Parlant du siege d'Auaricum, il dit, que c'estoit sa coustume, de se tenir nuit & iour pres des ouuriers,

qu'il auoit en befoigne. En toutes entreprises de consequence, il faisoit tousiours la descouuerte luy mesme, & ne passa iamais son armée en lieu, qu'il n'eust premierement reconnu. Et si nous croyons Suetone; quand il fit l'entreprise de traicter en Angleterre, il fut le premier à fonder le gué. Il auoit accoustumé de dire, qu'il aimoit mieux la victoire qui se conduisoit par conseil que par force. Et en la guerre contre Petreius & Afranius, la Fortune luy presentant vne bien apparante occasion d'aduantage; il la refusa, dit-il, esperant auec vn peu plus de longueur, mais moins de hazard, venir à bout de ses ennemis. Il fit aussi là vn merueilleux traict, de commander à tout son ost, de passer à nage la riuere sans aucune necessité,

*rapuitque ruens in prælia miles,
Quod fugiens timuisset iter, mox vda receptis
Membra fouent armis, gelidâsque à gurgite, cursu
Restituunt artus.*

Le le trouue vn peu plus retenu & consideré en ses entreprises, qu'Alexandre : car cettuy-cy semble rechercher & courir à force les dangers, comme vn impetueux torrent, qui choque & attaque sans discretion & sans chois, tout ce qu'il rencontre.

*Sic tauri-formis voluitur Aufidus,
Qui Regna Dauni perfluit Appuli
Dum sæuit, horrendâque cultis
Diluuiem meditatur agris.*

Aussi estoit-il embesongné en la fleur & premiere chaleur de son aage; là où Cæsar s'y print estant desia meur & bien auancé. Outre ce, qu'Alexandre

estoit d'une temperature plus sanguine, cholere, & ardente : & si esmouuoit encore cette humeur par le vin, duquel Cæsar estoit tres-abstinent. Mais où les occasions de la necessité se presentoyent, & où la chose le requeroit, il ne fut iamais homme faisant meilleur marché de sa personne. Quant à moy; il me semble lire en plusieurs de ses exploits, vne certaine resolution de se perdre, pour fuyr la honte d'estre vaincu. En cette grande bataille qu'il eut contre ceux de Tournay, il courut se presenter à la teste des ennemis, sans bouclier, comme il se trouua, voyant la pointe de son armée s'esbranler : ce qui luy est aduenu plusieurs autres fois. Oyant dire que ses gens estoient assiegez, il passa desguisé au trauers l'armée ennemie, pour les aller fortifier de sa presence. Ayant trauerfé à Dirrachium, avec bien petites forces, & voyant que le reste de son armée qu'il auoit laissée à conduire à Antonius, tardoit à le suiure, il entreprit luy seul de repasser la mer par vne tres-grande tormente : & se desroba, pour aller reprendre le reste de ses forces; les ports de delà, & toute la mer estant saisie par Pompeius. Et quant aux entreprises qu'il a faites à main armée, il y en a plusieurs, qui surpassent en hazard tout discours de raison militaire : car avec combien foibles moyens, entreprint-il de subiuquer le Royaume d'Égypte : & depuis d'aller attaquer les forces de Scipion & de Iuba, de dix parts plus grandes que les siennes? Ces gens là ont eu ie ne sçay quelle plus qu'humaine confiance de leur fortune : & disoit-il, qu'il falloit executer, non pas consulter les hautes entreprises. Apres la bataille de Pharsale, comme il eust enuoyé son armée deuant en Asie, & passast avec vn seul vaisseau, le destroit de l'Hellepont, il rén-

contra en mer Lucius Cassius, avec dix gros nauires de guerre : il eut le courage non seulement de l'attendre, mais de tirer droit vers luy, & le sommer de se rendre : & en vint à bout. Ayant entrepris ce furieux siege d'Alexia, où il y auoit quatre vingts mille hommes de deffence, toute la Gaule s'estant esleuée pour luy courre sus, & leuer le siege, & dressé vn' armée de cent neuf mille chevaux, & de deux cens quarante mille hommes de pied, quelle hardiesse & manacle confiance fut-ce, de n'en vouloir abandonner son entreprise, & se resoudre à deux si grandes difficultez ensemble ? Lesquelles toutesfois il soustint : & apres auoir gaigné cette grande bataille contre ceux de dehors, renga bien tost à sa mercy ceux qu'il tenoit enfermez. Il en aduint autant à Lucullus, au siege de Tigranocerta contre le Roy Tigranes, mais d'une condition dispareille, veu la mollesse des ennemis, à qui Lucullus auoit affaire. Je veux icy remarquer deux rares euenemens & extraordinaires, sur le fait de ce siege d'Alexia, l'un, que les Gaulois s'assembloient pour venir trouuer là Cæsar, ayans fait denombrement de toutes leurs forces, resolurent en leur conseil, de retrancher vne bonne partie de cette grande multitude, de peur qu'ils n'en tombassent en confusion. Cet exemple est nouveau, de craindre à estre trop : mais à le bien prendre, il est vray-semblable, que le corps d'une armée doit auoir vne grandeur modérée, & réglée à certaines bornes, soit pour la difficulté de la nourrir, soit pour la difficulté de la conduire & tenir en ordre. Aumoins seroit il bien aisé à verifier par exemple, que ces armées monstrueuses en nombre, n'ont guere rien fait qui vaille. Suiuant le dire de Cyrus en Xenophon, ce n'est pas

le nombre des hommes, ains le nombre des bons hommes, qui faict l'aduantage : le demeurant seruant plus de destourbier que de secours. Et Baiazet print le principal fondement à sa resolution, de liurer iournée à Tamburlan, contre l'aduis de tous ses Capitaines, sur ce, que le nombre innombrable des hommes de son ennemy luy donnoit certaine esperance de confusion. Scanderbech bon iuge & tres expert, auoit accoustumé de dire, que dix ou douze mille combattans fideles, deuoient baster à vn suffisant chef de guerre, pour garantir sa reputation en toute sorte de besoing militaire. L'autre point, qui semble estre contraire, & à l'vsage, & à la raison de la guerre, c'est que Vercingetorix, qui estoit nommé chef & general de toutes les parties des Gaules, reuoltées, print party de s'aller enfermer dans Alexia. Car celuy qui commande à tout vn pays ne se doit iamais engager qu'au cas de cette extremité, qu'il y allast de sa derniere place, & qu'il n'y eust rien plus à esperer qu'en la deffence d'icelle. Autrement il se doit tenir libre, pour auoir moyen de prouoir en general à toutes les parties de son gouuernement. Pour reuenir à Cæsar, il deuint avec le temps vn peu plus tardif & plus considéré, comme tesmoigne son familier Oppius : estimant, qu'il ne deuoit aisément hazarder l'honneur de tant de victoires, lequel, vne seule defortune luy pourroit faire perdre. C'est ce que disent les Italiens, quand ils veulent reprocher cette hardiesse temeraire, qui se void aux ieunes gens, les nommants necessiteux d'honneur, *bisognosi d'honore* : & qu'estans encore en cette grande faim & disette de reputation, ils ont raison de la chercher à quelque prix que ce soit : ce que ne doiuent pas faire

ceux qui en ont desia acquis à suffisance. Il y peut auoir quelque iuste moderation en ce desir de gloire, & quelque sâcieté en cet appetit, comme aux autres : assez de gens le pratiquent ainfin. Il estoit bien esloigné de cette religion des anciens Romains, qui ne se vouloyent preualoir en leurs guerres, que de la vertu simple & nayfue. Mais encore y apportoit il plus de conscience que nous ne ferions à cette heure, & n'approuuoit pas toutes sortes de moyens, pour acquerir la victoire. En la guerre contre Ariouistus, estant à parlementer avec luy, il y furuint quelque remuement entre les deux armées, qui commença par la faute des gens de cheual d'Ariouistus. Sur ce tumulte, Cæsar se trouua auoir fort grand aduantage sur ses ennemis, toutes-fois il ne s'en voulut point preualoir, de peur qu'on luy peust reprocher d'y auoir procedé de mauuaise foy. Il auoit accoustumé de porter vn accoustrement riche au combat, & de couleur esclatante, pour se faire remarquer. Il tenoit la bride plus estroite à ses soldats, & les tenoit plus de court estants pres des ennemis. Quand les anciens Grecs vouloient accuser quelqu'un d'extreme insuffisance, ils disoyent en commun proverbe, qu'il ne sçauoit ny lire ny nager : il auoit cette mesme opinion, que la science de nager estoit tres-vtile à la guerre, & en tira plusieurs commoditez : s'il auoit à faire diligence, il franchissoit ordinairement à nage les riuieres qu'il rencontroit : car il aymoît à voyager à pied, comme le grand Alexandre. En Ægypte, ayant esté forcé pour se sauuer, de se mettre dans vn petit batteau, & tant de gens s'y estants lancez quant & luy, qu'il estoit en danger d'aller à fons, il ayma mieux se ietter en la mer, & gaigna sa flotte à nage, qui estoit plus de deux

cents pas au delà, tenant en sa main gauche ses tablettes hors de l'eau, & trainant à belles dents sa cotte d'armes, afin que l'ennemy n'en iouyst, estant desia bien auancé sur l'aage. Iamais chef de guerre n'eut tant de creance sur ses foldats. Au commencement de ses guerres ciuiles, les centeniers luy offrirent de soudoyer chacun sur sa bourse, vn homme d'armes, & les gens de pied, de le seruir à leurs despens : ceux qui estoient plus aysez, entreprenants encore à deffrayer les plus necessiteux. Feu Monsieur l'Admiral de Chastillon nous fit veoir dernièrement vn pareil cas en noz guerres ciuiles : car les François de son armée, fournissoient de leurs bourses au payement des estrangers, qui l'accompagnoient. Il ne se trouueroit guere d'exemples d'affection si ardente & si preste, parmy ceux qui marchent dans le vieux train, sous l'ancienne police des loix. La passion nous commande bien plus viuement que la raison. Il est pourtant aduenu en la guerre contre Annibal, qu'à l'exemple de la liberalité du peuple Romain en la ville, les gendarmes & Capitaines refuserent leur paye; & appelloit on au camp de Marcellus, mercenaires, ceux qui en prenoient. Ayant eu du pire aupres de Dyrrachium, ses foldats se vindrent d'eux mesmes offrir à estre chastiez & punis, de façon qu'il eut plus à les consoler qu'à les tancer. Vne sienne seule cohorte, soustint quatre légions de Pompeius plus de quatre heures, iusques à ce qu'elle fut quasi toute deffaicte à coups de trait, & se trouua dans la tranchée, cent trente mille fiesches. Vn soldat nommé Scæua, qui commandoit à l'une des entrées, s'y maintint inuincible ayant vn œil creué, vne espaule & vne cuisse percées, & son escu faucé en deux cens trente lieux.

Il est aduenü à plusieurs de ses soldats pris prisonniers, d'accepter plustost la mort, que de vouloir promettre de prendre autre party. Granius Petronius; pris par Scipion en Affrique, Scipion apres auoir faict mourir ses compagnons, luy manda qu'il luy donnoit la vie, car il estoit homme de reng & questeur : Petronius respondit que les soldats de Cæsar auoyent accoustumé de donner la vie aux autres, non la receuoir; & se tua tout soudain de sa main propre. Il y a infinis exemples de leur fidelité : il ne faut pas oublier le traitt de ceux qui furent assiegez à Salone, ville partizane pour Cæsar contre Pompeius, pour vn rare accident qui y aduint. Marcus Octauius les tenoit assiegez; ceux de dedans estans reduits en extreme necessité de toutes choses, en maniere que pour suppleer au deffaut qu'ils auoyent d'hommes, la plus part d'entre eux y estans morts & bleffez, ils auoyent mis en liberté tous leurs esclaves, & pour le seruice de leurs engins auoient esté contrains de couper les cheueux de toutes les femmes, affin d'en faire des cordes; outre vne merueilleuse disette de viures; & ce neantmoins resolu de iamais ne se rendre. Apres auoir trainé ce siege en grande longueur, d'où Octauius estoit deuenü plus nonchalant, & moins attentif à son entreprinse, ils choisirent vn iour sur le midy, & comme ils eurent rangé les femmes & les enfans sur leurs murailles, pour faire bonne mine, sortirent en telle furie, sur les assiegeans, qu'ayants enfoncé le premier, le second, & tiers corps de garde, & le quatriesme, & puis le reste, & ayants faict du tout abandonner les tranchées, les chasserent iusques dans les nauires : & Octauius mesmes se sauua à Dyrrachium, où estoit Pompeius. Le n'ay point me-

moire pour cett' heure, d'auoir veu aucun autre exemple, où les affiegez battent en gros les affiegeans, & gagnent la maistrise de la campagne; ny qu'une sortie ait tiré en consequence, vne pure & entiere victoire de bataille.





De trois bonnes femmes.

CHAPITRE XXXV.



L n'en est pas à douzaines, comme chacun sçait; & notamment aux deuoirs de mariage : car c'est vn marché plein de tant d'espineuses circonstances, qu'il est malaisé que la volonté d'une femme, s'y maintienne entiere long temps.

Les hommes, quoy qu'ils y soyent avec vn peu meilleure condition, y ont trop affaire. La touche d'un bon mariage, & sa vraye preuue, regarde le temps que la société dure; si elle a esté constamment douce, loyalle, & commode. En nostre siecle, elles reseruent plus communément, à estaller leurs bons offices, & la vehemence de leur affection, enuers leurs maris perdus : cherchent au moins lors, à donner tesmoignage de leur bonne volonté. Tardif tesmoignage, & hors de saison. Elles preuuent plustost par là, qu'elles ne les ayment que morts. La vie est pleine de combustion, le trespas d'amour, & de courtoisie. Comme les peres cachent l'affection enuers leurs enfans, elles volontiers de mesmes, cachent la leur enuers le mary, pour maintenir vn honneste respect. Ce mystere n'est pas de mon gouff. Elles ont beau s'escheueler & s'es-

gratigner ; ie m'en vois à l'oreille d'une femme de chambre, & d'un secretaire : comment estoient-ils, comment ont-ils vescu ensemble ? il me fouoient tousiours de ce bon mot, *iaciantius merent, quæ minus dolent*. Leur rechigner est odieux aux viuans, & vain aux morts. Nous dispenserons volontiers qu'on rie apres, pourueu qu'on nous rie pendant la vie. Est-ce pas de quoy resusciter de despit : qui m'aura craché au nez pendant que i'estoy, me vienne frotter les pieds, quand ie ne suis plus ? S'il y a quelque honneur à pleurer les maris, il n'appartient qu'à celles qui leur ont ry : celles qui ont pleuré en la vie, qu'elles rient en la mort, au dehors comme au dedans. Aussi, ne regardez pas à ces yeux moites, & à cette piteuse voix : regardez ce port, ce teinct, & l'embonpoint de ces iouës, sous ces grands voiles : c'est par là qu'elle parle François. Il en est peu, de qui la santé n'aille en amendant, qualité qui ne sçait pas mentir. Cette ceremonieuse contenance ne regarde pas tant derriere foy, que denant ; c'est acquest, plus que payement. En mon enfance, une honneste & tresbelle dame, qui vit encores, vescu d'un Prince, auoit ie ne sçay quoy plus en sa parure, qu'il n'est permis par les loix de nostre vefuage : à ceux qui le luy reprochoient : C'est, disoit elle, que ie ne pratique plus de nouvelles amitez, & suis hors de volonté de me remarier. Pour ne disconuenir du tout à nostre vsage, i'ay icy choisi trois femmes, qui ont aussi employé l'effort de leur bonté, & affection, autour la mort de leurs maris. Ce sont pourtant exemples un peu autres, & si pressans, qu'ils tirent hardiment la vie en consequence. Pline le ieune auoit pres d'une sienne maison en Italie, un voisin merueilleusement tourmenté de quelques vlceres, qui

luy estoient suruenues és parties honteuses. Sa femme le voyant si longuement languir, le pria de permettre, qu'elle veüst à loisir & de pres l'estat de son mal, & qu'elle luy diroit plus franchement qu'aucun autre ce qu'il auoit à en esperer. Apres auoir obtenu cela de luy, & l'auoir curieusement consideré, elle trouua qu'il estoit impossible, qu'il en peust guerir, & que tout ce qu'il auoit à attendre, c'estoit de trainer fort long temps vne vie douloureuse & languissante : si luy conseilla pour le plus seur & souuerain remede, de se tuer. Et le trouuant vn peu mol, à vne si rude entreprise : Ne pense point, luy dit-elle, mon amy, que les douleurs que ie te voy souffrir ne me touchent autant qu'à toy, & que pour m'en deliurer, ie ne me vueille seruir moy-mesme, de cette medecine que ie t'ordonne. Ie te veux accompagner à la guérison, comme i'ay faict à la maladie : oste cette crainte, & pense que nous n'aurons que plaisir en ce passage, qui nous doit deliurer de tels tourmens : nous nous en irons heureusement ensemble. Cela dit, & ayant rechauffé le courage de son mary, elle resolut qu'ils se precipiteroient en la mer, par vne fenestre de leur logis, qui y respondoit. Et pour maintenir iusques à sa fin, cette loyale & vehemente affection, dequoy elle l'auoit embrassé pendant sa vie, elle voulut encore qu'il mourust entre ses bras ; mais de peur qu'ils ne luy faillissent, & que les estraintes de ses enlacements, ne vinssent à se relascher par la cheute & la crainte, elle se fit lier & attacher bien estroitement avec luy, par le faux du corps ; & abandonna ainsi sa vie, pour le repos de celle de son mary. Celle-là estoit de bas lieu ; & parmy telle condition de gens, il n'est pas si nouueau d'y voir quelque traict de rare bonté,

*extrema per illos**Iustitia excedens terris vestigia fecit.*

Les autres deux sont nobles & riches, où les exemples de vertu se logent rarement. Arria femme de Cecinna Pætus, personnage consulaire, fut mere d'une autre Arria femme de Thrasea Pætus, celui duquel la vertu fut tant renommée du temps de Neron; & par le moyen de ce gendre, mere-grand de Fannia; car la ressemblance des noms de ces hommes & femmes, & de leurs fortunes, en a fait mesconter plusieurs. Cette premiere Arria, Cecinna Pætus, son mary, ayant esté prins prisonnier par les gens de l'Empereur Claudius, apres la deffaiëte de Scribonianus, duquel il auoit fuiuy le party : supplia. ceux qui l'emmenioient prisonnier à Rome, de la recevoir dans leur nauire, où elle leur seroit de beaucoup moins de despence & d'incommodité, qu'un nombre de personnes, qu'il leur faudroit, pour le seruice de son mary : & qu'elle seule fourniroit à sa chambre, à sa cuisine, & à tous autres offices. Ils l'en refuserent : & elle s'estant iettée dans un batteau de pescheur, qu'elle loua sur le champ, le suyuit en cette sorte depuis la Sclauonie. Comme ils furent à Rome, un iour, en presence de l'Empereur, Iunia veſue de Scribonianus, s'estant accostée d'elle familièrement, pour la société de leurs fortunes, elle la repoussa rudement avec ces parolles : Moy, dit-elle, que ie parle à toy, ny que ie t'escoute, à toy, au giron de laquelle Scribonianus fut tué, & tu vis encores? Ces parolles, avec plusieurs autres signes, firent sentir à ses parents, qu'elle estoit pour se deffaire elle mesme, impatiente de supporter la fortune de son mary. Et Thrasea son gendre, la suppliant sur ce

propos de ne se vouloir perdre, & luy disant ainsi : Quoy ? si ie courois pareille fortune à celle de Cecinna, voudriez vous que ma femme vostre fille en fist de mesme ? Comment donc ? si ie le voudrois, respondit-elle : ouy, ouy, ie le voudrois, si elle auoit vescu aussi long temps, & d'aussi bon accord avec toy, que i'ay faict avec mon mary. Ces responces augmentoient le soing, qu'on auoit d'elle, & faisoient qu'on regardoit de plus pres à ses deportemens. Vn iour apres auoir dict à ceux qui la gardoient, Vous avez beau faire, vous me pouuez bien faire plus mal mourir, mais de me garder de mourir, vous ne sçauriez : s'eslançant furieusement d'une chaire, où elle estoit assise, elle s'alla de toute sa force chocquer la teste contre la paroy voisine : duquel coup, estant cheute de son long esuanouye, & fort blessée, apres qu'on l'eut à toute peine faite reuenir : Ie vous disois bien, dit-elle, que si vous me refusiez quelque façon aisée de me tuer, i'en choisirois quelque autre pour mal-aisée qu'elle fust. La fin d'une si admirable vertu fut telle : Son mary Pærus, n'ayant pas le cœur assez ferme de soy-mesme, pour se donner la mort, à laquelle la cruauté de l'Empereur le rengeoit ; vn iour entre autres, apres auoir premierement employé les discours & enhortemens, propres au conseil, qu'elle luy donnoit à ce faire, elle print le poignart, que son mary portoit : & le tenant traitt en sa main, pour la conclusion de son exhortation ; Fais ainsi Pærus, luy dit-elle. Et en mesme instant, s'en estant donné vn coup mortel dans l'estomach, & puis l'arrachant de sa playe, elle le luy presenta, finissant quant & quant sa vie : avec cette noble, genereuse, & immortelle parole, *Pærus non dolet*. Elle n'eust loisir que de dire ces trois paroles d'une si belle

substance; Tien Pætus, il ne m'a point fait mal.

*Casto suo gladium cum traderet Arria Pæto,
Quem de visceribus traxerat ipsa suis :
Si qua fides, vulnus quod feci, non dolet, inquit,
Sed quod tu facies, id mihi Pæte dolet.*

Il est bien plus vif en son naturel, & d'un sens plus riche : car & la playe, & la mort de son mary, & les siennes, tant s'en faut qu'elles luy poïassent, qu'elle en auoit esté la conseillère & promotrice : mais ayant fait cette haulte & courageuse entreprise pour la seule commodité de son mary, elle ne regarde qu'à luy, encore au dernier trait de sa vie, & à luy offer la crainte de la suiure en mourant. Pætus se frappa tout soudain, de ce mesme glaïue; honteux à mon aduis, d'auoir eu besoin d'un si cher & pretieux enseignement. Pompeia Paulina, ieune & tres-noble Dame Romaine, auoit espousé Seneque, en son extreme vieillesse. Neron, son beau disciple, enuoya ses satellites vers luy, pour luy denoncer l'ordonnance de sa mort, ce qui se faisoit en cette maniere. Quand les Empereurs Romains de ce temps, auoyent condamné quelque homme de qualité, ils luy mandoyent par leurs officiers de choisir quelque mort à sa poste, & de la prendre dans tel, ou tel delay, qu'ils luy faisoient prescrire selon la trempe de leur cholere, tantost plus pressé, tantost plus long, luy donnant terme pour disposer pendant ce temps là, de ses affaires, & quelque fois luy ostant le moyen de ce faire, par la briefueté du temps : & si le condamné estriuoit à leur ordonnance, ils menoyent des gens propres à l'executer, ou luy couppant les veines des bras, & des iambes, ou luy faisant aualler du poison par force. Mais les personnes d'honneur, n'at-

tendoyent pas cette necessité, & se seruoient de leurs propres medecins & chirurgiens à cet effect. Seneque ouyt leur charge, d'un visage paisible & asseuré, & apres, demanda du papier pour faire son testament : ce que luy ayant esté refusé par le Capitaine, il se tourne vers ses amis : Puis que ie ne puis, leur dit-il, vous laisser autre chose en recognoissance de ce que ie vous doy, ie vous laisse au moins ce que i'ay de plus beau, à sçauoir l'image de mes mœurs & de ma vie, laquelle ie vous prie conseruer en vostre memoire : affin qu'en ce faisant, vous acqueriez la gloire de sincerés & veritables amis. Et quant & quant, appaisant tantost l'aigreur de la douleur, qu'il leur voyoit souffrir, par douces paroles, tantost roidissant sa voix, pour les en tancer : Où sont, disoit-il, ces beaux preceptes de la philosophie ? que sont deuenus les prouisions, que par tant d'années nous auons faites, contre les accidens de la fortune ? la cruauté de Neron nous estoit elle incogne ? que pouuions nous attendre de celuy, qui auoit tué sa mere & son frere, sinon qu'il fist encor mourir son gouverneur, qui l'a nourry & esleué ? Apres auoir dit ces paroles en commun, il se destourne à sa femme, & l'embrassant estroittement, comme par la pesanteur de la douleur elle deffailloit de cœur & de forces ; la pria de porter vn peu plus patiemment cet accident, pour l'amour de luy ; & que l'heure estoit venue, où il auoit à montrer, non plus par discours & par disputes, mais par effect, le fruit qu'il auoit tiré de ses estudes : & que sans doute il embrassoit la mort, non seulement sans douleur, mais avecques allegresse. Parquoy m'amie, disoit-il, ne la deshonore par tes larmes, affin qu'il ne semble que tu t'aimes plus que ma reputation : appaise ta dou-

leur, & te console en la cognoissance, que tu as eu de moy, & de mes actions, conduisant le reste de ta vie, par les honnestes occupations, auxquelles tu es addonnée. A quoy Paulina ayant vn peu repris ses esprits, & reschauffé la magnanimité de son courage, par vne tref-noble affection : Non Seneca, respondit-elle, ie ne suis pas pour vous laisser sans ma compagnie en telle necessité : ie ne veux pas que vous pensiez, que les vertueux exemples de vostre vie, ne m'ayent encore appris à sçauoir bien mourir : & quand le pourroy-ie ny mieux, ny plus honnestement, ny plus à mon gré qu'avecques vous? ainsi faictes estat que ie m'en voy quant & vous. Lors Seneca prenant en bonne part vne si belle & glorieuse deliberation de sa femme; & pour se deliurer aussi de la crainté de la laisser apres sa mort, à la mercy & cruauté de ses ennemis : Je t'auoy, Paulina, dit-il, conseillé ce qui seruoit à conduire plus heureusement ta vie : tu aymes donc mieux l'honneur de la mort : vrayement ie ne te l'enuieray point : la constance & la resolution, soyent pareilles à nostre commune fin, mais la beauté & la gloire soit plus grande de ta part. Cela fait, on leur couppa en mesme temps les veines des bras : mais par ce que celles de Seneca referrées tant par la vieillesse, que par son abstinence, donnoyent au sang le cours trop long & trop lasche, il commanda qu'on luy coupast encore les veines des cuisses : & de peur que le courment qu'il en souffroit, n'attendrist le cœur de sa femme, & pour se deliurer aussi soy-mesme de l'affliction, qu'il portoit de la veoir en si piteux estat : apres auoir tref-amoureusement pris congé d'elle, il la pria de permettre qu'on l'emportast en la chambre voisine, comme on fait. Mais toutes ces

incisions estans encore insuffisantes pour le faire mourir, il commande à Staius Anneus son medecin, de luy donner vn breuuage de poison; qui n'eut guere non plus d'effect : car par la foiblesse & froideur des membres, elle ne peut arriuer iusques au cœur. Par ainfin on luy fit en outre apprester vn baing fort chaud : & lors sentant sa fin prochaine, autant qu'il eut d'halene, il continua des discours tres-excellens sur le subiect de l'estat où il se trouuoit, que ses secretaires recueillirent tant qu'ils peurent ouyr sa voix; & demurerent ses parolles dernieres long temps depuis en credit & honneur, és mains des hommes : ce nous est vne bien fascheuse perte, qu'elles ne soyent venues iusques à nous. Comme il sentit les derniers traicts de la mort, prenant de l'eau du baing toute sanglante, il en arrousa sa teste, en disant; Je vouë cette eau à Iuppiter le liberateur. Neron aduertty de tout cecy, craignant que la mort de Paulina, qui estoit des mieux apparentées dames Romaines, & enuers laquelle il n'auoit nulles particulieres inimitiez, luy vinst à reproche; renuoya en toute diligence luy faire r'atacher ses playes : ce que ses gens d'elle, firent sans son sçeu, estant desia demy morte, & sans aucun sentiment. Et ce que contre son dessein, elle vesquit depuis, ce fut tres-honorablement, & comme il appartenoit à sa vertu, montrant par la couleur blesme de son visage, combien elle auoit escoulé de vie par ses blessures. Voyla mes trois comtes tres-veritables, que ie trouue aussi plaisans & tragiques que ceux que nous forgeons à nostre poste, pour donner plaisir au commun : & m'estonne que ceux qui s'adonnent à cela, ne s'aussent de choisir plustost dix mille tres-belles histoires, qui se rencontrent dans

les liures, où ils auroient moins de peine, & apporteroient plus de plaisir & profit. Et qui en voudroit bastir vn corps entier & s'entretenant, il ne faudroit qu'il fournist du sien que la liaifon, comme la soudure d'un autre metal : & pourroit entaffer par ce moyen force veritables euenemens de toutes fortes, les disposant & diuersifiant, selon que la beauté de l'ouurage le requerroit, à peu pres comme Ouide a coufu & r'apicé sa Metamorphose, de ce grand nombre de fables diuerses. En ce dernier couple, cela est encore digne d'estre considéré, que Paulina offre volontiers à quitter la vie pour l'amour de son mary, & que son mary auoit autre-fois quitté aussi la mort pour l'amour d'elle. Il n'y a pas pour nous grand contre-pois en cet eschange : mais selon son humeur Stoïque, ie croy qu'il pensoit auoir autant fait pour elle, d'allonger sa vie en sa faueur, comme s'il fust mort pour elle. En l'une des lettres, qu'il escrit à Lucilius; apres qu'il luy a fait entendre, comme la siebure l'ayant pris à Rome, il monta soudain en coche, pour s'en aller à une sienne maison aux champs, contre l'opinion de sa femme, qui le vouloit arrester; & qu'il luy auoit respondu, que la siebure qu'il auoit, ce n'estoit pas siebure du corps, mais du lieu : il suit ainsin : Elle me laissa aller me recommandant fort ma santé. Or moy, qui scay que ie loge sa vie en la mienne, ie commence de pouruoir à moy, pour pouruoir à elle : le priuilege que ma vieillesse m'auoit donné, me rendant plus ferme & plus resolu à plusieurs choses, ie le pers, quand il me souuient qu'en ce vieillard, il y en a une ieune à qui ie profite. Puis que ie ne la puis ranger à m'aymer plus courageusement, elle me renga à m'aymer moy-

mesme plus curieusement : car il faut prester quelque chose aux honnestes affections : & par fois, encore que les occasions nous pressent au contraire, il faut r'appeller la vie, voire avecque tourment : il faut arrester l'ame entre les dents, puis que la loy de viure aux gens de bien, ce n'est pas autant qu'il leur plaist, mais autant qu'ils doiuent. Celuy qui n'estime pas tant sa femme ou vn sien amy, que d'en allonger sa vie, & qui s'opiniastre à mourir, il est trop delicat & trop mol : il faut que l'ame se commande cela, quand l'vtilité des nostres le requiert : il faut par fois nous prester à noz amis : & quand nous voudrions mourir pour nous, interrompre nostre dessein pour eux. C'est tesmoignage de grandeur de courage, de retourner en la vie pour la consideration d'autrui, comme plusieurs excellens personnages ont fait : & est vn traitt de bonté singuliere, de conseruer la vieillesse, (de laquelle la commodité la plus grande, c'est la nonchalance de sa durée, & vn plus courageux & desdaigneux vsage de la vie,) si on sent que cet office soit doux, agreable, & profitable à quelqu'un bien affectionné. Et en reçoit on vne tresplaisante recompense : car qu'est-il plus doux, que d'estre si cher à sa femme, qu'en sa consideration, on en deuienne plus cher à soy-mesme? Ainsi ma Paulina m'a chargé, non seulement sa crainte, mais encore la mienne. Ce ne m'a pas esté assez de considerer, combien resolument ie pourrois mourir, mais i'ay aussi considéré, combien irresoluement elle le pourroit souffrir. Je me suis contrainct à viure, & c'est quelquefois magnanimité que viure. Voyla ses mots excellens, comme est son vsage.



Des plus excellens hommes.

CHAPITRE XXXVI.



Si on me demandoit le choix de tous les hommes qui sont venus à ma cognoissance, il me semble en trouuer trois excellens au dessus de tous les autres. L'un Homere; non pas qu'Aristote ou Varro, pour exemple, ne fussent à l'adventure aussi sçauans que luy; ny possible encore qu'en son art mesme, Virgile ne luy soit comparable. Je le laisse à iuger à ceux, qui les cognoissent tous deux. Moy qui n'en cognoy que l'un, puis seulement dire cela, selon ma portée, que ie ne croy pas que les Muses mesmes allassent au delà du Romain.

*Tale facit carmen docta testudine, quale
Cynthius impositis temperat articulis.*

Toutesfois en ce iugement, encore ne faudroit il pas oublier, que c'est principalement d'Homere que Virgile tient sa suffisance, que c'est son guide, & maistre d'escole; & qu'un seul trait de l'Iliade, a fourny de corps & de matiere, à cette grande & diuine Eneide. Ce n'est pas ainsi que ie compte :

i'y melle plusieurs autres circonstances, qui me rendent ce personnage admirable, quasi au dessus de l'humaine condition. Et à la verité, ie m'estonne souvent, que luy qui a produit, & mis en credit au monde plusieurs deitez, par son auctorité, n'a gagné reng de Dieu luy mesme. Estant aueugle, indigent; estant avant que les sciences fussent redigées en regle, & obseruations certaines, il les a tant cognues, que tous ceux qui se sont meslez depuis d'establir des polices, de conduire guerres, & d'escrire ou de la religion, ou de la philosophie, en quelque secte que ce soit, ou des arts, se sont feruis de luy, comme d'un maistre tres-parfait en la cognoissance de toutes choses. Et de ses liures, comme d'une pepiniere de toute espeece de suffisance,

*Qui quid sit pulchrum, quid turpe, quid vtile, quid non,
Plenius ac melius Chrysippo ac Crantore dicit.*

Et comme dit l'autre,

*à quo ceu fonte perenni
Vatum Pieriis labra rigantur aquis.*

Et l'autre,

*Adde Heliconiadum comites, quorum vnus Homerus
Astra potitus.*

Et l'autre,

*Cuiusque ex ore profuso
Omnis posteritas latices in carmina duxit,
Annemque in tenues ausu est deducere riuos,
Vnius facunda bonis.*

C'est contre l'ordre de Nature, qu'il a fait la plus excellente production qui puisse estre : car la nais-

sance ordinaire des choses, elle est imparfaicte : elles s'augmentent, se fortifient par l'accroissance. L'enfance de la poësie, & de plusieurs autres sciences, il l'a rendue meure, parfaicte, & accomplie. A cette cause le peut on nommer le premier & dernier des poëtes, suyuant ce beau tesmoignage que l'antiquité nous a laissé de luy, que n'ayant eu nul qu'il peust imiter auant luy, il n'a eu nul apres luy qui le peust imiter. Ses parolles, selon Aristote, sont les seules parolles, qui ayent mouuement & action : ce sont les seuls mots substantiels. Alexandre le grand ayant rencontré parmy les despouilles de Darius, vn riche coffret, ordonna qu'on le luy reseruast pour y loger son Homere : disant, que c'estoit le meilleur & plus fidelle conseiller qu'il eust en ses affaires militaires. Pour cette mesme raison disoit Cleomenes fils d'Anaxandridas, que c'estoit le Poëte des Lacedemoniens, par ce qu'il estoit tres-bon maistre de la discipline guerriere. Cette loüange singuliere & particuliere luy est aussi demeurée au iugement de Plutarque, que c'est le seul auteur du monde, qui n'a iamais soulé ne dégousté les hommes, se montrant aux lecteurs tousiours tout autre, & fleurissant tousiours en nouuelle grace. Ce folastre d'Alcibiades, ayant demandé à vn, qui faisoit profession des lettres, vn liure d'Homere, luy donna vn soufflet, par ce qu'il n'en auoit point : comme qui trouueroit vn de nos prestres sans breuiare. Xenophanes se pleignoit vn iour à Hieron, tyran de Syracuse, de ce qu'il estoit si pauure, qu'il n'auoit dequoy nourrir deux serui-teurs : Et quoy, luy respondit-il, Homere qui estoit beaucoup plus pauure que toy, en nourrit bien plus de dix mille, tout mort qu'il est. Que n'estoit ce dire, à Panætius, quand il nommoit Platon l'Homere

des philosophes? Outre cela, quelle gloire se peut comparer à la sienne? Il n'est rien qui viue en la bouche des hommes, comme son nom & ses ouurages : rien si cogneu, & si reçu que Troye, Helene, & ses guerres, qui ne furent à l'adventure iamais. Nos enfans s'appellent encore des noms qu'il forgea, il y a plus de trois mille ans. Qui ne cognoist Hector & Achilles? Non seulement aucunes races particulieres, mais la plus part des nations, cherchent origine en ses inuentions. Mahumet second de ce nom, Empereur des Turcs, escriuant à nostre Pape Pie second : Je m'estonne, dit-il, comment les Italiens se bandent contre moy, attendu que nous auons nostre origine commune des Troyens : & que i'ay comme eux interest de venger le sang d'Hector sur les Grecs, lesquels ils vont fauorisant contre moy. N'est-ce pas vne noble farce, de laquelle les Roys, les choses publiques, & les Empereurs, vont ioüant leur personnage tant de siecles, & à laquelle tout ce grand vniuers sert de theatre? Sept villes Grecques entrerent en debat du lieu de sa naissance, tant son obscurité mesmes luy apporta d'honneur :

Smyrna, Rhodos, Colophon, Salamis, Chios, Argos, Athenæ.

L'autre, Alexandre le grand. Car qui considerera l'aage qu'il commença ses entreprises : le peu de moyen avec lequel il fit vn si glorieux dessein : l'autorité qu'il gaigna en cette sienne enfance, parmy les plus grands & experimentez capitaines du monde, desquels il estoit suyui : la faueur extraordinaire, dequoy Fortune embrassa, & fauorisa tant de siens exploits hazardoux, & à peu que ie ne die temeraires :

*impellens quicquid sibi summa petensi
Obstaret, gaudensque viam fecisse ruina :*

cette grandeur, d'auoir à l'aage de trente trois ans, passé victorieux toute la terre habitable, & en vne demie vie auoir atteint tout l'effort de l'humaine nature : si que vous ne pouuez imaginer sa durée legitime, & la continuation de son accroissance, en vertu & en fortune, iusques à vn iuste terme d'aage, que vous n'imaginiez quelque chose au dessus de l'homme : d'auoir fait naistre de ses soldats tant de branches Royales : laissant apres sa mort le monde en partage à quatre successeurs, simples capitaines de son armée, desquels les descendans ont depuis si long temps duré, maintenans cette grande possession : tant d'excellentes vertus qui estoient en luy, iustice, temperance, liberalité, foy en ses parolles, amour enuers les siens, humanité enuers les vaincus : car ses mœurs semblent à la verité n'auoir aucun iuste reproche : ouy bien aucunes de ses actions particulieres, rares, & extraordinaires. Mais il est impossible de conduire si grands mouuemens, avec les regles de la iustice. Telles gens veulent estre iugez en gros, par la maistresse fin de leurs actions. La ruine de Thebes, le meurtre de Menander, & du medecin d'Ephestion : de tant de prisonniers Persiens à vn coup, d'une troupe de soldats Indiens non sans interest de sa parole, des Cosséiens iusques aux petits enfans : font faillies vn peu mal excusables. Car quant à Clytus, la faute en fut amendée outre son poix : & tesmoigne cette action autant que toute autre, la debonnaireté de sa complexion, & que c'estoit de foy vne complexion excellemment formée à la bonté, & a esté ingenieusement dict de luy,

qu'il auoit de la Nature ses vertus, de la Fortune ses vices. Quant à ce qu'il estoit vn peu vanteur, vn peu trop impatient d'ouyr mesdire de soy, & quant à ses mangeoires, armes, & mors, qu'il fit semer aux Indes : toutes ces choses me semblent pouuoir estre condonnées à son aage, & à l'estrange prosperité de sa fortune. Qui considerera quand & quand, tant de vertus militaires, diligence, pouruoyance, patience, discipline, subtilité, magnanimité, resolution, bon-heur, en quoy, quand l'autorité d'Hannibal ne nous l'auroit appris, il a esté le premier des hommes : les rares beautez & conditions de sa personne, iusques au miracle : ce port, & ce venerable maintien, fous vn visage si ieune, vermeil, & flambloyant :

*Qualis vbi Oceani perfusus Lucifer vnda,
Quem Venus ante alios astrorum diligit ignes,
Extulit os sacrum calo, tenebrasque resoluït :*

l'excellence de son sçauoir & capacité : la durée & grandeur de sa gloire, pure, nette, exempte de tache & d'enuie : & qu'encore long temps apres sa mort, ce fust vne religieuse croyance, d'estimer que ses medailles portassent bon-heur à ceux qui les auoyent sur eux : & que plus de Roys, & Princes ont escrit ses gestes, qu'autres hystoriens n'ont escrit les gestes d'autre Roy ou Prince que ce soit : & qu'encores à present, les Mahumetans, qui mesprisent toutes autres hystoires, reçoient & honnoient la sienne seule par special priuilege : il confessera, tout cela mis ensemble, que i'ay eu raison de le preferer à Cæsar mesme, qui seul m'a peu mettre en doubte du choix. Et il ne se peut nier, qu'il n'y aye plus du sien en ses exploits, plus de la Fortune en

ceux d'Alexandre. Ils ont eu plusieurs choses esgales, & Cæsar à l'adventure aucunes plus grandes. Ce furent deux feux, ou deux torrens, à rauager le monde par diuers endroits.

*Et velut immissi diuersis partibus ignes
Arentem in fluam, & virgulta sonantia lauro :
Aut vbi decursu rapido de montibus altis
Dant sonitum spumosi amnes, & in æquora currunt,
Quisque suum populatus iter.*

Mais quand l'ambition de Cæsar auroit de foy plus de moderation, elle a tant de mal'heur, ayant rencontré ce vilain subiect de la ruyne de son pays, & de l'empirement vniuersel du monde, que toutes pieces ramassées & mises en la balance, ie ne puis que ie ne panche du costé d'Alexandre. Le tiers, & le plus excellent, à mon gré, c'est Epaminondas. De gloire, il n'en a pas à beaucoup pres tant que d'autres (aussi n'est-ce pas vne piece de la substance de la chose,) de resolution & de vaillance, non pas de celle qui est esguisée par ambition, mais de celle que la sapience & la raison peuuent planter en vne ame bien réglée, il en auoit tout ce qui s'en peut imaginer. De preuue de cette sienne vertu, il en a fait autant, à mon aduis, qu'Alexandre mesme, & que Cæsar : car encore que ses exploits de guerre, ne foyent ny si frequens, ny si enflés, ils ne laissent pas pourtant, à les bien considerer & toutes leurs circonstances, d'estre aussi poissants & roides, & portants autant de tesmoignage de hardiesse & de suffisance militaire. Les Grecs luy ont fait cet honneur, sans contredit, de le nommer le premier homme d'entre eux : mais estre le premier de la Grece, c'est facilement estre le prime du monde. Quant à son

ſçauoir & ſuffiſance, ce iugement ancien nous en eſt reſté, que iamais homme ne ſceut tant, & parla ſi peu que luy. Car il eſtoit Pythagorique de ſecte. Et ce qu'il parla, nul ne parla iamais mieux : excellent orateur & tres perſuaſif. Mais quant à ſes mœurs & conſcience, il a de bien loing ſurpaſſé tous ceux, qui ſe ſont iamais meſlez de manier affaires : car en cette partie, qui doit eſtre principalement conſiderée, qui ſeule marque veritablement, quels nous ſommes : & laquelle ie contrepoſe ſeule à toutes les autres enſemble, il ne cede à aucun philoſophe, non pas à Socrates meſmes. En ceſtuy-cy l'innocence eſt vne qualité, propre, maiſtreſſe, conſtante, vniforme, incorruptible. Au parangon de laquelle, elle paroïſt en Alexandre ſubalterne, incertaine, bigarrée, molle, & fortuite. L'ancienneté iugea, qu'à eſplucher par le menu tous les autres grands capitaines, il ſe trouue en chaſcun quelque ſpeciale qualité, qui le rend illuſtre. En ceſtuy-cy ſeul, c'eſt vne vertu & ſuffiſance pleine par tout, & pareille : qui en tous les offices de la vie humaine ne laiſſe rien à deſirer de ſoy : ſoit en occupation publique ou priuée, ou paiſible, ou guerriere : ſoit à viure ſoit à mourir grandement & glorieuſement. Ie ne cognoy nulle ny forme ny fortune d'homme, que ie regarde auec tant d'honneur & d'amour. Il eſt bien vray, que ſon obſtination à la pauureté, ie la trouue aucunement ſcrupuleuſe : comme elle eſt peinte par ſes meilleurs amis. Et cette ſeule action, haute pourtant & tres digne d'admiration, ie la ſens vn peu aigrette, pour par ſouhait meſme en la forme qu'elle eſtoit en luy, m'en deſirer l'imitation. Le ſeul Scipion Æmylian, qui luy donneroit vne fin auſſi fiere & magnifique, & la cognoiſſance des ſciences autant pro-

fonde & vniuerselle, se pourroit mettre à l'encontre à l'autre plat de la balance. O quel desplaisir le temps m'a fait, d'oster de nos yeux à point nommé, des premieres, la couple de vies iustement la plus noble, qui fust en Plutarque, de ces deux personnages : par le commun consentement du monde, l'un le premier des Grecs, l'autre des Romains ! Quelle matiere, quel œurier ! Pour un homme non saint, mais que nous disons, galant homme, de mœurs ciuiles & communes : d'une hauteur modérée : la plus riche vie, que ie sçache, à estre vescu entre les viuants, comme on dit : & estoïée de plus de riches parties & desirables, c'est, tout considéré, celle d'Alcibiades à mon gré. Mais quant à Epaminondas, pour exemple d'une excessiue bonté, ie veux adiouter icy aucunes de ses opinions. Le plus doux contentement qu'il eut en toute sa vie, il tesmoigna que c'estoit le plaisir qu'il auoit donné à son pere, & à sa mere, de sa victoire de Leuctres : il couche de beaucoup, preferant leur plaisir, au sien si iuste & si plein d'une tant glorieuse action. Il ne pensoit pas qu'il fust loisible pour recouurer mesmes la liberté de son pays, de tuer un homme sans cognoissance de cause. Voila pourquoy il fut si froid à l'entreprise de Pelopidas son compaignon, pour la deliurance de Thebes. Il tenoit aussi, qu'en une bataille il falloit fuyr le rencontre d'un amy, qui fust au party contraire, & l'espargner. Et son humanité à l'endroit des ennemis mesmes, l'ayant mis en soupçon enuers les Bœotiens, de ce qu'apres auoir miraculeusement forcé les Lacedemoniens de luy ouurir le pas, qu'ils auoyent entrepris de garder à l'entrée de la Morée pres de Corinthe, il s'estoit contenté de leur auoir passé sur le ventre, sans les pourfuyure à toute

outrance : il fut déposé de l'estat de Capitaine general. Tres honorablement pour vne telle cause : & pour la honte que ce leur fut d'auoir par necessité à le remonter tantost apres en son degré, & reconnoistre, combien dependoit de luy leur gloire & leur salut : la victoire le fuyuant comme son ombre par tout où il guidaſt, la prosperité de son pays mourut aussi luy mort, comme elle estoit née par luy.





De la ressemblance des enfans aux peres.

CHAPITRE XXXVII.



CE fagotage de tant de diuerſes pieces, ſe faiſt en cette condition, que ie n'y mets la main, que lors qu'une trop laſche oyſieté me preſſe, & non ailleurs que chez moy. Ainſi il s'eſt baſty à diuerſes poſes & interualles, comme les occasions me detiennent ailleurs par fois pluſieurs moys. Au demeurant, ie ne corrige point mes premieres imaginations par les ſecondes, ouy à l'auenture quelque mot : mais pour diuerſifier, non pour oſter. Ie veux repreſenter le progrez de mes humeurs, & qu'on voye chaſque piece en ſa naiſſance. Ie prendrois plaſiſr d'auoir commencé pluſtoſt, & à recognoiſtre le train de mes mutations. Vn valet qui me ſeruoit à les eſcrire ſoubs moy, penſa faire vn grand butin de m'en deſrober pluſieurs pieces choiſies à ſa poſte. Cela me conſole, qu'il n'y fera pas plus de gain, que i'y ay fait de perte. Ie me ſuis enuieilly de ſept ou huit ans depuis que ie commençay. Ce n'a pas eſté ſans quelque nouuel acqueſt. I'y ay pratiqué la colique, par la liberalité des ans : leur commerce & longue conuerſation, ne ſe paſſe

ayfément fans quelque tel fruit. Je voudroy bien, de plusieurs autres prefens, qu'ils ont à faire, à ceux qui les hantent long temps, qu'ils en euſſent choiſi quelqu'un qui m'eût eſté plus acceptable : car ils ne m'en euſſent ſceu faire, que i'euffe en plus grande horreur, des mon enfance. C'eſtoit à point nommé, de tous les accidens de la vieillesſe, celui que ie craignois le plus. L'auoy penſé mainte-fois à part moy, que i'alloy trop auant : & qu'à faire vn ſi long chemin, ie ne faudroy pas de m'engager en fin, en quelque malplaiſant rencontre. Je ſentois & proteſtois aſſez, qu'il eſtoit heure de partir, & qu'il falloir trencher la vie dans le viſ, & dans le ſein, ſuyuant la regle des chirurgiens, quand ils ont à couper quelque membre. Qu'à celui, qui ne la rendoit à temps, Nature auoit accouſtumé de faire payer de bien rudes vfures. Il s'en falloir tant, que i'en fuſſe preſt lors, qu'en dix-huit mois ou enuiron qu'il y a que ie ſuis en ce malplaiſant eſtat, i'ay deſia appris à m'y accommoder. L'entre deſia en compoſition de ce viure coliqueux : i'y trouue dequoy me conſoler, & dequoy eſperer. Tant les hommes ſont accouquinez à leur eſtre miſerable, qu'il n'eſt ſi rude condition qu'ils n'acceptent pour s'y conſeruer. Oyez *Mæcenas*.

*Debilem facito manu,
Debilem pede, coxa,
Lubricos quate dentes :
Vita dum ſupereſt, bene eſt.*

Et couuroit Tamburlan d'une ſotte humanité, la cruauté fantaſtique qu'il exerçoit contre les ladres, en faiſant mettre à mort autant qu'il en venoit à ſa cognoiſſance, pour, diſoit-il, les deliurer de la vie,

qu'ils viuoient si penible. Car il n'y auoit nul d'eux, qui n'eust mieux aymé estre trois fois ladre, que de n'estre pas. Et Antisthenes le Stoicien, estant fort malade, & s'escriant : Qui me deliurera de ces maux ? Diogenes, qui l'estoit venu veoir, luy presentant vn couteau : Cestuy-cy, si tu veux, bien tost : Je ne dy pas de la vie, repliqua il, ie dy des maux. Les souffrances qui nous touchent simplement par l'ame, m'affligent beaucoup moins qu'elles ne font la pluspart des autres hommes : partie par iugement : car le monde estime plusieurs choses horribles, ou euitables au prix de la vie, qui me font à peu pres indifferentes : partie, par vne complexion stupide & insensible, que i'ay aux accidents qui ne donnent à moy de droit fil : laquelle complexion i'estime l'une des meilleures pieces de ma naturelle condition. Mais les souffrances vrayement essentielles & corporelles, ie les gouste bien vifurement. Si est-ce pourtant, que les preuoyant autrefois d'une veuë foible, delicate, & amollie par la iouissance de cette longue & heureuse fanté & repos, que Dieu m'a presté, la meilleure part de mon aage : ie les auoy conceuës par imagination, si insupportables, qu'à la verité i'en auois plus de peur, que ie n'y ay trouué de mal. Par où i'augmente tousiours cette creance, que la pluspart des facultez de nostre ame, comme nous les employons, troublent plus le repos de la vie, qu'elles n'y seruent. Je suis aux prises avec la pire de toutes les maladies, la plus soudaine, la plus douloureuse, la plus mortelle, & la plus irremediable. l'en ay desia essayé cinq ou six bien longs accez & penibles : toutesfois ou ie me flatte, ou encores y a-il en cet estat, dequoy se soustenir, à qui a l'ame deschargée de la crainte de la mort,

& deschargée des menasses, conclusions & consequences, dequoy la medecine nous enteste. Mais l'effect mesme de la douleur, n'a pas cette aigreur si aspre & si poignante, qu'un homme rassis en doive entrer en rage & en desespoir. L'ay aumoins ce profit de la cholique, que ce que ie n'auoy encore peu sur moy, pour me concilier du tout, & m'accointer à la mort, elle le parfera : car d'autant plus elle me pressera, & importunera, d'autant moins me fera la mort à craindre. L'auoy desia gaigné cela, de ne tenir à la vie, que par la vie seulement : elle desnouera encore cette intelligence. Et Dieu vueille qu'en fin, si son aspreté vient à surmonter mes forces, elle ne me reiette à l'autre extremité non moins vitieuse, d'aymer & desirer à mourir.

Summum nec metuas diem, nec optes.

Ce sont deux passions à craindre, mais l'une a son remede bien plus prest que l'autre. Au demeurant, j'ay tousiours trouué ce precepte ceremonieux, qui ordonne si exactement de tenir bonne contenance & un maintien desdaigneux, & posé, à la souffrance des maux. Pourquoi la philosophie, qui ne regarde que le vif, & les effects, se va elle amusant à ces apparences externes ? Qu'elle laisse ce soing aux farceurs & maistres de rhetorique, qui font tant d'estat de nos gestes. Qu'elle condone hardiment au mal, cette lascheté voyelle, si elle n'est ny cordiale, ny stomacale : & preste ses plaintes volontaires au genre des souspirs, sanglots, palpitations, pallissemens, que Nature a mis hors de nostre puissance. Pourueu que le courage soit sans effroy, les parolles sans desespoir, qu'elle se contente. Qu'importe que nous

tordions nos bras, pourueu que nous ne tordions nos pensées? elle nous dresse pour nous, non pour autrui, pour estre, non pour sembler. Qu'elle s'arreste à gouverner nostre entendement, qu'elle a pris à instruire. Qu'aux efforts de la cholique, elle maintienne l'ame capable de se recognoistre, de suyure son train accoustumé : combatant la douleur & la soustenant, non se prosternant honteusement à ses pieds : esmeuë & eschauffée du combat, non abatus & renuerfée : capable d'entretien & d'attente occupation, iusques à certaine mesure. En accidents si extremes, c'est cruauté de requerir de nous vne démarche si composée. Si nous auons beau ieu, c'est peu que nous ayons mauuaise mine. Si le corps se soulage en se plaignant, qu'il le face : si l'agitation luy plaist, qu'il se tourneboule & tracasse à sa fantasie : s'il luy semble que le mal s'euaipore aucunement (comme aucuns medecins disent que cela aide à la deliurance des femmes enceintes) pour pouffer hors la voix auec plus grande violence : ou s'il en amuse son tourment, qu'il crie tout à fait. Ne commandons point à cette voix, qu'elle aille, mais permettons le luy. Epicurus ne pardonne pas seulement à son sage de crier aux tourments, mais il le luy conseille. *Pugiles etiam quum feriant, in iactandis cæstibus ingemiscunt, quia profundenda voce omne corpus intenditur, venitque plaga vehementior.* Nous auons assez de trauail du mal, sans nous trauailler à ces regles superflues. Ce que ie dis pour excuser ceux, qu'on voit ordinairement se tempester, aux secouffes & assaux de cette maladie : car pour moy, ie l'ay passée iusques à cette heure auec vn peu meilleure contenance, & me contente de gemir sans brailler. Non pourtant que ie me mette en peine,

pour maintenir cette decence exterieure : car ie fay peu de compte d'un tel aduantage. Je preste en cela au mal autant qu'il veut : mais ou mes douleurs ne sont pas si excessiues, ou i'y apporte plus de fermeté que le commun. Je me plains, ie me despice, quand les aigres pointures me pressent, mais ie n'en viens point au defespoir, comme celuy là :

*Eiulatu, questu, gemitu, fremitibus
Resonando multum flebiles voces refert.*

Je me taste au plus espais du mal : & ay tousiours trouué que i'estoy capable de dire, de penser, de respondre aussi sainement qu'en vne autre heure, mais non si constamment : la douleur me troublant & destournant. Quand on me tient le plus atterré, & que les assistans m'espargnent, i'essaye souuent mes forces, & leur entame moy-mesme des propos les plus esloignez de mon estat. Je puis tout par vn soudain effort : mais ostez en la durée. O que n'ay ie la faculté de ce songeur de Cicero, qui, songeant embrasser vne garse, trouua qu'il s'estoit deschargé de sa pierre emmy ses draps ! Les miennes me desgarsent estrangement. Aux interualles de cette douleur excessiue lors que mes vreteres languissent sans me ronger, ie me remets soudain en ma forme ordinaire : d'autant que mon ame ne prend autre alarme, que la sensible & corporelle. Ce que ie doy certainement au soing que i'ay eu à me preparer par discours à tels accidens :

*laborum
Nulla mihi noua nunc facies inopinâque surgit,
Omnia præcepi, atque animo mecum antè peregi.*

Je suis essayé pourtant vn peu bien rudement pour

vn apprenti, & d'un changement bien soudain & bien rude : estant cheu tout à coup, d'une tref-douce condition de vie, & tref-heureuse, à la plus douloureuse, & penible, qui se puisse imaginer. Car outre ce que c'est vne maladie bien fort à craindre d'elle mesme, elle fait en moy ses commencemens beaucoup plus aspres & difficiles qu'elle n'a accoustumé. Les accès me reprennent si souuent, que ie ne sens quasi plus d'entière santé : ie maintien toutesfois, iusques à cette heure, mon esprit en telle affiette, que pourueu que i'y puisse apporter de la constance, ie me treuve en assez meilleure condition de vie, que mille autres, qui n'ont ny fièvre, ny mal, que celuy qu'ils se donnent eux mesmes, par la faute de leur discours. Il est certaine façon d'humilité subtile, qui naist de la presumption : comme ceste-cy : Que nous recognoissons nostre ignorance, en plusieurs choses, & sommes si courtois d'auoier, qu'il y ait és ouurages de Nature, aucunes qualitez & conditions, qui nous sont imperceptibles, & desquelles nostre suffisance ne peut descouurir les moyens & les causes. Par cette honneste & conscientieuse declaration, nous esperons gaigner qu'on nous croira aussi de celles, que nous dirons, entendre. Nous n'auons que faire d'aller trier des miracles & des difficultez estrangeres : il me semble que parmy les choses que nous voyons ordinairement, il y a des estrangeres si incomprehensibles, qu'elles surpassent toute la difficulté des miracles. Quel monstre est-ce, que cette goutte de semence, dequoy nous sommes produits, porte en soy les impressions, non de la forme corporelle seulement, mais des pensemens & des inclinations de nos peres ? Cette goutte d'eau, où loge elle ce nombre infiny de formes ? & comme portent elles

ces ressemblances, d'un progrez si temeraire & si desreglé, que l'arriere fils respondra à son bifayeul, le nepueu à l'oncle ? En la famille de Lepidus à Rome, il y en a eu trois, non de suite, mais par interualles, qui nasquirent vn mesme œuil couuert de cartilage. A Thebes il y auoit vne race qui portoit dès le ventre de la mere, la forme d'un fer de lance, & qui ne le portoit, estoit tenu illegitime. Aristote dit qu'en certaine nation, où les femmes estoient communes, on assignoit les enfans à leurs peres, par la ressemblance. Il est à croire que ie dois à mon pere cette qualité pierreuse : car il mourut merueilleusement affligé d'une grosse pierre, qu'il auoit en la vessie. Il ne s'apperceut de son mal, que le soixante septiesme an de son aage : & auant cela il n'en auoit eu aucune menasse ou ressentiment, aux reins, aux costez, ny ailleurs : & auoit vescu iusques lors, en vne heureuse santé, & bien peu subiette à maladies, & dura encores sept ans en ce mal, trainant vne fin de vie bien douloureuse. I'estoy nay vingt cinq ans & plus, auant sa maladie, & durant le cours de son meilleur estat, le troisieme de ses enfans en rang de naissance. Où se couuoit tant de temps, la propension à ce defect ? Et lors qu'il estoit si loing du mal, cette legere piece de sa substance, dequoy il me bastit, comment en portoit elle pour sa part, vne si grande impression ? Et comment encore si couuerte, que quarante cinq ans apres, i'aye commencé à m'en ressentir ? seul iusques à cette heure, entre tant de freres, & de sœurs, & tous d'une mere. Qui m'esclaircira de ce progrez, ie le croiray d'autant d'autres miracles qu'il voudra : pourueu que, comme ils font, il ne me donne en payement, vne doctrine beaucoup plus difficile & fantastique, que n'est la chose mesme.

Que les medecins excusent vn peu ma liberré : car par cette mesme infusion & insinuation fatale, i'ay receu la haine & le mespris de leur doctrine. Cette antipathie, que i'ay à leur art, m'est hereditaire. Mon pere a vescu soixante & quatorze ans, mon ayeul soixante & neuf, mon bisayeul pres de quatre vingts, sans auoir gousté aucune sorte de medecine. Et entre eux, tout ce qui n'estoit de l'vsage ordinaire, tenoit lieu de drogue. La medecine se forme par exemples & experience : aussi fait mon opinion. Voyla pas vne bien expresse experience, & bien aduantageuse ? Je ne sçay s'ils m'en trouueront trois en leurs registres, nais, nourris, & trespassez, en mesme fouier, mesme toit, ayans autant vescu par leur conduite. Il faut qu'ils m'aduouient en cela, que si ce n'est la raison, aumoins que la Fortune est de mon party : or chez les medecins, Fortune vaut bien mieux que la raison. Qu'ils ne me prennent point à cette heure à leur aduantage, qu'ils ne me menassent point, atterré comme ie suis : ce seroit supercherie. Aussi à dire la verité, i'ay assez gagné sur eux par mes exemples domestiques, encore qu'ils s'arrestent là. Les choses humaines n'ont pas tant de constance : il y a deux cens ans, il ne s'en faut que dix-huict, que cet essay nous dure : car le premier nasquit l'an mil quatre cens deux. C'est vrayement bien raison, que cette experience commence à nous faillir. Qu'ils ne me reprochent point les maux, qui me tiennent asseure à la gorge : d'auoir vescu sain quarante sept ans pour ma part, n'est-ce pas assez ? Quand ce sera le bout de ma carriere, elle est des plus longues. Mes ancestres auoient la medecine à contre-cœur par quelque inclination occulte & naturelle . car la veüe mesme des drogues faisoit horreur à mon pere. Le

Seigneur de Gaujac mon oncle paternel, homme d'Eglise, maladif dès sa naissance, & qui fit toutes-fois durer cette vie debile, iusques à soixante sept ans, estant tombé autrefois en vne grosse & vehemente fièvre continue, il fut ordonné par les medecins, qu'on luy declaireroit, s'il ne se vouloit ayder (ils appellent secours ce qui le plus souuent est empeschement) qu'il estoit infailliblement mort. Ce bon homme, tout effrayé comme il fut de cette horrible sentence, Si, respondit-il, ie suis donq mort : mais Dieu rendit tantost apres vain ce prognostique. Le dernier des freres, ils estoient quatre, Sieur de Buffaguet, & de bien loing le dernier, se soubmit seul, à cet art : pour le commerce, ce croy-ie, qu'il auoit avec les autres arts : car il estoit conseiller en la cour de parlement : & luy succeda si mal, qu'estant par apparence de plus forte complexion, il mourut pourtant long temps auant les autres, sauf vn, le Sieur de Saint Michel. Il est possible que i'ay receu d'eux cette dyspathie naturelle à la medecine : mais s'il n'y eust eu que cette consideration, i'eusse essayé de la forcer. Car toutes ces conditions, qui naissent en nous sans raison, elles sont vitieuses : c'est vne espece de maladie qu'il faut combattre. Il peult estre, que i'y auois cette propension, mais ie l'ay appuyée & fortifiée par les discours, qui m'en ont estably l'opinion que i'en ay. Car ie hay aussi cette consideration de refuser la medecine pour l'aigreur de son goust. Ce ne seroit aysément mon humeur, qui trouue la santé digne d'estre r'achetée, par tous les cauterres & incisions les plus penibles qui se facent. Et suyuant Epicurus, les voluptez me semblent à euitier, si elles tirent à leurs fuittes des douleurs plus grandes : & les douleurs à rechercher, qui tirent à leur fuite

des voluptez plus grandes. C'est vne pretieuse chose, que la santé : & la seule qui merite à la verité qu'on y employe, non le temps seulement, la fueur, la peine, les biens, mais encore la vie à sa poursuite : d'autant que sans elle, la vie nous vient à estre iniurieuse. La volupté, la sagesse, la science & la vertu, sans elle se ternissent & esuanouissent. Et aux plus fermes & tendus discours, que la philosophie nous vueille imprimer au contraire, nous n'auons qu'à opposer l'image de Platon, estant frappé du haut mal, ou d'une apoplexie : & en cette presuppotion le deffier d'appeller à son secours les riches facultez de son ame. Toute voye qui nous meneroit à la santé, ne se peut dire pour moy ny aspre, ny chere. Mais i'ay quelques autres apparences, qui me font estrangement deffier de toute cette marchandise. Je ne dy pas qu'il n'y en puisse auoir quelque art : qu'il n'y ait parmy tant d'ouurages de Nature, des choses propres à la conseruation de nostre santé, cela est certain. L'entens bien, qu'il y a quelque simple qui humecte, quelque autre qui assèche : ie sçay par experience, & que les refforts produisent des vents, & que les feuilles du sené laschent le ventre : ie sçay plusieurs telles experiences : comme ie sçay que le mouton me nourrit, & que le vin m'eschauffe. Et disoit Solon, que le manger estoit, comme les autres drogues, vne medecine contre la maladie de la faim. Je ne desaduouë pas l'usage, que nous tirons du monde, ny ne doute de la puissance & vberté de Nature, & de son application à nostre besoing. Je vois bien que les brochets, & les arondes se trouuent bien d'elle. Je me deffie des inuentions de nostre esprit : de nostre science & art : en faueur duquel nous l'auons abandonnée, & ses regles :

& auquel nous ne ſçauons tenir moderation, ny limite. Comme nous appellons iuſtice, le paſſiſſage des premieres loix qui nous tombent en main, & leur diſpenſation & pratique, tres inepte ſouuent & tres inique. Et comme ceux, qui s'en moquent, & qui l'accuſent, n'entendent pas pourtant iniurier cette noble vertu : ains condamner ſeulement l'abus & profanation de ce ſacré titre. De meſme, en la medecine, i'honore bien ce glorieux nom, ſa propoſition, ſa promeſſe, ſi vtile au genre humain : mais ce qu'il deſigne entre nous, ie ne l'honore, ny l'eſtime. En premier lieu l'experiance me le fait craindre : car de ce que i'ay de cognoiſſance, ie ne voy nulle race de gens ſi toſt malade, & ſi tard guerrie, que celle qui eſt ſoubs la iuriſdiction de la medecine. Leur ſanté meſme eſt alterée & corrompue, par la contrainte des regimes. Les medecins ne ſe contentent point d'auoir la maladie en gouuernement, ils rendent la ſanté malade, pour garder qu'on ne puiſſe en aucune faiſon eſchapper leur autorité. D'une ſanté conſtante & entiere, n'en tirent ils pas l'argument d'une grande maladie future ? l'ay eſté aſſez ſouuent malade : i'ay trouué ſans leurs ſecours, mes maladies auſſi douces à ſupporter (& en ay eſſayé quaſi de toutes les fortes) & auſſi courtes, qu'à nul autre : & ſi n'y ay point meſlé l'amertume de leurs ordonnances. La ſanté, ie l'ay libre & entiere, ſans regle, & ſans autre diſcipline, que de ma couſtume & de mon plaiſir. Tout lieu m'eſt bon à m'arreſter : car il ne me faut autres commoditez eſtant malade, que celles qu'il me faut eſtant ſain. Je ne me paſſionne point d'eſtre ſans medecin, ſans apotiquaire, & ſans ſecours : dequoy i'en voy la plus part plus affligez que du mal. Quoy ? eux meſmes nous ſont ils voir

de l'heur & de la durée en leur vie, qui nous puisse tesmoigner quelque apparent effect de leur science? Il n'est nation qui n'ait esté plusieurs siècles sans la medecine : & les premiers siècles, c'est à dire les meilleurs & les plus heureux : & du monde la dixiesme partie ne s'en sert pas encores à cette heure. Infinites nations ne la cognoissent pas, où l'on vit & plus sainement, & plus longuement, qu'on ne fait icy : & parmy nous, le commun peuple s'en passe heureusement. Les Romains auoyent esté six cens ans, auant que de la recevoir : mais apres l'auoir essayée, ils la chasserent de leur ville, par l'entremise de Caton le Censeur, qui montra combien aysement il s'en pouoit passer, ayant vescu quatre vingts & cinq ans : & faict viure sa femme iusqu'à l'extreme vieillesse, non pas sans medecine : mais ouy bien sans medecin : car toute chose qui se trouue salubre à nostre vie, se peut nommer medecine. Il entretenoit, ce dit Plutarque, sa famille en santé, par l'usage, ce me semble, du lieure. Comme les Arcades, dit Pline, guerissent toutes maladies avec du lait de vache. Et les Lybiens, dit Herodote, iouyssent populairement d'une rare santé, par cette coustume qu'ils ont : apres que leurs enfants ont atteint quatre ans, de leur causterizer & bruler les veines du chef & des temples : par où ils coupent chemin pour leur vie, à toute defluxion de rheume. Et les gens de village de ce pays, à tous accidens n'employent que du vin le plus fort qu'ils peuuent, meslé à force safran & espice : tout cela avec une fortune pareille. Et à dire vray, de toute cette diuersité & confusion d'ordonnances, quelle autre fin & effect apres tout y a il, que de vider le ventre? ce que mille simples domestiques peuuent faire. Et si ne sçay si c'est si

vtilement qu'ils disent : & si nostre nature n'a point besoing de la residence de ses excremens, iusques à certaine mesure, comme le vin a de sa lie pour sa conseruation. Vous voyez souuent des hommes sains, tomber en vomissemens, ou flux de ventre par accident estranger, & faire vn grand vuidange d'excremens sans besoïn aucun precedent, & sans aucune vtilité suyuant, voire auec empirement & dommage. C'est du grand Platon, que i'apprins n'agueres, que de trois sortes de mouuements, qui nous appartiennent, le dernier & le pire est celuy des purgations : que nul homme, s'il n'est fôl, ne doit entreprendre, qu'à l'extreme necessité. On va troublant & esueillant le mal par oppositions contraires. Il faut que ce soit la forme de viure, qui doucement l'allanguisse & reconduise à sa fin. Les violentes harpades de la drogue & du mal, sont tousiours à nostre perte, puis que la querelle se desmesle chez nous, & que la drogue est vn secours infiable : de sa nature ennemy à nostre santé, & qui n'a accez en nostre estat que par le trouble. Laissons vn peu faire. L'ordre qui pouruoid aux puces & aux taupes, pouruoid aussi aux hommes, qui ont la patience pareille, à se laisser gouuerner, que les puces & les taupes. Nous auons beau crier bihore : c'est bien pour nous enroüier, mais non pour l'auancer. C'est vn ordre superbe & impiteux. Nostre crainte, nostre desespoir, le desgoust & retarde de nostre ayde, au lieu de l'y conuier. Il doibt au mal son cours, comme à la santé. De se laisser corrompre en faueur de l'vn, au preiudice des droits de l'autre, il ne le fera pas : il tomberoit en desordre. Suyuons de par Dieu, suyuous. Il meine ceux qui suyuent : ceux qui ne le suyuent pas, il les entraine, & leur rage, & leur

medecine ensemble. Faittes ordonner vne purgation à vostre ceruelle. Elle y fera mieux employée, qu'à vostre estomach. On demandoit à vn Lacedemonien, qui l'auoit fait viure sain si long temps : L'ignorance de la medecine, respondit-il. Et Adrian l'Empereur crioit sans cesse en mourant, que la presse des medecins l'auoit tué. Vn mauuais luiſteur se fit medecin : Courage, luy dit Diogenes, tu as raison, tu mettras à cette heure en terre ceux qui t'y ont mis autres-fois. Mais ils ont cet heur, selon Nicocles, que le soleil esclaire leur succez, & la terre cache leur faute. Et outre-cela, ils ont vne façon bien auantageuse, à se seruir de toutes sortes d'euenemens : car ce que la Fortune, ce que la Nature, ou quelque autre cause estrangere, desquelles le nombre est infini, produit en nous de bon & de salutaire, c'est le priuilege de la medecine de se l'attribuer. Tous les heureux succez qui arriuent au patient, qui est soubz son regime, c'est d'elle qu'il les tient. Les occasions qui m'ont guery moy, & qui guerissent mille autres, qui n'appellent point les medecins à leurs secours, ils les vsurpent en leurs subiects. Et quant aux mauuais accidens, ou ils les desaduoiënt tout à fait, en attribuant la coulpe au patient, par des raisons si vaines, qu'ils n'ont garde de faillir d'en trouuer tousiours assez bon nombre de telles : Il a descouuert son bras, il a ouy le bruit d'un coche :

rhedarum transitus arſto

Vicorum inflexu :

on a entrouuert sa fenestre, il s'est couché sur le costé gauche, ou passé par sa teste quelque pensément penible. Somme vne parolle, vn songe, vne

œuillade, leur semble suffisante excuse pour se descharger de faute. Ou, s'il leur plaist, ils se seruent encore de cet empirement, & en font leurs affaires, par cet autre moyen qui ne leur peut iamais faillir : c'est de nous payer lors que la maladie se trouue reschaufee par leurs applications, de l'assurance qu'ils nous donnent, qu'elle seroit bien autrement empirée sans leurs remedes. Celuy qu'ils ont ietté d'un morfondement en vne fièvre quotidienne, il eust eu sans eux, la continue. Ils n'ont garde de faire mal leurs besongnes, puis que le dommage leur reuient à profit. Vrayement ils ont raison de requerir du malade, vne application de creance fauorable : il faut qu'elle le soit à la verité en bon escient, & bien souple, pour s'appliquer à des imaginations si mal aisées à croire. Platon disoit bien à propos, qu'il n'appartenoit qu'aux medecins de mentir en toute liberté, puis que nostre salut despend de la vanité, & fauceté de leurs promesses. Æsope auteur de tref-rare excellence, & duquel peu de gens descouurent toutes les graces, est plaissant à nous représenter cette autorité tyrannique, qu'ils vsurpent sur ces pauvres ames affoiblies & abatuës par le mal, & la crainte : car il conte, qu'un malade estant interrogé par son medecin, quelle operation il sentoit des medicamens, qu'il luy auoit donnez : l'ay fort sué, respondit-il. Cela est bon, dit le medecin. Vne autre fois il luy demanda encore, comme il s'estoit porté depuis : l'ay eu un froid extreme, fit-il, & si ay fort tremblé. Cela est bon, fuyit le medecin : à la troisieme fois, il luy demanda de rechef, comment il se portoit : Je me sens, dit-il, enfler & bouffir comme d'hydropisie. Voyla qui va bien, adiousta le medecin. L'un de ses domestiques

venant apres à s'enquerir à luy de son estat : Certes mon amy, respond-il, à force de bien estre, ie me meurs. Il y auoit en *Ægypte* vne loy plus iuste, par laquelle le medecin prenoit son patient en charge les trois premiers iours, aux perils & fortunes du patient : mais les trois iours passez, c'estoit aux siens propres. Car quelle raison y a-il, qu'*Æsculapius* leur patron ait esté frappé du foudre, pour auoir r'amené *Hypolitus* de mort à vie,

*Nam pater omnipotens aliquem indignatus ab umbris
Mortalem infernis, ad lumina surgere vitæ,
Ipse repertorem medicinæ talis, & artis
Fulmine Phæbigenam stygias detruxit ad vndas :*

& ses suyans soyent absous, qui enuoyent tant d'ames de la vie à la mort? Vn medecin vantoit à *Nicoclés*, son art estre de grande auctorité : Vrayement c'est mon, dit *Nicoclés*, qui peut impunement tuer tant de gens. Au demeurant, si i'eusse esté de leur conseil, i'eusse rendu ma discipline plus sacrée & mystérieuse : ils auoyent assez bien commencé, mais ils n'ont pas acheué de mesme. C'estoit vn bon commencement, d'auoir fait des dieux & des dæmons auteurs de leur science, d'auoir pris vn langage à part, vne escriture à part. Quoy qu'en sente la philosophie, que c'est folie de conseiller vn homme pour son profit, par maniere non intelligible : *Vt si quis medicus imperet vtumat*

Terrigenam, herbigradam, domiportam, sanguine cassam.

C'estoit vne bonne regle en leur art, & qui accompagne toutes les arts fanatiques, vaines, & supernaturelles, qu'il faut que la foy du patient, preoccupe

par bonne esperance & assurance, leur effect & operation. Laquelle regle ils tiennent iusques là, que le plus ignorant & grossier medecin, ils le trouuent plus propre à celuy, qui a fiance en luy, que le plus experimenté, & incognu. Le choix mesmes de la plus part de leurs drogues est aucunement mystereux & diuin. Le pied gauché d'une tortue, l'urine d'un lezart, la fiente d'un elephant, le foye d'une taupe, du sang tiré sous l'aile droite d'un pigeon blanc : & pour nous autres coliqueux (tant ils abusent desdaigneusement de nostre misere) des crottes de rat puluerisées, & telles autres singeries, qui ont plus le visage d'un enchantement magique, que de science solide. Je laisse à part le nombre imper de leurs pillules : la destination de certains iours & festes de l'année : la distinction des heures, à cueillir les herbes de leurs ingrediens : & cette grimace rebarbative & prudente, de leur port & contenance, dequoy Pline mesme se mocque. Mais ils ont failly, veux-je dire, de ce qu'à ce beau commencement, ils n'ont adiousté cecy, de rendre leurs assemblées & consultations plus religieuses & secretes : aucun homme profane n'y deuoit auoir accez, non plus qu'aux secretes ceremonies d'Æsculape. Car il aduient de cette faute, que leur irresolution, la foiblesse de leurs argumens, diuinations & fondemens, l'aspreté de leurs contestations, pleines de haine, de ialousie, & de consideration particuliere, venants à estre descouuertes à un chacun, il faut estre merueilleusement aueugle, si on ne se sent bien hazardé entre leurs mains. Qui vid iamais medecin se seruir de la recepte de son compagnon, sans y retrancher ou adiouter quelque chose ? Ils trahissent assez par là leur art : & nous font voir qu'ils y considerent

plus leur reputation, & par consequent leur profit, que l'interest de leurs patiens. Celuy là de leurs docteurs est plus sage, qui leur a anciennement prescript, qu'un seul se mesle de traiter un malade : car s'il ne fait rien qui vaille, ~~le~~ reproche à l'art de la medecine, n'en sera pas fort grand pour la faute d'un homme seul : & au rebours, la gloire en sera grande, s'il vient à bien rencontrer : là où quand ils sont beaucoup, ils descrient à tous les coups le mestier : d'autant qu'il leur aduient de faire plus souvent mal que bien. Ils se deuoient contenter du perpetuel desaccord, qui se trouue és opinions des principaux maistres & autheurs anciens de cette science, lequel n'est cogneu que des hommes versez aux liures, sans faire voir encore au peuple les controuerses & inconstances de iugement, qu'ils nourrissent & continuent entre eux. Voulons nous un exemple de l'ancien debat de la medecine ? Hierophilus loge la cause originelle des maladies aux humeurs : Erasistratus, au sang des arteres : Asclepiades, aux atomes inuisibles s'escoulants en noz pores : Alcmæon, en l'exuperance ou deffaut des forces corporelles : Diocles, en l'inegalité des elements du corps, & en la qualité de l'air, que nous respirons : Strato, en l'abondance, crudité, & corruption de l'aliment que nous prenons : Hippocrates la loge aux esprits. Il y a l'un de leurs amis, qu'ils cognoissent mieux que moy, qui s'escrie à ce propos, que la science la plus importante qui soit en nostre vsage, comme celle qui a charge de nostre conseruation & fanté, c'est de mal'heur, la plus incertaine, la plus trouble, & agitée de plus de changemens. Il n'y a pas grand danger de nous mescomter à la hauteur du soleil, ou en la fraction

de quelque supputation astronomique : mais icy, où il va de tout nostre estre, ce n'est pas sagesse, de nous abandonner à la mercy de l'agitation de tant de vents contraires. Auant la guerre Peloponnesiaque, il n'estoit pas grands nouvelles de cette science : Hippocrates la mit en credit : tout ce que cettuy-cy auoit estably, Chrysippus le renuerfa : depuis Erasistratus petit fils d'Aristote, tout ce que Chrysippus en auoit escrit. Apres ceux-cy, suruindrent les Empiriques, qui prindrent vne voye toute diuerse des anciens, au maniemment de cet art. Quand le credit de ces derniers commença à s'enuieillir, Herophilus mit en vſage vne autre sorte de medecine, qu'Asclepiades vint à combattre & aneantir à son tour. A leur reng gaignerent autorité les opinions de Themison, & depuis de Musa, & encore apres celles de Vexius Valens, medecin fameux par l'intelligence qu'il auoit avec Messalina. L'empire de la medecine tomba du temps de Neron à Thesalus, qui abolit & condamna tout ce qui en auoit esté tenu iusques à luy. La doctrine de cettuy-cy fut abbatue par Crinas de Marseille, qui apporta de nouveau, de regler toutes les operations medecinales, aux ephemerides & mouuemens des astres, manger, dormir, & boire à l'heure qu'il plairoit à la lune & à Mercure. Son autorité fut bien tost apres supplantée par Charinus, medecin de cette mesme ville de Marseille. Cettuy-cy combattoit non seulement la medecine ancienne, mais encore l'vſage des bains chauds, public, & tant de siecles auparauant accoustumé. Il faisoit baigner les hommes dans l'eau froide, en hyuer mesme, & plongeoit les malades dans l'eau naturelle des ruisseaux. Iusques au temps de Pline aucun Romain n'auoit encore

daigné exercer la medecine : elle se faisoit par des estrangiers, & Grecs : comme elle se fait entre nous François, par des Latineurs. Car comme dit vn tres-grand medecin, nous ne receuons pas aisément la médecine que nous entendons; non plus que la drogue que nous cueillons. Si les nations, desquelles nous retirons le gayac, la falseperille, & le bois d'esquine, ont des medecins, combien pensons nous par cette mesme recommandation de l'estrangereté, la rareté, & la cherté, qu'ils fassent feste de noz choulx, & de nostre persil? car qui oseroit mespriser les choses recherchées de si loing, au hazard d'une si longue peregrination & si perilleuse? Depuis ces anciennes mutations de la medecine, il y en a eu infinies autres iusques à nous; & le plus souuent mutations entieres & vniuerselles; comme sont celles que produisent de nostre temps, Paracelse, Fiorauanti & Argenterius : car ils ne changent pas seulement vne recepte, mais, à ce qu'on me dit, toute la contexture & police du corps de la medecine, accusans d'ignorance & de pippérié, ceux qui en ont fait profession iusques à eux. Je vous laisse à penser où en est le pauvre patient. Si encor nous estions asseurez, quand ils se mescontent, qu'il ne nous nuisist pas, s'il ne nous profite; ce seroit vne bien raisonnable composition, de se hazarder d'acquérir du bien, sans se mettre en danger de perte. *Æsopé* fait ce comte, qu'un qui auoit acheté vn More esclaué, estimant que cette couleur luy fust venue par accident, & mauuais traitement de son premier maistre, le fit medeciner de plusieurs bains & breuuages, avec grand soing : il aduint, que le More n'en amenda aucunement sa couleur basanée, mais qu'il en perdit entierement sa premiere santé. Combien de fois

nous aduient-il, de voir les medecins imputans les vns aux autres, la mort de leurs patiens? Il me souuient d'une maladie populaire, qui fut aux villes de mon voisinage, il y a quelques années, mortelle & tref-dangereuse : cet orage estant passé, qui auoit emporté vn nombre infiny d'hommes; l'un des plus fameux medecins de toute la contrée, vint à publier vn liuret, touchant cette matiere, par lequel il se rauise, de ce qu'ils auoyent vsé de la saignée, & confesse que c'est l'une des causes principales du dommage, qui en estoit aduenu. Dauantage leurs auteurs tiennent, qu'il n'y a aucune medecine, qui n'ait quelque partie nuisible. Et si celles mesmes qui nous seruent, nous offensent aucunement, que doiuent faire celles qu'on nous applique du tout hors de propos? De moy, quand il n'y auroit autre chose, i'estime qu'à ceux qui hayssent le goust de la medecine, ce soit vn dangereux effort, & de preiudice, de l'aller aualler à vne heure si incommode, avec tant de contre-cœur : & croy que cela essaye merueilleusement le malade, en vne saison, où il a tant besoin de repos. Outre ce, qu'à considerer les occasions, surquoy ils fondent ordinairement la cause de noz maladies, elles sont si legeres & si delicates, que i'argumente par là, qu'une bien petite erreur en la dispensation de leurs drogues, peut nous apporter beaucoup de nuifance. Or si le mescomte du medecin est dangereux, il nous va bien mal : car il est bien mal-aisé qu'il n'y retombe souuent : il a besoin de trop de pieces, considerations, & circonstances, pour affuster iustement son dessein. Il faut qu'il cognoisse la complexion du malade, sa temperature, ses humeurs, ses inclinations, ses actions, ses penfements mesmes, & ses imaginations. Il faut

qu'il se responde des circonstances externes, de la nature du lieu, condition de l'air & du temps, assiette des planetes, & leurs influences : qu'il sçache en la maladie les causes, les signes, les affections, les iours critiques : en la drogue, le poix, la force, le pays, la figure, l'aage, la dispensation : & faut que toutes ces pieces, il les sçache proportionner & rapporter l'vné à l'autre, pour en engendrer vne parfaite symmetrie. A quoy s'il faut tant soit peu, si de tant de refforts, il y en a vn tout seul, qui tire à gauche, en voyla assez pour nous perdre. Dieu sçait, de quelle difficulté est la cognoissance de la plupart de ces parties : car pour exemple, comment trouuera-il le signe propre de la maladie ; chacune estant capable d'un infiny nombre de signes ? Combien ont ils de débats entr'eux & de doubtes, sur l'interpretation des vrines ? Autrement d'où viendroît cette altercation continuelle que nous voyons entr'eux sur la cognoissance du mal ? Comment excuserions nous cette faute, où ils tombent si souuent, de prendre martre pour renard ? Aux maux, que i'ay eu, pour peu qu'il y eust de difficulté, ie n'en ay iamais trouué trois d'accord. Je remarque plus volontiers les exemples qui me touchent. Dernierement à Paris vn Gentil-homme fut taillé par l'ordonnance des medecins, auquel on ne trouua de pierre non plus à la vessie, qu'à la main ; & là mesmes, vn Euesque qui m'estoit fort amy, auoit esté instamment sollicité par la plupart des medecins, qu'il appelloit à son conseil, de se faire tailler : i'aydoy moy mesme sous la foy d'autrui, à le luy suader : quand il fut trespasé, & qu'il fut ouuert, on trouua qu'il n'auoit mal qu'aux reins. Ils sont moins excusables en cette maladie, d'autant

qu'elle est aucunement palpable. C'est par là que la chirurgie me semble beaucoup plus certaine, par ce qu'elle voit & manie ce qu'elle fait; il y a moins à coniecturer & à deuiner. Là où les medecins n'ont point de *speculum matricis*, qui leur descouure nostre cerueau, nostre poulmon, & nostre foye. Les promesses mesmes de la medecine sont incroyables. Car ayant à prouuoir à diuers accidents & contraires, qui nous pressent souuent ensemble, & qui ont vne relation quasi necessaire, comme la chaleur du foye, & froideur de l'estomach, ils nous vont persuadant que de leurs ingrediens, cettuy-cy eschauffera l'estomach, cet autre refraichira le foye : l'un a sa charge d'aller droit aux reins, voire iusques à la vessie, sans estaler ailleurs ses operations; & conseruant ses forces & sa vertu, en ce long chemin & plein de destourbiers, iusques au lieu, au seruice duquel il est destiné, par sa proprieté occulte : l'autre asséchera le cerueau : celui là humectera le poulmon. De tout cet amas, ayant fait vne mixtion de breuage, n'est-ce pas quelque espece de resuerie, d'esperer que ces vertus s'aillent diuisant, & triant de cette confusion & meslange, pour courir à charges si diuerses? Je craindrois infiniment qu'elles perdissent, ou eschangeassent leurs ethiquettes, & troublassent leurs quartiers. Et qui pourroit imaginer, qu'en cette confusion liquide, ces facultez ne se corrompent, confondent, & alterent l'une l'autre? Quoy, que l'execution de cette ordonnance despend d'un autre officier, à la foy & mercy duquel nous abandonnons encore un coup nostre vie? Comme nous auons des pourpointiers, des chauffetiers pour nous vestir; & en sommes d'autant mieux seruis, que chacun ne se mesle que de son subiect, & a sa science plus

restreinte & plus courte, que n'a vn tailleur, qui embrasse tout. Et comme, à nous nourrir, les grands, pour plus de commodité ont des offices distinguez de potagers & de rostisseurs, dequoy vn cuisinier, qui prend la charge vniuerselle, ne peut si exquisément venir à bout. De mesme à nous guairir, les Égyptiens auoient raison de reiecter ce general mestier de medecin, & descoupper cette profession à chasque maladie, à chasque partie du corps son œuurier. Car cette partie en estoit bien plus proprement & moins confusement traitée, de ce qu'on ne regardoit qu'à elle spécialement. Les nostres ne s'aduissent pas, que, qui pouruoid à tout, ne pouruoid à rien : que la totale police de ce petit monde, leur est indigestible. Cependant qu'ils craignent d'arrester le cours d'un dysenterique, pour ne luy causer la fieure, ils me tuerent vn amy, qui valoit mieux, que tout tant qu'ils font. Ils mettent leurs diuinations au poids, à l'encontré des maux presents : & pour ne guarir le cerueau au preiudice de l'estomach, offencent l'estomach, & empirent le cerueau, par ces drogues tumultuaires & dissensieuses. Quant à la variété & foiblesse des raisons de cet art, elle est plus apparente qu'en aucun autre art. Les choses aperitiues sont viles à vn homme coliqueux, d'autant qu'ouurans les passages & les dilatans, elles acheminent cette matiere gluante, de laquelle se bastit la graue, & la pierre, & conduisent contre-bas, ce qui se commence à durcir & amasser aux reins. Les choses aperitiues sont dangereuses à vn homme coliqueux, d'autant qu'ouurans les passages & les dilatans, elles acheminent vers les reins, la matiere propre à bastir la graue, lesquels s'en faissans volontiers pour cette

propension qu'ils y ont, il est mal aisé qu'ils n'en arrestent beaucoup de ce qu'on y aura charrié. D'auantage, si de fortune il s'y rencontre quelque corps, vn peu plus grossier qu'il ne faut pour passer tous ces destroicts, qui restent à franchir pour l'expeller au dehors, ce corps étant esbranlé par ces choses aperitiues, & ietté dans ces canaux estroits, venant à les boucher, acheminera vne certaine mort & tref-douloureuse. Ils ont vne pareille fermeté aux conseils qu'ils nous donnent de nostre regime de viure : il est bon de tomber souuent de l'eau, car nous voyons par experience, qu'en la laissant croupir, nous luy donnons loisir de se descharger de ses excremens, & de sa lye, qui seruira de matiere à bafir la pierre en la vessie : il est bon de ne tomber point souuent de l'eau, car les poisons excremens qu'elle traine quant & elle, ne s'emporteront point, s'il n'y a de la violence, comme on void par experience, qu'un torrent qui roule avecques roideur, baloye bien plus nettement le lieu où il passe, que ne fait le cours d'un ruisseau mol & lasche. Pareillement, il est bon d'auoir souuent affaire aux femmes, car cela ouure les passages, & achemine la graue & le sable. Il est bien aussi mauuais, car cela eschauffe les reins, les lasse & affoiblit. Il est bon de se baigner aux eaux chaudes, d'autant que cela relasche & amollit les lieux, où se croupit le sable & la pierre. Mauuais aussi est-il, d'autant que cette application de chaleur externe, aide les reins à cuire, durcir, & petrifier la matiere qui y est disposée. A ceux qui sont aux bains, il est plus salubre de manger peu le soir, affin que le breuuage des eaux qu'ils ont à prendre lendemain matin, face plus d'operation, rencontrant l'estomach vuide,

& non empesché. Au rebours, il est meilleur de manger peu au dîner, pour ne troubler l'opération de l'eau, qui n'est pas encore parfaite, & ne charger l'estomach si soudain, apres cet autre traual, & pour laisser l'office de digerer, à la nuit, qui le sçait mieux faire que ne fait le iour, où le corps & l'esprit, sont en perpetuel mouuement & action. Voila comment ils vont bastelant, & baguenaudant à noz despens en tous leurs discours, & ne me sçau-roient fournir proposition, à laquelle ie n'en reba-tisse vne contraire, de pareille force. Qu'on ne crie donc plus apres ceux qui en ce trouble, se laissent doucement conduire à leur appetit & au conseil de Nature, & se remettent à la fortune commune. L'ay veu par occasion de mes voyages, quasi tous les bains fameux de Chrestienté; & depuis quelques années ay commencé à m'en feruir. Car en general i'estime le baigner salubre, & croy que nous encou-rons non legeres incommoditez, en nostre santé, pour auoir perdu cette coustume, qui estoit generalement obseruée au temps passé, quasi en toutes les nations, & est encores en plusieurs, de se lauer le corps tous les iours : & ne puis pas imaginer que nous ne vaillions beaucoup moins de tenir ainsi noz membres encroustrez, & noz pores estoupez de crasse. Et quant à leur boisson, la Fortune a fait premierement, qu'elle ne soit aucunement ennemie de mon goust : secondement elle est naturelle & simple, qui au-moins n'est pas dangereuse, si elle est vaine. De-quoy ie prens pour respondant, cette infinité de peu-ples de toutes sortes & complexions, qui s'y assem-ble. Et encores que ie n'y aye apperceu aucun effect extraordinaire & miraculeux : ains que m'en in-formant vn peu plus curieusement qu'il ne se fait,

i'aye trouué mal fondez & faux, tous les bruits de telles operations, qui se fement en ces lieux là, & qui s'y croient (comme le monde va se pippant aisément de ce qu'il desire) toutesfois aussi, n'ay-ie veu guere de personnes que ces eaux ayent empiré; & ne leur peut-on sans malice refuser cela, qu'elles n'esfueillent l'appetit, facilitent la digestion, & nous prestent quelque nouvelle allegresse, si on n'y va par trop abbatu de forces; ce que ie desconseille de faire. Elles ne font pas pour releuer vne poissante ruynne: elles peuuent appuyer vne inclination legere, ou prouuoir à la menace de quelque alteration. Qui n'y apporte assez d'allegresse, pour pouuoir iouyr le plaisir des compagnies qui s'y trouuent, & des promenades & exercices, à quoy nous conuie la beauté des lieux, où sont communément assises ces eaux, il perd sans doubte la meilleure piece & plus assurée de leur effect. A cette cause i'ay choisi iusques à cette heure, à m'arrester & à me seruir de celles, où il y auoit plus d'amœnitè de lieu, commodité de logis, de viures & de compagnies, comme sont en France, les bains de Banieres: en la frontiere d'Allemagne, & de Lorraine, ceux de Plombieres: en Souysse, ceux de Bade: en la Tos cane, ceux de Lucques; & specialement ceux *della Villa*, desquels i'ay vîé plus souuent, & à diuerses saisons. Chasque nation a des opinions particulieres, touchant leur vsage, & des loix & formes de s'en seruir, toutes diuerses: & selon mon experience l'effect quasi pareil. Le boire n'est aucunement receu en Allemagne. Pour toutes maladies, ils se baignent, & sont à grenouiller dans l'eau, quasi d'un soleil à l'autre. En Italie, quand ils boient neuf iours, ils s'en baignent pour le moins trente; & communément boient l'eau

mixonnée d'autres drogues, pour secourir son operation. On nous ordonne icy, de nous promener pour la digerer : là on les arreste au liét, où ils l'ont prise, iufques à ce qu'ils l'ayent vuidée, leur eschauffant continuellement l'estomach, & les pieds. Comme les Allemans ont de particulier, de se faire generalmente tous corneter & vantoufer, avec scarification dans le bain : ainfin ont les Italiens leurs *doccie*, qui font certaines gouttieres de cette eau chaude, qu'ils conduisent par des cannes, & vont baignant vne heure le matin, & autant l'apres disnée, par l'espace d'un mois, ou la teste, ou l'estomach, ou autre partie du corps, à laquelle ils ont affaire. Il y a infinies autres differences de coustumes, en chaque contrée : ou pour mieux dire, il n'y a quasi aucune ressemblance des vnes aux autres. Voylà comment cette partie de medecine, à laquelle seule ie me suis laissé aller, quoy qu'elle soit la moins artificielle, si a elle sa bonne part de la confusion & incertitude, qui se voit par tout ailleurs en cet art. Les poëtes disent tout ce qu'ils veulent, avec plus d'emphase & de grace; tesmoing ces deux epigrammes.

*Alcon hesterno signum Iouis attigit. Ille
Quamuis marmoreus, vim patitur medici.
Ecce hodie iussus transferri ex æde vetusta,
Effertur, quamuis sit Deus atque lapis.*

Et l'autre,

*Lotus nobiscum est hilaris, cœnavit & idem,
Inuentus mane est mortuus Andragoras.
Tam subitæ mortis causam Faustine requiris?
In somnis medicum viderat Hermocratem.*

Sur quoy ie veux faire deux comtes. Le Baron de Caupene en Chalosse, & moy, auons en commun le droit de patronage d'un benefice, qui est de grande estenduë, au pied de noz montaignes, qui se nomme Lahontan. Il est des habitans de ce coin, ce qu'on dit de ceux de la vallée d'Angrougne; ils auoient vne vie à part, les façons, les vestemens, & les mœurs à part : regis & gouuenez par certaines polices & coustumes particulieres, receuës de pere en filz, aufquelles ils s'obligeoient sans autre contrainte, que de la reuerence de leur vsage. Ce petit estat s'estoit continué de toute ancienneté en vne condition si heureuse, qu'aucun iuge voisin n'auoit esté en peine de s'informer de leur affaire; aucun aduocat employé à leur donner aduis, ny estrangier appellé pour esteindre leurs querelles; & n'auoit on iamais veu aucun de ce destroit à l'aumosne. Ils fuyoient les alliances & le commerce de l'autre monde, pour n'alterer la pureté de leur police : iusques à ce, comme ils recitent, que l'un d'entre eux, de la memoire de leurs peres, ayant l'ame espoissonnée d'une noble ambition, alla s'aduifer pour mettre son nom en credit & reputation, de faire l'un de ses enfans maistre Iean, ou maistre Pierre : & l'ayant fait instruire à escrire en quelque ville voisine, en rendit en fin vn beau notaire de village. Cettuy-cy, deuenu grand, commença à desdaigner leurs anciennes coustumes, & à leur mettre en teste la pompe des regions de deça. Le premier de ses comperes, à qui on escorna vne cheure, il luy conseilla d'en demander raison aux iuges Royaux d'autour de là; & de cettuy-cy à vn autre, iusques à ce qu'il eust tout abastardy. A la fuite de cette corruption, ils disent, qu'il y en suruint incontinent vn' autre, de pire consequence, par

le moyen d'un medecin, à qui il print enuie d'espouiser vne de leurs filles, & de s'habituer parmy eux. Certuy-cy commença à leur apprendre premierement le nom des fiebres, des rheumes, & des apostemes, la situation du cœur, du foye, & des intestins, qui estoit vne science iusques lors tres-esloignée de leur cognoissance : & au lieu de l'ail, dequoy ils auoyent appris à chasser toutes fortes de maux, pour aspres & extremes qu'ils fussent, il les accoustuma pour vne toux, ou pour vn morfondement, à prendre les mixtions estrangeres, & commença à faire trafique, non de leur santé seulement, mais aussi de leur mort. Ils iurent que depuis lors seulement, ils ont apperceu que le serain leur appesantissoit la teste, que le boire ayant chault apportoit nuifance, & que les vents de l'automne. estoient plus griefs que ceux du printemps : que depuis l'usage de cette medecine, ils se trouuent accablez d'une legion de maladies inaccoustumées, & qu'ils apperçoient vn general deschet, en leur ancienne vigueur, & leurs vies de moitié raccourcies. Voyla le premier de mes comtes. L'autre est, qu'auant ma subiection graueleuse, oyant faire cas du sang de bouc à plusieurs, comme d'une manne celeste enuoyée en ces derniers siecles, pour la tutelle & conseruation de la vie humaine; & en oyant parler à des gens d'entendement comme d'une drogue admirable, & d'une operation infaillible : moy qui ay tousiours pensé estre en bute à tous les accidens, qui peuuent toucher tout autre homme, prins plaisir en pleine santé à me prouuoir de ce miracle; & commanday chez moy qu'on me nourrist vn bouc selon la recepte. Car il faut que ce soit aux mois les plus chaleureux de l'esté, qu'on le retire : & qu'on ne

luy donne à manger que des herbes aperitives, & à boire que du vin blanc. Je me rendis de fortune chez moy le iour qu'il deuoit estre tué : on me vint dire que mon cuyfinier trouuoit dans la panse deux ou trois grosses boules, qui se chocquoient l'une l'autre parmy sa mangeaille. Je fus curieux de faire apporter toute cette tripaille en ma presence, & fis ouvrir cette grosse & large peau : il en sortit trois gros corps, legers comme des éponges, de façon qu'il semble qu'ils soyent creux, durs au demeurant par le dessus & fermes, bigarrez de plusieurs couleurs mortes : l'un parfait en rondeur, à la mesure d'une courte boule : les autres deux, un peu moins, auxquels l'arrondissement est imparfait, & semble qu'il s'y acheminast. J'ay trouué, m'en estant fait enquerir à ceux, qui ont accoustumé d'ouvrir de ces animaux, que c'est un accident rare & inusité. Il est vray-semblable que ce sont des pierres cousines des nostres. Et s'il est ainsi, c'est une espérance bien vaine aux graueleux, de tirer leur guérison du sang d'une beste, qui s'en alloit elle mesme mourir d'un pareil mal. Car de dire que le sang ne se sent pas de cette contagion, & n'en altere sa vertu accoustumée, il est plustost à croire, qu'il ne s'engendre rien en un corps que par la conspiration & communication de toutes les parties : la masse agit tout'entiere, quoy que l'une piece y contribue plus que l'autre, selon la diuersité des operations. Parquoy il y a grande apparence qu'en toutes les parties de ce bouc, il y auoit quelque qualité petrifiante. Ce n'estoit pas tant pour la crainte de l'aduenir, & pour moy, que j'estoy curieux de cette experience : comme c'estoit, qu'il aduient chez moy, ainsi qu'en plusieurs maisons, que les femmes y font

amas de telles menues drogueries, pour en secourir le peuple : vsant de mesme recepte à cinquante maladies, & de telle recepte, qu'elles ne prennent pas pour elles, & si triomphent en bons euenemens. Au demeurant, i'honore les medecins, non pas fuiuant le precepte, pour la necessité (car à ce passage on en oppose vn autre du prophete, reprenant le Roy Afa d'auoir eu recours au medecin) mais pour l'amour d'eux mesmes, en ayant veu beaucoup d'honnestes hommes & dignes d'estre aymez. Ce n'est pas à eux que i'en veux, c'est à leur art, & ne leur donne pas grand blafme de faire leur profit de nostre sottise, car la plus part du monde fait ainsi. Plusieurs vacations & moindres & plus dignes que la leur, n'ont fondement, & appuy qu'aux abuz publiques. Je les appelle en ma compagnie, quand ie suis malade, s'ils se rencontrent à propos, & demande à en estre entretenu, & les paye comme les autres. Je leur donne loy, de me commander de m'abrier chaudement, si ie l'ayme mieux ainsi, que d'autre sorte : ils peuuent choisir d'entre les porreaux & les laitues, dequoy il leur plaira que mon bouillon se face, & m'ordonner le blanc ou le claiet : & ainsi de toutes autres choses, qui sont indifferentes à mon appetit & vsage. I'entens bien que ce n'est rien faire pour eux, d'autant que l'aigreur & l'estrangeté sont accidens de l'essence propre de la medecine. Lycurgus ordonnoit le vin aux Spartiates malades. Pourquoi ? par ce qu'ils en haïssoyent l'vsage, sains. Tout ainsi qu'un Gentilhomme mon voisin s'en sert pour drogue tressalutaire à ses siebures, par ce que de sa nature il en haït mortellement le goust. Combien en voyons nous d'entr'eux, estre de mon humeur ? desdaigner la

medecine pour leur service, & prendre vne forme de vie libre, & toute contraire à celle qu'ils ordonnent à autrui? Qu'est-ce cela, si ce n'est abuser tout destrouffement de nostre simplicité? Car ils n'ont pas leur vie & leur santé moins chere que nous; & accommoderoient leurs effects à leur doctrine, s'ils n'en cognoissoient eux mesmes la faulxeté. C'est la crainte de la mort & de la douleur, l'impatience du mal, vne furieuse & indiscrete soif de la guerison, qui nous aueugle ainfi. C'est pure lascheté qui nous rend nostre croyance si molle & maniable. La plus part pourtant ne croient pas tant, comme ils endurent & laissent faire : car ie les oy se plaindre & en parler, comme nous. Mais ils se resoluent en fin : Que feroi-je donc? Comme si l'impatience estoit de foy quelque meilleur remede, que la patience. Y a il aucun de ceux qui se sont laissez aller à cette miserable subiection, qui ne se rende esgalement à toute sorte d'impostures? qui ne se mette à la mercy de quiconque a cette impudence, de luy donner promesse de sa guerison? Les Babyloniens portoyent leurs malades en la place : le medecin c'estoit le peuple : chacun des passants ayant par humanité & ciuilité à s'enquerir de leur estat : &, selon son experience, leur donner quelque aduis salutaire. Nous n'en faisons guere autrement : il n'est pas vne simple femmelette, de qui nous n'employons les barbotages & les breuets : & selon mon humeur, si i'auoy à en accepter quelqu'une, j'accepterois plus volontiers cette medecine qu'aucune autre : d'autant qu'au moins il n'y a nul dommage à craindre. Ce qu'Homere & Platon disoyent des Égyptiens, qu'ils estoient tous medecins, il se doit dire de tous peuples. Il n'est personne, qui ne se vante de quelque

recepte, & qui ne la hazarde sur son voisin, s'il l'en veut croire. L'estoy l'autre iour en vne compagnie, où ie ne sçay qui, de ma confrairie, apporta la nouvelle d'une forte de pillules compilées de cent, & tant d'ingrediens de comte fait : il s'en esmeut vne feste & vne consolation singuliere : car quel rocher soustiendroit l'effort d'une si nombreuse batterie ? L'entens toutesfois par ceux qui l'essayerent, que la moindre petite graue ne daigna s'en esmouvoir. Je ne me puis desprendre de ce papier, que ie n'en die encore ce mot, sur ce qu'ils nous donnent pour respondant de la certitude de leurs drogues, l'experience qu'ils ont faite. La plus part, & ce croy-je, plus des deux tiers des vertus medecinales, consistent en la quinte essence, ou propriété occulte des simples ; de laquelle nous ne pouuons auoir autre instruction que l'usage. Car quinte essence, n'est autre chose qu'une qualité, de laquelle par nostre raison nous ne sçauons trouuer la cause. En telles preuues, celles qu'ils disent auoir acquises par l'inspiration de quelque dæmon, ie suis content de les receuoir, (car quant aux miracles, ie n'y touche iamais) ou bien encore les preuues qui se tirent des choses, qui pour autre consideration tombent souvent en nostre usage : comme si en la laine, dequoy nous auons accoustumé de nous vestir, il s'est trouué par accident, quelque occulte propriété desiccative, qui guerisse les mules au talon ; & si au reffort, que nous mangeons pour la nourriture, il s'est rencontré quelque operation aperitiue. Galen recite, qu'il aduint à vn ladre de receuoir guerison par le moyen du vin qu'il beut, d'autant que de fortune, vne vipere s'estoit coulée dans le vaisseau. Nous trouuons en cet exemple le moyen, & vne conduite

vray-semblable à cette experience. Comme aussi en celles, auxquelles les medecins disent, auoir esté ache-miné par l'exemple d'aucunes bestes. Mais en la plus part des autres experiences, à quoy ils disent auoir esté conduis par la fortune, & n'auoir eu autre guide que le hazard, ie trouue le progrez de cette information incroyable. L'imagine l'homme, regardant au tour de luy le nombre infiny des choses, plantes, animaux, metaulx. Ie ne sçay par où luy faire commencer son essay : & quand sa premiere fantasie se iettera sur la corne d'un elan, à quoy il faut prester vne creance bien molle & aisée : il se trouue encore autant empesché en sa seconde operation. Il luy est proposé tant de maladies, & tant de circonstances, qu'auant qu'il soit venu à la certitude de ce point, où doit ioindre la perfection de son experience, le sens humain y perd son Latin : & auant qu'il ait trouué parmy cette infinité de choses, que c'est cette corne : parmy cette infinité de maladies, l'epilepsie : tant de complexions, au melancholique : tant de saisons, en hyuer : tant de nations, au François : tant d'ages, en la vieillesse : tant de mutations celestes, en la conioction de Venus & de Saturne : tant de parties du corps au doigt. A tout cela n'estant guidé ny d'argument, ny de coniecture, ny d'exemple, ny d'inspiration diuine, ains du seul mouuement de la fortune, il faudroit que ce fust par vne fortune, parfaitement artificielle, réglée & methodique. Et puis, quand la guerison fut faite, comment se peut il asseurer, que ce ne fust, que le mal estoit arriué à sa-periode ; ou un effect du hazard ? ou l'operation de quelque autre chose, qu'il eust ou mangé, ou beu, ou touché ce iour là ? ou le merite des prieres de sa mere-grand ? Dauantage,

quand cette preuue auroit esté parfaite, combien de fois fut elle reiterée ? & cette longue cordée de fortunes & de rencontres, r'enfilée, pour en conclure vne regle ? Quand elle sera conclue, par qui est-ce ? de tant de millions, il n'y a que trois hommes qui se messent d'enregistrer leurs experiences. Le fort aura il r'encontré à poinct nommé l'un de ceux-cy ? Quoy si yn autre, & si cent autres, ont fait des experiences contraires ? A l'aduanture y verriens nous quelque lumiere, si tous les iugemens, & raisonnemens des hommes, nous estoient cogneuz. Mais que trois tesmoins & trois docteurs, regentent l'humain genre, ce n'est pas la raison : il faudroit que l'humaine nature les eust deputez & choisis, & qu'ils fussent declarez nos syndics par expresse procuration.

A MADAME DE DVRAS.

Madame, vous me trouuastes sur ce pas dernièrement, que vous me vinstes voir. Par ce qu'il pourra estre, que ces inepties se rencontreront quelque fois entre vos mains : ie veux aussi qu'elles portent tesmoignage, que l'auteur se sent bien fort honoré de la faueur que vous leur ferez. Vous y recognoistrez ce mesme port, & ce mesme air, que vous auez veu en sa conuersation. Quand i'eusse peu prendre quelque autre façon que la mienne ordinaire, & quelque autre forme plus honorable & meilleure, ie ne l'eusse pas fait : car ie ne veux tirer de ces escrits, sinon qu'ils me representent à vostre memoire, au naturel. Ces mesmes conditions & facultez, que vous auez pratiquées & recueillies, Madame, avec beaucoup plus d'honneur & de cour-

toisie qu'elles ne meritent, ie les veux logger, mais sans alteration & changement, en vn corps solide, qui puisse durer quelques années, ou quelques iours apres moy, où vous les retrouuerez, quand il vous plaira vous en refreschir la memoire, sans prendre autrement la peine de vous en souuenir : aussi ne le valent elles pas. Je desire que vous continuez en moy, la faueur de vostre amitié, par ces mesmes qualitez, par le moyen desquelles, elle a esté produite. Je ne cherche aucunement qu'on m'ayme & estime mieux, mort, que viuant. L'humeur de Tybere est ridicule, & commune pourtant, qui auoit plus de soin d'estendre sa renommée à l'aduenir, qu'il n'auoit de se rendre estimable & agreable aux hommes de son temps. Si i'estoy de ceux, à qui le monde peut deuoir louange, ie l'en quitteroy pour la moitié, & qu'il me la payast d'auance. Qu'elle se hastast & ammoncelast tout autour de moy, plus espeffe qu'alongée, plus pleine que durable. Et qu'elle s'euanouist hardiment, quand & ma cognoissance, & quand ce doux son ne touchera plus mes oreilles. Ce seroit vne sotte humeur, d'aller à cet'heure, que ie suis prest d'abandonner le commerce des hommes, me produire à eux, par vne nouuelle recommandation. Je ne fay nulle recepte des biens que ie n'ay peu employer à l'vsage de ma vie. Quel que ie soye, ie le veux estre ailleurs qu'en papier. Mon art & mon industrie ont esté employez à me faire valoir moy-mesme. Mes estudes, à m'apprendre à faire, non pas à escrire. I'ay mis tous mes efforts à former ma vie. Voyla mon mestier & mon ouurage. Je suis moins faiseur de liures, que de nulle autre besongne. I'ay désiré de la suffisance, pour le seruice de mes commoditez presentes & essentielles, non pour en faire

magasin, & reserue à mes heritiers. Qui a de la valeur, si le face cognoistre en ses mœurs, en ses propos ordinaires : à traicter l'amour, ou des querelles, au ieu, au liët, à la table, à la conduicte de ses affaires, à son œconomie. Ceux que ie voy faire des bons liures sous des meschantes chausses, eussent premierement faict leurs chausses, s'ils m'en eussent creu. Demandez à vn Spartiate, s'il ayme mieux estre bon rhetoricien que bon soldat : non pas moy, que bon cuisinier, si ie n'auoy qui m'en seruist. Mon Dieu, Madame, que ie haïrois vne telle recommandation, d'estre habile homme par escrit, & estre vn homme de neant, & vn sot, ailleurs. L'ayme mieux encore estre vn sot, & icy, & là, que d'auoir si mal choisi, où employer ma valeur. Aussi il s'en faut tant que i'attende à me faire quelque nouuel honneur par ces sottises, que ie feray beaucoup, si ie n'y en pers point, de ce peu que i'en auois aquis. Car, outre ce que cette peinture morte, & muete, dérobera à mon estre naturel, elle ne se raporte pas à mon meilleur estat, mais beaucoup descheu de ma premiere vigueur & allegresse, tirant sur le flegmy & le rance. Je suis sur le fond du vaisseau, qui sent tantost le bas & la lye. Au demeurant, Madame, ie n'eusse pas osé remuer si hardiment les mysteres de la medecine, attendu le credit que vous & tant d'autres luy donnez, si ie n'y eusse esté acheminé par ses auteurs mesmes. Je croy qu'ils n'en n'ont que deux anciens Latins, Pline & Celsus. Si vous les voyez quelque iour, vous trouuerez qu'ils parlent bien plus rudement à leur art, que ie ne fay : ie ne fay que la pincer, ils l'esgorgent. Pline se mocque entre autres choses, dequoy quand ils sont au bout de leur corde, ils ont inuenté cette belle deffaite, de r'enuoyer les

malades qu'ils ont agitez & tormentez pour neant, de leurs drogues & regimes, les vns, au secours des vœuz, & miracles, les autres aux eaux chaudes. Ne vous courrouffez pas, Madame, il ne parle pas de celles de deçà, qui sont sous la protection de vostre maison, & toutes Gramontoises. Ils ont vne tierce sorte de deffaitte, pour nous chasser d'aupres d'eux, & se descharger des reproches, que nous leur pouuons faire du peu d'amendement, à noz-maux, qu'ils ont eu si long temps en gouuernement, qu'il ne leur reste plus aucune inuention à nous amuser : c'est de nous enuoyer chercher la bonté de l'air de quelque autre contrée. Madame en voyla assez : vous me donnez bien congé de reprendre le fil de mon propos, duquel ie m'estoy destourné, pour vous entretenir.


Ce fut ce me semble, Pericles, lequel estant enquis, comme il se portoit : Vous le pouuez, dit-il, iuger par là : montrant des breuets, qu'il auoit attachez au col & au bras. Il vouloit inferer, qu'il estoit bien malade, puis qu'il en estoit venu iusques-là, d'auoir recours à choses si vaines, & de s'estre laissé equipper en cette façon. Ie ne dy pas que ie ne puisse estre emporté vn iour à cette opinion ridicule, de remettre ma vie, & ma santé, à la mercy & gouuernement des medecins : ie pourray tomber en cette resuerie : ie ne me puis respondre de ma fermeté future : mais lors aussi si quelqu'un s'enquiert à moy, comment ie me porte, ie luy pourray dire, comme Pericles : Vous le pouuez iuger par là, montrant ma main chargée de six dragmes d'opiate : ce sera vn bien euident signe d'une maladie violente : j'auray mon iugement merueilleusement desmanché. Si l'impatience & la frayeur gaignent cela sur moy, on

en pourra conclurre vne bien aspre fièvre en mon ame. J'ay pris la peine de plaider cette cause, que j'entens assez mal, pour appuyer vn peu & conforter la propension naturelle, contre les drogues, & pratique de nostre medecine : qui s'est deriuée en moy, par mes ancestres : à fin que ce ne fust pas seulement vne inclination stupide & temeraire, & qu'elle eust vn peu plus de forme. Aussi que ceux qui me voyent si ferme contre les exhortemens & menaces, qu'on me fait, quand mes maladies me pressent, ne pensent pas que ce soit simple opiniastreté : qu'il y ait quelqu'un si fascheux, qui iuge encore, que ce soit quelque esguillon de gloire. Ce feroit vn desir bien asséné, de vouloir tirer honneur d'une action, qui m'est commune, avec mon iardinier & mon muletier. Certes ie n'ay point le cœur si enflé, ny si venteux, qu'un plaisir solide, charnu, & moëlleux, comme la santé, ie l'allasse eschanger, pour vn plaisir imaginaire, spirituel, & aérée. La gloire, voire celle des quatre fils Aymon, est trop cher achetée à vn homme de mon humeur, si elle luy couste trois bons accez de colique. La santé de par Dieu ! Ceux qui ayment nostre medecine, peuvent auoir aussi leurs considerations bonnes, grandes, & fortes : ie ne hay point les fantasies contraires aux miennes. Il s'en faut tant que ie m'effarouche, de voir de la discordance de mes iugemens à ceux d'autrui, & que ie me rende incompatible à la société des hommes, pour estre d'autre sens & party que le mien : qu'au rebours, (comme c'est la plus generale façon que Nature aye fuiuy, que la variété, & plus aux esprits, qu'aux corps : d'autant qu'ils sont de substance plus souple & susceptible de formes) ie trouue bien plus rare, de voir conuenir

nos humeurs, & nos desseins. Et ne fut iamais au monde, deux opinions pareilles, non plus que deux poils, ou deux grains. Leur plus vniuerselle qualité, c'est la diuersité.

FIN DV SECOND LIVRE.







LIVRE TROISIÈME.

De l'utile & de l'honneste.

CHAPITRE I.



PERSONNE n'est exempt de dire des fadaïses : le malheur est, de les dire curieusement :

Næ iste magno conatu magnas nugæ dixerit.

Cela ne me touche pas ; les miennes m'eschappent aussi nonchallamment qu'elles le valent. D'où bien leur prend. Je les quitterois soudain, à peu de coust qu'il y eust. Et ne les achette, ny ne les vends, que ce qu'elles poissent. Je parle au papier, comme ie parle au premier que ie rencontre. Qu'il soit vray, voicy dequoy. A qui ne doit estre la perfidie detestable, puis que Tybere la refusa à si grand interest ? On luy manda d'Allemagne, que s'il le trouuoit bon, on le defferoit

d'Ariminius par poison. C'estoit le plus puissant ennemy que les Romains eussent, qui les auoit si vilainement traictez sous Varus, & qui seul empeschoit l'accroissement de sa domination en ces contrées là. Il fit responce, que le peuple Romain auoit accoustumé de se venger de ses ennemis par voye ouuerte, les armes en main, non par fraude & en cachette : il quitta l'utile pour l'honeste. C'estoit, me direz-vous, vn affronteur. Le le croy : ce n'est pas grand miracle, à gens de sa profession. Mais la confession de la vertu, ne porte pas moins en la bouche de celuy qui la hayt : d'autant que la verité la luy arrache par force, & que s'il ne la veult recevoir en foy, au moins il s'en couure, pour s'en parer. Nostre bastiment & public & priué, est plein d'imperfection : mais il n'y a rien d'inutile en Nature, non pas l'inutilité mesmes, rien ne s'est ingeré en cet vniuers, qui n'y tienne place opportune. Nostre estre est simenté de qualitez maladiues : l'ambition, la ialousie, l'enuie, la vengeance, la superstition, le desespoir, logent en nous, d'une si naturelle possession, que l'image s'en recognoist aussi aux bestes. Voire & la cruauté, vice si defnaturé : car au milieu de la compassion, nous sentons au dedans, ie ne sçay quelle aigre-douce pointe de volupté maligne, à voir souffrir autrui : & les enfans la sentent :

*Suaue mari magno turbantibus æquora ventis,
E terra magnum alterius spectare laborem.*

Desquelles qualitez, qui osteroit les semences en l'homme, destroyeroit les fondamentales conditions de nostre vie. De mesme, en toute police : il y a des offices necessaires, non seulement abiects, mais

encores vicieux. Les vices y trouuent leur rang, & s'employent à la cousture de nostre liaison : comme les venins à la conseruation de nostre santé. S'ils deuiennent excusables, d'autant qu'ils nous font befoing, & que la necessité commune efface leur vraye qualité : il faut laisser iouer cette partie, aux citoyens plus vigoureux, & moins craintifs, qui sacrifient leur honneur & leur conscience, comme ces autres anciens sacrifient leur vie, pour le salut de leur pays. Nous autres plus foibles prenons des rolles & plus aysez & moins hazardeux. Le bien public requiert qu'on trahisse, & qu'on mente, & qu'on malfacre : resignons cette commission à gens plus obeissans & plus souples. Certes i'ay eu souuent despit, de voir des iuges, attirer par fraude & fauces esperances de faueur ou pardon, le criminel à decourir son fait, & y employer la piperie & l'impudence. Il seruiroit bien à la iustice, & à Platon mesme, qui fauorise cet vsage, de me fournir d'autres moyens plus selon moy. C'est vne iustice malicieuse : & ne l'estime pas moins bleffee par soy-mesme, que par autrui. Je respondy, n'y a pas long temps, qu'à peine trahirois-ie le Prince pour vn particulier, qui serois tres-marry de trahir aucun particulier, pour le Prince. Et ne hay pas seulement à piper, mais ie hay aussi qu'on se pipe en moy : ie n'y veux pas seulement fournir de matiere & d'occasion. En ce peu que i'ay eu à negocier entre nos Princes, en ces diuisions, & subdiuisions, qui nous deschirent au-iourd'huy : i'ay curieusement euité, qu'ils se mesprinsent en moy, & s'enferrassent en mon masque. Les gens du mestier se tiennent les plus couuerts, & se presentent & contrefont les plus moyens, & les plus voyfins qu'ils peuuent : moy, ie m'offre par mes

opinions les plus viues, & par la forme plus mienne. Tendre negociateur & nouice : qui ayme mieux faillir à l'affaire, qu'à moy. C'a esté pourtant iusques à cette heure, avec tel heur, car certes Fortune y a la principale part, que peu ont passé de main à autre, avec moins de soupçon, plus de faueur & de priuauté. I'ay vne façon ouuerte, aisée à s'insinuer, & à se donner credit, aux premieres accointances. La naïfueté & la verité pure, en quelque siecle que ce soit, trouuent encore leur opportunité & leur mise. Et puis de ceux-là est la liberté peu suspecte, & peu odieuse, qui besongnent sans aucun leur interest. Et peuuent veritablement employer la responce de Hipperides aux Atheniens, se plaignans de l'aspreté de son parler : Messieurs, ne confidez pas si ie suis libre, mais si ie le suis, sans rien prendre, & sans amender par là mes affaires. Ma liberté m'a aussi aisément deschargé du soupçon de faintise, par sa vigueur (n'espargnant rien à dire pour poissant & cuisant qu'il fust : ie n'eusse peu dire pis absent) & en ce, qu'elle a vne montre apparente de simpleesse & de nonchalance. Je ne pretens autre fruit en agissant, que d'agir, & n'y attache longues suites & propositions. Chasque action fait particulièrement son ieu : porte s'il peut. Au demeurant, ie ne suis pressé de passion, ou hayneuse, ou amoureuse, enuers les grands : ny n'ay ma volonté garrotee d'offence, ou d'obligation particuliere. Je regarde nos Roys d'une affection simplement legitime & ciuile, ny emeuë ny demeuë par interest priué, dequoy ie me fçay bon gré. La cause generale & iuste ne m'attache non plus, que modérément & sans fièvre. Je ne suis pas subiet à ces hypoteques & engagemens penetrans & intimes. La cholere & la hayne sont au

delà du deuoir de la iustice : & sont passions seruans seulement à ceux, qui ne tiennent pas assez à leur deuoir, par la raison simple : *Vtatur motu animi, qui vti ratione non potest*. Toutes intentions legitimes sont d'elles mesmes temperees : finon, elles s'alterent en seditieuses & illegitimes. C'est ce qui me faict marcher par tout, la teste haute, le visage, & le cœur ouuert. A la verité, & ne crains point de l'aduouer, ie porterois facilement au besoing, vne chandelle à Sainct Michél, l'autre à son serpent, suiuant le dessein de la vieille. Je suiuray le bon party iusquès au feu, mais exclusivement si ie puis. Que Montaigne s'engouffre quant & la ruyne publique, si besoing est : mais s'il n'est pas besoing, ie sçauray bon gré à la Fortune qu'il se sauue : & autant que mon deuoir me donne de corde, ie l'employe à sa conseruation. Fut-ce pas Atticus, lequel se tenant au iuste party, & au party qui perdit, se sauua par sa moderation, en cet vniuersel naufrage du monde, parmy tant de mutations & diuersitez ? Aux hommes, comme luy prieuez, il est plus aisé. Et en telle sorte de besongne, ie trouue qu'on peut iustement n'estre pas ambitieux à s'ingerer & conuier soy-mesmes. De se tenir chancelant & mestis, de tenir son affection immobile, & sans inclination aux troubles de son pays, & en vne diuision publique, ie ne le trouue ny beau, ny honneste : *Ea non media, sed nulla via est, velut euentum expectantium, quò fortunæ consilia sua applicent*. Cela peut estre permis enuers les affaires des voysins : & Gelon tyran de Syracuse, suspendoit ainsi son inclination en la guerre des Barbares contre les Grècs, tenant vne Ambassade à Delphes, avec des presents pour estre en eschauguette, à veoir de quel costé tomberoit la fortune, & prendre l'occasion

à poinct, pour le concilier aux victorieux. Ce seroit vne espece de trahison, de le faire aux propres & domestiques affaires, auxquels necessairement il faut prendre party : mais de ne s'embesongner point, à homme qui n'a ny charge, ny commandement exprez qui le presse, ie le trouue plus excusable (& si ne pratique pour moy cette excuse) qu'aux guerres estrangeres : desquelles pourtant, selon nos loix, ne s'empesche qui ne veut. Toutesfois ceux encore qui s'y engagent tout à fait, le peuuent, avec tel ordre & attrempance, que l'orage debura couler par dessus leur teste, sans offence. N'auions nous pas raison de l'esperer ainsi du feu Euesque d'Orleans, sieur de Moruilliers ? Et i'en cognois entre ceux qui y ouurent valeureusement à cette heure, de mœurs ou si equables, ou si douces, qu'ils feront, pour demeurer debout, quelque iniurieuse mutation & cheute que le ciel nous appreste. Je tiens que c'est aux Roys proprement, de s'animer contre les Roys : & me moque de ces esprits, qui de gayeté de cœur se presentent à querelles si disproportionnees. Car on ne prend pas querelle particuliere avec vn Prince, pour marcher contre luy ouuertement & courageusement, pour son honneur, & selon son deuoir : s'il n'aime vn tel personnage, il fait mieux, il l'estime. Et notamment la cause des loix, & defence de l'ancien estat, a toujours cela, que ceux mesmes qui pour leur dessein particulier le troublent, en excusent les defenseurs, s'ils ne les honorent. Mais il ne faut pas appeller deuoir, comme nous faisons tous les iours, vne aigreur & vne intestine aspreté, qui naist de l'interest & passion priuee, ny courage, vne conduite traitresse & malicieuse. Ils nomment zele, leur propension vers la malignité, & violence. Ce n'est pas la

cause qui les eschauffe, c'est leur interest. Ils artisent la guerre, non par ce qu'elle est iuste : mais par ce que c'est guerre. Rien n'empesche qu'on ne se puisse comporter commodément entre des hommes qui se sont ennemis, & loyalement : conduisez vous y d'une, sinon par tout esgale affection (car elle peut souffrir différentes mesures) au moins temperee, & qui ne vous engage tant à l'un, qu'il puisse tout requerir de vous. Et vous contentez aussi d'une moyenne mesure de leur grace : & de couler en eau trouble, sans y vouloir pescher. L'autre maniere de s'offrir de toute sa force aux uns & aux autres, a encore moins de prudence que de conscience. Celuy enuers qui vous en trahissez un, duquel vous estes pareillement bien venu : sçait-il pas, que de soy vous en faites autant à son tour ? Il vous tient pour un meschant homme : ce pendant il vous oit, & tire de vous, & fait ses affaires de vostre desloyauté. Car les hommes doubles sont utiles, en ce qu'ils apportent : mais il se faut garder, qu'ils n'emportent que le moins qu'on peut. Je ne dis rien à l'un, que je ne puisse dire à l'autre, à son heure, l'accent seulement un peu changé : & ne rapporte que les choses ou indifferentes, ou cogneuës, ou qui seruent en commun. Il n'y a point d'utilité, pour laquelle je me permette de leur mentir. Ce qui a esté fié à mon silence, je le cele religieusement : mais je prens à celer le moins que je puis. C'est une importune garde, du secret des Princes, à qui n'en a que faire. Je presente volontiers ce marché, qu'ils me fient peu : mais qu'ils se fient hardiment, de ce que je leur apporte. J'en ay tousiours plus sceu que je n'ay voulu. Un parler ouuert, ouure un autre parler, & le tire hors, comme fait le vin & l'amour. Philippides ref-

pondit sagement à mon gré, au Roy Lyfimachus, qui luy disoit, Que veux-tu que ie te communique de mes biens? Ce que tu voudras, pourueu que ce ne soit de tes secrets. Je voy que chacun se mutine, si on luy cache le fonds des affaires ausquels on l'employe, & si on luy en a desrobé quelque arriere-sens. Pour moy, ie suis content qu'on ne m'en die non plus, qu'on veut que i'en mette en besoigne : & ne desire pas, que ma science outrepassse & contraigne ma parole. Si ie dois seruir d'instrument de tromperie, que ce soit au moins sauue ma conscience. Je ne veux estre tenu seruiteur, ny si affectionné, ny si loyal, qu'on me treuue bon à trahir personne. Qui est infidelle à foy-mesme, l'est excusablement à son maistre. Mais ce sont Princes, qui n'acceptent pas les hommes à moytié, & mesprisent les seruices limitez & conditionnez. Il n'y a remede : ie leur dis franchement mes bornes : car esclau, ie ne le dois estre que de la raison, encore n'en puis-ie bien venir à bout. Et eux aussi ont tort, d'exiger d'un homme libre, telle subiection à leur seruice, & telle obligation, que de celuy, qu'ils ont fait & acheté : ou duquel la fortune tient particulierement & expressement à la leur. Les loix m'ont osté de grand peine, elles m'ont choisi party, & donné vn maistre : toute autre superiorité & obligation doit estre relative à celle-là, & retranchée. Si n'est-ce pas à dire, quand mon affection me porteroit autrement, qu'incontinent i'y portasse la main : la volonté & les desirs se font loy eux mesmes, les actions ont à la receuoir de l'ordonnance publique. Tout ce mien proceder, est vn peu bien dissonant à nos formes : ce ne seroit pas pour produire grands effets, ny pour y durer : l'innocence mesme ne sçauroit à cette heure ny

negotier fans diffimulation, ny marchander fans menterie. Auffi ne font aucunement de mon gibier, les occupations publiques : ce que ma profession en requiert, ie l'y fournis, en la forme que ie puis la plus priuee. Enfant, on m'y plongea iufques aux oreilles, & il succedoit : fi m'en desprins ie de belle heure. L'ay fouuent depuis éuité de m'en meller, rarement accepté, iamais requis, tenant le dos tourné à l'ambition : mais finon comme les tireurs d'auiron, qui s'auancent ainfin à reculons : tellement toutesfois, que de ne m'y estre point embarqué, i'en fuis moins obligé à ma refolution, qu'à ma bonne fortune. Car il y a des voyes moins ennemyes de mon gouft, & plus conformes à ma portee, par lefquelles fi elle m'eust appellé autrefois au feruice public, & à mon auancement vers le credit du monde, ie fçay que i'eusse passé par dessus la raifon de mes discours, pour la fuyure. Ceux qui difent communement contre ma profession, que ce que i'appelle franchise, simpleffe, & naifueté, en mes mœurs, c'est art & finesse : & plustoft prudence, que bonté : industrie, que nature : bon fens, que bonheur : me font plus d'honneur qu'ils ne m'en ostent. Mais certes ils font ma finesse trop fine. Et qui m'aura fuyui & efpié de pres, ie luy donray gaigné, s'il ne confesse, qu'il n'y a point de regle en leur escole, qui sçeust rapporter ce naturel mouuement, & maintenir vne apparence de liberté, & de licence, si pareille, & inflexible, parmy des routes si tortues & diuerfes : & que toute leur attention & engin, ne les y fçauroit conduire. La voye de la verité est vne & simple, celle du profit particulier, & de la commodité des affaires, qu'on a en charge, double, inegale, & fortuite. L'ay veu fouuent en vfage, ces libertez contre-

faites, & artificielles, mais le plus souvent, sans succez. Elles sentent volontiers leur asne d'Esope : lequel par emulation du chien, vint à se jetter tout gayement, à deux pieds, sur les espauls de son maistre : mais autant que le chien receuoit de caresses, de pareille feste, le pauvre asne, en reçoit deux fois autant de bastonnades. *Id maximè quemque decet, quod est cuiusque suum maximè.* Je ne veux pas prouer la tromperie de son rang, ce seroit mal entendre le monde : ie sçay qu'elle a feruy souvent profitablement, & qu'elle maintient & nourrit la plus part des vacations des hommes. Il y a des vices legitimes, comme plusieurs actions, ou bonnes, ou excusables, illegitimes. La iustice en foy, naturelle & vniuerselle, est autrement reglee, & plus noblement, que n'est cette autre iustice speciale, nationale, contrainte au besoing de nos polices : *Veri iuris germanæque iustitiæ solidam & expressam effigiem nullam tenemus : vmbra & imaginibus vtimur.* Si que le sage Dandamys, oyant reciter les vies de Socrates, Pythagoras, Diogenes, les iugea grands personnages en toute autre chose, mais trop asseruis à la reuerence des loix. Pour lesquelles auctoriser, & seconder, la vraye vertu a beaucoup à se desmettre de sa vigueur originelle : & non seulement par leur permission, plusieurs actions vitieuses ont lieu, mais encores à leur suasion. *Ex Senatusconsultis plebique scitis scelera exercentur.* Je sçay le langage commun, qui fait difference entre les choses vtils, & les honnestes : si que d'aucunes actions naturelles, non seulement vtils, mais necessaires, il les nomme deshonnestes & sales. Mais continuons nostre exemple de la trahison. Deux pretendans au royaume de Thrace, estoient tombez en debat de leurs droicts,

l'Empereur les empêcha de venir aux armes : mais l'un d'eux, sous couleur de conduire un accord amiable, par leur entreueuë, ayant assigné son compagnon, pour le festoyer en sa maison, le fit emprisonner & tuer. La iustice requeroit, que les Romains eussent raison de ce forfait : la difficulté en empêchoit les voyes ordinaires. Ce qu'ils ne peuvent legitiment, sans guerre, & sans hazard, ils entreprendrent de le faire par trahison : ce qu'ils ne peuvent honnestement, ils le firent vilement. A quoy se trouua propre un Pomponius Flaccus. Cettuy-cy, sous feintes parolles, & assurances, ayant attiré cest homme dans ses rets : au lieu de l'honneur & faueur qu'il luy promettoit, l'enuoya pieds & poings liez à Rome. Un traistre y trahit l'autre, contre l'usage commun. Car ils sont pleins de defiance, & est mal-aisé de les surprendre par leur art : tesmoing la poissante experience, que nous venons d'en sentir. Sera Pomponius Flaccus qui voudra, & en est assez qui le voudront. Quant à moy, & ma parolle & ma foy, sont, comme le demeurant, pieces de ce commun corps : leur meilleur effect, c'est le seruice public : ie tiens cela pour presuppposé. Mais comme si on me commandoit, que ie prinse la charge du Palais, & des plaids, ie respondroy, Je n'y entens rien : ou la charge de conducteur de pionniers, ie diroy, Je suis appelé à un rolle plus digne : de mesmes, qui me voudroit employer, à mentir, à trahir, & à me pariurer, pour quelque seruice notable, non que d'assassiner ou empoisonner : ie diroy, Si i'ay volé ou desrobé quelqu'un, enuoyez moy plustost en gallere. Car il est loysible à un homme d'honneur, de parler ainsi que firent les Lacedemoniens, ayants esté deffaits par Antipater, sur le point

de leurs accords : Vous nous pouuez commander des charges poissantes & dommageables, autant qu'il vous plaira : mais de honteuses, & deshonnestes, vous perdrez vostre temps de nous en commander. Chacun doit auoir iuré à foy mesme, ce que les Roys d'Égypte faisoient solennellement iurer à leurs iuges, qu'ils ne se desuoyeroient de leur conscience, pour quelque commandement qu'eux mesmes leur en fissent. A telles commissions il y a note euidente d'ignominie, & de condamnation. Et qui vous la donne, vous accuse, & vous la donne, si vous l'entendez bien, en charge & en peine. Autant que les affaires publiques s'amendent de vostre exploit, autant s'en empirent les vostres : vous y faictes d'autant pis, que mieux vous y faictes. Et ne sera pas nouveau, ny à l'auanture sans quelque air de iustice, que celuy mesmes vous ruine, qui vous aura mis en besongne. Si la trahison doit estre en quelque cas excusable : lors seulement elle l'est, qu'elle s'employe à chastier & trahir la trahison. Il se trouue assez de perfidies, non seulement refusees, mais punies, par ceux en faueur desquels elles auoient esté entreprises. Qui ne sçait la sentence de Fabritius, à l'encontre du medecin de Pyrrhus ? Mais cecy encore se trouue : que tel l'a commandee, qui par apres l'a vengée rigoureusement, sur celuy qu'il y auoit employé : refusant vn credit & pouuoir si effrené, & desaduouant vn seruage & vne obeissance si abandonnee, & si lasche. Iaropelc Duc de Ruffie, practiqua vn Gentilhomme de Hongrie, pour trahir le Roy de Poulongne Boleslaus, en le faisant mourir, ou donnant aux Russiens moyen de luy faire quelque notable dommage. Cettuy-cy s'y porta en galand homme : s'addonna plus que deuant au seruice

de ce Roy, obtint d'estre de son conseil, & de ses plus feaux. Avec ces aduantages, & choisissant à point l'opportunité de l'absence de son maistre, il trahit aux Ruffiens Visilicie, grande & riche cité : qui fut entierement saccagee, & arse par eux, avec occision totale, non seulement des habitans d'icelle, de tout sexe & aage, mais de grand nombre de noblesse de là autour, qu'il y auoit assemblé à ces fins. Iaropelc affouuy de sa vengeance, & de son courroux, qui pourtant n'estoit pas sans tiltre, (car Boleslaus l'auoit fort offensé, & en pareille conduite) & saoul du fruit de cette trahison, venant à en considerer la laideur nuë & seule, & la regarder d'une veüe saine, & non plus troublee par sa passion, la print à vn tel remors, & contre-cœur, qu'il en fit creuer les yeux, & couper la langue, & les parties honteuses, à son executeur. Antigonus persuada les soldats Argyraspides, de luy trahir Eumenes, leur capitaine general, son aduersaire. Mais l'eut-il fait tuer, apres qu'ils le luy eurent liuré, il desira luy mesme estre commissaire de la iustice diuine, pour le chastiment d'un forfait si detestable : & les con-signa entre les mains du gouuerneur de la prouince, luy donnant tres-expres commandement, de les perdre, & mettre à male fin, en quelque maniere que ce fust. Tellement que de ce grand nombre qu'ils estoient, aucun ne vit onques puis, l'air de Macedoine. Mieux il en auoit esté seruy, d'autant le iugea il auoir esté plus meschamment & punissablement. L'esclaue qui trahit la cachette de P. Sulpicius son maistre, fut mis en liberté, suiuant la promesse de la proscription de Sylla : mais suiuant la promesse de la raison publique, tout libre, il fut precipité du roc Tarpeien. Et nostre Roy Clouis, au lieu des armes d'or qu'il

leur auoit promis, fit pendre les trois seruiteurs de Cannacre, apres qu'ils luy eurent trahy leur maistre, à quoy il les auoit pratiquez. Ils les font pendre avec la bourse de leur payement au col. Ayant satisfait à leur seconde foy, & speciale, ils satisfont à la generale & premiere. Mahomed second, se voulant deffaire de son frere, pour la ialousie de la domination, fuiuant le stile de leur race, y employa l'un de ses officiers : qui le suffoqua, l'engorgeant de quantité d'eau, prinse trop à coup. Cela fait, il liura, pour l'expiation de ce meurtre, le meurtrier entre les mains de la mere du trespasé (car ils n'estoient freres que de pere) : elle, en sa presence, ouurit à ce meurtrier l'estomach : & tout chaudement de ses mains, fouillant & arrachant son cœur, le ietta manger aux chiens. Et à ceux mesmes qui ne valent rien, il est si doux, ayant tiré l'usage d'une action vicieuse, y pouoir hormais coudre en toute seureté, quelque trait de bonté, & de iustice : comme par compensation, & correction conscientieuse. Ioint qu'ils regardent les ministres de tels horribles maléfices, comme gents, qui les leur reprochent : & cherchent par leur mort d'estouffer la cognoissance & tesmoignage de telles menees. Or si par fortune on vous en recompence, pour ne fruster la necessité publique, de cet extreme & desesperé remede : celui qui le fait, ne laisse pas de vous tenir, s'il ne l'est luy-mesme, pour un homme maudit & execrable : & vous tient plus traistre, que ne fait celui, contre qui vous l'estes : car il touche la malignité de vostre courage, par vos mains, sans desadueu, sans obiect. Mais il vous employe, tout ainsi qu'on fait les hommes perdus, aux executions de la haute iustice : charge autant vtile, comme elle est peu honneste.

Outre la vilité de telles commissions, il y a de la prostitution de conscience. La fille à Seïanus ne pouuant estre punie à mort, en certaine forme de iugement à Rome, d'autant qu'elle estoit vierge, fut, pour donner passage aux loix, forcee par le bourreau, auant qu'il l'estranglast. Non sa main seulement, mais son ame, est esclaué à la commodité publique. Quand le premier Amurath, pour aigrir la punition contre ses subiects, qui auoient donné support à la parricide rebellion de son fils, ordonna, que leurs plus proches parents presteroient la main à cette execution : ie trouue tres-honeste à aucuns d'iceux, d'auoir choisi plustost, d'estre iniustement tenus coupables du parricide d'un autre, que de seruir la iustice de leur propre parricide. Et où en quelques bicoques forcees de mon temps, i'ay veu des coquins, pour garantir leur vie, accepter de pendre leur amis & conforsts, ie les ay tenus de pire condition que les pendus. On dit que Vuitolde Prince de Lituanie, introduisit en cette nation, que le criminel condamné à mort, eust luy mesme de sa main, à se deffaire : trouuant estrange, qu'un tiers innocent de la faute, fust employé & chargé d'un homicide. Le Prince, quand vne vrgente circonstance, & quelque impetueux & inopiné accident, du besoing de son estat, luy fait gauchir sa parolle & sa foy, ou autrement le iette hors de son deuoir ordinaire, doit attribuer cette necessité, à un coup de la verge diuine. Vice n'est-ce pas, car il a quitté sa raison, à vne plus vniuerselle & puissante raison : mais certes c'est malheur. De maniere qu'à quelqu'un qui me demandoit : Quel remede? nul remede, fis-ie, s'il fut veritablement gehenné entre ces deux extremes (*sed videat ne quærat latebra periurio*) il le falloit

faire : mais s'il le fit, sans regret, s'il ne luy greua de le faire, c'est signe que sa conscience est en mauvais termes. Quand il s'en trouueroit quelqu'un de si tendre conscience, à qui nulle guarison ne semblast digne d'un si poissant remede, ie ne l'en estimeroy pas moins. Il ne se scauroit perdre plus excusablement & decemment. Nous ne pouons pas tout. Ainsi comme ainsi nous faut-il souuent, comme à la dernière ancre, remettre la protection de nostre vaisseau à la pure conduite du ciel. A quelle plus iuste necessité se reserue il ? Que luy est-il moins possible à faire que ce qu'il ne peut faire, qu'aux despens de sa foy & de son honneur ? choses, qui à l'auenture luy doiuent estre plus cheres que son propre salut, & que le salut de son peuple. Quand les bras croisez il appellera Dieu simplement à son aide, n'aura-il pas à esperer, que la diuine bonté n'est pour refuser la faueur de sa main extraordinaire à vne main pure & iuste ? Ce sont dangereux exemples, rares, & maladiques exceptions, à nos regles naturelles : il y faut ceder, mais avec grande moderation & circospection. Aucune vtilité priuee, n'est digne pour laquelle nous facions cet effort à nostre conscience : la publique bien, lors qu'elle est & tres-apparente, & tres-importante. Timoleon se garantit à propos, de l'estrangeté de son exploit, par les larmes qu'il rendit, se souuenant que c'estoit d'une main fraternelle qu'il auoit tué le tyran. Et cela pinça iustement sa conscience, qu'il eust esté necessité d'acheter l'utilité publique, à tel prix de l'honesteté de ses mœurs. Le Senat mesme deliuré de seruitude par son moyen, n'osa rondement decider d'un si haut fait, & deschiré en deux si poissants & contraires visages. Mais les Syracusains ayans tout à point, à

l'heure mesme, enuoyé requerir les Corinthiens de leur protection, & d'un chef digne de restablir leur ville en sa premiere dignité, & nettoier la Sicile de plusieurs tyranneaux, qui l'oppressoient : il y deputa Timoleon, avec cette nouvelle deffaitte & declaration : Que selon qu'il se porteroit bien ou mal en sa charge, leur arrest prendroit party, à la faueur du liberateur de son pais, ou à la desfaueur du meurtrier de son frere. Cette fantastique conclusion, a quelque excuse, sur le danger de l'exemple & importance d'un fait si diuers. Et firent bien, d'en descharger leur iugement, ou de l'appuier ailleurs, & en des considerations tierces. Or les deportemens de Timoleon en ce voyage rendirent bien tost sa cause plus claire, tant il s'y porta dignement & vertueusement, en toutes façons. Et le bon heur qui l'accompagna aux aspretez qu'il eut à vaincre en cette noble besongne, sembla luy estre enuoyé par les Dieux conspirants & fauorables à sa iustification. La fin de cettuy cy est excusable, si aucune le pouuoit estre. Mais le profit de l'augmentation du reuenu publique, qui seruit de pretexte au Senat Romain à cette orde conclusion, que ie m'en vay reciter, n'est pas assez fort pour mettre à garand vne telle iniustice. Certaines citez s'estoient rachetees à prix d'argent, & remises en liberté, avec l'ordonnance & permission du Senat, des mains de L. Sylla. La chose estant tombee en nouveau iugement, le Senat les condamna à estre taillables comme auparauant : & que l'argent qu'elles auoyent employé pour se rachetter, demeureroit perdu pour elles. Les guerres ciuiles produisent souuent ces vilains exemples : Que nous punissons les priuez, de ce qu'ils nous ont creu, quand nous estions autres. Et vn mesme magistrat

fait porter la peine de son changement, à qui n'en peut mais. Le maistre foitte son disciple de docilité, & la guide son aueugle. Horrible image de iustice. Il y a des regles en la philosophie & faulces & molles. L'exemple qu'on nous propose, pour faire preualoir l'vtilité priuee, à la foy donnee, ne reçoit pas assez de poids par la circonstance qu'ils y meslent. Des voleurs vous ont prins, ils vous ont remis en liberté, ayans tiré de vous serment du paiement de certaine somme. On a tort de dire, qu'un homme de bien, sera quitte de sa foy, sans payer, estant hors de leurs mains. Il n'en est rien. Ce que la crainte m'a fait vne fois vouloir, ie suis tenu de le vouloir encore sans crainte. Et quand elle n'aura forcé que ma langue, sans la volonté : encore suis ie tenu de faire la maille bonne de ma parole. Pour moy, quand par fois ell'a inconsiderément deuancé ma pensee, i'ay fait conscience de la desaduier pourtant. Autrement de degré en degré, nous viendrons à abolir tout le droit qu'un tiers prend de noz promesses. *Quasi verò fortis viro vis possit adhiberi.* En cecy seulement a loy, l'interest priué, de nous excuser de faillir à nostre promesse, si nous auons promis chose meschante, & inique de foy. Car le droit de la vertu doit preualoir le droit de nostre obligation. I'ay autrefois logé Epaminondas au premier rang des hommes excellens : & ne m'en desdy pas. Iusques où montoit-il la consideration de son particulier deuoir ? qui ne tua iamais homme qu'il eust vaincu : qui pour ce bien inestimable, de rendre la liberté à son pais, faisoit conscience de tuer un tyran, ou ses complices, sans les formes de la iustice : & qui iugeoit meschant homme, quelque bon citoyen qu'il fust, celui qui entre les ennemis, & en

la bataille, n'espargnoit son amy & son hôte. Voyla vne ame de riche composition. Il marioit aux plus rudes & violentes actions humaines, la bonté & l'humanité, voire la plus delicate, qui se treuve en l'escole de la philosophie. Ce courage si gros, enflé, & obstiné contre la douleur, la mort, la pauvreté, estoit-ce nature, ou art, qui l'eust attendry, iusques au poinct d'une si extreme douceur, & debonnairété de complexion? Horrible de fer & de fang, il va fracassant & rompant vne nation invincible contre tout autre, que contre luy seul : & gauchit au milieu d'une telle meslee, au rencontre de son hôte & de son amy. Vrayement celuy la proprement commandoit bien à la guerre, qui luy faisoit souffrir le mors de la benignité, sur le point de sa plus forte chaleur : ainsin enflammee qu'elle estoit, & toute escumeuse de fureur & de meurtre. C'est miracle, de pouvoir meller à telles actions quelque image de iustice : mais il n'appartient qu'à la roideur d'Epaminondas, d'y pouvoir meller la douceur & la facilité des mœurs les plus molles, & la pure innocence. Et où l'un dit aux Mammertins, que les statuts n'auoient point de mise enuers les hommes armez : l'autre, au Tribun du peuple, que le temps de la iustice, & de la guerre, estoient deux : le tiers, que le bruit des armes l'empeschoit d'entendre la voix des loix : cettuy-cy n'estoit pas seulement empesché d'entendre celles de la ciuilité, & pure courtoisie. Auoit-il pas emprunté de ses ennemis, l'usage de sacrifier aux Muses, allant à la guerre, pour destremper par leur douceur & gayeté, cette furie & aspreté martiale? Ne craignons point apres vn si grand precepteur, d'estimer qu'il y a quelque chose illicite contre les ennemys mesmes :

que l'intereſt commun ne doit pas tout requerir de tous, contre l'intereſt priué : *manente memoria etiam in diſidio publicorum fœderum priuati iuris* :

*Et nulla potentia vires
Præſtandi, ne quid peccet amicus, habet :*

& que toutes choſes ne ſont pas loiſibles à vn homme de bien, pour le ſeruice de ſon Roy, ny de la cauſe generale & des loix. *Non enim patria præſtat omnibus officijs, Et ipſi conducit pios habere ciues in parentes.* C'eſt vne inſtruction propre au temps. Nous n'auons que faire de durcir nos courages par ces lames de fer, c'eſt aſſez que nos eſpaules le foyent : c'eſt aſſez de tramer nos plumes en ancre, ſans les tramer en ſang. Si c'eſt grandeur de courage; & l'eſſet d'une vertu rare & ſinguliere, de meſpriſer l'amitié, les obligations priuees, ſa parolle, & la parenté, pour le bien commun, & obeïſſance du magiſtrat : c'eſt aſſez vrayement pour nous en excuſer, que c'eſt vne grandeur, qui ne peut loger en la grandeur du courage d'Epaminondas. L'abomine les exhortemens enragez, de cette autre ame deſre-
glee,

*dum tela micant, non vos pietatis imago
Vlla, nec aduerſa conſpecti fronte parentes
Commoueat, vultus gladio turbate verendos.*

Oſtons aux meſchants naturels, & ſanguinaires, & traîtres, ce pretexte de raiſon : laiſſons là cette iuſtice enorme, & hors de foy : & nous tenons aux plus humaines imitations. Combien peut le temps & l'exemple? En vne rencontre de la guerre ciuile contre Cinna, vn ſoldat de Pompeius, ayant tué

fans y penser son frere, qui estoit au party contraire, se tua sur le champ soy-mesme, de honte & de regret. Et quelques annees apres, en vne autre guerre ciuile de ce mesme peuple, vn soldat, pour auoir tué son frere, demanda recompense à ses capitaines. On argumente mal l'honneur & la beauté d'une action, par son vtilité : & conclud-on mal, d'estimer que chacun y soit obligé, & qu'elle soit honeste à chacun; si elle est vtile.

Omnia non pariter rerum sunt omnibus apta.

Choisissons la plus necessaire & plus vtile de l'humaine societé, ce fera le mariage. Si est-ce que le conseil des saints, trouue le contraire party plus honeste, & en exclut la plus venerable vacation des hommes : comme nous assignons au haras, les bestes qui font de moindre estime.





Du repentir.

CHAPITRE II.



Les autres forment l'homme, ie le recite : & en represente vn particulier, bien mal formé : & lequel si i'auoy à façonner de nouveau, ie ferois vrayement bien autre qu'il n'est : mes-huy c'est fait. Or les traits de ma peinture, ne se fouruoyent point, quoy qu'ils se changent & diuersifient. Le monde n'est qu'une branloire perenne. Toutes choses y branlent sans cesse, la terre, les rochers du Caucaze, les pyramides d'Ægypte : & du branle public, & du leur. La constance mesme n'est autre chose qu'un branle plus languissant. Ie ne puis affermer mon obiet : il va trouble & chancelant, d'une yuressse naturelle. Ie le prens en ce point, comme il est, en l'instant que ie m'amuse à luy. Ie ne peinds pas l'estre, ie peinds le passage : non un passage d'aage en autre, ou comme dict le peuple, de sept en sept ans, mais de iour en iour, de minute en minute. Il faut accommoder mon hystoire à l'heure. Ie pourray tantost changer, non de fortune seulement, mais aussi d'intention. C'est un contrerolle de diuers & muables accidens, & d'imaginations irre-

soluës, & quand il y eschet, contraires : soit que ie sois autre moy-mesme, soit que ie faissie les subiects, par autres circonstances, & considerations. Tant y a que ie me contredis bien à l'aduanture, mais la verité, comme disoit Demades, ie ne la contredy point. Si mon ame pouuoit prendre pied, ie ne m'essaierois pas, ie me refoudrois : elle est tousiours en apprentissage, & en espreuue. Ie propose vne vie basse, & sans lustre. C'est tout vn. On attache aussi bien toute la philosophie morale, à vne vie populaire & priuee, qu'à vne vie de plus riche estoffe. Chaque homme porte la forme entiere, de l'humaine condition. Les auteurs se communiquent au peuple par quelque marque speciale & estrangere : moy le premier, par mon estre vniuersel : comme, Michel de Montaigne : non comme grammairien ou poëte, ou iuriconsulte. Si le monde se plaint dequoy ie parle trop de moy, ie me plains dequoy il ne pense seulement pas à soy. Mais est-ce raison, que si particulier en vñage, ie pretende me rendre public en cognoissance? Est-il aussi raison, que ie produise au monde, où la façon & l'art ont tant de credit & de commandement, des effects de nature & crus & simples, & d'une nature encore bien foiblette? Est-ce pas faire vne muraille sans pierre, ou chose semblable, que de bastir des liures sans science? Les fantasies de la musique, sont conduites par art, les miennes par sort. Aumoins i'ay cecy selon la discipline, que iamais homme ne traitta subiect, qu'il entendist ne cogneust mieux, que ie fay celuy que i'ay entrepris : & qu'en celuy là ie suis le plus sçauant homme qui viue. Secondement, que iamais aucun ne penetra en sa matiere plus auant, ny en esplucha plus distinctement les mem-

bres & fuittes : & n'arriua plus exactement & plus plainement, à la fin qu'il s'estoit proposé à sa besongne. Pour la parfaire, ie n'ay besoing d'y apporter que la fidelité : celle-là y est, la plus sincere & pure qui se trouue. Je dy vray, non pas tout mon faoul : mais autant que ie l'ose dire. Et l'ose vn peu plus en vieillissant : car il semble que la coustume concede à cet aage, plus de liberté de bauasser, & d'indiscretion à parler de foy. Il ne peut aduenir icy, ce que ie voy aduenir souuent, que l'artizan & sa besongne se contrarient. Vn homme de si honneste conuersation, a-il fait vn si sot escrit? Ou, des escrits si sçauans, sont-ils partis d'un homme de si foible conuersation? Qui a vn entretien commun, & ses escrits rares : c'est à dire, que sa capacité est en lieu d'où il l'emprunte, & non en luy. Vn personnage sçauant n'est pas sçauant par tout. Mais le suffisant est par tout suffisant, & à ignorer mesme. Icy nous allons conformément, & tout d'un train, mon liure & moy. Ailleurs, on peut recommander & accuser l'ouurage, à part de l'ouurier : icy non : qui touche l'un, touche l'autre. Celuy qui en iugera sans le congnoistre, se fera plus de tort qu'à moy : celuy qui l'aura cogneu, m'a du tout satisfait. Heureux outre mon merite, si i'ay seulement cette part à l'approbation publique, que ie face sentir aux gens d'entendement, que i'estoy capable de faire mon profit de la science, si i'en eusse eu : & que ie meritois que la memoire me secourust mieux. Excusons icy ce que ie dy souuent, que ie me repens rarement, & que ma conscience se contente de foy : non comme de la conscience d'un ange, ou d'un cheual, mais comme de la conscience d'un homme. Adioustant tousiours ce refrain, non un refrain de

ceremonie, mais de naïfue & effentielle fubmiffion : Que ie parle enquerant & ignorant, me rapportant de la refolution, purement & fimplement, aux creances communes & legitimes. Ie n'enseigne point, ie raconte. Il n'est vice veritablement vice, qui n'offence, & qu'un iugement entier n'accufe. Car il a de la laideur & incommodité fi apparente, qu'à l'aduanture ceux-là ont raifon, qui difent, qu'il eft principalement produict par beftife & ignorance : tant eft-il mal-aifé d'imaginer qu'on le cognoiffe fans le haïr. La malice hume la plupart de fon propre venin, & s'en empoifonne. Le vice laiffe comme un ulcere en la chair, une repentance en l'ame, qui toujours s'esgratigne, & s'enfanglante elle mefme. Car la raifon efface les autres triftelfes & douleurs, mais elle engendre celle de la repentance : qui eft plus griefue, d'autant qu'elle naift au dedans : comme le froid & le chaud des fièvres eft plus poignant, que celui qui vient du dehors. Ie tiens pour vices, mais chacun felon fa mefure, non feulement ceux que la raifon & la nature condamnent, mais ceux aufsi que l'opinion des hommes a forgé, voire fauce & erronnee, fi les loix & l'ufage l'autorife. Il n'est pareillement bonté, qui ne refiouiffe une nature bien nee. Il y a certes ie ne fçay quelle congratulation, de bien faire, qui nous refiouit en nous mefmes, & une fierté genereufe, qui accompagne la bonne confcience. Une ame courageufement vitieufe, fe peut à l'aduenture garnir de fécürité : mais de cette complaifance & fatisfaction, elle ne s'en peut fournir. Ce n'est pas un leger plaifir, de fe fentir preferué de la contagion d'un fiecle fi gaffé, & de dire en foy : Qui me verroit iufques dans l'ame, encore ne me trouueroit-il coupable, ny de l'affliction

& ruyne de perſonne : ny de vengeance ou d'enuie, ny d'offence publique des loix : ny de nouuelleté & de trouble : ny de faute à ma parole : & quoy que la licence du temps permiſt & appriniſt à chacun, ſi n'ay-ie mis la main ny és biens, ny en la bourse d'homme François, & n'ay veſcu que ſur la mienne, non plus en guerre qu'en paix : ny ne me ſuis feruy du trauail de perſonne, ſans loyer. Ces teſmoignages de la conſcience, plaiſent, & nous eſt grand benefice que cette eſiouyſſance naturelle : & le ſeul payement qui iamais ne nous manque. De fonder la recompence des actions vertueuſes, ſur l'approbation d'autrui, c'eſt prendre vn trop incertain & trouble fondement, ſignamment en vn ſiecle corrompu & ignorant, comme cettuy cy : la bonne eſtime du peuple eſt iniurieufe. A qui vous ſiez vous, de veoir ce qui eſt louable ? Dieu me garde d'eſtre homme de bien, ſelon la deſcription que ie voy faire tous les iours par honneur, à chacun de ſoy. *Quæ fuerant vitia, mores ſunt.* Tels de mes amis, ont par fois entrepris de me chapitrer & mercurializer à cœur ouuert, ou de leur propre mouuement, ou ſemons par moy, comme d'un office, qui à vne ame bien faiçte, non en vtilité ſeulement, mais en douceur auſſi, ſurpaſſe tous les offices de l'amitié. Ie l'ay touſiours accueilli des bras de la courtoisie & recognoiſſance, les plus ouuerts. Mais, à en parler à cette heure en conſcience, i'ay ſouuent trouué en leurs reproches & louanges, tant de fauce meſure, que ie n'euffe guere failly, de faillir pluſtoſt, que de bien faire à leur mode. Nous autres principalement, qui viuons vne vie priuee, qui n'eſt en montre qu'à nous, deuons auoir eſtably vn patron au dedans, auquel toucher nos actions : & ſelon

iceluy nous careffer tantoſt, tantoſt nous chaſtier. L'ay mes loix & ma cour, pour iuger de moy, & m'y adreſſe plus qu'ailleurs. Je reſtrains bien ſelon au-
 : truy mes actions, mais ie ne les eſtends que ſelon
 moy. Il n'y a que vous qui ſçache ſi vous eſtes lâche
 & cruel, ou loyal & deuotieux : les autres ne vous voyent point, ils vous deuinent par coniectures incertaines : ils voyent, non tant voſtre naturel, que voſtre art. Par ainſi, ne vous tenez pas à leur ſentence, tenez vous à la voſtre. *Tuo tibi iudicio eſt vtendum. Virtutis & vitiorum graue ipſius conſcientiæ pondus eſt : qua ſublata, iacent omnia.* Mais ce qu'on dit, que la repentance ſuit de pres le peché, ne ſemble pas regarder le peché qui eſt en ſon haut appareil : qui loge en nous comme en ſon propre domicile. On peut defauouer & deſdire les vices, qui nous ſurprennent, & vers leſquels les paſſions nous emportent : mais ceux qui par longue habitude, ſont enracinez & ancrez en vne volonté forte & vigou-
 reuſe, ne ſont ſubiects à contradiction. Le repentir n'eſt qu'une deſdicte de noſtre volonté, & oppoſition de nos fantaſies, qui nous pourmene à tout ſens. Il faiet deſaduouer à celuy-là, ſa vertu paſſee & ſa continence.

*Quæ mens eſt hodie, cur eadem non puero fuit,
 Vel cur his animis incolumes non redeunt genæ?*

C'eſt vne vie exquiſe, celle qui ſe maintient en ordre iuſques en ſon priué. Chacun peut auoir part au bartelage, & representer vn honneſte perſonnage en l'eſchaffaut : mais au dedans, & en ſa poiſtrine, où tout nous eſt loifible, où tout eſt caché, d'y eſtre réglé, c'eſt le point. Le voyſin degré, c'eſt de l'eſtre en ſa

maison, en ses actions ordinaires, desquelles nous n'auons à rendre raison à personne : où il n'y a point d'estude, point d'artifice. Et pourtant Bias peignant vn excellent estat de famille : de laquelle, dit-il, le maistre soit tel au dedans, par luy-mesme, comme il est au dehors, par la crainte de la loy, & du dire des hommes. Et fut vne digne parole de Iulius Drusus, aux ouuriers qui luy offroient pour trois mille escus, mettre sa maison en tel point, que ses voyfins n'y auroient plus la veuë qu'ils y auoient : le vous en donneray, dit-il, six mille, & faites que chacun y voye de toutes parts. On remarque auec honneur l'usage d'Agésilas, de prendre en voyageant son logis dans les eglises, affin que le peuple, & les Dieux mesmes, vissent dans ses actions priuees. Tel a esté miraculeux au monde, auquel sa femme & son valet n'ont rien veu seulement de remerable. Peu d'hommes ont esté admirez par leurs domestiques. Nul a esté prophete non seulement en sa maison, mais en son païs, dit l'experience des histoires. De mesmes aux choses de neant. Et en ce bas exemple, se void l'image des grands. En mon climat de Gascogne, on tient pour drolerie de me veoir imprimé. D'autant que la cognoissance, qu'on prend de moy, s'esloigne de mon giste, i'en vaux d'autant mieux. L'achette les imprimeurs en Guienne : ailleurs ils m'achettent. Sur cet accident se fondent ceux qui se cachent viuants & presens, pour se mettre en credit, trespassez & absents. L'ayme mieux en auoir moins. Et ne me jette au monde, que pour la part que i'en tire. Au partir de là, ie l'en quitte. Le peuple reconuoye celuy-là, d'un acte public, auec estonnement, iusqu'à sa porte : il laisse auec sa robbe ce rolle : il en retombe d'autant plus bas, qu'il s'estoit

plus haut monté. Au dedans chez luy, tout est tumultuaire & vil. Quand le reglement s'y trouveroit, il faut vn iugement vif & bien trié, pour l'appercevoir en ces actions basses & priuees. Ioint que l'ordre est vne vertu morne & sombre. Gagner vne bresche, conduire vne ambassade, regir vn peuple, ce sont actions esclatantes : tancer, rire, vendre, payer, aymer, hayr, & conuerfer avec les siens, & avec soy-mesme, doucement & iustement : ne relascher point, ne se desmentir point, c'est chose plus rare, plus difficile, & moins remarquable. Les vies retirees soustiennent par là, quoy qu'on die, des deuoirs autant ou plus aspres & tendus, que ne font les autres vies. Et les priuez, dit Aristote, seruent la vertu plus difficilement & hautement, que ne font ceux qui sont en magistrat. Nous nous preparons aux occasions eminentes, plus par gloire que par conscience. La plus courte façon d'arriuer à la gloire, ce seroit faire pour la conscience ce que nous faisons pour la gloire. Et la vertu d'Alexandre me semble representer assez moins de vigueur en son theatre, que ne fait celle de Socrates, en cette exercitation basse & obscure. Je conçois aisément Socrates, en la place d'Alexandre ; Alexandre en celle de Socrates, ie ne puis. Qui demandera à celuy-là, ce qu'il sçait faire, il respondra, Subiuguer le monde : qui le demandera à cettuy-cy, il dira, Mener l'humaine vie conformément à sa naturelle condition : science bien plus generale, plus poissante, & plus legitime. Le prix de l'ame ne consiste pas à aller haut, mais ordonnément. Sa grandeur ne s'exerce pas en la grandeur : c'est en la mediocrité. Ainsi que ceux qui nous iugent & touchent au dedans, ne font pas grand' recette de la lueur de noz actions pu-

bliques : & voyent que ce ne sont que filets & pointes d'eau fine reallies d'un fond au demeurant limoneux & poissant. En pareil cas, ceux qui nous jugent par cette braue apparence du dehors, concluent de mesmes de nostre constitution interne : & ne peuvent accoupler des facultez populaires & pareilles aux leurs, à ces autres facultez, qui les estonnent, si loin de leur vifée. Ainsi donnons nous aux demons des formes sauuages. Et qui non à Tamburlan, des sourcils esleuez, des nazeaux ouuerts, un visage afreux, & vne taille desmesuree, comme est la taille de l'imagination qu'il en a conceüe par le bruit de son nom ? Qui m'eust fait veoir Erasme autrefois, il eust esté mal-aisé, que ie n'eusse prins pour adages & apophthegmes, tout ce qu'il eust dit à son valler & à son hofteffe. Nous imaginons bien plus fortablement un artisan sur sa garderobe ou sur sa femme qu'un grand President, venerable par son maintien & suffisance. Il nous semble que de ces hauts thrones ils ne s'abaissent pas iusques à viure. Comme les ames vicieuses sont incitees souuent à bien faire, par quelque impulsion estrangere ; aussi sont les vertueuses à faire mal. Il les faut doncq iuger par leur estat raffis : quand elles sont chez elles, si quelquefois elles y sont : ou aumoins quand elles sont plus voyfines du repos, & en leur naifue assiette. Les inclinations naturelles s'aident & fortifient par institution : mais elles ne se changent gueres & surmontent. Mille natures, de mon temps, ont eschappé vers la vertu, ou vers le vice, au trauers d'une discipline contraire.

*Sic vbi desuetæ filius in carcere clausæ
Manfueuere feræ, & vultus posuere minaces,
Atque hominem didicere pati, si torrida paruus*

*Venit in ora cruor, redeunt rabisque furorque,
Admonitæque tument gustato sanguine fauces,
Feruet, & à trepido vix abstinet ira magistro.*

On n'extirpe pas ces qualitez originelles, on les couure, on les cache. Le langage Latin m'est comme naturel : ie l'entens mieux que le François : mais il y a quarante ans, que ie ne m'en suis du tout point seruy à parler, ny guere à escrire. Si est-ce qu'à des extremes & soudaines esmotions, où ie suis tombé, deux ou trois fois en ma vie : & l'une, voyant mon pere tout sain, se renuerfer sur moy palmé : i'ay tousiours eslané du fonds des entrailles, les premieres paroles Latines : Nature se sourdant & s'exprimant à force, à l'encontre d'un si long vsage : & cet exemple se dit d'assez d'autres. Ceux qui ont essayé de r'auiser les mœurs du monde, de mon temps, par nouuelles opinions, reformat les vices de l'apparence, ceux de l'essence ils les laissent là, s'ils ne les augmentent. Et l'augmentation y est à craindre. On se seiourne volontiers de tout autre bien faire, sur ces reformatations externes, de moindre coust, & de plus grand merite : & satisfait-on à bon marché par là, les autres vices naturels consubstantiels & intestins. Regardez vn peu, comment s'en porte nostre experience. Il n'est personne, s'il s'escoute, qui ne descouure en foy, vne forme sienne, vne forme maistresse, qui lucte contre l'institution : & contre la tempeste des passions, qui luy sont contraires. De moy, ie ne me sens gueres agiter par secouffe : ie me trouue quasi tousiours en ma place, comme font les corps lourds & poisons. Si ie ne suis chez moy, i'en suis tousiours bien pres : mes desbauches ne m'emportent pas fort loing : il n'y a rien d'extreme & d'esrange : & si ay des rai-

semens sains & vigoureux. La vraye condamnation, & qui touche la commune façon de nos hommes, c'est, que leur retraicte mesme est pleine de corruption, & d'ordure : l'idée de leur amendement cha-fourree, leur penitence malade, & en coulpe, autant à peu pres que leur peché. Aucuns, ou pour estre collez au vice d'une attache naturelle, ou par longue accoustumance, n'en trouuent plus la laideur. A d'autres, duquel regiment ie suis, le vice poise, mais ils le contrebalancent avec le plaisir, ou autre occasion : & le souffrent & s'y prestent, à certain prix. Vitieusement pourtant, & laschement. Si se pourroit-il à l'aduanture imaginer, si esloignee disproportion de mesure, où avec iustice, le plaisir excuseroit le peché, comme nous disons de l'utilité. Non seulement s'il estoit accidental, & hors du peché, comme au larrecin, mais en l'exercice mesme d'ice-luy, comme en l'accointance des femmes, où l'incitation est violente, &, dit-on, par fois inuincible. En la terre d'un mien parent, l'autre iour que i'estois en Armaignac, ie vis un paisant, que chacun surnomme le Larron. Il faisoit ainsi le conte de sa vie : Qu'estant nay mendiant, & trouuant, qu'à gagner son pain au trauail de ses mains, il n'arriueroit iamais à se fortifier assez contre l'indigence, il s'aduisa de se faire larron : & auoit employé à ce mestier toute sa ieunesse, en seureté, par le moyen de sa force corporelle : car il moissonnoit & vendangeoit des terres d'autrui : mais c'estoit au loing, & à si gros monceaux, qu'il estoit inimaginable qu'un homme en eust tant emporté en une nuit sur ses espaulles : & auoit soing outre cela, d'egaler, & disperser le dommage qu'il faisoit, si que la foule estoit moins importable à chaque particulier. Il se trouue

à cette heure en sa vieillesse, riche pour vn homme de sa condition, mercy à cette trafique : de laquelle il se confesse ouuertement. Et pour s'accorder avec Dieu, de ses acquests, il dit, estre tous les iours apres à satisfaire par bien-faicts, aux successeurs de ceux qu'il a defrobez : & s'il n'acheue (car d'y pouruoir tout à la fois, il ne peut) qu'il en chargera ses heritiers, à la raison de la science qu'il a luy seul, du mal qu'il a fait à chacun. Par cette description, soit vraye ou fauce, cettuy-cy regarde le larrecin, comme action des-honneste, & le hayt, mais moins que l'indigence : s'en repent bien simplement, mais en tant qu'elle estoit ainsi contrebalancee & compensee, il ne s'en repent pas. Cela, ce n'est pas cette habitude, qui nous incorpore au vice, & y conforme nostre entendement mesme : ny n'est ce vent impetueux qui va troublant & aueuglant à secouffes nostre ame, & nous precipite pour l'heure, iugement & tout, en la puissance du vice. Je fay coustumierement entier ce que ie fay, & marche tout d'une piece : ie n'ay guere de mouuement qui se cache & defrobe à ma raison, & qui ne se conduise à peu pres, par le consentement de toutes mes parties : sans diuision, sans sedition intestine : mon iugement en a la coulpe, ou la louange entiere : & la coulpe qu'il a vne fois, il l'a tousiours : car quasi dès sa naissance il est vn, mesme inclination, mesme routte, mesme force. Et en matiere d'opinions vniuerselles, dès l'enfance, ie me logeay au poinct où i'auois à me tenir. Il y a des pechez impetueux, prompts & subits, laissons les à part : mais en ces autres pechez, à tant de fois reprins, deliberez, & consultez, ou pechez de complexion, ou pechez de profession & de vacation : ie ne puis pas conceuoir, qu'ils

soient plantez si long temps en vn mesme courage, sans que la raison & la conscience de celuy qui les possede, le vueille constamment, & l'entende ainsin. Et le repentir qu'il se vante luy en venir à certain instant prescript, m'est vn peu dur à imaginer & former. Je ne suy pas la secte de Pythagoras, que les hommes prennent vne ame nouvelle, quand ils approchent des simulacres des Dieux, pour recueillir leurs oracles. Sinon qu'il voulust dire cela mesme, qu'il faut bien qu'elle soit estrangere, nouvelle, & prestee pour le temps : la nostre montrant si peu de signe de purification & netteté condigne à cet office. Ils font tout à l'opposite des preceptes Stoiques : qui nous ordonnent bien, de corriger les imperfections & vices que nous recognoissons en nous, mais nous defendent d'en alterer le repos de nostre ame. Ceux-cy nous font à croire, qu'ils en ont grande desplaissance, & remors au dedans, mais d'amendement & correction ny d'interruption, ils ne nous en font rien apparoir. Si n'est-ce pas guerison, si on ne se descharge du mal. Si la repentance pesoit sur le plat de la balance, elle emporteroit le peché. Je ne trouue aucune qualité si aysee à contrefaire, que la deuotion, si on n'y conforme les mœurs & la vie : son essence est abstruse & occulte, les apparences faciles & pompeuses. Quant à moy, ie puis desirer en general estre autre : ie puis condamner & me desplaire de ma forme vniuerselle, & supplier Dieu pour mon entiere reformation, & pour l'excuse de ma foiblesse naturelle : mais cela, ie ne le doibs nommer repentir, ce me semble, non plus que le desplaisir de n'estre ny Ange ny Caton. Mes actions sont reglees, & conformes à ce que ie suis, & à ma condition. Je ne puis faire mieux : & le repentir

ne touche pas proprement les choses qui ne sont pas en nostre force : ouy bien le regret. L'imaginer infinies natures plus hautes & plus reglees que la mienne. Je n'amende pourtant mes facultez : comme ny mon bras, ny mon esprit, ne deuiennent plus vigoureux, pour en concevoir vn autre qui le soit. Si l'imaginer & desirer vn agir plus noble que le nostre, produisoit la repentance du nostre, nous aurions à nous repentir de nos operations plus innocentes : d'autant que nous iugeons bien qu'en la nature plus excellente, elles auroient esté conduictes d'une plus grande perfection & dignité : & voudrions faire de mesme. Lors que ie consulte des deportemens de ma ieunesse avec ma vieillesse, ie trouue que ie les ay communement conduits avec ordre, selon moy. C'est tout ce que peut ma resistance. Je ne me flatte pas : à circonstances pareilles, ie seroy tousiours tel. Ce n'est pas macheure, c'est plustost vne teinture vniuerselle qui me tache. Je ne cognoy pas de repentance superficielle, moyenne, & de ceremonie. Il faut qu'elle me touche de toutes parts, auant que ie la nomme ainfin : & qu'elle pinse mes entrailles, & les afflige autant profondement, que Dieu me voit, & autant vniuersellement. Quand aux negoces, il m'est eschappé plusieurs bonnes auantures, à faute d'heureuse conduite : mes conseils ont pourtant bien choisi, selon les occurrences qu'on leur presentoit. Leur façon est de prendre tousiours le plus facile & seur party. Je trouue qu'en mes deliberations passees, i'ay, selon ma regle, sagement procedé, pour l'estat du subiect qu'on me proposoit : & en ferois autant d'icy à mille ans, en pareilles occasions. Je ne regarde pas, quel il est à cette heure, mais quel il estoit, quand i'en consul-

tois. La force de tout conseil gift au temps : les occasions & les matieres roulent & changent sans cesse. L'ay encouru quelques lourdes erreurs en ma vie, & importantes : non par faute de bon aduis, mais par faute de bon heur. Il y a des parties secrettes aux obiects, qu'on manie, & indiuinables : signamment en la nature des hommes : des conditions muettes, sans montre, incognues par fois du possesseur mesme : qui se produisent & esueillent par des occasions suruenantes. Si ma prudence ne les a peu penetrer & profetizer, ie ne luy en fçay nul mauuais gré : sa charge se contient en ses limites. Si l'euement me bat, & s'il fauorise le party que i'ay refusé : il n'y a remede, ie ne m'en prens pas à moy, i'accuse ma fortune, non pas mon ouurage : cela ne s'appelle pas repentir. Phocion auoit donné aux Atheniens certain aduis, qui ne fut pas suiuy : l'affaire pourtant se passant contre son opinion, avec prosperité, quelqu'un luy dit : Et bien Phocion, es tu content que la chose aille si bien? Bien suis-je content, fit-il, qu'il soit adueni cecy, mais ie ne me repens point d'auoir conseillé cela. Quand mes amis s'adressent à moy, pour estre conseillez, ie le fay librement & clairement, sans m'arrester comme fait quasi tout le monde, à ce que la chose estant hazardeuse, il peut aduenir au rebours de mon sens, par où ils ayent à me faire reproche de mon conseil : de quoy il ne me chaut. Car ils auront tort, & ie n'ay deu leur refuser cet office. Je n'ay guere à me prendre de mes fautes ou infortunes, à autre qu'à moy. Car en effect, ie me sers rarement des aduis d'autrui, si ce n'est par honneur de ceremonie : sauf où i'ay besoing d'instruction de science, ou de la connoissance du fait. Mais es choses où ie n'ay à em-

ployer que le iugement : les raisons estrangeres peuvent seruir à m'appuyer, mais peu à me destourner. Je les escoute fauorablement & decemment toutes. Mais, qu'il m'en souuienne, ie n'en ay creu iusqu'à cette heure que les miennes. Selon moy, ce ne sont que mousches & atomes, qui promeuvent ma volonté. Je prise peu mes opinions : mais ie prise aussi peu celles des autres, fortune me paye dignement. Si ie ne reçois pas de conseil, i'en donne aussi peu. I'en suis peu enquis, & encore moins creu : & ne sache nulle entreprinse publique ny priuee, que mon aduis aye redressée & ramenee. Ceux mesmes que la fortune y auoit aucunement attachez, se sont laissez plus volontiers manier à toute autre ceruelle qu'à la mienne. Comme cil qui suis bien autant ialoux des droits de mon repos, que des droits de mon auctorité, ie l'ayme mieux ainsi. Me laissant là, on fait selon ma profession, qui est, de m'establir & contenir tout en moy. Ce m'est plaisir, d'estre desinteressé des affaires d'autrui, & desgagé de leur gariement. En tous affaires quand ils sont passés, comment que ce soit, i'y ay peu de regret : car cette imagination me met hors de peine, qu'ils deuoyent ainsi passer : les voyla dans le grand cours de l'vniuers, & dans l'encheineure des causes Stoïques. Vostre fantasie n'en peut, par souhait & imagination, remuer vn poinct, que tout l'ordre des choses ne renuerse & le passé & l'aduenir. Au demeurant, ie hay cet accidental repentir que l'aage apporte. Celuy qui disoit anciennement, estre obligé aux anneés, dequoy elles l'auoyent deffait de la volupté, auoit autre opinion que la mienne. Je ne scauray jamais bon gré à l'impuissance, de bien qu'elle me face. *Nec tam auersa vnquam videbitur ab opere suo*

providentia, ut debilitas inter optima inuenta sit. Nos appetits sont rares en la vieillesse : vne profonde satiété nous saisit apres le coup. En cela ie ne voy rien de conscience. Le chagrin, & la foiblesse nous impriment vne vertu lasche, & caterreuse. Il ne nous faut pas laisser emporter si entiers, aux alterations naturelles, que d'en abastardir nostre iugement. La ieunesse & le plaisir n'ont pas fait autrefois que l'aye mescogneu le visage du vice en la volupté : ny ne fait à cette heure, le degoust que les ans m'apportent, que ie mescognoisse celui de la volupté au vice. Ores que ie n'y suis plus, i'en iuge comme si i'y esloy. Moy qui la secouë viuement & attentiuement, trouue que ma raison est celle mesme que i'auoy en l'aage plus licencieux : sinon à l'auanture, d'autant qu'elle s'est affoiblie & empiree, en vieillissant. Et trouue que ce qu'elle refuse de m'enfourner à ce plaisir, en consideration de l'interest de ma santé corporelle, elle ne le feroit non plus qu'autrefois, pour la santé spirituelle. Pour la voir hors de combat, ie ne l'estime pas plus valeureuse. Mes tentations sont si cassees & mortifiees, qu'elles ne valent pas qu'elle s'y oppose : tendant seulement les mains au deuant, ie les coniure. Qu'on luy remette en presence, cette ancienne concupiscence, ie crains qu'elle auroit moins de force à la soustenir, qu'elle n'auoit autrefois. Je ne luy voy rien iuger à part soy, que lors elle ne iugeast, ny aucune nouuelle clarté. Parquoy s'il y a conualescence, c'est vne conualescence maleficiée. Miserable sorte de remede, deuoir à la maladie sa santé. Ce n'est pas à nostre malheur de faire cet office : c'est au bon heur de nostre iugement. On ne me fait rien faire par les offenses & afflictions, que les maudire. C'est aux gents, qui ne s'esueillent

qu'à coups de fouët. Ma raison a bien son cours plus deliure en la prosperité : elle est bien plus distraite & occupee à digerer les maux, que les plaisirs. Je voy bien plus clair en temps serain. La santé m'aduertit, comme plus alaigrement, aussi plus vtilement, que la maladie. Je me suis auancé le plus que i'ay peu, vers ma reparation & reglement, lors que i'auoy à en iouir. Je seroy honteux & enuieux, que la misere & l'infortune de ma vieillesse eust à se preferer à mes bonnes annees, saines, esueillees, vigoureuses. Et qu'on eust à m'estimer, non par où i'ay esté, mais par où i'ay cessé d'estre. A mon aduis, c'est le viure heureusement, non, comme disoit Antisthenes, le mourir heureusement, qui fait l'humaine felicité. Je ne me suis pas attendu d'attacher monstrueusement la queue d'un philosophe à la teste & au corps d'un homme perdu : ny que ce chetif bout eust à desaduouier & desmentir la plus belle, entiere & longue partie de ma vie. Je me veux presenter & faire veoir par tout vniformément. Si i'auois à reuiure, ie reuiurois comme i'ay vescu. Ny ie ne pleins le passé, ny ie ne crains l'aduenir : & si ie ne me deçoy, il est allé du dedans enuiron comme du dehors. C'est vne des principales obligations, que i'aye à ma fortune, que le cours de mon estat corporel ayt esté conduit, chasque chose en sa saison, i'en ay veu l'herbe, & les fleurs, & le fruit : & en voy la secheresse. Heureusement, puisque c'est naturellement. Je porte bien plus doucement les maux que i'ay, d'autant qu'ils sont en leur point : & qu'ils me font aussi plus fauorablement souuenir de la longue felicité de ma vie passée. Pareillement, ma sagesse peut bien estre de mesme taille, en l'un & en l'autre temps : mais elle estoit bien de plus d'exploit, & de

meilleure grace, verte, gaye, naïue, qu'elle n'est à present, cassée, grondeuse, laborieuse. Je renonce donc à ces reformatiōs casuelles & douloureuses. Il faut que Dieu nous touche le courage : il faut que nostre conscience s'amende d'elle mesme, par renforcement de nostre raison, non par l'affoiblissement de nos appetits. La volupté n'en est en soy, ny passe, ny descoulouree, pour estre apperceuë par des yeux chassieux & troubles. On doit aymer la temperance par elle mesme, & pour le respect de Dieu qui nous l'a ordonnee, & la chasteté : celle que les catterres nous presentent, & que ie dois au benefice de ma cholique, ce n'est ny chasteté, ny temperance. On ne peut se vanter de mespriser & combattre la volupté, si on ne la voit, si on l'ignore, & ses graces, & ses forces, & sa beauté plus attrayante. Je cognoy l'une & l'autre, c'est à moy de le dire. Mais il me semble qu'en la vieillesse, nos ames sont subiectes à des maladies & imperfections plus importunes, qu'en la ieunesse. Je le disois estant ieune, lors on me donnoit de mon menton par le nez : ie le dis encore à cette heure, que mon poil gris m'en donne le credit. Nous appellons sagesse, la difficulté de nos humeurs, le desgoust des choses presentes : mais à la verité, nous ne quittons pas tant les vices, comme nous les changeons : &, à mon opinion, en pis. Outre vne fotte & caduque fierté, vn babil ennuyeux, ces humeurs espineuses & inasociables, & la superstition, & vn soin ridicule des richesses, lors que l'vsage en est perdu, i'y trouue plus d'enuie, d'iniustice & de malignité. Elle nous attache plus de rides en l'esprit qu'au visage : & ne se void point d'ames, ou fort rares, qui en vieillissant ne sentent l'aigre & le moisi. L'homme marche

entier, vers son croist & vers son décroist. A voir la sagesse de Socrates, & plusieurs circonstances de sa condamnation, i'oseroy croire, qu'il s'y presta aucunement luy mesme, par preuarication, à dessein : ayant de si prés, aagé de soixante & dix ans, à souffrir l'engourdissement des riches allures de son esprit, & l'esblouissement de sa clairté accoustumee. Quelles metamorphoses luy voy-ie faire tous les iours, en plusieurs de mes cognoissans ? c'est vne puissante maladie, & qui se coule naturellement & imperceptiblement : il y faut grande prouision d'estude, & grande precaution, pour euitier les imperfections qu'elle nous charge : ou aumoins affoiblir leur progres. Je sens que nonobstant tous mes retranchemens, elle gaigne pied à pied sur moy. Je soustien tant que ie puis, mais ie ne sçay en fin, où elle me menera moy-mesme. A toutes auantures, ie suis content qu'on sçache d'où ie seray tombé.





De trois commerces.

CHAPITRE III.



L ne faut pas se clouër si fort à ses humeurs & complexions. Nostre principale suffisance, c'est, sçauoir s'appliquer à diuers vsages. C'est estre, mais ce n'est pas viure que se tenir attaché & obligé par necessité, à vn seul train.

Les plus belles ames sont celles qui ont plus de variété & de souplesse. Voyla vn honorable tesmoignage du vieil Caton : *Huic versatile ingenium sic pariter ad omnia fuit, vt natum ad id vnum diceret, quodcumque ageret.* Si c'estoit à moy à me dresser à ma mode, il n'est aucune si bonne façon, où ie voulusse estre fiché, pour ne m'en sçauoir desprendre. La vie est vn mouuement inegal, irregulier, & multiforme. Ce n'est pas estre amy de soy, & moins encore maistre; c'est en estre esclaue, de se suiure incessamment : & estre si pris à ses inclinations, qu'on n'en puisse fouruoyer, qu'on ne les puisse tordre. Ie le dy à cette heure, pour ne me pouuoir facilement despestrer de l'importunité de mon ame, en ce qu'elle ne sçait communément s'amuser, sinon où elle s'empesche, ny s'employer, que bandee & entiere. Pour

leger subiect qu'on luy donne, elle le grossit volontiers, & l'estire, iusques au point où elle ayt à s'y embesongner de toute sa force. Son oyfueté m'est à cette cause vne penible occupation, & qui offense ma santé. La plus part des esprits ont besoing de matiere estrangere, pour se desgourdir & exercer : le mien en a besoing, pour se rassoir plustost & sejourner, *vitia otij negotio discutienda sunt*. Car son plus laborieux & principal estude, c'est, s'estudier soy. Les liures font, pour luy, du genre des occupations, qui le desbauchent de son estude. Aux premieres pensees qui luy viennent, il s'agite, & fait preuue de sa vigueur à tout sens : exerce son maniemement tantost vers la force, tantost vers l'ordre & la grace, se range, modere, & fortifie. Il a dequoy esueiller ses facultez par luy mesme. Nature luy a donné comme à tous, assez de matiere sienne, pour son utilité, & des subiects propres assez, où inuenter & iuger. Le mediter est vn puissant estude & plein, à qui sçait se taster & employer vigoureusement. L'ayme mieux forger mon ame, que la meubler. Il n'est point d'occupation ny plus foible, ny plus forte, que celle d'entretenir ses pensees, selon l'ame que c'est. Les plus grandes en font leur vacation, *quibus viuere est cogitare*. Aussi l'a nature fauorisée de ce priuilege, qu'il n'y a rien, que nous puissions faire si long temps : ny action à laquelle nous nous addonnions plus ordinairement & facilement. C'est la besongne des Dieux, dit Aristote, de laquelle naist & leur beatitude & la nostre. La lecture me sert specialement à esueiller par diuers obiects mon discours : à embesongner mon iugement, non ma memoire. Peu d'entretiens doncq m'arrestent sans vigueur & sans effort. Il est vray que la gentil-

lesse & la beauté me remplissent & occupent, autant ou plus, que le pois & la profondeur. Et d'autant que ie sommeille en toute autre communication, & que ie n'y preste que l'escorce de mon attention, il m'aduiuent souuent, en telle sorte de propos abatus & lasches, propos de contenance, de dire & respondre des songes & bestises, indignes d'un enfant, & ridicules : ou de me tenir obstiné en silence, plus ineptement encore & inciuilement. I'ay vne façon refuseuse, qui me retire à moy : & d'autre part vne lourde ignorance & puerile, de plusieurs choses communes. Par ces deux qualitez, i'ay gagné, qu'on puisse faire au vray, cinq ou six contes de moy, aussi niais que d'autre quel qu'il soit. Or suyuant mon propos, cette complexion difficile me rend delicat à la pratique des hommes : il me les faut trier sur le volet : & me rend incommode aux actions communes. Nous viuons, & negotions avec le peuple : si sa conuersation nous importune, si nous desdaignons à nous appliquer aux ames basses & vulgaires : & les basses & vulgaires sont souuent aussi reglees que les plus déliees : & toute sapience est insipide qui ne s'accommode à l'insipience commune : il ne nous faut plus entremettre ny de nos propres affaires, ny de ceux d'autrui : & les publiques, & les priuez se demeslent avec ces gens là. Les moins tendues & plus naturelles alleures de nostre ame, sont les plus belles : les meilleures occupations, les moins efforcees. Mon Dieu, que la sagesse fait vn bon office à ceux, de qui elle rengen les desirs à leur puissance ! Il n'est point de plus vtile science. Selon qu'on peut : c'estoit le refrain & le mot fauory de Socrates. Mot de grande substance : il faut adresser & arrester nos desirs, aux choses les plus

ayſees & voyſines. Ne m'eſt-ce pas vne ſotte humeur, de diſconuenir avec vn milier à qui ma fortune me ioint, de qui ie ne me puis paſſer, pour me tenir à vn ou deux, qui ſont hors de mon commerce : ou pluſtoſt à vn deſir fantaſtique, de choſe que ie ne puis recouurer? Mes mœurs molles, ennemies de toute aigreur & aſpreté, peuuent ayſement m'auoir deſchargé d'enuies & d'inimitiez. D'eſtre aymé, ie ne dy, mais de n'eſtre point hay, iamais homme n'en donna plus d'occaſion. Mais la froideur de ma conuerſation, m'a defrobé avec raiſon, la bien-vueillance de pluſieurs, qui ſont excuſables de l'interpréter à autre, & pire ſens. Je ſuis tref-capable d'acquérir & maintenir des amitez rares & exquiſes. D'autant que ie me harpe avec ſi grande faim aux accointances qui reuiennent à mon gouſt, ie m'y produis, ie m'y iette ſi auidement, que ie ne faux pas ayſement de m'y attacher, & de faire impreſſion où ie donne : i'en ay faiſt ſouuent heureuſe preuue. Aux amitez communes, ie ſuis aucunement ſterile & froid : car mon aller n'eſt pas naturel, s'il n'eſt à pleine voyle. Outre ce, que ma fortune m'ayant duit & affriandé de ieuneſſe, à vne amitié ſeule & parfaicte, m'a à la verité aucunement deſgouſté des autres : & trop imprimé en la fantaſie, qu'elle eſt beſte de compagnie, non pas de troupe, comme diſoit cet ancien. Auſſi, que i'ay naturellement peine à me communiquer à demy : & avec modification, & cette ſeruile prudence & ſoupçonneuſe, qu'on nous ordonne, en la conuerſation de ces amitez nombreuses, & imparfaictes. Et nous l'ordonne lon principalement en ce temps, qu'il ne ſe peut parler du monde, que dangereuſement, ou fauſcement. Si voy-ie bien pourtant, que qui a comme moy, pour

sa fin, les commoditez de sa vie, ie dy les commoditez essentielles, doit fuir comme la peste, ces difficultez & delicateſſe d'humeur. Je louerois vn' ame à diuers eſtages, qui ſçaſche & ſe tendre & ſe deſmonter : qui ſoit bien par tout où ſa fortune la porte : qui puiſſe deuifer avec ſon voiſin, de ſon baſtiment, de ſa chaſſe & de ſa querelle : entretenir avec plaifir vn charpentier & vn iardinier. L'ennie ceux, qui ſçauent ſ'apriuoiſer au moindre de leur fuite, & dreſſer de l'entretien en leur propre train. Et le conſeil de Platon ne me plaift pas, de parler touſiours d'un langage maiſtral à ſes ſeruiteurs, ſans ieu, ſans familiarité : ſoit enuers les maſles, ſoit enuers les femmes. Car outre ma raiſon, il eſt inhumain & iniuſte, de faire tant valoir cette telle quelle prerogatiue de la fortune : & les polices, où il ſe ſouffre moins de diſparité entre les valets & les maiſtres, me ſemblent les plus equitables. Les autres ſ'eſtudient à eſlancer & guinder leur eſprit : moy à le baiſſer & coucher : il n'eſt vicieux qu'en extention.

*Narras & genus Æaci,
Et pugnata ſacro bella ſub Ilio,
Quo Chium pretio cadum
Mercemur, quis aquam temperet ignibus,
Quo præbente domum, & quota
Pelignis caream frigorigibus, taces.*

Ainſi comme la vaillance Lacedemonienne auoit beſoyn de moderation, & du ſon doux & gracieux du ieu des fluſtes, pour la flatter en la guerre, de peur qu'elle ne ſe iettaſt à la temerité, & à la furie : là où toutes autres nations ordinairement emploient des ſons & des voix aigues & fortes, qui

esmeuvent & qui eschauffent à outrance le courage des soldats : il me semble de mesme, contre la forme ordinaire, qu'en l'usage de nostre esprit, nous auons pour la plus part, plus besoing de plomb, que d'ailes : de froideur & de repos, que d'ardeur & d'agitation. Sur tout, c'est à mon gré bien faire le sot, que de faire l'entendu, entre ceux qui ne le sont pas : parler tousiours bandé, *fauellar in punta di forchetta*. Il faut se desmettre au train de ceux avec qui vous estes, & par fois affecter l'ignorance. Mettez à part la force & la subtilité : en l'usage commun, c'est assez d'y reseruer l'ordre : traidez vous au demeurant à terre, s'ils veulent. Les sçauans chopent volontiers à cette pierre : ils sont tousiours parade de leur magistère, & sement leurs liures par tout. Ils en ont en ce temps entonné si fort les cabinets & oreilles des dames, que si elles n'en ont retenu la substance, au moins elles en ont la mine. A toute sorte de propos, & matiere, pour basse & populaire qu'elle soit, elles se seruent d'une façon de parler & d'escrire, nouuellè & sçauante.

*Hoc sermone panent, hoc iram, gaudia, curas,
Hoc cuncta effundunt animi secreta, quid vltra?
Concumbunt docti.*

Et alleguent Platon & saint Thomas, aux choses auxquelles le premier rencontré, seruiroit aussi bien de tesmoing. La doctrine qui ne leur a peu arriuer en l'ame, leur est demeuree en la langue. Si les bien-nees me croient, elles se contenteront de faire valoir leurs propres & naturelles richesses. Elles cachent & couurent leurs beautez, sous des beautez estrangeres : c'est grande simpleesse, d'estouffer sa clarté pour luire d'une lumiere empruntée. Elles

sont enterrees & enseuelies sous l'art de *Capfula tota*. C'est qu'elles ne se cognoissent point assez : le monde n'a rien de plus beau : c'est à elles d'honorer les arts, & de farder le fard. Que leur faut-il, que viure aymeas & honnorees? Elles n'ont, & ne sçauent que trop, pour cela. Il ne faut qu'esueiller vn peu, & reschauffer les facultez qui sont en elles. Quand ie les voy attachees à la rhetorique, à la iudiciaire, à la logique, & semblables drogueries, si vaines & inutiles à leur besoing : i'entre en crainte, que les hommes qui le leur conseillent, le facent pour auoir loy de les regenter sous ce tiltre. Car quelle autre excuse leur trouuerois-je? Baste, qu'elles peuuent sans nous, rengier la grace de leurs yeux, à la gayeté, à la seuerité, & à la douceur : assaisonner vn nenny, de rudeffe, de doubte, & de faueur : & qu'elles ne cherchent point d'interprete aux discours qu'on fait pour leur seruice. Auec cette science, elles commandent à baguette, & regentent les regents & l'escole. Si toutesfois il leur fasche de nous ceder en quoy que ce soit, & veulent par curiosité auoir part aux liures : la poésie est vn amusement propre à leur besoin : c'est vn art follastre, & subtil, desguisé, parlier, tout en plaisir, tout en montre, comme elles. Elles tireront aussi diuerfes commoditez de l'histoire. En la philosophie, de la part qui sert à la vie, elles prendront les discours qui les dresseent à iuger de nos humeurs & conditions, à se deffendre de nos trahisons : à regler la temerité de leurs propres desirs : à mesnager leur liberté : allonger les plaisirs de la vie, & à porter humainement l'inconstance d'un seruiteur, la rudeffe d'un mary, & l'importunité des ans, & des rides, & choses semblables. Voyla pour le plus, la part que ie leur assignerois

aux sciences. Il y a des naturels particuliers, retirez & internes. Ma forme essentielle, est propre à la communication, & à la production : ie suis tout au dehors & en evidence, nay à la société & à l'amitié. La solitude que i'ayme, & que ie presche, ce n'est principalement, que ramener à moy mes affections, & mes pensées : restreindre & resserer, non mes pas, ains mes desirs & mon soucy, resignant la solitude estrangere, & fuyant mortellement la servitude, & l'obligation : & non tant la foule des hommes, que la foule des affaires. La solitude locale, à dire verité, m'estend plustost, & m'eslargit au dehors : ie me iette aux affaires d'estat, & à l'vniuers, plus volontiers quand ie suis seul. Au Louure & en la presse, ie me reserre & contrains en ma peau. La foule me repousse à moy. Et ne m'entretiens iamais si folement, si licentieusement & particulierement, qu'aux lieux de respect, & de prudence ceremonieuse. Nos folies ne me font pas rire, ce sont nos sapiences. De ma complexion, ie ne suis pas ennemy de l'agitation des cours : i'y ay passé partie de la vie : & suis fait à me porter allaiement aux grandes compagnies : pourueu que ce soit par interualles, & à mon point. Mais cette mollesse de iugement, dequoy ie parle, m'attache par force à la solitude. Voire chez moy, au milieu d'une famille peuplee, & maison des plus frequentees, i'y voy des gens assez, mais rarement ceux, avecq qui i'ayme à communiquer. Et ie reserue là, & pour moy, & pour les autres, une liberté inutile. Il s'y fait trefue de ceremonie, d'assistance, & conuoimens, & telles autres ordonnances penibles de nostre courtoisie (où la servile & importune vance) chacun s'y gouerne à sa mode, y entre-

tient qui veut ses pensées : ie m'y tiens muet, refuseur, & enfermé, sans offence de mes hostes. Les hommes, de la société & familiarité desquels ie suis en quête, sont ceux qu'on appelle honnestes & habiles hommes : l'image de ceux icy me degousté des autres. C'est à le bien prendre, de nos formes, la plus rare : & forme qui se doit principalement à la nature. La fin de ce commerce, c'est simplement la priuauté, fréquentation, & conference : l'exercice des ames, sans autre fruit. En nos propos, tous subiects me sont égaux : il ne me chaut qu'il y ayt ny poix, ny profondeur : la grace & la pertinence y sont tousiours : tout y est teinct d'un iugement meur & constant, & meslé de bonté, de franchise, de gayeté & d'amitié. Ce n'est pas au subiect des substitutions seulement, que nostre esprit montre sa beauté & sa force, & aux affaires des Roys : il la montre autant aux confabulations priuees. Je congnois mes gens au silence mesme, & à leur sousrire, & les descouure mieux à l'aduanture à table, qu'au conseil. Hippomachus disoit bien qu'il congnissoit les bons lucteurs, à les voir simplement marcher par vne ruë. S'il plaist à la doctrine de se mesler à nos deuis, elle n'en sera point refusée : non magistrale, imperieuse, & importune, comme de coustume, mais suffragante & docile elle mesme. Nous n'y cherchons qu'à passer le temps : à l'heure d'estre instruits & preschez, nous l'irons trouuer en son throsne. Qu'elle se demette à nous pour ce coup s'il luy plaist : car toute vtile & desirable qu'elle est, ie presuppõe, qu'encore au besoing nous en pourrions nous bien du tout passer, & faire nostre effect sans elle. Vne ame bien nee, & exercee à la pratique des hommes, se rend plainement agreeable

d'elle mesme. L'art n'est autre chose que le contre-rolle, & le registre des productions de telles ames. C'est aussi pour moy vn doux commerce, que celuy des belles & honnestes femmes : *nam nos quoque oculos eruditos habemus*. Si l'ame n'y a pas tant à iouyr qu'au premier, les sens corporels qui participent aussi plus à cettuy-cy, le ramènent à vne proportion voisine de l'autre : quoy que selon moy, non pas esgalle. Mais c'est vn commerce où il se faut tenir vn peu sur ses gardes : & notamment ceux en qui le corps peut beaucoup, comme en moy. Je m'y eschauday en mon enfance : & y souffris toutes les rages, que les poëtes disent aduenir à ceux qui s'y laissent aller sans ordre & sans iugement. Il est vray que ce coup de fouët m'a seruy depuis d'instruction.

*Quicumque Argolica de classe Capharea fugit,
Semper ab Euboicis vela retorquet aquis.*

C'est folie d'y attacher toutes ses pensées, & s'y engager d'une affection furieuse & indiscrete. Mais d'autre part, de s'y mesler sans amour, & sans obligation de volonté, en forme de comediens, pour iouer vn rolle commun, de l'age & de la coustume, & n'y mettre du sien que les parolles : c'est de vray pouruoir à sa seureté : mais bien laschement, comme celuy qui abandonneroit son honneur ou son proffit, ou son plaisir, de peur du danger. Car il est certain, que d'une telle pratique, ceux qui la dressent, n'en peuuent esperer aucun fruit, qui touche ou satisfasse vne belle ame. Il faut auoir en bon escient désiré, ce qu'on veut prendre en bon escient plaisir de iouyr. Je dy quand iniustement fortune fauorise-

roit leur masque : ce qui aduient souuent, à cause de ce qu'il n'y a aucune d'elles, pour malotrue qu'elle soit, qui ne pense estre bien aymable, qui ne se recommande par son aage, ou par son poil, ou par son mouuement (car de laides vniuersellement, il n'en est non plus que de belles) & les filles Brachmanes, qui ont faute d'autre recommandation, le peuple assemblé à cri public pour cet effect, vont en la place, faisans montre de leurs parties matrimoniales : veoir, si par là aumoins elle ne valent pas d'acquérir vn mary. Par consequent il n'en est pas vne qui ne se laisse facilement persuader au premier serment qu'on luy fait de la seruir. Or de cette trahison commune & ordinaire des hommes d'aujourd'huy, il faut qu'il aduienne, ce que desia nous montre l'experience : c'est qu'elles se r'allient & reiettent à elles mesmes, ou entre elles, pour nous fuyr : ou bien qu'elles se rengent aussi de leur costé, à cet exemple que nous leur donnons : qu'elles ioient leur part de la farce, & se prestent à cette negociation, sans passion, sans soing & sans amour : *Neque affectui suo aut alieno obnoxia*. Estimans, suyuant la persuasion de Lysias en Platon, qu'elles se peuuent addonner vtilement & commodement à nous, d'autant plus, que moins nous les aymons. Il en ira comme des comedies, le peuple y aura autant ou plus de plaisir que les comediens. De moy, ie ne connois non plus Venus sans Cupidon, qu'une maternité sans engeance. Ce sont choses qui s'entrepresent & s'entredoiuent leur essence. Ainsi cette piperie reiallit sur celuy qui la fait : il ne luy couste guere, mais il n'acquiert aussi rien qui vaille. Ceux qui ont fait Venus Deesse, ont regardé que sa principale beauté estoit incorporelle & spirituelle.

Mais celle que ces gens cy cherchent, n'est pas seulement humaine, ny mesme brutale : les bestes ne la veulent si lourde & si terrestre. Nous voyons que l'imagination & le desir les eschauffe souuent & solícite, auant le corps : nous voyons en l'un & l'autre sexe, qu'en la presse elles ont du choix & du triage en leurs affections, & qu'elles ont entre-elles des accointances de longue bien-vueillance. Celles mesmes à qui la vieillesse refuse la force corporelle, fremissent encores, hannissent & tressaillent d'amour. Nous les voyons auant le fait, pleines d'esperance & d'ardeur : & quand le corps a ioué son ieu, se chatouiller encor de la douceur de cette souenance : & en voyons qui s'enflent de fierté au partir de là, & qui en produisent des chants de feste & de triomphe, lasses & faoules. Qui n'a qu'à descharger le corps d'une necessité naturelle, n'a que faire d'y embesongner autrui avec des apprests si curieux. Ce n'est pas viande à une grosse & lourde faim. Comme celui qui ne demande point qu'on me tienne pour meilleur que ie suis, ie diray cecy des erreurs de ma ieunesse : non seulement pour le danger qu'il y a, de la santé, (si n'ay-ie sceu si bien faire, que ie ie n'en aye eu deux atteintes, legeres toutesfois, & preambulaires) mais encores par mespris, ie ne me suis guere adonné aux accointances venales & publiques. J'ay voulu aiguïser ce plaisir par la difficulté, par le desir & par quelque gloire. Et aymoï la façon de l'Empereur Tibere, qui se prenoit en ses amours, autant par la modestie & nobleſſe, que par autre qualité. Et l'humeur de la courtisane Flora, qui ne se prestoit à moins, que d'un Dictateur, ou Consul, ou Censeur : & prenoit son deduit, en la dignité de ses amoureux. Cer-

tes les perles & le brocadel y conferent quelque chose : & les tiltres, & le train. Au demeurant, ie faisois grand compte de l'esprit, mais pourueu que le corps n'en fust pas à dire. Car à respondre en conscience, si l'une ou l'autre des deux beautez deuoit necessairement y faillir, i'eusse choisi de quitter plustost la spirituelle. Elle a son vsage en meilleurs choses. Mais au subiect de l'amour, subiect qui principalement se rapporte à la veüe & à l'arouchement, on fait quelque chose sans les graces de l'esprit, rien sans les graces corporelles. C'est le vray aduantage des dames que la beauté : elle est si leur, que la nostre, quoy qu'elle desire des traictz vn peu autres, n'est en son point, que confuse avec la leur, puerile & imberbe. On dit que chez le grand Seigneur, ceux qui le seruent sous titre de beauté, qui sont en nombre infini, ont leur congé, au plus loing, à vingt & deux ans. Les discours, la prudence, & les offices d'amitié, se trouuent mieux chez les hommes : pourtant gouernent-ils les affaires du monde. Ces deux commerces sont fortuites, & despendans d'autrui : l'un est ennuyeux par sa rareté, l'autre se flestrit avec l'aage : ainfin ils n'eussent pas assez prouueu au besoing de ma vie. Celuy des liures, qui est le troiesiesme ; est bien plus seur & plus à nous. Il cede aux premiers, les autres aduantages : mais il a pour sa part la constance & facilité de son seruice. Certuy-cy costoye tout mon cours, & m'assiste par tout : il me console en la vieillesse & en la solitude : il me descharge du poix d'une oisuieté ennuyeuse : & me defait à toute heure des compagnies qui me faschent : il emouffe les pointures de la douleur, si elle n'est du tout extreme & maistresse. Pour me distraire d'une ima-

gination importune, il n'est que de recourir aux liures, ils me destournent facilement à eux, & me la desrobent. Et si ne se mutinent point, pour voir que ie ne les recherche, qu'au deffaut de ces autres commoditez, plus reelles, viues & naturelles : ils me reçoient tousiours de mesme visage. Il a bel aller à pied, dit-on, qui meine son cheual par la bride. Et nostre Iacques Roy de Naples, & de Sicile, qui beau, ieune, & sain, se faisoit porter par pays en ciuiere, couché sur vn meschant oriller de plume, vestu d'une robe de drap gris, & vn bonnet de mesme : fuiuy ce pendant d'une grande pompe royalle, listieres, cheuaux à main de toutes sortes, gentils-hommes & officiers : representoit vne austerité tendre encores & chancellante. Le malade n'est pas à plaindre, qui a la guarison en sa manche. En l'experience & vsage de cette sentence, qui est tres-veritable, consiste tout le fruit que ie tire des liures. Je ne m'en sers en effect, quasi non plus que ceux qui ne les cognoissent point. L'en iouys, comme les auaritieux des tresors, pour sçauoir que i'en iouyray quand il me plaira : mon ame se rassasie & contente de ce droit de possession. Je ne voyage sans liures, ny en paix, ny en guerre. Toutesfois il se passera plusieurs iours, & des mois, sans que ie les employe. Ce sera tantost, dis-je, ou demain, ou quand il me plaira : le temps court & s'en va ce pendant sans me bleffer. Car il ne se peut dire, combien ie me repose & seiourne en cette consideration, qu'ils sont à mon costé pour me donner du plaisir à mon heure : & à reconnoistre, combien ils portent de secours à ma vie. C'est la meilleure munition que i'aye trouuée à cet humain voyage : & plains extremement les hommes d'en-

tendement, qui l'ont à dire. l'accepte plustost toute autre sorte d'amusement, pour leger qu'il soit : d'autant que cettuy-cy ne me peut faillir. Chez moy, ie me destourne vn peu plus souuent à ma librairie, d'où, tout d'une main, ie commande mon mesnage. Je suis sur l'entree, & vois sous moy, mon iardin, ma basse cour, ma cour, & dans la plus part des membres de ma maison. Là ie feuillette à cette heure vn liure, à cette heure vn autre, sans ordre & sans dessein, à pieces descousues. Tantost ie refuse, tantost i'enregistre & dicte, en me promenant, mes songes que voicy. Elle est au troisieme estage d'une tour. Le premier, c'est ma chapelle, le second vne chambre & sa suite, où ie me couche souuent, pour estre seul. Au dessus, elle a vne grande garde-robe. C'estoit au temps passé, le lieu plus inutile de ma maison. Je passe là & la plus part des iours de ma vie, & la plus part des heures du iour. Je n'y suis iamais la nuit. A sa suite est vn cabinet assez poly, capable à receuoir du feu pour l'hyuer, tres-plaisamment percé. Et si ie ne craignoy non plus le soing que la despen- se, le soing qui me chasse de toute besongne : i'y pourroy facilement coudre à chascun costé vne gallerie de cent pas de long, & douze de large, à plein pied : ayant trouué tous les murs montez, pour autre v- sage, à la hauteur qu'il me faut. Tout lieu retiré requiert vn proumenoir. Mes pensees dorment, si ie les assis. Mon esprit ne va pas seul, comme si les iambes l'agitent. Ceux qui estudient sans liure, en sont tous là. La figure en est ronde, & n'a de plat, que ce qu'il faut à ma table & à mon siege : & vient m'offrant en se courbant, d'une veuë, tous mes liures, rangez sur des pulpitres à cinq degrez tout à l'environ. Elle a trois

veuës de riche & libre prospect, & seize pas de vuide en diametre. En hyuer i'y suis moins continuellement : car ma maison est iuchee sur vn tertre, comme dit son nom : & n'a point de piece plus euentee que cette cy : qui me plaist d'estre vn peu penible & à l'esquart, tant pour le fruit de l'exercice, que pour reculer de moy la presse. C'est là mon siege. l'essaye à m'en rendre la domination pure : & à soustraire ce seul coing, à la communauté & coniugale, & filiale, & ciuile. Par tout ailleurs ie n'ay qu'une auctorité verbale : en essence, confuse. Misérable à mon gré, qui n'a chez soy, où estre à soy : où se faire particulièrement la cour : où se cacher. L'ambition paye bien ses gents, de les tenir tousiours en montre, comme la statue d'un marché. *Magna seruitus est magna fortuna.* Il n'ont pas seulement leur retraict pour retraite. Je n'ay rien iugé de si rude en l'austerité de vie, que nos religieux affectent, que ce que ie voy en quelqu'une de leurs compagnies, auoir pour regle une perpetuelle société de lieu : & assistance nombreuse entre eux, en quelque action que ce soit. Et trouue aucunement plus supportable, d'estre tousiours seul, que ne le pouoir iamais estre. Si quelqu'un me dit, que c'est auillir les muses, de s'en seruir seulement de iouet, & de passetemps, il ne sçait pas comme moy, combien vaut le plaisir, le ieu & le passetemps : à peine que ie ne die toute autre fin estre ridicule. Je vis du iour à la iournee, & parlant en reuerence, ne vis que pour moy : mes desseins se terminent là. l'estudiai ieune pour l'ostentation; depuis; vn peu pour m'affagir : à cette heure pour m'esbatre : iamais pour le quest. Une humeur vaine & despendiere que i'auois, apres cette forte de meuble : non

pour en prouuoir seulement mon besoing, mais de trois pas au dela, pour m'en tapiffer & parer : ie l'ay pieça abandonnee. Les liures ont beaucoup de qualitez agreables à ceux qui les sçauent choisir. Mais aucun bien sans peine. C'est vn plaisir qui n'est pas net & pur, non plus que les autres : il a ses incommoditez, & bien poissantes. L'ame s'y exerce, mais le corps, duquel ie n'ay non plus oublié le foing, demeure ce pendant sans action, s'atterre & s'attriste. Je ne sçache excez plus dommageable pour moy, ny plus à euter, en cette declinaison d'aage. Voyla mes trois occupations fauories & particulieres. Je ne parle point de celles que ie dois au monde par obligation ciuile.





De la diuerſion.

CHAPITRE IIII.



'AY autresfois eſté employé à conſoler vne dame vrayement affligee. La plus part de leurs deuils ſont artificiels & ceremonies.

*Vberibus ſemper lacrymis, ſemperque
paratis,*

*In ſtatione ſua, atque expectantibus illam
Quo iubeat manare modo.*

On y procede mal, quand on s'oppose à cette passion : car l'opposition les pique & les engage plus auant à la tristesse. On exaspere le mal par la ialousie du debat. Nous voyons des propos communs, que ce que i'auray dit sans soing, si on vient à me le contester, ie m'en formalise, ie l'espouse : beaucoup plus ce à quoy i'aurois interest. Et puis en ce faisant, vous vous presentez à vostre operation d'une entree rude : là où les premiers accueils du medecin enuers son patient, doiuent estre gracieux, gays, & agreables. Iamais medecin laid, & rechigné n'y fit oeuvre. Au contraire doncq, il faut ayder d'arriuee & fauoriser leur plainte, & en tesmoigner quelque appro-

bation & excuse. Par cette intelligence, vous gaignez credit à passer outre, & d'une facile & insensible inclination, vous vous coulez aux discours plus fermes & propres à leur guerison. Moy, qui ne desirois principalement que de piper l'assistance, qui auoit les yeux sur moy, m'aduisay de plastrer le mal. Aussi me trouue-je par experience, auoir mauuaïse main & infructueuse à persuader. Ou ie presente mes raisons trop pointues & trop seiches : ou trop brusquement : ou trop nonchalamment. Apres que ie me fus appliqué vn temps à son tourment, ie n'essayay pas de le guarir par fortes & viues raisons : par ce que i'en ay faute, ou que ie pensois autrement faire mieux mon effect. Ny n'allay choisissant les diuerses manieres, que la philosophie prescrit à consoler : Que ce qu'on plaint n'est pas mal, comme Cleanthes : Que c'est vn léger mal, comme les Peripateticiens : Que ce plaindre n'est action, ny iuste, ny louable, comme Chrysippus : Ny cette cy d'Epicurus, plus voisine à mon style, de transferer la pensee des choses fascheuses aux plaissantes : Ny faire vne charge de tout cet amas, le dispensant par occasion, comme Cicero. Mais declinant tout mollement noz propos, & les gauchissant peu à peu, aux subiects plus voyzins, & puis vn peu plus eslongnez, selon qu'elle se prestoit plus à moy, ie luy desrobay imperceptiblement cette pensee douloureuse : & la tins en bonne contenance & du tout r'apaisée autant que i'y fus. l'vsay de diuersion. Ceux qui me suyurent à ce mesme seruice, n'y trouuerent aucun amendement : car ie n'auois pas porté la coignée aux racines. A l'aduenture ay-ie touché ailleurs quelque espece de diuersions publiques. Et l'vsage des militaires, dequoy se seruit

Pericles en la guerre Peloponnesiaque : & mille autres ailleurs, pour reuoker de leurs pais les forces contraires, est trop frequent aux histoires. Ce fut vn ingenieux destour, dequoy le Sieur d'Himbercourt sauua & foy & d'autres, en la ville du Liege : où le Duc de Bourgogne, qui la tenoit assiegee, l'auoit fait entrer, pour executer les conuenances de leur reddition accordee. Ce peuple assemblé de nuit pour y pouruoir, commence à se mutiner contre ces accords passez : & delibererent plusieurs, de courre sus aux negociateurs, qu'ils tenoient en leur puissance. Luy, sentant le vent de la premiere ondee de ces gens, qui venoient se ruer en son logis, lascha soudain vers eux, deux des habitans de la ville, (car il y en auoit aucuns avec luy) chargez de plus douces & nouuelles offres, à proposer en leur conseil, qu'il auoit forgees sur le champ pour son besoing. Ces deux arresterent la premiere tempeste, ramenant cette tourbe esmeüe en la maison de ville, pour ouyr leur charge, & y deliberer. La deliberation fut courte. Voicy debonder vn second orage, autant animé que l'autre : & luy à leur despecher en teste, quatre nouueaux & semblables intercesseurs, protestans auoir à leur declarer à ce coup, des presentations plus grasses, du tout à leur contentement & satisfaction : par où ce peuple fut de rechef repoussé dans le conclaue. Somme, que par telle dispensation d'amusemens, diuertissant leur furie, & la dissipant en vaines consultations, il l'endormit en fin, & gagna le iour, qui estoit son principal affaire. Cet autre comte est aussi de ce predicament. Atalante fille de beauté excellente, & de merueilleuse disposition, pour se deffaire de la presse de mille pourfuiuants, qui la

pour le mettre, inegal & mal formé : Ny cela, mesme, dit-il, se tournant aux soldats qui y assistoyent, n'est selon la discipline militaire. Et à Niger, qui l'exhortoit de tenir la teste ferme : Frapasses tu seulement aussi ferme. Et deuina bien : car le bras tremblant à Niger, il la luy coupa à diuers coups. Cettuy-cy semble bien auoir eu sa pensèe droittement & fixement au subiect. Celuy qui meurt en la meslee, les armes à la main, il n'estudie pas lors la mort, il ne la sent, ny ne la confidere : l'ardeur du combat l'emporte. Vn honnest homme de ma cognoissance, estant tombé comme il se batoit en estocade, & se sentant daguer à terre par son enemy de neuf ou dix coups, chacun des assistans luy crioit qu'il pensast à sa conscience, mais il me dit depuis, qu'encores que ces voix luy vinsent aux oreilles, elles ne l'auoient aucunement touché, & qu'il ne pensa iamais qu'à se descharger & à se venger. Il tua son homme en ce mesme combat. Beaucoup fit pour L. Syllanus, celui qui luy apporta sa condamnation : de ce qu'ayant ouy sa response, qu'il estoit bien préparé à mourir, mais non pas de mains scelerees : il se rua sur luy, avec ses soldats pour le forcer : & comme luy tout defarmé, se defendoit obstinement de poings & de pieds, il le fit mourir en ce debat : dissipant en prompt cholere & tumultuaire, le sentiment penible d'une mort longue & preparee, à quoy il estoit destiné. Nous pensons tousiours ailleurs : l'esperance d'une meilleure vie nous arreste & appuye : ou l'esperance de la valeur de nos enfans : ou la gloire future de nostre nom : ou la fuitte des maux de cette vie : ou la vengeance qui menasse ceux qui nous causent la mort :

*Spero equidem mediis, si quid pia numina possunt,
Supplicia hausurum scopulis, & nomine Dido
Sæpe vocaturum.*

Audiam, & hæc manes veniet mihi fama sub imos.

Xenophon sacrifioit couronné quand on luy vint annoncer la mort de son fils Gryllus, en la bataille de Mantinee. Au premier sentiment de cette nouvelle, il ietta sa couronne à terre : mais par la suite du propos, entendant la forme d'une mort tres-valeureuse, il l'amassa, & remit sur sa teste. Epicurus mesme se console en sa fin, sur l'éternité & l'utilité de ses escrits. *Omnes clari & nobilitati labores, fiunt tolerabiles.* Et la mesme playe, le mesme trauail, ne poise pas, dit Xenophon, à vn general d'armee, comme à vn soldat. Epaminondas print sa mort bien plus alaigrement, ayant esté informé, que la victoire estoit demeuree de son costé. *Hæc sunt solatia, hæc fomenta summorum dolorum.* Et telles autres circonstances nous amusent, diuertissent & destournent de la consideration de la chose en soy. Voire les arguments de la philosophie, vont à tous coups costoyans & gauchiffans la matiere, & à peine effuyans sa crouste. Le premier homme de la premiere eschole philosophique, & surintendante des autres, ce grand Zenon, contre la mort : Nul mal n'est honorable : la mort l'est : elle n'est pas donc mal. Contre l'yurongnerie : Nul ne fie son secret à l'yurongne : chacun le fie au sage : le sage ne fera donc pas yurongne. Cela est-ce donner au blanc? L'ayme à veoir ces ames principales, ne se pouoir desprendre de nostre conforce. Tant parfaits hommes qu'ils soyent, ce sont tousiours bien lourdement des hommes. C'est vne douce passion que la vengeance, de grande impression & naturelle : ie le

voy bien, encore que ie n'en aye aucune experience. Pour en distraire dernièrement vn ieune Prince, ie ne luy allois pas disant, qu'il falloit prester la iouë à celuy qui vous auoit frappé l'autre, pour le deuoir de charité : ny ne luy allois représenter les tragiques euenemens que la poësie attribue à cette passion. Je la laissay là, & m'amusay à luy faire goufter la beauté d'une image contraire : l'honneur, la faueur, la bien-vueillance qu'il acquerroit par clemence & bonté : ie le destournay à l'ambition. Voyla comme lon en fait. Si vostre affection en l'amour est trop puissante, dissipez la, disent-ils. Et disent vray, car ie l'ay souuent essayé avec vtilité. Rompez la à diuers desirs, desquels il y en ayt vn regent & vn maistre, si vous voulez, mais de peur qu'il ne vous gourmande & tyrannise, affoiblissez-le, sejournez-le, en le diuisant & diuertissant.

*Cum morosa vago finguliet inguine vena,
Coniucito humorem collectum in corpora quæque.*

Et pouruoyez y de bonne heure, de peur que vous n'en foyez en peine, s'il vous a vne fois faisi,

*Si non prima nouis conturbes vulnera plagis,
Volgiuagâque vagus Venere ante recentia cures.*

Je fus autrefois touché d'un puissant desplaisir, selon ma complexion : & encores plus iuste que puissant : ie m'y fusse perdu à l'adventure, si ie m'en fusse simplement fié à mes forces. Ayant besoing d'une vehemente diuersion pour m'en distraire, ie me fis par art amoureux & par estude : à quoy l'aage m'aydoit. L'amour me foulagea & retira du mal,

qui m'estoit causé par l'amitié. Par tout ailleurs de mesme. Vne aigre imagination me tient : ie trouue plus court, que de la dompter, la changer : ie luy en substitue, si ie ne puis vne contraire, aumoins vn' autre. Tousiours la variation soulage, dissout & dissipe. Si ie ne puis la combattre, ie luy eschappe : & en la fuiant, ie fouruoie, ie ruse. Muant de lieu, d'occupation, de compagnie, ie me sauue dans la presse d'autres amusemens & pensees, où elle perd ma trace, & m'esgare. Nature procede ainsi, par le benefice de l'inconstance. Car le temps qu'elle nous a donné pour souuerain medecin de nos passions, gaigne son effect principalement par là, que fournissant autres & autres affaires à nostre imagination, il demesle & corrompt cette premiere apprehension, pour forte qu'elle soit. Vn sage ne voit guere moins, son amy mourant, au bout de vingt & cinq ans, qu'au premier an ; & suiuant Epicurus, de rien moins : car il n'attribuoit aucun leniment des fascheres, ny à la preuoyance, ny à l'antiquité d'icelles. Mais tant d'autres cogitations trauerfent cette-cy, qu'elle s'alanguit, & se lasse en fin. Pour destourner l'inclination des bruits communs, Alcibiades couppa les oreilles & la queue à son beau chien, & le chassa en la place : afin que donnant ce subiect pour babiller au peuple, il laissast en paix ses autres actions. I'ay veu aussi, pour cet effect de diuertir les opinions & coniectures du peuple, & desuoyer les parleurs, des femmes, couvrir leurs vrayes affections, par des affections contrefaites. Mais i'en ay veu telle, qui en se contrefaisant s'est laissée prendre à bon escient, & a quitté la vraye & originelle affection pour la feinte : & aprins par elle, que ceux qui se trouuent bien logez, sont des fots de con-

fentir à ce masque. Les accueils & entretiens publics estans referuez à ce seruiteur aposté, croyez qu'il n'est guere habile, s'il ne se met en fin en vostre place, & vous enuoye en la sienne. Cela c'est proprement tailler & coudre vn foulier, pour qu'un autre le chauffe. Peu de chose nous diuertit & destourne : car peu de chose nous tient. Nous ne regardons gueres les subiects en gros & feuls : ce sont des circonstances ou des images menues & superficielles qui nous frappent : & des vaines escorces qui reiallissent des subiects.

*Folliculos vt nunc teretes æstate cicadae
Linquunt.*

Plutarque mesme regrette sa fille par des singeries de son enfance. Le souuenir d'un adieu, d'une action, d'une grace particuliere, d'une recommandation derriere, nous afflige. La robe de Cæsar troubla toute Rome, ce que sa mort n'auoit pas fait. Le son mesme des noms, qui nous tintouïne aux oreilles : Mon pauvre maistre, ou mon grand amy : hélas mon cher pere, ou ma bonne fille. Quand ces redites me pincent, & que i'y regarde de pres, ie trouue que c'est vne plainte grammairiene, le mot & le ton me blesse. Comme les exclamations des precheurs, esmouuent leur auditoire souuent, plus que ne font leurs raisons : & comme nous frappe la voix piteuse d'une beste qu'on tue pour nostre seruice : sans que ie poise ou penetre ce pendant, la vraye essence & massiue de mon subiect.

his se stimulis dolor ipse laceffit.

Ce sont les fondemens de nostre deuil. L'opinia-

streté de mes pierres, spécialement en la verge, m'a par fois ietté en longues suppressions d'vrine, de trois, de quatre iours. : & si auant en la mort, que c'eust esté follié d'esperer l'euitier, voyre desirer, veu les cruels efforts que cet estat m'apporte. O que ce bon Empereur, qui faisoit lier la verge à ses criminels, pour les faire mourir à faute de piffer, estoit grand maistre en la science de bourrellerie! Me trouuant là, ie consideroy par combien legeres causes & obiects, l'imagination nourrissoit en moy le regret de la vie : de quels atomes se bastissoit en mon ame, le poids & la difficulté de ce deslogement : à combien friuoles pensees nous donnions place en vn si grand affaire. Vn chien, vn cheual, vn liure, vn verre, & quoy non? tenoient compte en ma perte. Aux autres, leurs ambitieuses esperances, leur bourse, leur science, non moins sottement à mon gré. Je voy nonchalamment la mort, quand ie la voy vniuersellement, comme fin de la vie. Je la gourmande en bloc : par le menu, elle me pille. Les larmes d'un laquais, la dispensation de ma desferre, l'attouchement d'une main cognue, vne consolation commune, me desconsole & m'attendrit. Ainsi nous troublent l'ame, les plaintes des fables : & les regrets de Didon, & d'Ariadné passionnent ceux mesmes qui ne les croient point en Virgile & en Catulle : c'est vne exemple de nature obstinee & dure, n'en sentir aucune emotion : comme on recite, pour miracle, de Polemon : mais aussi ne pallit il pas seulement à la morsure d'un chien enragé, qui luy emporta le gras de la iambe. Et nulle sagesse ne va si auant, de conceuoir la cause d'une tristesse, si viue & entiere, par iugement, qu'elle ne souffre accession par

la presence, quand les yeux & les oreilles y ont leur part : parties qui ne peuvent estre agitees que par vains accidens. Est-ce raison que les arts mesmes se seruent & facent leur proufit, de nostre imbecillité & bestise naturelle? L'orateur, dit la rhetorique, en cette farce de son plaidoyer, s'esmouuera par le son de sa voix, & par ses agitations feintes; & se lairra piper à la passion qu'il represente. Il s'imprimera vn vray deuil & essentiel, par le moyen de ce battelage qu'il iouë, pour le transfmettre aux iuges, à qui il touche encore moins. Comme font ces personnes qu'on loüe aux mortuaires, pour ayder à la ceremonie du deuil, qui vendent leurs larmes à poix & à mesure, & leur tristesse. Car encore qu'ils s'esbranlent en forme empruntée, toutesfois en habituant & regeant la contenance, il est certain qu'ils s'emportent souuent tous entiers, & recoiuent en eux vne vraye melancholie. Je fus entre plusieurs autres de ses amis, conduire à Soissons le corps de monsieur de Grammont, du siege de la Fere, où il fut tué. Je consideray que par tout où nous passions, nous remplissions de lamentation & de pleurs, le peuple que nous rencontrions, par la seule montre de l'appareil de nostre conuoy : car seulement le nom du trespasné n'y estoit pas cogneu. Quintilian dit auoir veu des comedians si fort engagez en vn rolle de deuil, qu'ils en pleuroient encore au logis : & de soy mesme, qu'ayant prins à esmouuoir quelque passion en autrui, il l'auoit espousee, iusques à se trouuer surprins, non seulement de larmes, mais d'une paleur de visage & port d'homme vrayement accablé de douleur. En vne contree pres de nos montaignes, les femmes font le prestre-martin : car comme elles

agrandissent le regret du mary perdu, par la souvenance des bonnes & agreables conditions qu'il auoit, elles font tout d'un train aussi recueil & publient ses imperfections : comme pour entrer d'elles mesmes en quelque compensation, & se diuertir de la pitié au desdain. De bien meilleure grace encore que nous, qui à la perte du premier cognu, nous piquons à luy prestre des louanges nouuelles & fauces : & à le faire tout autre, quand nous l'auons perdu de veüe, qu'il ne nous sembloit estre, quand nous le voyions. Comme si le regret estoit vne partie instructiue : ou que les larmes en lauant nostre entendement, l'esclaircissent. Je renonce dès à present aux fauorables tesmoignages, qu'on me voudra donner, non par ce que i'en feray digne, mais par ce que ie feray mort. Qui demandera à celui là, Quel interest auez vous à ce siege? L'interest de l'exemple, dira-il, & de l'obeyssance commune du Prince : ie n'y pretens proffit quelconque : & de gloire, ie sçay la petite part qui en peut toucher vn particulier comme moy : ie n'ay icy ny passion ny querelle. Voyez le pourtant le lendemain, tout changé, tout bouillant & rougissant de cholere, en son rang de bataille pour l'assaut. C'est la lueur de tant d'acier, & le feu & tintamarre de nos canons & de nos tambours, qui luy ont ietté cette nouuelle rigueur & hayne dans les veines. Friuole cause, me direz vous. Comment cause? il n'en faut point, pour agiter nostre ame. Vne resuerie sans corps & sans subiect la regente & l'agite. Que ie me mette à faire des chasteaux en Espagne, mon imagination m'y forge des commoditez & des plaisirs, desquels mon ame est reellement chatouillee & resiouye. Combien de fois embrouillons nous no-

estre esprit de cholere ou de tristesse, par telles ombres, & nous inferons en des passions fantastiques, qui nous alterent & l'ame & le corps? Quelles grimaces, estonnees, riardes, confuses, excite la resuerie en noz visages! Quelles faillies & agitations de membres & de voix! Semble-il pas de cet homme seul, qu'il aye des visions fauces, d'une presse d'autres hommes, avec qui il negocie: ou quelque demon interne, qui le persecute? Enquerez vous à vous, où est l'obiet de cette mutation? Est-il rien sauf nous, en nature, que l'inanité substante, sur quoy elle puisse? Cambyse pour auoir songé en dormant, que son frere deuoit deuenir Roy de Perse, le fit mourir. Vn frere qu'il ayait, & duquel il s'estoit tousiours fié. Aristodemus Roy des Messeniens se tua, pour vne fantasie qu'il print de mauuais augure, de ie ne sçay quel hurlement de ses chiens. Et le Roy Midas en fit autant, troublé & fâché de quelque mal plaissant songe qu'il auoit songé. C'est priser sa vie iustement ce qu'elle est, de l'abandonner pour vn songe. Oyez pourtant nostre ame, triompher de la misere du corps, de sa foiblesse, de ce qu'il est en butte à toutes offences & alterations: vrayement elle a raison d'en parler.

O prima infelix fingenti terra Prometheo!

Ille parum cauti pectoris egit opus.

Corpora disponens, mentem non vidit in arte,

Recta animi primum debuit esse via.





Sur des vers de Virgile.

CHAPITRE V.



mesvre que les pensemens viles
sont plus pleins, & solides, ils
sont aussi plus empeschans, & plus
onereux. Le vice, la mort, la pau-
ureté, les maladies, sont subiets
graues, & qui greuent. Il faut
auoir l'ame instruite des moyens
de soustenir & combattre les maux, & instruite des
regles de bien viure, & de bien croire : & souuent
l'esueiller & exercer en cette belle estude. Mais à vne
ame de commune sorte, il faut que ce soit avec relas-
che & moderation : elle s'affolle, d'estre trop conti-
nuellement bandee. l'auoy besoing en ieunesse, de
m'aduertir & solliciter pour me tenir en office.
L'alegresse & la santé ne conuiennent pas tant bien,
dit-on, avec ces discours serieux & sages. Je suis à
present en vn autre estat. Les conditions de la vieil-
lesse, ne m'aduertissent que trop, m'assagissent & me
preschent. De l'excez de la gayeté, ie suis tombé
en celuy de la feuerité : plus fascheux. Parquoy, ie
me laisse à cette heure aller vn peu à la desbauche,
par dessein : & employe quelque fois l'ame, à des
pensemens folastres & ieunes, où elle se seiourne.

Ie ne fuis meshuy que trop rassis, trop poissant, & trop meur. Les ans me font leçon tous les iours, de froideur, & de temperance. Ce corps fuyt le desreiglement, & le craint : il est à son tour de guider l'esprit vers la reformation : il regente à son tour : & plus rudement & imperieusement. Il ne me laisse pas vne heure, ny dormant ny veillant, chaumer d'instruction, de mort, de patience, & de pénitence. Ie me deffens de la temperance, comme i'ay faict autresfois de la volupté : elle me tire trop arriere, & iusques à la stupidité. Or ie veux estre maistre de moy, à tout sens. La sagesse a ses excez, & n'a pas moins besoing de moderation que la folie. Ainsi, de peur que ie ne seche, tariisse, & m'aggrauue de prudence, aux interualles que mes maux me donnent,

Mens intenta suis ne fiet vsque malis,

ie gauchis tout doucement, & desrobe ma veuë de ce ciel orageux & nubileux que i'ay deuant moy. Lequel, Dieu mercy, ie confidere bien sans effroy, mais non pas sans contention, & sans estude. Et me vay amusant en la recordation des ieunesses passées :

*animus quod perdidit, optat,
Atque in præterita se totus imagine versat.*

Que l'enfance regarde deuant elle, la vieillesse derriere : estoit ce pas ce que signifioit le double visage de Ianus? Les ans m'entrainnent s'ils veulent, mais à reculons. Autant que mes yeux peuuent recognoistre cette belle saison expirée, ie les y destourne à secouffes. Si elle eschappe de mon sang & de mes

veines, aumoins n'en veux-je déraciner l'image de la memoire.

hoc est,
Viuere bis, vita posse priore frui.

Platon ordonne aux vieillards d'assister aux exercices, danfes, & ieu de la ieunesse, pour se resiouyr en autruy, de la soupplesse & beauté du corps, qui n'est plus en eux : & rappeler en leur souuenance, la grace & faueur de cet aage verdissant. Et veut qu'en ces esbats, ils attribuent l'honneur de la victoire, au ieune homme, qui aura le plus esbaudi & resiouy, & plus grand nombre d'entre eux. Je merquois autresfois les iours poisons & tenebreux, comme extraordinaires. Ceux-là sont tantost les miens ordinaires : les extraordinaires sont les beaux & serains. Je m'en vay au train de trefsaillir, comme d'une nouuelle faueur, quand aucune chose ne me deult. Que ie me chatouille, ie ne puis tantost plus arracher vn pauvre rire de ce meschant corps. Je ne m'esgaye qu'en fantasie & en songe : pour destourner par ruse, le chagrin de la vieillesse. Mais certes il faudroit autre remede, qu'en songe. Foible luste, de l'art contre la nature. C'est grand simplesse, d'alonger & anticiper, comme chacun fait, les incommoditez humaines. L'ayme mieux estre moins long temps vieil, que d'estre vieil, auant que de l'estre. Iusques aux moindres occasions de plaisir que ie puis rencontrer, ie les empoigne. Je congnois bien par ouyr dire, plusieurs especes de voluptez prudentes, fortes & glorieuses : mais l'opinion ne peut pas assez sur moy pour m'en mettre en appetit. Je ne les veux pas tant magnanimes, magnifiques & fastueuses, comme ie les veux doucereuses, faciles

& prestes. *A natura discedimus : populo nos damus, nullius rei bono auctori.* Ma philosophie est en action, en vsage naturel & present : peu en fantasie. Prinssé- ie plaisir à iouer aux noisettes & à la toupie !

Non ponebas enim rumores ante salutem.

La volupté est qualité peu ambitieuse ; elle s'estime assez riche de foy, sans y mesler le prix de la reputation : & s'ayme mieux à l'ombre. Il faudroit donner le fouët à vn ieune homme, qui s'amuseroit à choisir le goust du vin, & des fauces. Il n'est rien que i'aye moins sceu, & moins prisé : à cette heure ie l'apprens. L'en ay grand honte, mais qu'y feroiy-ie ? I'ay encor plus de honte & de despit, des occasions qui m'y pouffent. C'est à nous, à resuer & baguenauder, & à la ieunesse à se tenir sur la reputation & sur le bon bout. Elle va vers le monde, vers le credit : nous en venons. *Sibi arma, sibi equos, sibi hastas, sibi clauam, sibi pilam, sibi natationes & cursus habeant : nobis senibus, ex lusionibus multis, talos relinquunt & tesseras.* Les loix mesme nous enuoyent au logis. Je ne puis moins en faueur de cette che- tiue condition, où mon aage me pouffe, que de luy fournir de ioüets & d'amusoires, comme à l'enfance : aussi y retombons nous. Et la sagesse & la folie, auront prou à faire, à m'estayer & secourir par offices alternatifs, en cette calamité d'aage.

Misce stultitiam consiliis breuem.

Je fuis de mesme les plus legeres pointures : & celles qui ne m'eussent pas autresfois esgratigné, me transpercent à cette heure. Mon habitude commence

de s'appliquer si volontiers au mal : *in fragili corpore odiosa omnis offensio est.*

Ménsque pati durum sustinet ægra nihil.

L'ay esté tousiours chatouilleux & delicat aux offences, ie suis plus tendre à cette heure, & ouuert par tout.

Et minimæ vires frangere quassa valent.

Mon iugement m'empesche bien de regimber & gronder contre les inconueniens que Nature m'ordonne à souffrir, mais non pas de les sentir. Je courrois d'un bout du monde à l'autre, chercher un bon an de tranquillité plaisante & eniuee, moy, qui n'ay autre fin que viure & me resiouyr. La tranquillité sombre & stupide, se trouue assez pour moy, mais elle m'endort & enteste : ie ne m'en contente pas. S'il y a quelque personne, quelque bonne compagnie, aux champs, en la ville, en France, ou ailleurs, resseante, ou voyagee, à qui mes humeurs soient bonnes, de qui les humeurs me foyent bonnes, il n'est que de siffler en paume, ie leur iray fournir des Essays, en chair & en os. Puisque c'est le priuilege de l'esprit, de se r'auoir de la vieillesse, ie luy conseille autant que ie puis, de le faire : qu'il verdisse, qu'il fleurisse ce pendant, s'il peut, comme le guy sur un arbre mort. Je crains que c'est un traistre : il s'est si estroittement affreté au corps, qu'il m'abandonne à tous coups, pour le suiure en sa necessité. Je le flatte à part, ie le pratique pour neant : j'ay beau essayer de le destourner de cette colligence, & luy presenter & Seneque & Catulle, & les dames & les dances royales : si

son compaignon a la cholique, il semble qu'il l'ayt aussi. Les puissances mesmes qui luy sont particulieres & propres, ne se peuuent lors fousleuer : elles sentent euidemment le morfondu : il n'y a point d'allegresse en ses productions, s'il n'en y a quand & quand au corps. Noz maistres ont tort, dequoy cherchant les causes des eslancements extraordinaires de nostre esprit, outre ce qu'ils en attribuent à vn rauissement diuin, à l'amour, à l'aspreté guerriere, à la poésie, au vin : ils n'en ont donné sa part à la fanté. Vne fanté bouillante, vigoureuse, pleine, oyfiue, telle qu'autrefois la verdeur des ans & la securité, me la furnissoient par venuës. Ce feu de gayeté suscite en l'esprit des eloises viues & claires outre nostre clarté naturelle : & entre les enthousiasmes, les plus gaillards, sinon les plus esperdus. Or bien, ce n'est pas merueille, si vn contraire estat affesse mon esprit, le cloué, & en tire vn effect contraire.

Ad nullum confurgit opus cum corpore languet.

Et veut encores que ie luy fois tenu, dequoy il preste, comme il dit, beaucoup moins à ce consentement, que ne porte l'usage ordinaire des hommes. Au moins pendant que nous auons trefue, chassons les maux & difficultez de nostre commerce,

Dum licet obducta soluaturn fronte senectus :

tetrica sunt amœnanda iocularibus. J'ayme vne fagesse gaye & ciuile, & fuis l'aspreté des mœurs, & l'austerité : ayant pour suspecte toute mine rebarbatue :

tristémque vultus tetrici arrogantiam.

Et habet tristis quoque turba cynædos.

Je croy Platon de bon cœur, qui dit les humeurs faciles ou difficiles, estre vn grand preiudice à la bonté ou mauuaistié de l'ame. Socrates eut vn visage constant, mais serein & riant. Non fascheusement constant, comme le vieil Crassus, qu'on ne veit iamais rire. La vertu est qualité plaisante & gaye. Je sçay bien que fort peu de gens rechigneront à la licence de mes escrits, qui n'ayent plus à rechigner à la licence de leur pensée. Je me conforme bien à leur courage : mais i'offence leurs yeux. C'est vne humeur bien ordonnée, de pinser les escrits de Platon, & couler ses negociations pretendues avec Phedon, Dion, Stella, Archeanassa. *Non pudeat dicere, quod non pudeat sentire.* Je hay vn esprit hargneux & triste, qui glisse par dessus les plaisirs de sa vie, & s'empoigne & paist aux malheurs. Comme les mouches, qui ne peuuent tenir contre vn corps bien poly, & bien lissé, & s'attachent & reposent aux lieux scabreux & raboteux. Et comme les van-toufes, qui ne hument & appetent que le mauuais sang. Au reste, ie me suis ordonné d'oser dire tout ce que i'ose faire : & me desplaist des pensées mesmes impubliables. La pire de mes actions & conditions, ne me semble pas si laide, comme ie trouue laid & lasche, de ne l'oser aduouer. Chacun est discret en la confession, on le deuroit estre en l'action. La hardiesse de faillir, est aucunement compensee & bridee, par la hardiesse de le confesser. Qui s'obligeroit à tout dire, s'obligeroit à ne rien faire de ce qu'on est contraint de taire. Dieu vueille que cet excès de ma licence, attire nos hommes iusques à la liberté : par dessus ces vertus couardes & mineuses,

nees de nos imperfections : qu'aux despens de mon immoderation, ie les attire iusques au point de la raison. Il faut voir son vice, & l'estudier, pour le redire : ceux qui le celent à autrui, le celent ordinairement à eux mesmes : & ne le tiennent pas pour assés couuert, s'ils le voyent. Ils le soustrayent & desguisent à leur propre conscience. *Quare vicia sua nemo confitetur? Quia etiam nunc in illis est, somnium narrare, vigilantis est.* Les maux du corps s'esclaircissent en augmentant. Nous trouuons que c'est goutte, ce que nous nommions rheume ou fouldure. Les maux de l'ame s'obscurcissent en leurs forces : le plus malade les sent le moins. Voyla pourquoy il les faut souuent remanier au iour, d'une main impiteuse : les ouurir & arracher du creus de nostre poitrine. Comme en matiere de biens faicts, de mesme en matiere de mesfaicts, c'est par fois satisfaction que la seule confession. Est-il quelque laideur au faillir, qui nous dispense de nous en confesser? Ie souffre peine à me feindre : si que i'euite de prendre les secrets d'autrui en garde, n'ayant pas bien le cœur de defaduouer ma science. Ie puis la taire, mais la nyer, ie ne puis sans effort & desplaisir. Pour estre bien secret, il le faut estre par nature, non par obligation. C'est peu, au seruice des Princes, d'estre secret, si on n'est menteur encore. Celuy qui s'enquestoit à Thales Milefius, s'il deuoit solemnellement nyer d'auoir paillardé, s'il se fust adressé à moy, ie luy eusse respondu, qu'il ne le deuoit pas faire, car le mentir me semble encore pire que la paillardise. Thales luy conseilla tout autrement, & qu'il iurast, pour garentir le plus, par le moins. Toutesfois ce conseil n'estoit pas tant election de vice, que multiplication. Sur quoy difons ce mot en passant, qu'on

fait bon marché à vn homme de conscience, quand on luy propose quelque difficulté au contrepoids du vice : mais quand on l'enferme entre deux vices, on le met à vn rude choix. Comme on fit Origene : ou qu'il idolatras, ou qu'il se souffrist iouyr charnellement, à vn grand vilain *Æthiopien* qu'on luy presenta. Il subit la premiere condition : & vitieusement, dit-on. Pourtant ne seroient pas sans goust, selon leur erreur, celles qui nous protestent en ce temps, qu'elles aymeroient mieux charger leur conscience de dix hommes, que d'une messe. Si c'est indiscretion de publier ainsi ses erreurs, il n'y a pas grand danger qu'elle passe en exemple & usage. Car *Ariston* disoit, que les vens que les hommes craignent le plus, sont ceux qui les descouurent. Il faut rebrasser ce sot haillon qui cache nos mœurs. Ils enuoyent leur conscience au bordel, & tiennent leur contenance en regle. Iusques aux traistres & assassins, ils espousent les loix de la ceremonie, & attachent là leur deuoir. Si n'est-ce, ny à l'iniustice de se plaindre de l'inciuité, ny à la malice de l'indiscretion. C'est dommage qu'un meschant homme ne soit encore vn sot, & que la decence pallie son vice. Ces incrustations n'appartiennent qu'à une bonne & saine paroy, qui merite d'estre conseruee, d'estre blanchie. En faueur des Huguenots, qui accusent nostre confession auriculaire & priuee, ie me confesse en public, religieusement & purement. *Saint Augustin*, *Origene*, & *Hippocrates*, ont publié les erreurs de leurs opinions : moy encore de mes mœurs. Ie suis affamé de me faire congnoistre : & ne me chaut à combien, pourueu que ce soit veritablement. Ou pour dire mieux, ie n'ay faim de rien : mais ie suis mortellement, d'estre pris en eschange,

par ceux à qui il arriue de congnoistre mon nom. Celuy qui fait tout pour l'honneur & pour la gloire, que pense-il gaigner, en se produisant au monde en masque, desrobant son vray estre à la congnoissance du peuple? Louez vn bossu de sa belle taille, il le doit receuoir à iniure : si vous estes couard, & qu'on vous honnore pour vn vaillant homme, est-ce de vous qu'on parle? On vous prend pour vn autre. L'aymeroy aussi cher, que celuy-là se gratifiast des bonnetades qu'on luy faict, pensant qu'il soit maistre de la troupe, luy qui est des moindres de la suite. Archelaus Roy de Macedoine, passant par la rue, quelqu'un versa de l'eau sur luy : les assistans disoient qu'il deuoit le punir. Voyre mais, fit-il, il n'a pas versé l'eau sur moy, mais sur celuy qu'il pensoit que ie fusse. Socrates à celuy, qui l'aduertissoit : qu'on mesdisoit de luy. Point, dit-il : il n'y a rien en moy de ce qu'ils disent. Pour moy, qui me loueroit d'estre bon pilote, d'estre bien modeste, ou d'estre bien chaste, ie ne luy en deurois nul grammercy. Et pareillement, qui m'appelleroit traistre, voleur, ou yurongne, ie me tiendroy aussi peu offensé. Ceux qui se mescognoissent, se peuuent paistre de fauces approbations : non pas moy, qui me voy, & qui me recherche iusques aux entrailles, qui sçay bien ce qu'il m'appartient. Il me plaist d'estre moins loué, pourueu que ie soy mieux congneu. On me pourroit tenir pour sage en telle condition de sagesse, que ie tien pour sottise. Ie m'ennuye que mes Effais seruient les dames de meuble commun seulement, & de meuble de sale : ce chapitre me fera du cabinet. L'ayme leur commerce vn peu priué : le publique est sans faueur & faueur. Aux adieux, nous eschauffons outre l'ordinaire l'affection enuers les choses que

nous abandonnons. Je prens l'extreme congé des ieux du monde : voicy nos dernieres accolades. Mais venons à mon theme. Qu'a fait l'action genitale aux hommes, si naturelle, si neccessaire, & si iuste, pour n'en oser parler sans vergongne, & pour l'exclurre des propos serieux & reglez? Nous prononçons hardiment, tuer, desrober, trahir : & cela, nous n'oserions qu'entre les dents. Est-ce à dire, que moins nous en exhalons en parole, d'autant nous auons loy d'en grossir la pensee? Car il est bon, que les mots qui sont le moins en vsage, moins escripts, & mieux teuz, sont les mieux sceus, & plus generalement cognus. Nul aage, nulles mœurs l'ignorent non plus que le pain. Ils s'impriment en chascun, sans estre exprimez, & sans voix & sans figure. Et le sexe qui le fait le plus, a charge de le taire le plus. C'est vne action, que nous auons mis en la franchise du silence, d'où c'est crime de l'arracher. Non pas pour l'accuser & iuger. Ny n'osons la fouëtter, qu'en periphrase & peinture. Grand faueur à vn criminel, d'estre si execrable, que la iustice estime iniuste, de le toucher & de le veoir : libre & sauué par le benefice de l'aigreur de sa condamnation. N'en va-il pas comme en matiere de liures, qui se rendent d'autant plus venaux & publiques, de ce qu'ils sont supprimez? Je m'en vay pour moy, prendre au mot l'aduis d'Aristote, qui dit, L'estre honteux, seruir d'ornement à la ieunesse, mais de reproche à la vieillesse. Ces vers se preschent en l'escole ancienne : escole à laquelle ie me tien bien plus qu'à la moderne : ses vertus me semblent plus grandes, ses vices moindres.

Ceux qui par trop fuyant Venus estriuent,

*Faillent autant que ceux qui trop la suivent.
 Tu Dea, tu rerum naturam sola gubernas,
 Nec fine te quicquam dias in luminis oras
 Exoritur, neque fit lætum, nec amabile quicquam.*

Je ne sçay qui a peu mal meller Pallas & les Muses, avec Venus, & les refroidir enuers l'amour : mais ie ne voy aucunes deitez qui s'aiennent mieux, ny qui s'entredoient plus. Qui osterà aux muses les imaginations amoureuses, leur desrobera le plus bel entretien qu'elles ayent, & la plus noble matiere de leur ouurage : & qui fera perdre à l'amour la communication & seruice de la poésie, l'affoiblira de ses meilleures armes. Par ainsin on charge le Dieu d'accointance, & de bien-vueillance, & les Deeesses proteêtrices d'humanité & de iustice, du vice d'in-gratitude & de mesconnoissance. Je ne suis pas de si long temps cassé de l'estat & fuite de ce Dieu, que ie n'aye la memoire informee de ses forces & va-leurs :

agnosco veteris vestigia flammæ.

Il y a encore quelque demeurant d'emotion & chaleur apres la fièvre :

Nec mihi deficiat calor hic, hyemantibus annis.

Tout affeché que ie suis, & appesanty, ie sens encore quelques tiedes restes de cette ardeur passée.

*Qual l'alto Ægeo per che Aquilone o Noto
 Cessi, che tutto prima il vuolse & scosse,
 Non s'acccheta ei perto, ma'l sono e'l moto,
 Ritien de l'onde anco agitate è grosse.*

Mais de ce que ie m'y entends, les forces & valeur

de ce Dieu, se trouuent plus vifues & plus animees, en la peinture de la poësie, qu'en leur propre essence.

Et versus digitos habet.

Elle represente ie ne sçay quel air, plus amoureux que l'amour mesme. Venus n'est pas si belle toute nue, & viue, & haletante, comme elle est icy chez Virgile.

*Dixerat, & niueis hinc atque hinc diua lacertis
Cantantem amplexu molli fouet : Ille repente
Accepit solitam flammam, notûsque medullas
Intrauit calor, & labefacta per ossa cucurrit.
Non secus atque olim tonitru cum rupta corusco
Ignea rima micans percurrit lumine nimbos.*

*ea verba loquutus,
Optatos dedit amplexus, placidûmque petiuit
Coniugis infusus gremio per membra soporem.*

Ce que i'y trouue à considérer, c'est qu'il la peint vn peu bien esmeüe pour vne Venus maritale. En ce sage marché, les appetits ne se trouuent pas si follastres : ils sont sombres & plus mouffes. L'amour hait qu'on se tienne par ailleurs que par luy, & se mesle lâchement aux accointances qui sont dressees & entretenues sous autre titre : comme est le mariage. L'alliance, les moyens, y poissent par raison, autant ou plus, que les graces & la beauté. On ne se marie pas pour soy, quoy qu'on die : on se marie autant ou plus, pour sa posterité, pour sa famille. L'usage & l'interest du mariage touche nostre race, bien loing par delà nous. Pourtant me plaist cette façon, qu'on le conduise plustost par main tierce, que par les propres : & par le sens d'autrui, que par le sien. Tout

cecy, combien à l'opposite des conuentions amoureuses? Aussi est-ce vne espece d'inceste, d'aller employer à ce parentage venerable & sacré, les efforts & les extrauagances de la licence amoureuse, comme il me semble auoir dict ailleurs. Il faut, dit Aristote, toucher sa femme prudemment & seuerement, de peur qu'en la chatouillant trop lasciuement, le plaisir ne la face sortir hors des gons de raison. Ce qu'il dit pour la conscience, les medecins le disent pour la santé. Qu'un plaisir excessiuement chaud, voluptueux, & assidu, altere la semence, & empesche la conception. Disent d'autre part, qu'à vne congreffion languissante, comme celle là est de sa nature : pour la remplir d'une iuste & fertile chaleur, il s'y faut presenter rarement, & à notables interualles;

Quò rapiat fitiens Venerem interiùsque recondat.

Je ne voy point de mariages qui faillent plustost, & se troublent, que ceux qui s'acheminent par la beauté, & desirs amoureux. Il y faut des fondemens plus solides, & plus constans, & y marcher d'aguet : cette bouillante allegresse n'y vaut rien. Ceux qui pensent faire honneur au mariage, pour y ioindre l'amour, font, ce me semble, de mesme ceux, qui pour faire faueur à la vertu, tiennent, que la noblesse n'est autre chose que vertu. Ce sont choses qui ont quelque cousinage : mais il y a beaucoup de diuersité : on n'a que faire de troubler leurs noms & leurs tiltres. On fait tort à l'une ou à l'autre de les confondre. La noblesse est vne belle qualité, & introduite avec raison : mais d'autant que c'est vne qualité dependant d'autrui, & qui peut

tomber en vn homme vicieux & de neant, elle est en estimation bien loing au deffous de la vertu. C'est vne vertu, si ce l'est, artificielle & visible : dependant du temps & de la fortune : diuerse en forme selon les contrees, viuante & mortelle : sans naissance, non plus que la riuiera du Nil : genealogique & commune; de suite & de similitude : tiree par consequence, & consequence bien foible. La science, la force, la bonté, la beauté, la richesse, toutes autres qualitez, tombent en communication & en commerce : cette-cy se consomme en foy, de nulle emploie au seruice d'autrui. On proposoit à l'vn de nos Roys, le choix de deux competeurs, en vne mesme charge, desquels l'vn estoit Gentil'homme, l'autre ne l'estoit point : il ordonna que sans respect de cette qualité, on choisist celui qui auroit le plus de merite : mais où la valeur seroit entiere-ment pareille, qu'alors on eust respect à la noblesse : c'estoit iustement luy donner son rang. Antigonus à vn ieune homme incogneu, qui luy demandoit la charge de son pere, homme de valeur, qui venoit de mourir : Mon amy, dit-il, en tels bien faicts, ie ne regarde pas tant la noblesse de mes soldats, comme ie fais leur prouesse. De vray, il n'en doit pas aller comme des officiers des Roys de Sparte, trompettes, menestriers, cuisiniers, à qui en leurs charges succedoient les enfants, pour ignorants qu'ils fussent, auant les mieux experimentez du mestier. Ceux de Callicut font des nobles, vne espee par dessus l'humaine. Le mariage leur est interdit, & toute autre vacation que bellique. De concubines, ils en peuuent auoir leur faoul : & les femmes autant de ruffiens : sans ialousie les vns des autres. Mais c'est vn crime capital & irremissible, de s'ac-

coupler à personne d'autre condition que la leur. Et se tiennent pollus, s'ils en sont seulement touchez en passant : &, comme leur noblesse en estant merueilleusement iniurée & interessée, tuent ceux qui seulement ont approché vn peu trop près d'eux. De maniere que les ignobles sont tenus de crier en marchant, comme les gondoliers de Venise, au contour des ruës, pour ne s'entreheurter : & les nobles leur commandent de se ietter au quartier qu'ils veulent. Ceux cy eurent par là, cette ignominie, qu'ils estiment perpetuelle; ceux là vne mort certaine. Nulle duree de temps, nulle faueur de Prince, nul office, ou vertu, ou richesse peut faire qu'un roturier deuienne noble. A quoy ayde cette coustume, que les mariages sont defendus de l'un mestier à l'autre. Ne peut vne de race cordonniere, espouser vn charpentier : & sont les parents obligez de dresser les enfans à la vacation des peres, precisement, & non à autre vacation : par où se maintient la distinction & continuation de leur fortune. Vn bon mariage, s'il en est, refuse la compagnie & conditions de l'amour : il tasche à representer celles de l'amitié. C'est vne douce société de vie, pleine de constance, de fiance, & d'un nombre infiny d'vtils & solides offices, & obligations mutuelles. Aucune femme qui en fauoure le gouft,

optato quam iunxit lumine tæda,

ne voudroit tenir lieu de maistresse à son mary. Si elle est logee en son affection, comme femme, elle y est bien plus honorablement & seurement logee. Quand il fera l'esmeu ailleurs, & l'empresfé, qu'on luy demande pourtant lors, à qui il aymeroit mieux

arriuer vne honte, ou à sa femme ou à sa maistresse, de qui la desfortune l'affligeroit le plus, à qui il desire plus de grandeur : ces demandes n'ont aucun doubte en vn mariage sain. Ce qu'il s'en voit si peu de bons, est signe de son prix & de sa valeur. A le bien façonner & à le bien prendre, il n'est point de plus belle piece en nostre société. Nous ne nous en pouuons passer, & l'allons auilissant. Il en aduient ce qui se voit aux cages, les oyseaux qui en sont dehors, desesperent d'y entrer; & d'un pareil soing en sortir, ceux qui sont au dedans. Socrates, enquis, qui estoit plus commode, prendre, ou ne prendre point de femme : Lequel des deux, dit-il, on face, on s'en repentira. C'est vne conuention à laquelle se rapporte bien à point ce qu'on dit, *homo homini*, ou *Deus*, ou *lupus*. Il faut le rencontre de beaucoup de qualitez à le bastir. Il se trouue en ce temps plus commode aux ames simples & populaires, où les delices, la curiosité, & l'oyfiueté, ne le troublent pas tant. Les humeurs desbauchees, comme est la mienne, qui hay toute forte de liaison & d'obligation, n'y sont pas si propres.

Et mihi dulce magis resoluto viuere collo.

De mon dessein, i'eusse fuy d'espouser la sagesse mesme, si elle m'eust voulu. Mais nous auons beau dire : la coustume & l'vsage de la vie commune, nous emporte. La plus part de mes actions se conduisent par exemple, non par choix. Toutesfois ie ne m'y conuiay pas proprement. On m'y mena, & y fus porté par des occasions estrangeres. Car non seulement les choses incommodes, mais il n'en est aucune si laide & vitieuse & euitable, qui ne

puisse deuenir acceptable par quelque condition & accident. Tant l'humaine posture est vaine. Et y fus porté, certes plus mal préparé lors, & plus rebours, que ie ne suis à present, apres l'auoir essayé. Et tout licencieux qu'on me tient, i'ay en verité plus seuurement obserué les loix de mariage, que ie n'auois ny promis ny esperé. Il n'est plus temps de regimber quand on s'est laissé entrauer. Il faut prudemment mesnager sa liberté : mais depuis qu'on s'est soumis à l'obligation, il s'y faut tenir sous les loix du deuoir commun, au moins s'en efforcer. Ceux qui entreprennent ce marché pour s'y porter avec hayne & mespris, font iniustement & incommodément. Et cette belle regle que ie voy passer de main en main entre elles, comme vn saint oracle,

*Sers ton mary comme ton maistre,
Et t'en garde comme d'un traistre.*

qui est à dire : Porte toy enuers luy, d'une reuerence contrainte, ennemye, & deffiante (cry de guerre & de deff) est pareillement iniurieuse & difficile. Je suis trop mol pour desseins si espineux. A dire vray, ie ne suis pas encore arriué à cette perfection d'habileté & galantise d'esprit, que de confondre la raison avec l'iniustice, & mettre en risee tout ordre & regle qui n'accorde à mon appetit. Pour hayr la superstition, ie ne me iette pas incontinent à l'irreligion. Si on ne fait tousiours son deuoir, au moins le faut il tousiours aymer & reconnoistre : c'est trahison, se marier sans s'espouser. Passons outre. Nostre poëte represente vn mariage plein d'accord & de bonne conuenance, auquel pourtant il n'y a pas beaucoup de loyauté. A il voulu

dire, qu'il ne soit pas impossible de se rendre aux efforts de l'amour, & ce neantmoins reserver quelque deuoir enuers le mariage : & qu'on le peut blesser, sans le rompre tout à fait? Tel valet ferre la mule au maistre qu'il ne hayt pas pourtant. La beauté, l'oportunité, la destinee (car la destinee y met aussi la main)

*fatum est in partibus illis
Quas sinus abscondit : nam si tibi fidera cessent,
Nil faciet longi mensura incognita nerui,*

l'ont attachée à vn estranger : non pas si entiere peut estre, qu'il ne luy puisse rester quelque liaison par où elle tient encore à son mary. Ce sont deux desseins, qui ont des routes distinguees, & non confondues. Vne femme se peut rendre à tel personnage, que nullement elle ne voudroit auoir espousé : ie ne dy pas pour les conditions de la fortune, mais pour celles mesmes de la personne. Peu de gens ont espousé des amies qui ne s'en soyent repentis. Et iusques en l'autre monde, quel mauuais mesnage fait Iupiter avec sa femme, qu'il auoit premierement pratiquée & iouyè par amourettes? C'est ce qu'on dit, chier dans le panier, pour apres le mettre sur sa teste. I'ay veu de mon temps en quelque bon lieu, guerir honteusement & deshonnêtement, l'amour, par le mariage : les considerations sont trop autres. Nous aymons, sans nous empescher, deux choses diuerfes, & qui se contrarient. Isocrates disoit, que la ville d'Athenes plaisoit à la mode que sont les dames qu'on sert par amour; chacun aymoit à s'y venir promener, & y passer son temps : nul ne l'aymoit pour l'espouser : c'est à dire, pour s'y habituer & domicilier. I'ay avec despit, veu des

maris hayr leurs femmes, de ce seulement, qu'ils leur font tort. Aumoins ne les faut il pas moins aymer, de nostre faute : par repentance & compassion aumoins, elles nous en deuroient estre plus cheres. Ce sont fins differentes, & pourtant compatibles, dit-il, en quelque façon. Le mariage a pour sa part, l'vtilité, la iustice, l'honneur, & la constance : vn plaisir plat, mais plus vniuersel. L'amour se fonde au seul plaisir : & l'a de vray plus chatouilleux, plus vif, & plus aigu : vn plaisir attizé par la difficulté : il y faut de la piqueure & de la cuisson. Ce n'est plus amour, s'il est sans fleches & sans feu. La liberalité des dames est trop profuse au mariage, & esmouffe la pointe de l'affection & du desir. Pour fuir à cet inconuenient, voyez la peine qu'y prennent en leurs loix Lycurgus & Platon. Les femmes n'ont pas tort du tout, quand elles refusent les regles de vie, qui sont introduites au monde : d'autant que ce sont les hommes qui les ont faictes sans elles. Il y a naturellement de la brigue & riette entre elles & nous. Le plus estroit consentement que nous ayons avec elles, encores est-il tumultuaire & tempestueux. A l'aduis de nostre auteur, nous les traitons inconsiderément en cecy. Apres que nous auons cogneu, qu'elles sont sans comparaison plus capables & ardentes aux effects de l'amour que nous, & que ce prestre ancien l'a ainfi tesmoigné, qui auoit esté tantost homme, tantost femme :

Venus huic erat vtraque nota.

Et en outre, que nous auons appris de leur propre bouche, la preuue qu'en firent autrefois, en diuers siecles, vn Empereur & vne Emperiere de Rome,

maistres ouuriers & fameux en cette besongne : luy despuçela bien en vne nuit dix vierges Sarmates : ses captiues : mais elle fournit reelemment en vne nuit, à vingt & cinq entreprinſes, changeant de compagnie selon son beſoing & son gouſt,

adhuc ardens rigida tentigine vulue :
Et laſſata viris, nondum ſatiata receſſit.

Et que ſur le different aduenu à Cateloigne, entre vne femme, ſe plaignant des efforts trop aſſiduelz de ſon mary (non tant à mon aduis qu'elle en fuſt incommodee, car ie ne crois les miracles qu'en foy, comme pour retrancher ſoubs ce pretexte, & brider en ce meſme, qui eſt l'aſſion fondamentale du mariage, l'autorité des maris enuers leurs femmes : & pour montrer que leurs hergnes, & leur malignité paſſent outre la couche nuptiale, & foulent aux pieds les graces & douceurs meſmes de Venus) à laquelle plainte, le mary reſpondoit, homme vraiment brutal & deſnaturé, qu'aux iours meſme de ieufne il ne s'en ſçauoit paſſer à moins de dix : interuint ce notable arreſt de la Royne d'Aragon : par lequel, apres meure deliberation de conſeil, cette bonne Royne, pour donner regle & exemple à tout temps, de la moderation & modeſtie requiſe en vn iuſte mariage : ordonna pour bornes legitimes & neceſſaires, le nombre de ſix par iour : relachant & quitant beaucoup du beſoing & deſir de ſon ſexe, pour eſtablir, diſoit elle, vne forme ayſee, & par conſequent permanante & immuable. En quoy s'eſcrient les docteurs, quel doit eſtre l'appetit & la concupiſcence feminine, puisſque leur raiſon, leur reformation, & leur vertu, ſe taille à ce prix? con-

siderans le diuers iugement de nos appetits. Car Selon patron de l'eschole legiste ne taxe qu'à trois fois par mois, pour ne faillir point, cette hantise coniugale. Apres auoir creu, dis-ie, & presché cela, nous sommes allez, leur donner la continence peculièrement en partage : & sur peines dernieres & extremes. Il n'est passion plus pressante, que cette cy, à laquelle nous voulons qu'elles resistent seules : non simplement, comme à vn vice de sa mesure : mais comme à l'abomination & execration, plus qu'à l'irreligion & au parricide : & nous nous y rendons ce pendant sans coulpe & reproche. Ceux mesme d'entre nous, qui ont essayé d'en venir à bout, ont assez auoué, quelle difficulté, ou plustost impossibilité il y auoit, vsant de remedes materiels, à mater, affoiblir & refroidir le corps. Nous au contraire, les voulons saines, vigoreuses, en bon point, bien nourries, & chastes ensemble : c'est à dire, & chaudes & froides. Car le mariage, que nous difons auoir charge de les empescher de bruler, leur apporte peu de rafraichissement selon nos mœurs. Si elles en prennent vn, à qui la vigueur de l'aage boult encores, il fera gloire de l'espandre ailleurs.

*Sit tandem pudor, aut eamus in ius,
Multis mentula millibus redempta,
Non est hæc tua, Basse, vendidisti.*

Le philosophe Polemon fut iustement appellé en iustice par sa femme, de ce qu'il alloit semant en vn champ sterile le fruit deu au champ genital. Si c'est de ces autres cassez, les voyla en plein mariage, de pire condition que vierges & vefues. Nous les tenons pour bien fournies, par ce qu'elles ont vn homme aupres. Comme les Romains tindrent pour

viollee Clodia Læta, vestale, que Caligula auoit approchée, encore qu'il fust aueré, qu'il ne l'auoit qu'approchée. Mais au rebours; on recharge par là, leur necessité: d'autant que l'attouchement & la compagnie de quelque masse que ce soit, esueille leur chaleur, qui demeureroit plus quiete en la solitude. Et à cette fin, comme il est vray-semblable, de rendre par cette circonstance & consideration, leur chasteté plus meritoire. Boleslaus & Kinge sa femme, Roys de Poulongne, la vouïerent d'un commun accord, couchez ensemble, le iour mesme de leurs nopces: & la maintindrent à la barbe des commoditez maritales. Nous les dresseons dès l'enfance, aux entremises de l'amour: leur grace, leur attiffeure, leur science, leur parole, toute leur instruction, ne regarde qu'à ce but. Leurs gouuernantes ne leur impriment autre chose que le visage de l'amour, ne fust qu'en le leur representant continuellement pour les en desgouster. Ma fille, c'est tout ce que j'ay d'enfans, est en l'aage auquel les loix excusent les plus eschauffees de se marier. Elle est d'une complexion tardiuë, mince & molle, & a esté par sa mere esleuee de mesme, d'une forme retiree & particuliere: si qu'elle ne commence encore qu'à se desniaiser de la naïfueté de l'enfance. Elle lisoit vn liure François deuant moy: le mot de, fouteau, s'y rencontra, nom d'un arbre cogneu: la femme qu'ell' a pour sa conduite, l'arresta tout court, vn peu rudement, & la fit passer par dessus ce mauuais pas. Je la laissay faire, pour ne troubler leurs regles: car ie ne m'empesche aucunement de ce gouuernement. La police feminine a vn train mysterieux, il faut le leur quitter. Mais si ie ne me trompe, le commerce de vingt laquays, n'eust sceu imprimer en

la fantasie, de six mois, l'intelligence & vsage, & routes les consequences du son de ces syllables scelerées, comme fit cette bonne vieille, par sa reprimende & son interdiction.

*Motus doceri gaudet Ionicos
Matura virgo, & frangitur artubus
Iam nunc, & incestos amores
De tenero meditatur vngui.*

Qu'elles se dispensent vn peu de la ceremonie, qu'elles entrent en liberté de discours, nous ne sommes qu'enfans au prix d'elles, en cette science. Oyez leur representer nos poursuites & nos entretiens : elles vous font bien cognoistre que nous ne leur apportons rien, qu'elles n'ayent sçeu & digéré sans nous. Seroit-ce ce que dit Platon, qu'elles aient esté garçons desbauchez autresfois ? Mon oreille se rencontra vn iour en lieu, où elle pouuoit desrober aucun des discours faicts entre elles sans soupçon : que ne puis-je le dire ? Nostre dame, (fisie, allons à cette heure estudier des frases d'Amadis, & des registres de Boccace & de l'Aretin, pour faire les habiles : nous employons vraiment bien nostre temps : il n'est ny parole, ny exemple, ny démarche, qu'elles ne sçachent mieux que nos liures. C'est vne discipline qui naist dans leurs veines,

Et mentem Venus ipsa dedit.

que ces bons maistres d'escole, nature, ieunesse, & santé, leur soufflent continuellement dans l'ame. Elles n'ont que faire de l'apprendre, elles l'engendrent.

Nec tantum niueo gauisa est vlla columbo,

*Compar, vel si quid dicitur improbius,
Oscula mordenti semper decerpere rostro :
Quantum præcipue multiuola est mulier.*

Qui n'eust tenu vn peu en bride cette naturelle violence de leur desir, par la crainte & honneur, dequoy on les a pourueuës, nous estions diffamez. Tout le mouuement du monde se resoult & rend à cet accouplage : c'est vne matiere infuse par tout : c'est vn centre où toutes choses regardent. On void encore des ordonnances de la vieille & sage Rome, faictes pour le seruice de l'amour : & les preceptes de Socrates, à instruire les courtisanes.

*Necnon libelli Stoici inter sericos
Iacere puluillos amant.*

Zenon parmy les loix, regloit aussi les escarquillemens, & les secouffes du depucelage. De quel sens estoit le liure du philosophe Strato, de la conionction charnelle ? Et dequoy traittoit Theophraste, en ceux qu'il intitula, l'vn l'Amoureux, l'autre de l'Amour ? Dequoy Aristippus au sien, des anciennes delices ? Que veulent pretendre les descriptions si estendues & viues en Platon, des amours de son temps ? Et le liure de l'Amoureux, de Demetrius Phalereus : & Clinias, ou l'Amoureux forcé de Heraclides Ponticus ? Et d'Antisthenes, celui de faire les enfans, ou des nopces : & l'autre, du maistre ou de l'Amant ? Et d'Aristo, celui, des exercices amoureux ? de Cleanthes, vn de l'Amour, l'autre de l'art d'aymer ? Les dialogues amoureux de Spherus ? Et la fable de Iupiter & Iuno de Chrysippus, eshontee au delà de toute souffrance ? Et ses cinquante epistres si lasciuës ? Je veux laisser à part les escrits des

philosophes, qui ont fuiuy la secte d'Epicurus protectrice de la volupté. Cinquante deitez estoient au temps passé asseruies à cet office. Et s'est trouué nation, où pour endormir la concupiscence de ceux qui venoient à la deuotion, on tenoit aux temples des garfes à iouyr, & estoit acte de ceremonie de s'en seruir auant venir à l'office. *Nimirum propter continentiam incontinentia necessaria est, incendium ignibus extinguitur.* En la plus part du monde, cette partie de nostre corps estoit deisee. En mesme prouince, les vns se l'escorchoient pour en offrir & consacrer vn lopin : les autres offroient & consacroient leur semence. En vne autre, les ieunes hommes se le perçoient publiquement, & ouuroient en diuers lieux entre chair & cuir, & trauerfoient par ces ouuertes, des brochettes, les plus longues & grosses qu'ils pouuoient souffrir : & de ces brochettes faisoient apres du feu, pour offrande à leurs Dieux : estimez peu vigoureux & peu chastes, s'ils venoient à s'estonner par la force de cette cruelle douleur. Ailleurs, le plus sacré magistrat, estoit reueré & recogneu par ces parties là. Et en plusieurs ceremonies l'effigie en estoit portee en pompe, à l'honneur de diuerses diuinitez. Les dames *Ægyptiennes* en la feste des Bacchanales, en portoient au col vn de bois, exquisement formé, grand & pesant, chacune selon sa force : outre ce que la statue de leur Dieu, en representoit, qui surpassoit en mesure le reste du corps. Les femmes mariées icy pres, en forgent de leur couurechef vne figure sur leur front, pour se glorifier de la iouissance qu'elles en ont : & venans à estre vesues, le couchent en arriere, & enseuelissent soubs leur coiffure. Les plus sages matrones à Rome, estoient honnorees d'offrir

des fleurs & des couronnes au Dieu Priapus. Et sur ses parties moins honnestes, faisoit-on soir les vierges, au temps de leurs nopces. Encore ne sçay-je si i'ay veu en mes iours quelque air de pareille deuotion. Que vouloit dire cette ridicule piece de la chaussure de nos peres, qui se voit encore en nos Suysses? A quoy faire, la montre que nous faisons à cette heure de nos pieces en forme, sous nos grecques : & souuent, qui pis est, outre leur grandeur naturelle, par fauceté & imposture? Il me prend enuie de croire, que cette sorte de vestement fut inuentee aux meilleurs & plus consciencieux siecles, pour ne piper le monde : pour que chacun rendist en public compte de son faict. Les nations plus simples, l'ont encore aucunement rapportant au vray. Lors on instruisoit la science de l'oururier, comme il se faict, de la mesure du bras ou du pied. Ce bon homme qui en ma ieunesse, chastra tant de belles & antiques statues en sa grande ville, pour ne corrompre la veuë, suyuant l'aduis de cet autre antien bon homme,

Flagitij principium est nudare inter ciues corpora :

se deuoit aduifer, comme aux mysteres de la bonne Deesse, toute apparence masculine en estoit forclosse, que ce n'estoit rien auancer, s'il ne faisoit encore chastrer, & cheuaux, & asnes, & nature en fin.

*Omne adeo genus in terris, hominûmque ferarûmque,
Et genus æquoreum, pecudes piæque volucres,
In furias ignemque ruunt.*

Les Dieux, dit Platon, nous ont fourni d'un membre inobedient & tyrannique : qui, comme un ani-

mal furieux, entreprend par la violence de son appetit, soumettre tout à soy. De mesmes aux femmes le leur, comme vn animal glouton & auide, auquel si on refuse aliments en sa saison, il forcene impatient de delay; & soufflant sa rage en leurs corps, empesche les conduits, arreste la respiration, causant mille sortes de maux : iusques à ce qu'ayant humé le fruit de la soif commune, il en ayt largement arrousé & ensemencé le fond de leur matrice. Or se deuoit aduiser aussi mon legislateur, qu'à l'auanture est-ce vn plus chaste & fructueux vsage, de leur faire de bonne heure congnoistre le vis, que de le leur laisser deuiner, selon la liberté, & chaleur de leur fantasie. Au lieu des parties vrayes, elles en substituent par desir & par esperance, d'autres extravagantes au triple. Et tel de ma cognoissance s'est perdu, pour auoir fait la descouuerte des siennes, en lieu où il n'estoit encore au propre de les mettre en possession de leur plus serieux vsage. Quel dommage ne font ces enormes pourtraicts, que les enfants vont semant aux passages & escalliers des maisons Royales? De là leur vient vn cruel mespris de nostre portee naturelle. Que sçait-on, si Platon ordonnant apres d'autres republiques bien instituees que les hommes, femmes, vieux, ieunes, se presentent nuds à la veüe les vns des autres, en ses gymnastiques, n'a pas regardé à cela? Les Indiennes qui voyent les hommes à crud, ont aumoins refroidy le sens de la veüe. Et quoy que dient les femmes de ce grand royaume du Pegu, qui au dessus de la ceinture, n'ont à se courrir qu'vn drap fendu par le deuant : & si estroit, que quelque cerimonieuse decence qu'elles y cherchent, à chascun pas on les void toutes; que c'est vne inuention trouuee aux fins d'attirer les

hommes à elles, & les retirer des masses, à quoy cette nation est du tout abandonnée : il se pourroit dire, qu'elles y perdent plus qu'elles n'avancent : & qu'une faim entière, est plus aspre, que celle qu'on a rassasiée, au moins par les yeux. Aussi disoit Liwia, qu'à une femme de bien, un homme nud, n'est non plus qu'une image. Les Lacedemoniennes, plus vierges femmes, que ne sont nos filles, voyoyent tous les iours les ieunes hommes de leur ville, despouillez en leurs exercices : peu exactes elles mesmes à couvrir leurs cuisses en marchant : s'estimants, comme dit Platon, assez couvertes de leur vertu sans vertugade. Mais ceux là, desquels parle Sainct Augustin, ont donné un merueilleux effort de tentation à la nudité, qui ont mis en doute, si les femmes au iugement universel, resusciteront en leur sexe, & non plutost au nostre, pour ne nous tenter encore en ce saint estat. On les leurre en somme, & acharne, par tous moyens. Nous eschauffons & incitons leur imagination sans cesse, & puis nous crions au ventre. Confessons le vray, il n'en est guere d'entre nous, qui ne craigne plus la honte, qui luy vient des vices de sa femme, que des siens : qui ne se soigne plus (esmerueillable charité) de la conscience de sa bonne espouse, que de la sienne propre : qui n'aymât mieux estre voleur & sacrilege, & que sa femme fust meurtriere & heretique, que si elle n'estoit plus chaste que son mary. Inique estimation de vices. Nous & elles sommes capables de mille corruptions plus dommageables & desnaturees, que n'est la lascivité. Mais nous faisons & poisons les vices, non selon nature, mais selon nostre interest. Par où ils prennent tant de formes inegales. L'aspreté de nos decrets, rend l'application des femmes à ce vice, plus aspre

& plus vicieuse, que ne porte sa condition : & l'engage à des fuites pires que n'est leur cause. Elles offriront volontiers d'aller au palais querir du gain, & à la guerre de la reputation, plustost que d'auoir au milieu de l'oïfueté, & des delices, à faire vne si difficile garde. Voyent-elles pas, qu'il n'est ny marchant ny procureur, ny soldat, qui ne quitte sa besongne pour courre à cette autre : & le crocheteur, & le fauetier, tous harassez & hallebrenez qu'ils sont de trauail & de faim?

*Num tu quæ tenuit diues Achæmenes,
Aut pinguis Phrygiæ Mygdonias opes,
Permutare velis crine Licinniaë,
Plenas aut Arabum domos,
Dum fragrantia detorquet ad oscula
Ceruicem, aut facili scuitia negat,
Quæ poscente magis gaudeat eripi,
Interdum rapere occupet?*

Je ne sçay si les exploits de Cæsar & d'Alexandre surpassent en rudeſſe la resolution d'une belle ieune femme, nourrie à nostre façon, à la lumiere & commerce du monde, battue de tant d'exemples contraires, se maintenant entiere, au milieu de mille continuelles & fortes poursuites. Il n'y a point de faire, plus espineux, qu'est ce non faire, ny plus actif. Je trouue plus aysé, de porter vne cuirasse toute sa vie, qu'un pucelage. Et est le vœu de la virginité, le plus noble de tous les vœux, comme estant le plus aspre. *Diabolivirtus in lumbis est*: dict Sainct Ierosme. Certes le plus ardu & le plus vigoureux des humains deuoirs, nous l'auons resigné aux dames, & leur en quittons la gloire. Cela leur doit seruir d'un singulier esguillon à s'y opiniastrer. C'est vne belle ma-

tiere à nous brauer, & à fouler aux pieds, cette vaine preeminence de valeur & de vertu, que nous pretendons fur elles. Elles trouueront, si elles s'en prennent garde, qu'elles en seront non seulement tres-estimees, mais aussi plus aymeas. Vn galant homme n'abandonne point sa poursuite, pour estre refusé, pourueu que ce soit vn refus de chasteté, non de choix. Nous auons beau iurer & menasser, & nous plaindre : nous mentons, nous les en ayons mieux. Il n'est point de pareil leurre, que la sagesse, non rude, & renfrongnee. C'est stupidité & lascheté, de s'opiniastrer contre la hayne & le mespris. Mais contre vne resolution vertueuse & constante, meslee d'une volonté recognoissante, c'est l'exercice d'une ame noble & genereuse. Elles peuuent recognoistre nos seruices, iusques à certaine mesure, & nous faire sentir honnestement qu'elles ne nous desdaignent pas. Car cette loy qui leur commande de nous abominer, par ce que nous les adorons, & nous hayr de ce que nous les ayons : elle est certes cruelle, ne fust que de sa difficulté. Pourquoy n'orront elles noz offres & noz demandes, autant qu'elles se contiennent sous le deuoir de la modestie ? Que va lon deuinant, qu'elles sonnent au dedans, quelque sens plus libre ? Vne Royne de nostre temps, disoit ingenieusement, que de refuser ces abbors, c'est tesmoignage de foiblesse, & accusation de sa propre facilité : & qu'une dame non tentee, ne se pouuoit venter de sa chasteté. Les limites de l'honneur ne sont pas retranchez du tout si court : il a dequoy se relascher, il peut se dispenser aucunement sans se forfaire. Au bout de sa frontiere, il y a quelque estendue, libre, indifferente, & neutre. Qui l'a peu chasser & acculer à force, iusques dans

son coin & son fort : c'est vn mal habile homme s'il n'est satisfait de sa fortune. Le prix de la victoire se considere par la difficulté. Voulez vous sçauoir quelle impression a fait en son cœur, vostre seruitude & vostre merite? mesurez-le à ses mœurs. Telle peut donner plus, qui ne donne pas tant. L'obligation du bien-fait, se rapporte entierement à la volonté de celuy qui donne : les autres circonstances qui tombent au bien-faire, sont muettes, mortes & casueles. Ce peu luy couste plus à donner, qu'à sa compaignie son tout. Si en quelque chose la rareté sert d'estimation, ce doit estre en cecy. Ne regardez pas combien peu c'est, mais combien peu l'ont. La valeur de la monnoye se change selon le coin & la merque du lieu. Quoy que le despit & l'indiscretion d'aucuns, leur puisse faire dire, sur l'excez de leur mescontentement : tousiours la vertu & la verité regaigne son auantage. I'en ay veu, desquelles la reputation a esté long temps interessee par iniure, s'estre remises en l'approbation vniuerselle des hommes, par leur seule constance, sans soing & sans artifice : chacun se repent & se desment, de ce qu'il en a creu. De filles vn peu suspectes, elles tiennent le premier rang entre les dames d'honneur. Quelqu'un disoit à Platon : Tout le monde mesdit de vous. Laissez les dire, fit-il : ie viuray de façon, que ie leur feray changer de langage. Outre la crainte de Dieu, & le prix d'une gloire si rare, qui les doit inciter à se conseruer, la corruption de ce siecle les y force. Et si i'estois en leur place, il n'est rien que ie ne fisse plustost, que de commettre ma reputation en mains si dangereuses. De mon temps, le plaisir d'en comter (plaisir qui ne doit guere en douceur à celuy mesme de l'estre) n'estoit permis qu'à ceux qui auoient quelque

amy fidelle & vnique : à present les entretiens ordinaires des assemblees & des tables, ce sont les vanteries des faueurs receuës, & liberalité secrette des dames. Vrayement c'est trop d'abiection, & de bassesse de cœur, de laisser ainsi fierement persecuter, paistrir, & fourrager ces tendres & mignardes douceurs, à des personnes ingrates, indiscrettes, & si volages. Cette nostre exasperation immoderee, & illegitime, contre ce vice, naist de la plus vaine & tempesteuse maladie qui afflige les ames humaines, qui est la ialousie.

*Quis vetat appposito lumen de lumine sumi?
Dent licet assiduè, nil tamen inde perit.*

Celle-là, & l'enuie sa sœur, me semblent des plus ineptes de la troupe. De cette-cy, ie n'en puis gueres parler : cette passion qu'on peint si forte & si puissante, n'a de sa grace aucune adresse en moy. Quant à l'autre, ie la cognois, aumoins de veuë. Les bestes en ont ressentiment. Le pasteur Cratis estant tombé en l'amour d'une cheure, son bouc, ainsi qu'il dormoit, luy vint par ialousie choquer la teste, de la sienne, & la luy escraza. Nous auons monté l'excez de cette fieure, à l'exemple d'aucunes nations barbares. Les mieux disciplinees en ont esté touchees : c'est raison : mais non pas transportees :

*Ense maritali nemo confossus adulter,
Purpureo stygias sanguine tinxit aquas.*

Lucullus, Cæsar, Pompeius, Antonius, Caton, & d'autres braues hommes, furent cocus, & le sçurent, sans en exciter tumulte. Il n'y eut en ce temps là, qu'un sot de Lepidus, qui en mourut d'angoisse.

*Ah tum te miserum malique fati,
Quem attrahis pedibus patente porta,
Percurrent mugilisque raphanique.*

Et le Dieu de nostre poëte, quand il surprint avec sa femme l'un de ses compagnons, se contenta de leur en faire honte :

*atque aliquis de Diis non trifibus optat,
Sic fieri turpis.*

Et ne laisse pourtant de s'eschauffer des molles caresses, qu'elle luy offre : se plaignant qu'elle soit pour cela entree en deffiance de son affection :

*Quid causas petis ex alto? fiducia cessit
Quò tibi Diua mei?*

Voyre elle luy fait requeste pour un sien bastard,

Arma rogo genitrix nato :

qui luy est liberalement accordée. Et parle Vulcan d'Æneas avec honneur :

Arma acri facienda viro.

D'une humanité à la verité plus qu'humaine. Et cet excez de bonté, ie consens qu'on le quitte aux Dieux :

nec diuis homines componier æquum est.

Quant à la confusion des enfans, outre ce que les plus graues législateurs l'ordonnent & l'affectent en leurs republicues, elle ne touche pas les femmes, où cette passion est ie ne sçay comment encore mieux en son siege.

*Sæpe etiam Iuno maxima cælicolûm
Coniugis in culpa flagrauit quotidiana.*

Lors que la ialousie saisit ces pauvres ames, foibles, & sans resistance, c'est pitié, comme elle les tire & tyrannise cruellement. Elle s'y insinue sous tiltre d'amitié : mais depuis qu'elle les possède, les mesmes causes qui seruoient de fondement à la bien-vueillance, seruent de fondement de hayne capitale : c'est des maladies d'esprit celle, à qui plus de choses seruent d'aliment, & moins de choses de remede. La vertu, la santé, le merite, la reputation du mary, sont les bouteux de leur maltalent & de leur rage.

Nullæ sunt inimicitia nisi amoris acerbæ.

Cette fièvre laidit & corrompt tout ce qu'elles ont de bel & de bon d'ailleurs. Et d'une femme ialouse, quelque chaste qu'elle soit, & mesnagere, il n'est action qui ne sente l'aigre & l'importun. C'est une agitation enragee, qui les reiette à une extremité du tout contraire à sa cause. Il fut bon d'un Octavius à Rome. Ayant couché avec Pontia Posthumia, il augmenta son affection par la iouissance, & poursuyvit à toute instance de l'espouser : ne la pouvant persuader, cet amour extreme le precipita aux effets de la plus cruelle & mortelle inimitié : il la tua. Pareillement les symptomes ordinaires de cette autre maladie amoureuse, ce sont haines intestines, monopoles, coniurations :

notûmque, furens quid fœmina possit :

& une rage, qui se ronge d'autant plus, qu'elle est

contraincte de s'excuser du pretexte de bien-vueillance. Or le deuoir de chasteté, a vne grande estendue. Est-ce la volonté que nous voulons qu'elles brident ? C'est vne piece bien souple & actiue. Elle a beaucoup de promptitude pour la pouuoir arrester. Comment ? si les songes les engagent par fois si auant, qu'elles ne s'en puissent desdire. Il n'est pas en elles, ny à l'aduanture en la chasteté mesme, puis qu'elle est femelle, de se deffendre des concupiscences & du desirer. Si leur volonté seule nous interesse, où en sommes nous ? Imaginez la grand' presse, à qui auroit ce priuilege, d'estre porté tout empenné, sans yeux, & sans langue, sur le point de chacune qui l'accepteroit. Les femmes Scythes creuoyent les yeux à tous leurs esclaves & prisonniers de guerre, pour s'en seruir plus librement & couuertement. O le furieux aduantage que l'opportunité ! Qui me demanderoit la premiere partie en l'amour, ie respondrois, que c'est sçauoir prendre le temps : la seconde de mesme : & encore la tierce. C'est vn point qui peut tout. J'ay eu faute de fortune souuent, mais par fois aussi d'entreprise. Dieu gard' de mal qui peut encores s'en moquer. Il y faut en ce siecle plus de temerité : laquelle nos ieunes gens excusent sous pretexte de chaleur. Mais si elles y regardoyent de pres, elles trouueroient qu'elle vient plustost de mespris. Je craignois superstitieusement d'offenser : & respecte volontiers, ce que i'ayme. Outre ce qu'en cette marchandise, qui en oste la reuerence, en efface le lustre. L'ayme qu'on y face vn peu l'enfant, le craintif & le seruiteur. Si ce n'est du tout en cecy, i'ay d'ailleurs quelques airs de la fotte honte dequoy parle Plutarque : & en a esté le cours de ma vie blessé & taché diuersement. Qualité bien mal auenante à ma forme

vnuerfelle. Qu'est-il de nous auffi, que sedition & difcrepance? L'ay les yeux tendres à fousttenir vn refus, comme à refufer. Et me poife tant de poifer à autruy, qu'és occasions où le deuoir me force d'effayer la volonté de quelqu'un, en chose douteuse & qui luy couste, ie le fais maigrement & enuis. Mais si c'est pour mon particulier, (quoy que die veritablement Homere, qu'à vn indigent c'est vne forte vertu que la honte) i'y commets ordinairement vn tiers, qui rougisse en ma place : & escondus ceux qui m'emploient, de pareille difficulté : si qu'il m'est aduenu par fois, d'auoir la volonté de nier, que ie n'en auois pas la force. C'est donc folie, d'effayer à brider aux femmes vn desir qui leur est si cuyfant & si naturel. Et quand ie les oy se vanter d'auoir leur volonté si vierge & si froide, ie me moque d'elles. Elles se reculent trop arriere. Si c'est vne vieille esdentee & decrepite, ou vne ieune seche & pulmonique : s'il n'est du tout croyable, au moins elles ont apparence de le dire. Mais celles qui se meuuent & qui respirent encores, elles en empirent leur marché. D'autant que les excuses inconsiderées seruent d'accusation. Comme vn Gentilhomme de mes voyfins, qu'on soupçonnoit d'impuissance :

*Languidior tenera cui pendens facula beta,
Numquam se mediam sustulit ad tunicam :*

trois ou quatre iours apres ses nopces, alla iurer tout hardiment, pour se iustifier, qu'il auoit fait vingt postes la nuit precedente : dequoy on s'est feruy depuis à le conuaincre de pure ignorance, & à le desmarier. Outre, que ce n'est rien dire qui vaille.

Car il n'y a ny continence ny vertu, s'il n'y a de l'effort au contraire. Il est vray, faut-il dire, mais ie ne suis pas preste à me rendre. Les saincts mesmes parlent ainsi. S'entend, de celles qui se vantent en bon escient, de leur froideur & insensibilité, & qui veulent en estre creuës d'un visage serieux : car quand c'est d'un visage affecté, où les yeux dementent leurs parolles, & du iargon de leur profession, qui porte coup à contrepoil, ie le trouue bon. Ie suis fort seruiteur de la nayfueté & de la liberté : mais il n'y a remede, si elle n'est du tout naïse ou enfantine, elle est inepte, & melleante aux dames en ce commerce : elle gauchit incontinent sur l'impudence. Leurs desguisements & leurs figures ne trompent que les sots : le mentir y est en siege d'honneur : c'est un destour qui nous conduit à la verité, par une fauce porte. Si nous ne pouuons contenir leur imagination, que voulons nous d'elles ? les effects ? Il en est assez qui eschappent à toute communication estrangere, par lesquels la chasteté peult estre corrompue.

Illud sape facit, quod sine teste facit.

Et ceux que nous craignons le moins, sont à l'auanture les plus à craindre. Leurs pechez muets sont les pires.

Offendor mæcha simpliciore minus.

Il est des effects, qui peuuent perdre sans impudicité leur pudicité : & qui plus est, sans leur sçeu. *Obstetrix virginis cuiusdam integritatem manu velut explorans, siue maleuolentia, siue inscitia, siue casu, dum inspicit, perdidit.* Telle a adiré sa virginité, pour l'auoir cherchée : telle s'en esbattant l'a tuee. Nous ne sçaurions

leur circonſcrire preſiſement les actions que nous leur deſſendons. Il faut concevoir noſtre loy, ſous parolles generalles & incertaines. L'idee meſme que nous forgeons à leur chaſteté eſt ridicule. Car entre les extremes patrons que i'en aye, c'eſt Fatua femme de Faunus, qui ne ſe laiſſa voir oncques puis ſes nopces à maſle quelconque. Et la femme de Hieron, qui ne ſentoit pas ſon mary punais, eſtimant que ce fuſt vne qualité commune à tous hommes. Il faut qu'elles deuiennent inſenſibles & inuiſibles, pour nous ſatisfaire. Or confeſſons que le neud du iugement de ce deuoir, giſt principalement en la volonté. Il y a eũ des maris qui ont ſouffert cet accident, non ſeulement ſans reproche & offence enuers leurs femmes, mais avec ſinguliere obligation & recommandation de leur vertu. Telle, qui ay moit mieux ſon honneur que ſa vie, l'a proſtitué à l'appetit forcené d'un mortel ennemy, pour ſauuer la vie à ſon mary : & a faiſt pour luy ce qu'elle n'eũt aucunement faiſt pour ſoy. Ce n'eſt pas icy le lieu d'eſtendre ces exemples : ils ſont trop hauts & trop riches, pour eſtre repreſentez en ce luſtre : gardons-les à un plus noble ſiege. Mais pour des exemples de luſtre plus vulgaire : eſt-il pas tous les iours des femmes entre nous qui pour la ſeule vtilité de leurs maris ſe preſtent, & par leur expreſſe ordonnance & entremiſe ? Et anciennement Phaulius l'Argien offrit la ſienne au Roy Philippus par ambition : tout ainſi que par ciuilité ce Galba qui auoit donné à ſouper à Mecenas, voyant que ſa femme & luy commençoient à comploter d'œuillades & de ſignes, ſe laiſſa couler ſur ſon couſſin, repreſentant un homme aggraué de ſommeil : pour faire eſpaule à leurs amours. Ce qu'il aduoua d'aſſez bonne grace : car ſur ce point, vn

valet ayant pris la hardiesse de porter la main sur les vases, qui estoient sur la table : il luy cria tout franchement : Comment coquin ? vois tu pas que ie ne dors que pour Mécenas ? Telle a les mœurs desbordées, qui a la volonté plus reformée que n'a cet autre, qui se conduit sous vne apparence réglée. Comme nous en voyons, qui se plaignent d'auoir esté vouées à chasteté, auant l'age de cognoissance : l'en ay veu aussi, se plaindre veritablement, d'auoir esté vouées à la desbauche, auant l'age de cognoissance. Le vice des parens en peut estre cause : ou la force du besoing, qui est vn rude conseiller. Aux Indes Orientales, la chasteté y estant en singuliere recommandation, l'usage pourtant souffroit, qu'une femme mariée se peust abandonner à qui luy presentoit vn elephant : & cela, avec quelque gloire d'auoir esté estimée à si haut prix. Phedon le philosophe, homme de maison, apres la prinse de son pais d'Elide, feit mestier de prostituer, autant qu'elle dura, la beauté de sa ieunesse, à qui en voulut, à prix d'argent, pour en viure. Et Solon fut le premier en la Grece, dit-on, qui par ses loix, donna liberté aux femmes aux despens de leur pudicité de prouoir au besoing de leur vie : coustume qu'Herodote dit auoir esté receüe auant luy, en plusieurs polices. Et puis, quel fruit de cette penible sollicitude ? Car quelque iustice, qu'il y ayt en cette passion, encore faudroit-il voir si elle nous charie vtilement. Est-il quelqu'un, qui les pense boucler par son industrie ?

*Pone seram, cohibe, sed quis custodiet ipsos
Custodes ? cauta est, & ab illis incipit vxor.*

Quelle commodité ne leur est suffisante, en vn siecle

si sçauant? La curiosité est vicieuse par tout : mais elle est pernicieuse icy. C'est folie de vouloir s'esclaircir d'un mal, auquel il n'y a point de medecine, qui ne l'empire & le rengrege : duquel la honte s'augmente & se publie principalement par la ialousie : duquel la vengeance blesse plus nos enfans, qu'elle ne nous guerit. Vous affechez & mourez à la queste d'une si obscure verification. Combien piteusement y font arriuez ceux de mon temps, qui en sont venus à bout? Si l'aduertisseur n'y presente quand & quand le remede & son secours, c'est un aduertissement iniurieux, & qui merite mieux un coup de poignard, que ne fait un dementir. On ne se moque pas moins de celui qui est en peine d'y pouruoir, que de celui qui l'ignore. Le caractere de la cornardise est indelebile : à qui il est une fois attaché, il l'est tousiours. Le chastiment l'exprime plus, que la faute. Il fait beau voir, arracher de l'ombre & du doute, nos malheurs priez, pour les trompeter en eschaffaux tragiques : & malheurs, qui ne pincent, que par le rapport. Car bonne femme & bon mariage, se dit, non de qui l'est, mais duquel on se taist. Il faut estre ingenieux à euitier cette ennuyeuse & inutile cognoissance. Et auoyent les Romains en coustume, reuenans de voyage, d'enuoyer au deuant en la maison, faire sçauoir leur arriuee aux femmes, pour ne les surprendre. Et pourtant a introduit certaine nation, que le prestre ouure le pas à l'espousee, le iour des nopces : pour oster au marié, le doute & la curiosité, de chercher en ce premier effay, si elle vient à luy vierge, ou blesee d'une amour estrangere. Mais le monde en parle. Je sçay cent honnestes hommes coqus, honnestement & peu indecemment. Un galant homme en est pleint, non pas desestimé.

Faites que vostre vertu estouffe vostre malheur : que les gens de bien en maudissent l'occasion : que celui qui vous offence, tremble seulement à le penser. Et puis, de qui ne parle on en ce sens, depuis le petit iusques au plus grand ?

*tot qui legionibus imperitauit,
Et melior quàm tu multis fuit, improbe, rebus.*

Voys tu qu'on engage en ce reproche tant d'honnestes hommes en ta presence, pense qu'on ne t'espargne non plus ailleurs. Mais iusques aux dames elles s'en moqueront. Et dequoy se moquent elles en ce temps plus volontiers, que d'un mariage paisible & bien composé ? Chacun de vous a fait quelqu'un coqu : or nature est toute en pareilles, en compensation & vicissitude. La frequence de cet accident, en doit mes-huy auoir moderé l'aigreur : le voyla tantost passé en coustume. Misérable passion, qui a cecy encore, d'estre incommunicable.

Fors etiam nostris inuidit questibus aures.

Car à quel amy osez vous fier vos doléances : qui, s'il ne s'en rit, ne s'en serue d'acheminement & d'instruction pour prendre luy-mesme sa part à la curee ? Les aigreur comme les douceurs du mariage se tiennent secretes par les sages. Et parmy les autres importunes conditions, qui se trouuent en iceluy, cette cy à un homme languager, comme ie suis, est des principales : que la coustume rende indecent & nuisible, qu'on communique à personne tout ce qu'on en sçait, & qu'on en sent. De leur donner mesme conseil à elles, pour les desgouter de la ialousie, ce seroit temps perdu : leur essence est si

confite en soupçon, en vanité & en curiosité, que de les guarir par voye legitime, il ne faut pas l'esperer. Elles s'amendent souuent de cet inconuenient, par vne forme de santé, beaucoup plus à craindre que n'est la maladie mesme. Car comme il y a des enchantemens, qui ne sçauent pas oster le mal, qu'en le rechargeant à vn autre, elles reiettent ainsi volontiers cette fieure à leurs maris, quand elles la perdent. Toutesfois à dire vray, ie ne sçay si on peut souffrir d'elles pis que la ialousie. C'est la plus dangereuse de leurs conditions, comme de leurs membres, la teste. Pittacus disoit, que chacun auoit son defect : que le sien estoit la mauuaise teste de sa femme : hors cela, il s'estimeroit de tout point heureux. C'est vn bien poissant inconuenient, duquel vn personnage si iuste, si sage, si vaillant, sentoit tout l'estat de sa vie alteré. Que deuons nous faire nous autres hommes ? Le Senat de Marseille eut raison, d'interiner sa requeste à celuy qui demandoit permission de se tuer, pour s'exempter de la tempeste de sa femme : car c'est vn mal, qui ne s'emporte iamais qu'en emportant la piece : & qui n'a autre composition qui vaille, que la fuitte, ou la souffrance : quoy que toutes les deux, tres-difficiles. Celuy là s'y entendoit, ce me semble, qui dit qu'un bon mariage se dressoit d'une femme aueugle, avec vn mary sourd. Regardons aussi que cette grande & violente aspreté d'obligation, que nous leur enioignons, ne produise deux effects contraires à nostre fin : à sçauoir, qu'elle aiguise les poursuyuans, & face les femmes plus faciles à se rendre. Car quant au premier point, montant le prix de la place, nous montons le prix & le desir de la conqueste. Seroit-ce pas Venus mesme, qui eust ainsi finement haussé le cheuet à sa marchandise, par

le maquerelage des loix : cognoiffant combien c'est vn sot desduit, qui ne le feroit valoir par fantasie & par cherté ? En fin c'est toute chair de porc, que la fauce diuersifie, comme disoit l'hoste de Flaminus. Cupidon est vn Dieu felon. Il fait son ieu, à luitter la deuotion & la iustice. C'est sa gloire, que sa puissance chocque tout' autre puissance, & que toutes autres regles cedent aux siennes.

Materiam culpæ prosequiturque sua.

Et quant au second point : serions nous pas moins coqus, si nous craignons moins de l'estre ? suyuant la complexion des femmes : car la deffence les incite & conuie.

*Vbi velis nolunt, vbi nolis volunt vltro :
Concessa pudet ire via.*

Quelle meilleure interpretation trouuerions nous au fait de Messalina ? Elle fit au commencement son mary coqu à cachetes, comme il se fait : mais conduisant ses parties trop aysément, par la stupidité qui estoit en luy, elle desdaigna soudain cet vsage : la voyla à faire l'amour à la descouuerte, aduoüer des feruiteurs, les entretenir & les fauoriser à la veüe d'vn chacun. Elle vouloit qu'il s'en ressentist. Cet animal ne se pouuant esueiller pour tout cela, & luy rendant ses plaisirs mols & fades, par cette trop lasche facilité, par laquelle il sembloit qu'il les authorisast & legitimast : que fit elle ? Femme d'vn Empereur sain & viuant, & à Rome, au theatre du monde, en plein midy, en feste & ceremonie publique, & avec Silius, duquel elle iouyffoit long temps deuant, elle se marie vn iour que son mary estoit

hors de la ville. Semble-il pas qu'elle s'acheminast à deuenir chaste, par la nonchallance de son mary ? Ou qu'elle cherchast vn autre mary, qui luy aiguist l'appetit par sa ialousie, & qui en luy insistant, l'incitast ? Mais la premiere difficulté qu'elle rencontra, fut aussi la derniere. Cette beste s'esueilla en sursaut. On a souuent pire marché de ces sourdaux endormis. L'ay veu par experience, que cette extreme souffrance, quand elle vient à se desnoüer, produit des vengeancees plus aspres. Car prenant feu tout à coup, la cholere & la fureur s'emmoncelant en vn, esclatte tous ses efforts à la premiere charge.

irarúmque omnes effundit habenas.

Il la fit mourir, & grand nombre de ceux de son intelligence : iusques à tel qui n'en pouuoit mais, & qu'elle auoit conuié à son liét à coups d'escourgee. Ce que Virgile dit de Venus & de Vulcan, Lucrece l'auoit diét plus fortablement, d'une iouissance desrobée, d'elle & de Mars.

belli fera manera Maiors.

*Armipotens regit, in gremium qui sæpe tuum se
Reiicit, æterno deuinctus vulnere amoris :
Pascit amore auidos inhians in te Dea visus,
Eque tuo pendet resupini spiritus ore :
Hunc tu Diua tuo recubantem corpore sancto
Circunfusa super, suaueis ex ore loquelas
Funde.*

Quand ie rumine ce, *reiicit, pascit, inhians, molli, fouet, medullas, labefacta, pendet, percurrit*, & cette noble, *circunfusa*, mere du gentil, *infusus*, i'ay desdain de ces menues pointes & allusions verbales, qui nasquirent depuis. A ces bonnes gens, il ne falloit

d'aigue & subtile rencontre. Leur langage est tout plein, & gros d'une vigueur naturelle & constante. Ils font tout epigramme : non la queue seulement, mais la teste, l'estomach, & les pieds. Il n'y a rien d'efforcé, rien de trainant : tout y marche d'une pareille teneur. *Contextus totus virilis est, non sunt circa flosculos occupati*. Ce n'est pas une eloquence molle, & seulement sans offence : elle est nerveuse & solide, qui ne plaist pas tant, comme elle remplit & rait : & rait le plus, les plus forts esprits. Quand ie voy ces braues formes de s'expliquer, si vives, si profondes, ie ne dis pas que c'est bien dire, ie dis que c'est bien penser. C'est la aillardise de l'imagination, qui esleue & enfle les parolles. *Pectus est quod disertum facit*. Nos gens appellent iugement, langage, & beaux mots, les pleines conceptions. Cette peinture est conduite, non tant par dexterité de la main, comme pour auoir l'obiet plus vivement empreint en l'ame. Gallus parle simplement, par ce qu'il conçoit simplement. Horace ne se contente point d'une superficielle expression, elle le trahiroit : il voit plus clair & plus outre dans les choses : son esprit crochette & furette tout le magasin des mots & des figures, pour se représenter : & les luy faut outre l'ordinaire, comme sa conception est outre l'ordinaire. Plutarque dit, qu'il veid le langage Latin par les choses. Icy de mesme : le sens esclaire & produit les parolles : non plus de vent, ains de chair & d'os. Elles signifient, plus qu'elles ne disent. Les imbecilles sentent encores quelque image de cecy. Car en Italie ie disois ce qu'il me plaisoit en deuis communs : mais aux propos roides, ie n'eusse osé me fier à un idiome, que ie ne pouuois plier ny contourner, outre son alleure

commune. I'y veux pouuoir quelque chose du mien. Le maniemēt & employte des beaux esprits, donne prix à la langue : non pas l'innouant, tant, comme la remplissant de plus vigoureux & diuers seruices, l'estirant & ployant. Ils n'y apportent point des mots : mais ils enrichissent les leurs, appesantissent & enfoncent leur signification & leur vsage : luy apprennent des mouuements inaccoustumés : mais prudemment & ingenieusement. Et combien peu cela soit donné à tous, il se voit par tant d'escruiains François de ce siecle. Ils sont assez hardis & dédaigneux, pour ne suyure la route commune : mais faute d'inuention & de discretion les pert. Il ne s'y voit qu'une miserable affectation d'estrangeté : des desguisements froids & absurdes, qui au lieu d'esleuer, abbattent la matiere. Pourueu qu'ils se gorgiasent en la nouuelleté, il ne leur chaut de l'efficace. Pour saisir vn nouveau mot, ils quittent l'ordinaire, souuent plus fort & plus nerueux. En nostre langage ie trouue assez d'estoffe, mais vn peu faute de façon. Car il n'est rien, qu'on ne fist du iargon de nos chasses, & de nostre guerre, qui est vn genereux terrain à emprunter. Et les formes de parler, comme les herbes, s'amendent & fortifient en les transplantant. Ie le trouue suffisamment abondant, mais non pas maniant & vigoureux suffisamment. Il succombe ordinairement à vne puissante conception. Si vous allez tendu, vous sentez souuent qu'il languit sous vous, & fleschit : & qu'à son deffaut le Latin se presente au secours, & le Grec à d'autres. D'aucuns de ces mots que ie viens de trier, nous en apperceuons plus mal-aysément l'energie, d'autant que l'vsage & la frequence, nous en ont aucunement auily & rendu vulgaire la grace.

Comme en nostre commun, il s'y rencontre des frases excellentes, & des metaphores, desquelles la beauté flestrit de vieillesse, & la couleur s'est ternie par maniemment trop ordinaire. Mais cela n'oste rien du goust, à ceux qui ont bon nez : ny ne defroge à la gloire de ces anciens auteurs, qui, comme il est vraysemblable, mirent premierelement ces mots en ce lustre. Les sciences traictent les choses trop finement, d'une mode artificielle, & differente à la commune & naturelle. Mon page fait l'amour, & l'entend : lisez luy Leon Hebreu, & Ficin : on parle de luy, de ses pensées, & de ses actions, & si n'y entend rien. Je ne recognois chez Aristote, la plus part de mes mouuemens ordinaires. On les a couuers & reuestus d'une autre robbe, pour l'usage de l'eschole. Dieu leur doint bien faire : si i'estois du mestier, ie naturaliserois l'art, autant comme ils artialisent la nature. Laissons là Bembo & Equicola. Quand i'escriis, ie me passe bien de la compagnie, & souuenance des liures : de peur qu'ils n'interrompent ma forme. Aussi qu'à la verité, les bons auteurs m'abbattent par trop, & rompent le courage. Je fais volontiers le tour de ce peintre, lequel ayant miserablement representé des coqs, deffendoit à ses garçons, qu'ils ne laissassent venir en sa boutique aucun coq naturel. Et auroy plustost besoing, pour me donner vn peu de lustre, de l'inuention du musicien Antinonydes, qui, quand il auoit à faire la musique, mettoit ordre que deuant ou apres luy, son auditoire fust abreuué de quelques autres mauuais chantres. Mais ie me puis plus malaisément deffaire de Plutarque : il est si vniuersel & si plain, qu'à toutes occasions, & quelque suiet extrauagant que vous ayez pris, il s'ingere à vostre besongne, & vous tend vne main

liberale & inespuisable de richesses, & d'embellissements. Il m'en fait despit, d'estre si fort exposé au pillage de ceux qui le hantent. Je ne le puis si peu raconter, que ie n'en tire cuisse ou aile. Pour ce mien dessein, il me vient aussi à propos, d'escrire chez moy, en pays sauuage, où personne ne m'aide, ny me releue : où ie ne hante communément homme, qui entende le Latin de son patenostre ; & de François vn peu moins. Je l'eusse fait ailleurs, mais l'ouvrage eust esté moins mien. Et sa fin principale & perfection, c'est d'estre exactement mien. Je corrigerois bien vne erreur accidentale, dequoy ie suis plein, ainsi que ie cours inaduertement : mais les imperfections qui sont en moy ordinaires & constantes, ce seroit trahison de les oster. Quand on m'a dict ou que moy-mesme me suis dict : Tu es trop espais en figures, voyla vn mot du cru de Gascongne : voyla vne phrase dangereuse : (ie n'en refuis aucune de celles qui s'vsent emmy les rues Françoises : ceux qui veulent combattre l'vsage par la grammaire se moquent) voyla vn discours ignorant : voyla vn discours paradoxe, en voyla vn trop fol : tu te ioues souuent, on estimera que tu dies à droit, ce que tu dis à feinte. Oüy, fais-ie, mais ie corrige les fautes d'inaduertence, non celles de coustume. Est-ce pas ainsi que ie parle par tout ? me represente-ie pas viuement ? suffit. I'ay fait ce que i'ay voulu : tout le monde me recognoist en mon liure, & mon liure en moy. Or i'ay vne condition singereffe & imitatrice. Quand ie me meslois de faire des vers, & n'en fis iamais que des Latins, ils accusoient euidentement le poëte que ie venois dernièrement de lire. Et de mes premiers Essays, aucuns puent vn peu l'estran-

ger. A Paris ie parle vn langage aucunement autre qu'à Montaigne. Qui que ie regarde avec attention, m'imprime facilement quelque chose du sien. Ce que ie considere, ie l'vsurpe : vne sorte contenance, vne desplaissante grimace, vne forme de parler ridicule. Les vices-plus. D'autant qu'ils me poignent, ils s'acrochent à moy, & ne s'en vont pas sans secouer. On m'a veu plus souuent iurer par similitude, que par complexion. Imitation meurtriere, comme celle des singes horribles en grandeur & en force, que le Roy Alexandre rencontra en certaine contree des Indes. Desquels il eust esté autrement difficile de venir à bout. Mais ils en presterent le moyen par cette leur inclination à contrefaire tout ce qu'ils voyent faire. Car par là les chasseurs apprirent de se chauffer des fouliers à leur veuë, avec force nœuds de liens : de s'affubler d'accoustremens de teste à tout des lacs courants, & oindre par semblant, leurs yeux de glux. Ainsi mettoient imprudemment à mal, ces pauures bestes, leur complexion singereffe. Ils s'engluoient, s'encheuestroyent & garrotoient eux mesmes. Cette autre faculté, de représenter ingenieusement les gestes & parolles d'un autre, par dessein qui apporte souuent plaisir & admiration, n'est en moy, non plus qu'en vne souche. Quand ie iure selon moy, c'est seulement, par Dieu, qui est le plus droit de tous les serments. Ils disent, que Socrates iuroit le chien : Zenon cette mesme interiection, qui sert à cette heure aux Italiens, Capari : Pythagoras, l'eau & l'air. Je suis si aisé à recevoir sans y penser ces impressions superficielles, que si i'ay eu en la bouche, Sire ou Altesse, trois iours de suite, huit iours apres ils m'eschappent, pour excellence, ou pour seigneurie. Et ce que

i'auray pris à dire en battelant & en me moquant, ie le diray lendemain serieusement. Parquoy, à escrire, i'accepte plus enuis les argumens battus, de peur que ie les traite aux despens d'autrui. Tout argument m'est egallement fertile. Je les prens sur vne mouche. Et Dieu vueille que celuy que i'ay icy en main, n'ait pas esté pris, par le commandement d'une volonté autant volage. Que ie commence par celle qu'il me plaira, car les matieres se tiennent toutes encheffnees les vnes aux autres. Mais mon ame me desplaist, de ce qu'elle produit ordinairement ses plus profondes resueries, plus folles, & qui me plaisent le mieux, à l'improuueu, & lors que ie les cherche moins : lesquelles s'esuanouissent soudain, n'ayant sur le champ où les attacher. A cheual, à la table, au liét. Mais plus à cheual, où sont mes plus larges entretiens. I'ay le parler vn peu delicatement ialoux d'attention & de silence, si ie parle de force. Qui m'interrompt, m'arreste. En voyage, la necessité mesme des chemins coupe les propos. Outre ce, que ie voyage plus souuent sans compagnie, propre à ces entretiens de fuite : par où ie prens tout loisir de m'entretenir moy-mesme. Il m'en aduient comme de mes songes : en songeant, ie les recommande à ma memoire, car ie songe volontiers que ie songe, mais le lendemain, ie me represente bien leur couleur, comme elle estoit, ou gaye, ou triste, ou estrange, mais quels ils estoient au reste, plus i'ahane à le trouuer, plus ie l'enfonce en l'oubliance. Aussi des discours fortuites qui me tombent en fantaisie, il ne m'en reste en memoire qu'une vaine image : autant seulement qu'il m'en faut pour me faire ronger, & despiter apres leur queste, inutilement. Or donc, laissant les liures à

part, & parlant plus materiellement & simplement : ie trouue apres tout, que l'amour n'est autre chose, que la soif de cette iouissance en vn subiect desiré : ny Venus autre chose, que le plaisir à descharger ses vases : comme le plaisir que nature nous donne à descharger d'autres parties : qui deuient vicieux ou par immoderation, ou par indiscretion. Pour Socrates, l'amour est appetit de generation par l'entremise de la beauté. Et considerant maintefois la ridicule titillation de ce plaisir, les absurdes mouuemens esceruelez & estourdis, dequoy il agite Zenon & Cratippus : cette rage indiscrete, ce visage enflammé de fureur & de cruauté, au plus doux effect de l'amour : & puis cette morgue graue, feuer, & ecstasique, en vne action si folle, qu'on ayt logé pelle-messe nos delices & nos ordures ensemble : & que la supreme volupté aye du transy & du plaintif, comme la douleur : ie crois qu'il est vray, ce que dit Platon, que l'homme a esté fait par les Dieux pour leur iouët.

*quænam ista iocandi
Sæuitia?*

Et que c'est par moquerie, que Nature nous a laissé la plus trouble de nos actions, la plus commune : pour nous esgaller par là, & apparier les fols & les sages, & nous & les bestes. Le plus contemplatif, & prudent homme, quand ie l' imagine en cette assiette, ie le tiens pour affronteur, de faire le prudent, & le contemplatif. Ce sont les pieds du paon, qui abbattent son orgueil ;

*ridentem dicere verum
Quid vetat?*

Ceux qui parmi les jeux, refusent les opinions serieuses, font, dit quelqu'un, comme celui qui craint d'adorer la statue d'un saint, si elle est sans devanture. Nous mangeons bien & buvons comme les bestes : mais ce ne sont pas actions qui empêchent les offices de notre ame. En celles-là, nous gardons notre avantage sur elles : cette-cy met toute autre pensée sous le joug : abrutit & abestit par son impérieuse autorité, toute la theologie & philosophie qui est en Platon : & si ne s'en plaint pas. Par tout ailleurs vous pouvez garder quelque decence : toutes autres operations souffrent des regles d'honnesteté : cette-cy ne se peut pas seulement imaginer, que vicieuse ou ridicule. Trouvez y pour voir un proceder sage & discret. Alexandre disoit qu'il se connoissoit principalement mortel, par cette action, & par le dormir : le sommeil suffoque & supprime les facultez de notre ame, la besongne les absorbe & dissipe de mesme. Certes c'est une marque non seulement de nostre corruption originele : mais aussi de nostre vanité & deformité. D'un costé Nature nous y pousse, ayant attaché à ce desir, la plus noble, utile, & plaisante de toutes ses fonctions : & la nous laisse d'autre part accuser & fuyr, comme insolente & deshonneste, en rougir & recommander l'abstinence. Sommes nous pas bien bruttes, de nommer brutale l'operation qui nous fait ? Les peuples, és religions, se sont rencontrez en plusieurs convenances : comme sacrifices, luminaires, encensements, ieunes, offrandes : & entre autres, en la condamnation de cette action. Toutes les opinions y viennent, outre l'usage si estendu des circoncisions. Nous avons à l'avanture raison, de nous blasmer, de faire une si sotte production que l'homme : d'appeller l'action honteuse,

& honteuses les parties qui y seruent (à cette heure sont les miennes proprement honteuses). Les Efféniens, dequoy parle Plin, se maintenoient sans nourrice, sans maillot, plusieurs siècles : de l'abbord des estrangers, qui, suiuant cette belle humeur, se rengoient continuellement à eux : ayant toute vne nation, hazardé de s'exterminer plustost, que s'engager à vn embrassement féminin, & de perdre la suite des hommes plustost, que d'en forger vn. Ils disent que Zenon n'eut affaire à femme, qu'une fois en sa vie : & que ce fut par ciuilité, pour ne sembler dedaigner trop obstinément le sexe. Chacun fuit à le voir naistre, chacun court à le voir mourir. Pour le destruire, on cherche vn champ spacieux en pleine lumiere : pour le construire, on se muffle dans vn creux tenebreux, & le plus contraint qu'il se peut. C'est le deuoir, de se cacher pour le faire, & c'est gloire, & naissent plusieurs vertus, de le sçauoir deffaire. L'un est iniure, l'autre est faueur : car Aristote dit, que bonifier quelqu'un, c'est le tuer, en certaine phrase de son pais. Les Atheniens, pour apparier la deffaueur de ces deux actions, ayants à mundifier l'isle de Delos, & se iustifier enuers Apollo, defendirent au pourpris d'icelle, tout enterrement, & tout enfantement ensemble. *Nostri nosmet pœnit.* Il y a des nations qui se couurent en mangeant. Je sçay vne dame, & des plus grandes, qui a cette mesme opinion, que c'est vne contenance desagreable, de mascher : qui rabat beaucoup de leur grace, & de leur beauté : & ne se presente pas volontiers en public avec appetit. Et sçay vn homme, qui ne peut souffrir de voir manger, ny qu'on le voye : & fuyt toute assistance, plus quand il s'emplit, que s'il se vuide. En l'empire du Turc, il se void grand

nombre d'hommes, qui, pour exceller les autres, ne se laissent iamais veoir, quand ils font leur repas; qui n'en font qu'un la sepmaine : qui se deschiquettent & decoupent la face & les membres : qui ne parlent iamais à perfonne. Gens fanatiques, qui pensent honnorer leur nature en se desnaturant : qui se priſent de leur meſpris, & s'amendent de leur empiement. Quel monſtrueux animal, qui ſe fait horreur à ſoy-meſme, à qui ſes plaiſirs poiſent : qui ſe tient à mal-heur ? Il y en a qui cachent leur vie,

Exilióque domos & dulcia limina mutant,

& la defroben de la veuë des autres hommes : qui eurent la ſanté & l'allegreſſe, comme qualitez ennemies & dommageables. Non ſeulement pluſieurs ſectes, mais pluſieurs peuples maudiffent leur naiſſance, & beniſſent leur mort. Il en eſt où le ſoleil eſt abominé, les tenebres adorees. Nous ne ſommes ingenieux qu'à nous mal mener : c'eſt le vray gibbier de la force de noſtre eſprit : dangereux vtil en deſreglement.

O miſeri quorum gaudia crimen habent!

Hé pauvre homme, tu as aſſez d'incommoditez neceſſaires, ſans les augmèter par ton inuention : & es aſſez miſerable de condition, ſans l'eſtre par art : tu as des laideurs reelles & eſſentielles à ſuffiſance, ſans en forger d'imaginaires. Trouues tu que tu ſois trop à l'aiſe ſi la moitié de ton aiſe ne te faſche ? Trouues tu que tu ayes remply tous les offices neceſſaires, à quoy Nature t'engage, & qu'elle ſoit oyſiue chez toy, ſi tu ne t'obliges à nouueaux offices ? Tu ne crains point d'offencer ſes lois vniuerſelles & in-

dubitables, & te piques aux tiennes partifanes & fantastiques. Et d'autant plus qu'elles font particulières, incertaines, & plus contredites, d'autant plus tu fais là ton effort. Les ordonnances positives de ta paroisse t'attachent : celles du monde ne te touchent point. Cours vn peu par les exemples de cette consideration : ta vie en est toute. Les vers de ces deux poëtes, traictans ainsi reseruément & discrettement de la lasciueté, comme ils font, me semblent la decouvrir & esclairer de plus pres. Les dames coultrent leur sein d'vn reseul, les prestres plusieurs choses sacrees, les peintres ombragent leur ouurage, pour luy donner plus de lustre. Et dict-on que le coup du soleil & du vent, est plus poissant par reflexion qu'à droit fil. L'Egyptien respondit sagement à celuy qui luy demandoit, Que portes-tu là, caché sous ton manteau ? Il est caché sous mon manteau, affin que tu ne sçaches pas que c'est. Mais il y a certaines autres choses qu'on cache pour les montrer. Oyez cetuy-là plus ouuert,

Et nudam pressi corpus adusque meum.

Il me semble qu'il me chapone. Que Martial retrouffe Venus à sa poste, il n'arriue pas à la faire paroistre si entiere. Celuy qui dit tout, il nous saoule & nous desgoust. Celuy qui craint à s'exprimer, nous achemine à en penser plus qu'il n'en y a. Il y a de la trahison en cette sorte de modestie : & notamment nous entr'ouurant comme font ceux cy, vne si belle route à l'imagination. Et l'action & la peinture doiuent sentir leur larrecin. L'amour des Espagnols, & des Italiens, plus respectueuse & craintive, plus mineuse & couuerte, me plaist. Je ne sçay qui, ancien-

nement, desiroit le gosier allongé comme le col d'une grue, pour fauourer plus long temps ce qu'il auoit. Ce souhait est mieux à propos en cette volupté, viste & precipiteuse. Mesmes à telles natures comme est la mienne, qui suis vicieux en soudaineté. Pour arrester sa fuitte, & l'estendre en preambules; entre-eux, tout sert de faueur & de recompense: vne œillade, vne inclination, vne parolle, vn signe. Qui se pourroit disner de la fumee du rost, feroit-il pas vne belle espargne? C'est vne passion qui melle à bien peu d'essence solide, beaucoup plus de vanité & resuerie sieureuse: il la faut payer & seruir de mesme. Apprenons aux dames à se faire valoir, à s'estimer, à nous amuser, & à nous piper. Nous faisons nostre charge extreme la premiere: il y a tousiours de l'impetuosité Françoisë. Faisant filer leurs faueurs, & les estallant en detail: chacun, iusques à la vieillesse miserable, y trouue quelque bout de lisiere, selon son vaillant & son merite. Qui n'a iouyssance, qu'en la iouyssance: qui ne gaigne que du haut poinct: qui n'ayme la chasse qu'en la prise: il ne luy appartient pas de se mesler à nostre escole. Plus il y a de marches & degrez, plus il y a de hauteur & d'honneur au dernier siege. Nous nous deurions plaire d'y estre conduicts, comme il se fait aux palais magnifiques, par diuers portiques, & passages, longues & plaissantes galleries, & plusieurs destours. Cette dispensation reuiendroit à nostre commodité: nous y arresterions, & nous y aymerions plus long temps. Sans esperance, & sans desir, nous n'allons plus rien qui vaille. Nostre maistrise & entiere possession, leur est infiniment à craindre. Depuis qu'elles sont du tout rendues à la mercy de nostre foy, & constance, elles sont vn peu bien hasar-

dees. Ce sont vertus rares & difficiles : soudain qu'elles sont à nous, nous ne sommes plus à elles.

*postquam cupidæ mentis satiata libido est,
Verba nihil metuere, nihil periuria curant.*

Et Thrasonidez ieune homme Grec, fut si amoureux de son amour, qu'il refusa, ayant gagné le cœur d'une maistresse, d'en iouyr : pour n'amortir, raffasier & allanguir par la iouissance cette ardeur inquiete, de laquelle il se glorifioit & se païssoit. La cherté donne goust à la viande. Voyez combien la forme des salutations, qui est particuliere à nostre nation, abastardit par sa facilité, la grace des baisers, lesquels Socrates dit estre si puissans & dangereux à voler nos cœurs. C'est une desplaisante coustume, & iniurieuse aux dames, d'auoir à prester leurs leures, à quiconque a trois valets à sa suite, pour mal plaissant qu'il soit,

*Cuius liuida naribus caninis,
Dependet glacies, rigetque barba :
Centum occurrere malo culilingis.*

Et nous mesme n'y gagnons guere : car comme le monde se voit party, pour trois belles, il nous en faut baiser cinquante laides. Et à un estomach tendre, comme sont ceux de mon aage, un mauuais baiser en surpaie un bon. Ils sont les poursuyuans en Italie, & les transis, de celles mesmes qui sont à vendre : & se defendent ainsi : Qu'il y a des degrez en la iouissance : & que par seruices ils veulent obtenir pour eux, celle qui est la plus entiere. Elles ne vendent que le corps. La volonté ne peut estre mise en vente, elle est trop libre & trop sienne. Ainsi

ceux cy disent, que c'est la volonté qu'ils entreprennent, & ont raison. C'est la volonté qu'il faut servir & pratiquer. L'ay horreur d'imaginer mien, vn corps priué d'affection. Et me semble, que cette forcenerie est voisine à celle de ce garçon, qui alla faillir par amour, la belle image de Venus que Praxiteles auoit faite. Ou de ce furieux Égyptien, eschauffé apres la charongne d'une morte qu'il embaumoit & enfueroit. Lequel donna occasion à la loy, qui fut faite depuis en Égypte, que les corps des belles & ieunes femmes, & de celles de bonne maison, seroient gardez trois iours, auant qu'on les mist entre les mains de ceux qui auoient charge de prouoir à leur enterrement. Periander fit plus merueilleusement : qui estendit l'affection coniugale, plus reglée & legitime, à la iouissance de Melissa sa femme trespassee. Ne semble ce pas estre vne humeur lunatique de la Lune, ne pouuant autrement iouyr d'Endymion son mignon, l'aller endormir pour plusieurs mois : & se paistre de la iouissance d'un garçon, qui ne se remuoit qu'en songe ? Je dis pareillement ; qu'on ayme vn corps sans ame, quand on ayme vn corps sans son consentement, & sans son desir. Toutes iouissances ne sont pas vnes. Il y a des iouissances ethiques & languissantes. Mille autres causes que la bien-vueillance, nous peuuent acquiescer cet octroy des dames. Ce n'est suffisant tesmoignage d'affection. Il y peut eschoir de la trahison, comme ailleurs : elles n'y vont par fois que d'une fesse ;

tanquam thura merúmque parent :
absentem marmoreámve putes.

P'en fçay, qui ayment mieux prester cela, que leur

coche : & qui ne se communiquent, que par là. Il faut regarder si vostre compagnie leur plaist pour quelque autre fin encores, ou pour celle là seulement, comme d'un gros garçon d'estable : en quel rang & à quel prix vous y estes logé,

tibi si datur uni

Quo lapide illa diem candidiore noter.

Quoy, si elle mange vostre pain, à la sauce d'une plus agreable imagination ?

Te tenet, absentes alios suspirat amores.

Comment ? auons nous pas veu quelqu'un en nos iours, s'estre seruy de cette action, à l'usage d'une horrible vengeance : pour tuer par là, & empoisonner, comme il fit, une honneste femme ? Ceux qui cognoissent l'Italie, ne trouueront iamais estrange, si pour ce subiect, ie ne cherche ailleurs des exemples. Car cette nation se peut dire regente du reste du monde en cela. Ils ont plus communément des belles femmes, & moins de laydes que nous : mais des rares & excellentes beautez, i'estime que nous allons à pair. Et en iuge autant des esprits : de ceux de la commune façon, ils en ont beaucoup plus, & euidemment. La brutalité y est sans comparaison plus rare : d'ames singulieres & du plus haut estage, nous ne leur en deuons rien. Si i'auois à estendre cette similitude, il me sembleroit pouuoir dire de la vaillance, qu'au rebours, elle est au prix d'eux, populaire chez nous, & naturelle : mais on la voit par fois, en leurs mains, si pleine & si vigoureuse, qu'elle surpasse tous les plus roides exemples que nous en ayons. Les mariages de ce pays là,

clochent en cecy. Leur coustume donne communement la loy si rude aux femmes, & si ferue, que la plus esloignee accointance avec l'estranger, leur est autant capitale que la plus voisine. Cette loy fait, que toutes les approches se rendent necessairement substantieles. Et puis que tout leur reuient à mesme compte, elles ont le choix bien aysé. Et ont elles brisé ces cloisons ? Croyez qu'elles font feu : *Luxuria ipsis vinculis, sicut fera bestia, irritata, deinde emissa.* Il leur faut vn peu lascher les resnes.

*Vidi ego nuper equum contra sua frena tenacem:
Ore reluctanti fulminis ire modo.*

On alanguit le desir de la compagnie, en luy donnant quelque liberté. C'est vn bel vsage de nostre nation, qu'aux bonnes maisons, nos enfans foyent receuz, pour y estre nourris & esleuez pages comme en vne escole de noblesse. Et est discourtoisie, dire, & iniure, d'en refuser vn Gentil-homme. J'ay apperceu, car autant de maisons autant de diuers stiles & formes, que les dames qui ont voulu donner aux filles de leur suite, les regles plus austeres, n'y ont pas eu meilleure aduanture. Il y faut de la moderation. Il faut laisser bonne partie de leur conduite, à leur propre discretion : car ainsi comme ainsi n'y a il discipline qui les sçeut brider de toutes parts. Mais il est bien vray, que celle qui est eschappée bagues sauues, d'vn escolage libre, apporte bien plus de fiance de soy, que celle qui sort saine, d'vne escole seuerre & prisonniere. Nos peres dressoient la contenance de leurs filles à la honte & à la crainte (les courages & les desirs tousiours pareils) nous à l'assurance : nous n'y entendons rien. C'est

à faire aux Sarmates, qui n'ont loy de coucher aüec homme, que de leurs mains elles n'en ayent tué vn autre en guerre. A moy qui n'y ay droit que par les oreilles, fuffit, si elles me retiennent pour le conseil, fuyuant le priuilege de mon aage. Je leur conseille donc, & à nous aussi, l'abstinence : mais si ce siecle en est trop ennemy, au moins la discretion & la modestie. Car, comme dit le compte d'Aristippus, parlant à des ieunes hommes, qui rougissoient de le veoir entrer chez vne courtisane : Le vice est, de n'en pas sortir, non pas d'y entrer. Qui ne veut exempter sa conscience, qu'elle exempte son nom : si le fons n'en vaut guere, que l'apparence tienne bon. Je loüe la gradation & la longueur, en la dispensation de leurs faueurs. Platon montre, qu'en toute espèce d'amour, la facilité & promptitude est interdite aux tenants. C'est vn traitt de gourmandise, laquelle il faut qu'elles couurent de tout leur art, de se rendre ainsi temerairement en gros, & tumultuairement. Se conduisant en leur dispensation, ordonnement & mesurement, elles pipent bien mieux nostre desir, & cachent le leur. Qu'elles fuyent tousiours deuant nous : ie dis celles mesmes qui ont à se laisser attraper. Elles nous battent mieux en fuyant, comme les Scythes. De vray, selon la loy que Nature leur donne, ce n'est pas proprement à elles de vouloir & desirer : leur rolle est souffrir, obeyr, consentir. C'est pourquoy Nature leur a donné vne perpetuelle capacité; à nous, rare & incertaine. Elles ont tousiours leur heure, afin qu'elles soyent tousiours prestes à la nostre *Pati nata*. Et où elle a voulu que nos appetis eussent montre & declaration prominante, ell' a fait que les leurs fussent occultes & intestins. Et les a fournies de pieces impropres à

l'ostentation : & simplement pour la defenfiue. Il faut laisser à la licence Amazonienne pareils traits à cettuy cy. Alexandre passant par l'Hyrcanie, Thalestris Royne des Amazones le vint trouuer avec trois cents gens d'armes de son sexe : bien montez & bien armez : ayant laissé le demeurant d'une grosse armee, qui la suyuoit, au delà des voisines montagnes. Et luy dit tout haut, & en public, que le bruit de ses victoires & de sa valeur, l'auoit menee là, pour le veoir, luy offrir ses moyens & sa puissance au secours de ses entreprinſes. Et que le trouuant si beau, ieune, & vigoureux, elle, qui estoit parfaite en toutes ses qualitez, luy conseilloit, qu'ils couchassent ensemble : afin qu'il naquist de la plus vaillante femme du monde, & du plus vaillant homme, qui fust lors viuant, quelque chose de grand & de rare, pour l'aduenir. Alexandre la remercia du reste : mais pour donner temps à l'accomplissement de sa derniere demande, il arresta treize iours en ce lieu, lesquels il festoya le plus alaigrement qu'il peut, en faueur d'une si courageuse Princeſſe. Nous sommes quasi par tout iniques iuges de leurs actions, comme elles sont des nostres. L'aduouë la verité lors qu'elle me nuit, de meſme que si elle me fert. C'est vn vilain defreglement, qui les pouſſe si ſouuent au change, & les empesche de fermir leur affection en quelque ſubieſt que ce ſoit : comme on voit de cette Deeſſe, à qui lon donne tant de changemens & d'amis. Mais ſi eſt-il vray, que c'eſt contre la nature de l'amour, ſ'il n'eſt violent, & contre la nature de la violence, ſ'il eſt conſtant. Et ceux qui s'en eſtonnent, s'en eſcrient, & cherchent les cauſes de cette maladie en elles, comme deſnaturee & incroyable : que ne voyent ils, combien ſouuent ils

la reçoivent en eux, sans espouuamment & sans miracle ? seroit à l'adventure plus estrange d'y voir de l'arrest. Ce n'est pas vne passion simplement corporelle. Si on ne trouue point de bout en l'auarice, & en l'ambition, il n'y en a non plus en la paillardise. Elle vit encore apres la satieté : & ne luy peut on prescrire ny satisfaction constante, ny fin : elle va tousiours outre sa possession. Et si l'inconstance leur est à l'adventure aucunement plus pardonnable qu'à nous. Elles peuuent alleguer comme nous, l'inclination qui nous est commune à la varieté & à la nouuelleté : & alleguer secondement sans nous, qu'elles achètent chat en sac. Ieanne Royne de Naples, feit estrangler Andreosse son premier mary, aux grilles de sa fenestre, avec vn laz d'or & de soye, tiffu de sa main propre : sur ce qu'aux couruees marrimoniales, elle ne luy trouuoit ny les parties, ny les efforts, assez respondants à l'esperance qu'elle en auoit conceuë, à veoir sa taille, sa beauté, sa ieunesse & disposition : par où elle auoit esté prinse & abusée. Que l'action a plus d'effort que n'a la souffrance : ainsi que de leur part tousiours aumoins il est pourueu à la necessité : de nostre part il peut auenir autrement. Platon à cette cause establit sagement par ses loix, auant tout mariage, pour decider de son opportunité, que les iuges voyent les garçons, qui y pretendent, tous fins nuds : & les filles nuës iusqu'à la ceinture seulement. En nous essayant, elles ne nous trouuent à l'adventure pas dignes de leur choix :

*experta latus madidoque fimillima loro
Inguina, nec lassâ stare coacta manu,
Deferit imbelles thalamos.*

Ce n'est pas tout, que la volonté charrie droit.
La foiblesse & l'incapacité, rompent legitiment vn
mariage :

*Et quærendum aliunde foret nervosius illud,
Quod posset zonam soluere virgineam.*

Pourquoy non, & selon sa mesure, vne intelligence
amoureuse, plus licentieuse & plus active?

si blando nequeat superesse labori.

Mais n'est-ce pas grande impudence, d'apporter nos
imperfections & foibleses, en lieu où nous desirons
plaire, & y laisser bonne estime de nous & recom-
mandation? Pour ce peu qu'il m'en faut à cette
heure,

*ad vnum
Mollis opus,*

ie ne voudrois importuner vne personne, que i'ay à
reuerer & craindre.

*fuge suspicari,
Cuius vnderum trepidavit ætas
Claudere lustrum.*

Nature se devoit contenter d'auoir rendu cet aage
miserable, sans le rendre encore ridicule. Je hay de
le voir, pour vn pouce de chetive vigueur, qui
l'eschaufe trois fois la sepmaine, s'empresse & se gen-
darmier, de pareille aspreté, comme s'il auoit quelque
grande & legitime iournee dans le ventre : vn vray
feu d'estoupe. Et admire sa cuisson, si viue & fre-
tillante, en vn moment si lourdement congelee
& esteinte. Cet appetit ne deuroit appartenir qu'à

la fleur d'une belle ieunesse. Fiez vous y, pour voir, à seconder cett' ardeur indefatigable, pleine, constante, & magnanime, qui est en vous : il vous la lairra vrayment en beau chemin. Renuoyez le hardiment plustost vers quelque enfance molle, estonnee, & ignorante, qui tremble encore sous la verge, & en rougisse,

*Indum sanguineo veluti violauerit ostro
Si quis ebur, vel mista rubent vbi lilia, multa
Alba rosa.*

Qui peut attendre le lendemain, sans mourir de honte, le desdain de ces beaux yeux, consens de sa lascheté & impertinence :

Et taciti fecere tamen conuitia vultus,

il n'a iamais senty le contentement & la fierté, de les leur auoir battus & ternis, par le vigoureux exercice d'une nuit officieuse & active. Quand i'en ay veu quelqu'une s'ennuyer de moy, ie n'en ay point incontinent accusé sa legereté : i'ay mis en doute, si ie n'auois pas raison de m'en prendre à Nature plustost. Certes, elle m'a traité illegitimement & in-ciuilement,

*Si non longa satis, si non bene mentula crassa :
Nimirum sapiunt videtque paruum
Matronæ quoque mentulam illibenter :*

& d'une lesion enormissime. Chacune de mes pieces est esgalement mienne, que toute autre. Et nulle autre ne me fait plus proprement homme que cette cy. Je doy au public vniuersellement mon pourtrait. La sagesse de ma leçon est en verité, en liberté, en

effence, toute. Dedeignant au rolle de ses vrayes devoirs, ces petites regles, feintes, vſuelles, prouinciales. Naturelle toute, conſtante, generale. De laquelle ſont filles, mais baſtardes, la ciuilité, la ceremonie. Nous aurons bien les vices de l'apparence, quand nous aurons eu ceux de l'effence. Quand nous aurons fait à ceux icy, nous courrons ſus aux autres, ſi nous trouuons qu'il y faille courir. Car il y a danger, que nous fantaſions des offices nouueaux, pour excuſer noſtre negligence enuers les naturels offices, & pour les confondre. Qu'il ſoit ainſin, il ſe void, qu'és lieux, où les fautes ſont maleſices, les maleſices ne ſont que fautes. Qu'és nations, où les loix de la bienſeance ſont plus rares & laſches, les loix primitiues de la raiſon commune ſont mieux obſeruees : l'innombrable multitude de tant de devoirs, ſuffoquant noſtre ſoing, l'allanguiffant & diſſipant. L'application aux legeres choſes nous retire des iuſtes. O que ces hommes ſuperficiels, prennent vne routte facile & plaufible, au prix de la noſtre ! Ce ſont ombrages, dequoy nous nous plaſtrons & entrepayons. Mais nous n'en payons pas, ainçois en rechargeons noſtre debte, enuers ce grand iuge, qui trouble nos panneaus & haillons, d'autour noz parties honteuſes : & ne ſe feint point à nous veoir par tout, iuſques à noz intimes & plus ſecrettes ordures : vtile decence de noſtre virginale pudeur, ſi elle luy pouuoit interdire cette deſcouuerte. En fin, qui deſniaiferoit l'homme, d'vne ſi ſcrupuleuſe ſuperſtition verbale, n'apporteroit pas grande perte au monde. Noſtre vie eſt partie en folie, partie en prudence. Qui n'en eſcrit que reuerement & regulierement, il en laiſſe en arriere plus de la moitié. Il ne m'excuse pas enuers moy : & ſi ie le faiſoy, ce ſeroit

plustost de mes excuses, que ie m'excuseroy, que d'autre mienne faute. e m'excuse à certaines humeurs, que i'estime plus fortes en nombre que celles, qui sont de mon costé. En leur consideration, ie diray encore cecy (car ie desire de contenter chacun; chose pourtant difficile, *esse vnum hominem accommodatum ad tantam morum ac sermonum & voluntatum varietatem*) qu'ils n'ont à se prendre à moy, de ce que ie fay dire aux auctoritez receuës & approuuees de plusieurs siecles : & que ce n'est pas raison, qu'à faute de rythme ils me refusent la dispense, que mesme des hommes ecclesiastiques, des nostres, iouyssent en ce siecle. En voicy deux, & des plus crestez :

Rimula, dispeream, ni monogramma tua est.

Vn vit d'amy la contente & bien traitte.

Quoy tant d'autres? l'ayme la modestie : & n'est par iugement, que i'ay choisi cette sorte de parler scandaleux : c'est Nature, qui l'a choisi pour moy. Ie ne le louë, non plus que toutes formes contraires à l'vsage receu : mais ie l'excuse : & par circonstances tant generales que particulieres, en allege l'accusation. Suiuons. Pareillement d'où peut venir cette vsurpation d'autorité souueraine, que vous prenez sur celles, qui vous fauorisent à leurs despens,

Si furtiua dedit nigra munuscula nostre,

que vous en inuestissiez incontinent l'interest, la froideur, & vne auctorité maritale? C'est vne conuention libre, que ne vous y prenez vous, comme vous les y voulez tenir? Il n'y a point de prescription sur les choses volontaires. C'est. contre la forme,

mais il est vray pourtant, que i'ay en mon temps conduict ce marché, selon que sa nature peut souffrir, aussi consciencieusement qu'autre marché, & avec quelque air de iustice : & que ie ne leur ay tesmoigné de mon affection, que ce que i'en sentoys; & leur en ay representé naïfvement, la decadence, la vigueur, & la naissance : les accez & les remises. On n'y va pas tousiours vn train. I'ay esté si espargnant à promettre, que ie pense auoir plus tenu que promis, ny deu. Elles y ont trouué de la fidelité, iusques au seruice de leur inconstance. Ie dis inconstance aduouee, & par fois multipliee. Ie n'ay iamais rompu avec elles, tant que i'y tenois, ne fust que par le bout d'un filet. Et quelques occasions qu'elles m'en ayent donné, n'ay iamais rompu, iusques au mespris & à la hayne. Car telles priuau-
tez, lors mesme qu'on les acquiert par les plus honteuses conuentions, encorcs m'obligent elles à quelque bien-vueillance. De cholere & d'impatience vn peu indiscrete, sur le point de leurs ruses & des-
fuites, & de nos contestations, ie leur en ay fait voir par fois. Car ie suis de ma complexion, subiect à des emotions brusques, qui nuisent souuent à mes marchez, quoy qu'elles soyent legeres & courtes. Si elles ont voulu essayer la liberté de mon iugement, ie ne me suis pas feint, à leur donner des aduis pater-
nels & mordans, & à les pinser où il leur cuysoit. Si ie leur ay laissé à se plaindre de moy, c'est plustost d'y auoir trouué vn amour, au prix de l'vsage moderne, sottement consciencieux. I'ay obserué ma parole, és choses dequoy on m'eust aysément dispensé. Elles se rendoient lors par fois avec repu-
tation, & sous des capitulations, qu'elles souffroient aysément estre fausées par le vainqueur. I'ay fait

caler sous l'intérêt de leur honneur, le plaisir, en son plus grand effort, plus d'une fois. Et où la raison me pressoit, les ay armées contre moy : si qu'elles se conduisoient plus seurement & seurement, par mes règles, quand elles s'y estoient franchement remises, qu'elles n'eussent fait par les leurs propres. J'ay autant que j'ay peu chargé sur moy seul, le hazard de nos assignations, pour les en décharger : & ay dressé nos parties toujours par le plus aspre, & inopiné, pour estre moins en soupçon, & en outre par mon avis, plus accessible. Ils sont ouverts, principalement par les endroits qu'ils tiennent de foy couverts. Les choses moins craintes sont moins défendues & observées. On peut oser plus aisément, ce que personne ne pense que vous oseriez, qui devient facile par sa difficulté. Jamais homme n'eut ses approches plus impertinemment genitales. Cette voye d'aimer, est plus selon la discipline. Mais combien elle est ridicule à nos gens, & peu effective, qui le sçait mieux que moy ? Si ne m'en viendra point le repentir. Je n'y ay plus que perdre,

*me tabula facer
Votiva paries, indicat vuida,
Suspendisse potenti
Vestimenta maris Deo.*

Il est à cette heure temps d'en parler ouvertement. Mais tout ainsi comme à un autre, ie dirois à l'aventure, Mon amy tu refuses, l'amour de ton temps a peu de commerce avec la foy & la prudence ;

*hæc si tu postules
Ratione certa facere, nihilo plus agas,
Quam si des operam, ut cum ratione insanias.*

Aussi au rebours, si c'estoit à moy de recommencer, ce seroit certes le mesme train & par mesme progresz, pour infructueux qu'il me peult estre. L'insuffisance & la sottise est louable en vne action meslouable. Autant que ie m'eslongne de leur humeur en cela, ie m'approche de la mienne. Au demeurant, en ce marché, ie ne me laissois pas tout aller : ie m'y plaisois, mais ie ne m'y oublois pas : ie reseruois en son entier, ce peu de sens & de discretion, que Nature m'a donné, pour leur seruice, & pour le mien : vn peu d'esmotion, mais point de resuerie. Ma conscience s'y engageoit aussi, iusques à la desbauche & dissolution, mais iusques à l'ingratitude, trahison, malignité, & cruauté, non. Je n'achetois pas le plaisir de ce vice à tout prix : & me contentois de son propre & simple coust. *Nullum intra se vitium est.* Je hay quasi à pareille mesure vne oyssuete croupie & endormie, comme vn embesongnement espineux & penible. L'vn me pince, l'autre m'assoupit. J'ayme autant les bleffeurs, comme les meurtrisseurs, & les coups trenchans, comme les coups orbes. J'ay trouué en ce marché, quand i'y estois plus propre, vne iuste moderation entre ces deux extremitez. L'amour est vne agitation esueillee, viue, & gaye. Je n'en estois ny troublé, ny affligé, mais i'en estois eschauffé, & encores alteré : il s'en faut arrester là. Elle n'est nuisible qu'aux fols. Vn ieune homme demandoit au philosophe Panetius, s'il sieroit bien au sage d'estre amoureux : Laissons là le sage, respondit-il, mais toy & moy, qui ne le sommes pas, ne nous engageons en chose si esmeuë & violente, qui nous esclauie à autrui, & nous rende contemptibles à nous. Il disoit vray : qu'il ne faut pas fier chose de soy si precipiteuse, à vne ame qui n'aye dequoy

en foustenir les venues, & dequoy rabatre par effect la parole d'Agésilas, que la prudence & l'amour ne peuuent ensemble. C'est vne vaine occupation, il est vray, melleante, honteuse, & illegitime. Mais à la conduire en cette façon, ie l'estime salubre, propre à desgourdir vn esprit, & vn corps poissant. Et comme medecin, l'ordonnerois à vn homme de ma forme & condition, autant volontiers qu'aucune autre recepte : pour l'esueilleir & tenir en force bien auant dans les ans, & le dilaier des prises de la vieillesse. Pendant que nous n'en sommes qu'aux fauxbourgs, que le pouls bat encores,

*Dum nouz canities, dum prima & recta senectus,
Dum superest Lachesi quod torqueat, & pedibus me
Porto meis, nullo dextram subeunte bacillo,*

nous auons besoing d'estre sollicitez & chatouillez, par quelque agitation mordicante, comme est cette-cy. Voyez combien elle a rendu de ieunesse, de vigueur & de gayeté, au sage Anacreon. Et Socrates, plus vieil que ie ne suis, parlant d'un obiect amoureux : M'estant, dit-il, appuyé contre son espaulle, de la mienne, & approché ma teste à la sienne, ainsi que nous regardions ensemble dans vn liure, ie senty sans mentir, soudain vne piqueure dans l'espaulle, comme de quelque morsure de beste; & fus plus de cinq iours depuis, qu'elle me fourmilloit : & m'escoula dans le cœur vne demangeaison continuelle. Vn attouchement, & fortuite, & par vne espaulle, aller eschauffer, & alterer vne ame refroidie, & esneruee par l'age, & la premiere de toutes les humaines, en reformation. Pourquoi non dea? Socrates estoit homme, & ne vouloit ny estre ny sembler autre chose. La philosophie n'estriue

point contre les voluptez naturelles, pourueu que la mesure y soit ioincte : & en presche la moderation, non la fuitte. L'effort de sa resistance s'employe contre les estrangeres & bastardes. Elle dit que les appetits du corps ne doiuent pas estre augmentez par l'esprit. Et nous aduertit ingenieusement, de ne vouloir point esueiller nostre faim par la saturité : de ne vouloir farcir, au lieu de remplir le ventre : d'euer toute iouissance, qui nous met en disette : & toute viande & breuuage, qui nous altere, & affame. Comme au seruice de l'amour elle nous ordonne, de prendre vn obiect qui satisface simplement au besoing du corps, qui n'esmeue point l'ame : laquelle n'en doit pas faire son faict, ains suyure nuement & assister le corps. Mais ay-ie pas raison d'estimer, que ces preceptes, qui ont pourtant d'ailleurs, selon moy, vn peu de rigueur, regardent vn corps qui face son office : & qu'à vn corps abbattu, comme vn estomach prosterné, il est excusable de le rechauffer & soustenir par art : & par l'entremise de la fantasie, luy faire reuenir l'appetit & l'allegresse, puis que de foy il l'a perdue? Pouuons nous pas dire, qu'il n'y a rien en nous, pendant cette prison terrestre, purement, ny corporel, ny spirituel : & qu'iniurieusement nous desmembrons vn homme tout vif : & qu'il semble y auoir raison, que nous nous portions enuers l'vsage du plaisir, aussi fauorablement aumoins, que nous faisons enuers la douleur? Elle estoit, pour exemple, vehemente, iusques à la perfection, en l'ame des saints par la poenitence. Le corps y auoit naturellement part, par le droict de leur colligance, & si pouuoit auoir peu de part à la cause : si ne se sont ils pas contentez qu'il suyuiſt nuement, & assistast l'ame affligee. Ils l'ont

affligé luy-mesme, de peines atroces & propres : affin qu'à l'enuy l'un de l'autre, l'ame & le corps plongeassent l'homme dans la douleur, d'autant plus salutaire, que plus aspre. En pareil cas, aux plaisirs corporels, est-ce pas iniustice d'en refroidir l'ame, & dire, qu'il l'y faille entrainer, comme à quelque obligation & nécessité contrainte & seruite? C'est à elle plustost de les couuer & fomentier : de s'y presenter & conuier : la charge de regir luy appartenant. Comme c'est aussi à mon aduis à elle, aux plaisirs, qui luy sont propres, d'en inspirer & infondre au corps tout le ressentiment que porte sa condition, & de s'estudier qu'ils luy soient doux & salutaires. Car c'est bien raison, comme ils disent, que le corps ne suyue point ses appetits au dommage de l'esprit. Mais pourquoy n'est-ce pas aussi raison, que l'esprit ne suiue pas les siens, au dommage du corps? Je n'ay point autre passion qui me tienne en haleine. Ce que l'auarice, l'ambition, les querelles, les procès, font à l'endroit des autres, qui comme moy, n'ont point de vacation assignee, l'amour le feroit plus commodément. Il me rendroit la vigilance, la sobriété, la grace, le soing de ma personne : r'asseurerait ma contenance, à ce que les grimaces de la vieillesse, ces grimaces difformes & pitoyables, ne vinsent à la corrompre : me remettrait aux estudes sains & sages, par où ie me peusse rendre plus estimé & plus aymé : ostant à mon esprit le desespoir de soy, & de son vsage, & le raccoinant à soy : me diuertiroit de mille penſees ennuyeuses, de mille chagrins melancholiques, que l'oyſiueté nous charge en tel aage, & le mauuais estat de nostre santé : reschaufferoit aumoins en songe, ce sang que nature abandonne : soustiendrait

le menton, & allongeroit vn peu les nerfs, & la vigueur & allegresse de la vie, à ce pauvre homme, qui s'en va le grand train vers sa ruine. Mais j'entens bien que c'est vne commodité fort mal-aisée à recouurer. Par foiblesse, & longue experience, nostre goust est deuenu plus tendre & plus exquis. Nous demandons plus, lors que nous apportons moins. Nous voulons le plus choisir, lors que nous meritions le moins d'estre acceptez. Nous cognoissans tels; nous sommes moins hardis, & plus deffians : rien ne nous peut asseurer d'estre aymez, veu nostre condition, & la leur. J'ay honte de me trouuer parmy cette verte & bouillante ieunesse,

*Cuius in indomito constantior inguine neruus,
Quàm noua collibus arbor inhaeret.*

Qu'irions nous presenter nostre misere parmy cette allegresse?

*Possint vt iuuenes visere feruidi
Multo non sine risu,
Dilapsam in cineres facem.*

Ils ont la force & la raison pour eux : faisons leur place : nous n'auons plus que tenir. Et ce germe de beauté naissante, ne se laisse manier à mains si gourdes, & pratiquer à moyens purs materiels. Car, comme respondit ce philosophe ancien, à celuy qui se moquoit, dequoy il n'auoit sceu gagner la bonne grace d'un tendron qu'il pourchassoit : Mon amy, le hameçon ne mord pas à du fromage si frais. Or c'est vn commerce qui a besoin de relation & de correspondance. Les autres plaisirs que nous receuons, se peuuent recognoistre par recompenses de nature diuerse : mais cettuy-cy ne se paye que de

mesme espee de monnoye. En verité en ce desduit, le plaisir que ie fay, chatouille plus doucement mon imagination, que celuy qu'on me fait. Or cil n'a rien de genereux, qui peut receuoir plaisir où il n'en donne point : c'est vne vile ame, qui veut tout deuoir, & qui se plaist de nourrir de la conference, avec les personnes auxquels il est en charge. Il n'y a beauré, ny grace, ny priuauté si exquise, qu'un galant homme deust desirer à ce prix. Si elles ne nous peuuent faire du bien que par pitié : i'ayme bien plus cher ne viure point, que de viure d'aumosne. Je voudrois auoir droit de le leur demander, au stile auquel i'ay veu quester en Italie : *Fate ben per voi* : ou à la guise que Cyrus exhortoit ses soldats, Qui m'aymera, si me suiue. R'alliez vous, me dira lon, à celles de vostre condition, que la compagnie de mesme fortune vous rendra plus aysees. O la forte composition & infipide !

nolo

Barbam vellere mortuo leoni.

Xenophon employe pour obiection & accusation, contre Menon, qu'en son amour il embesongna des obieets passants fleur. Je trouue plus de volupté à seulement veoir le iuste & doux meslange de deux ieunes beautés : ou à le seulement considerer par fantasie, qu'à faire moy mesme le second, d'un meslange triste & informe. Je resigne cet appetit fantastique, à l'Empereur Galba, qui ne s'addonnoit qu'aux chairs dures & vieilles : & à ce pauvre miserable,

*O ego di' faciant talem te cernere possim,
Charaque mutatis oscula ferre comis,
Amplexusque meis corpus non pingue lacertis !*

Et entre les premières laideurs, ie compte les beautés artificielles & forcees. Emenez ieune gars de Chio, pensant par des beaux attours, acquerir la beauté que nature luy ostoit, se presenta au philosophe Arcefilaus : & luy demanda, si vn sage se pourroit veoir amoureux : Ouy dea, respondit l'autre, pourueu que ce ne fust pas d'une beauté paree & sophistiquée comme la tienne. La laideur d'une vieilleſſe adouéc, est moins vieille, & moins laide à mon gré, qu'une autre peinte & liffée. Le diray-je, pourueu qu'on ne m'en prenne à la gorge ? L'amour ne me semble proprement & naturellement en sa saison, qu'en l'aage voisin de l'enfance :

*Quem si puellarum infereres choro,
Mille sagaces falleret hospites,
Discrimen obscurum, solutis
Grinibus, ambiguoque vultu.*

Et la beauté non plus. Car ce qu'Homere l'estend iusqu'à ce que le menton commence à s'ombrager, Platon même l'a remarqué pour rare. Et est notoire la cause pour laquelle le sophiste Dion appelloit les poils folets de l'adolescence, Aristogitons & Harmodiens. En la virilité, ie le trouue desia aucunement hors de son siege, non qu'en la vieilleſſe.

*Importunus enim transuolat aridas
Quercus.*

Et Marguerite Royné de Nauarre, alonge en femme, bien loing, l'auantage des femmes : ordonnant qu'il est saison à trente ans, qu'elles changent le titre de belles en bonnes. Plus courte possession nous luy donnons sur nostre vie, mieux nous en valons.

Voyez son port. C'est vn menton puerile, qui ne sçait en son eschole, combien on procede au rebours de tout ordre. L'estude, l'exercitation, l'vsage, font voyes à l'insuffisance : les nouices y regentent. *Amor ordinem nescit*. Certes sa conduicte a plus de galbe, quand elle est meslee d'inaduertance, & de trouble : les fautes, les succez contraires, y donnent pointe & grace. Pourueu qu'elle soit aspre & affamee, il chaut peu, qu'elle soit prudente. Voyez comme il va chancelant, chopant, & folastrant. On le met aux ceps, quand on le guide par art, & sageffe. Et contraint on sa diuine liberté, quand on le submet à ces mains barbares & calleuses. Au demeurant, ie leur oy souuent peindre cette intelligence toute spirituelle, & desdaigner de mettre en consideration l'interest que les sens y ont. Tout y sert. Mais ie puis dire auoir veu souuent, que nous auons excusé la foiblesse de leurs esprits, en faueur de leurs beautez corporelles, mais que ie n'ay point encore veu, qu'en faueur de la beauté de l'esprit, tant rassis, & meur soit-il, elles vueillent prester la main à vn corps, qui tombe tant soit peu en decadence. Que ne prend il enuie à quelqu'une, de faire cette noble harde Socratique, du corps à l'esprit, achetant au prix de ses cuisses, vne intelligence & generation philosophique & spirituelle : le plus haut prix où elle les puisse monter ? Platon ordonne en ses loix, que celuy qui aura faict quelque signalé & vtile exploit en la guerre, ne puisse estre refusé durant l'expedition d'icelle, sans respect de sa laideur ou de son aage, du baïsser, ou autre faueur amoureuse, de qui il la vueille. Ce qu'il trouue si iuste en recommandation de la valeur militaire, ne le peut il pas estre aussi, en recommandation de quelque autre

valeur? Et que ne prend il enuie à vne de preoccuper sur ses compagnes la gloire de cet amour chaste? chaste dis-ie bien,

*nam si quando ad prælia ventum est,
Vt quondam stipulis magnus sine viribus ignis
Incaßum furit.*

Les vices qui s'estouffent en la pensée, ne sont pas des pires. Pour finir ce notable commentaire, qui m'est eschappé d'un flux de caquet : flux impetueux par fois & nuisible,

*Vt missum sponsi furtiuo munere malum,
Procurrit casto virginis à gremio :
Quod miseræ oblitæ molli sub veste locatum,
Dum aduentu matris profilit, excutitur,
Atque illud prono præceps agitur decursu,
Huic manat tristi conscius ore rubor.*

Ie dis, què les males & femelles, sont iettez en mesme moule, sauf l'institution & l'usage, la difference n'y est pas grande. Platon appelle indifferement les vns & les autres, à la société de tous estudes, exercices, charges & vacations guerrieres & paisibles, en sa republique. Et le philosophe Antisthenes, estoit toute distinction entre leur vertu & la nostre. Il est bien plus aisé d'accuser l'un sexe, que d'ex-cuser l'autre. C'est ce qu'on dit, Le fourgon se moque de la paele.





Des Coches.

CHAPITRE VI.



Il est bien aisé à vérifier, que les grands auteurs, escriuans des causes, ne se seruent pas seulement de celles qu'ils estiment estre vrayes, mais de celles encores qu'ils ne croient pas, pourueu qu'elles ayent quelque inuention & beauté. Ils disent assez veritablement & vtilement, s'ils disent ingenieusement. Nous ne pouuons nous asseurer de la maistresse cause, nous en entassons plusieurs, pour voir si par rencontre elle se trouuera en ce nombre,

*Namque vnam dicere causam,
Non satis est, verum plures vnde vna tamen fit.*

Me demandez vous d'où vient cette coustume, de benire ceux qui esternuent? Nous produisons trois sortes de vent; celui qui sort par embas est trop sale : celui qui sort par la bouche, porte quelque reproche de gourmandise : le troisieme est l'esternement : & parce qu'il vient de la teste, & est sans blafme, nous luy faisons cet honnestre recueil.

Ne vous moquez pas de cette subtilité, elle est, dit-on, d'Aristote. Il me semble auoir veu en Plutarque (qui est de tous les auteurs que ie cognoisse, celuy qui a mieux meslé l'art à la nature, & le iugement à la science) rendant la cause du soulèvement d'estomach, qui aduient à ceux qui voyagent en mer, que cela leur arriue de crainte : ayant trouué quelque raison, par laquelle il prouue, que la crainte peut produire vn tel effect. Moy qui y suis fort subiect, sçay bien, que cette cause ne me touche pas. Et le sçay, non par argument, mais par necessaire experience. Sans alleguer ce qu'on m'a dict, qu'il en arriue de mesme souuent aux bestes, spécialement aux pourceaux, hors de toute apprehension de danger : & ce qu'un mien cognoissant, m'a tesmoigné de foy, qu'y estant fort subiet, l'enuie de vomir luy estoit passée, deux ou trois fois, se trouuant pressé de frayeur, en grande tourmente. Comme à cet ancien : *Peius vexabar quàm vt periculum mihi succurreret*. Je n'euz iamais peur sur l'eau : comme ie n'ay aussi ailleurs (& s'en est assez souuent offert de iustes, si la mort l'est) qui m'ait troublé ou esblouy. Elle naist par fois de faute de iugement, comme de faute de cœur. Tous les dangers que j'ay veu, ç'a esté les yeux ouuerts, la veuë libre, saine, & entiere. Encore faut-il du courage à craindre. Il me seruit autrefois au prix d'autres, pour conduire & tenir en ordre ma fuite, qu'elle fust sinon sans crainte, toutesfois sans effroy, & sans estonnement. Elle estoit esmeue, mais non pas estourdie ny esperdue. Les grandes ames vont bien plus outre, & representent des fuites, non rassises seulement, & saines, mais fieres. Difons celle qu'Alcibiades recite de Socrates, son compaignon d'armes : le. le trouuay,

dit-il, apres la route de nostre armee, luy & Lachez, des derniers entre les fuyans : & le consideray tout à mon aise, & en seureté, car i'estois sur vn bon cheual, & luy à pied, & auions ainfi combatu. Je remarquay premierement, combien il monstroït d'auisement & de resolution, au prix de Lachez : & puis la brauerie de son marcher, nullement different du sien ordinaire : sa veue ferme & reglee, considerant & iugeant ce qui se passoit autour de luy : regardant tantost les vns, tantost les autres, amis & ennemis, d'une façon, qui encourageoit les vns, & signifioit aux autres, qu'il estoit pour vendre bien cher son sang & sa vie, à qui essayeroit de la luy oster, & se sauuerent ainfi : car volontiers on n'attaque pas ceux-cy, on court apres les effraiez. Voylà le tesmoignage de ce grand capitaine : qui nous apprend ce que nous essaïons tous les iours, qu'il n'est rien qui nous iette tant aux dangers, qu'une faim inconsiderée de nous en mettre hors. *Quo timoris minus est, eo minus ferme periculi est.* Nostre peuple a tort, de dire, celui-là craint la mort, quand il veut exprimer, qu'il y songe, & qu'il la preuoit. La preuoyance conuient egallement à ce qui nous touche en bien, & en mal. Considerer & iuger le danger, est aucunement le rebours de s'en estonner. Je ne me sens pas assez fort pour soutenir le coup, & l'impetuosité, de cette passion de la peur, ny d'autre vehemente. Si i'en estois vn coup vaincu, & atterré, ie ne m'en releuerois iamais bien entier. Qui auroit fait perdre pied à mon ame, ne la remettrait iamais droicte en sa place. Elle se retaste & recherche trop viuement & profondement. Et pourtant, ne lairroit iamais resfoudre & consolider la playe qui l'auroit percee. Il m'a bien pris qu'aucune

maladie ne me l'ayt encore desmise. A chasque charge qui me vient, ie me presente & oppose, en mon haut appareil. Ainsi la premiere qui m'emporteroit, me mettroit sans ressource. Je n'en fais point à deux. Par quelque endroit que le rauage fauçast ma leuee, me voyla ouuert, & noyé sans remede. Epicurus dit, que le sage ne peut iamais passer à vn estat contraire. I'ay quelque opinion de l'enuers de cette sentence; que qui aura esté vne fois bien fol, ne fera nulle autre fois bien sage. Dieu me donne le froid selon la robe, & me donne les passions selon le moyen que i'ay de les soustenir. Nature m'ayant descouuert d'un costé, m'a couuert de l'autre : m'ayant desarmé de force, m'a armé d'insensibilité, & d'une apprehension reglee, ou mouffe. Or ie ne puis souffrir long temps, & les souffrois plus difficilement en ieunesse, ny coche, ny litiere, ny bateau, & hay toute autre voiture que de cheual, & en la ville, & aux champs. Mais ie puis souffrir la litiere, moins qu'un coche : & par mesme raison, plus aisement vne agitation rude sur l'eau, d'où se produist la peur, que le mouuement qui se sent en temps calme. Par cette legere secousse, que les auirons donnent, desrobant le vaisseau sous nous, ie me sens brouiller, ie ne sçay comment, la teste & l'estomach : comme ie ne puis souffrir sous moy un siege tremblant. Quand la voile, ou le cours de l'eau, nous emporte esgallement, ou qu'on nous touë, cette agitation vnue, ne me blesse aucunement. C'est un remuement interrompu, qui m'offense : & plus, quand il est languissant. Je ne sçauois autrement peindre sa forme. Les medecins m'ont ordonné de me presser & sangler d'une seruiette le bas du ventre, pour remedier à cet accident : ce que ie n'ay point essayé,

ayant accoustumé de luster les deffauts qui sont en moy, & les dompter par moy-mesme. Si i'en auoy la memoire suffisamment informee, ie ne pleindroy mon temps à dire icy l'infinie varieté, que les histoires nous presentent de l'vsage des coches, au seruice de la guerre : diuers selon les nations, selon les siecles : de grand effect, ce me semble, & necessité. Si que c'est merueille, que nous en ayons perdu toute cognoissance. I'en diray seulement cecy, que tout freschement, du temps de nos peres, les Hongres les mirent tres-vtilement en besongne contre les Turcs : en chacun y ayant vn rondellier & vn mousquetaire, & nombre de harquebuzes rengees, prestes & chargees : le tout couuert d'une pauesade, à la mode d'une galliotte. Ils faisoient front à leur bataille de trois mille tels coches : & apres que le canon auoit ioué, les faisoient tirer, & aualler aux ennemys cette salue, auant que de taster le reste : qui n'estoit pas vn leger auancement : ou descochoient lesdits coches dans leurs escadrons, pour les rompre & y faire iour : outre le secours qu'ils en pouuoient prendre, pour flanquer en lieu chatouilleux, les troupes marchants en la campagne : ou à couvrir vn logis à la haste, & le fortifier. De mon temps, vn Gentil-homme, en l'une de nos frontieres, impost de sa personne, & ne trouuant cheual capable de son poids, ayant vne querelle, marchoit par pais en coche, de mesme cette peinture, & s'en trouuoit tres-bien. Mais laissons ces coches guerriers. Comme si leur neantise n'estoit assez cognue à meilleures enseignes, les derniers Roys de nostre premiere race marchaient par pais en vn chariot mené de quatre bœufs. Marc Antoine fut le premier, qui se fit trainer à Rome, & vne garfe

menestriere quand & luy, par des lyons attelés à vn coche. Heliogabalus en fit depuis autant, se disant Cibelé la mere des Dieux : & aussi par des tigres, contrefaisant le Dieu Bacchus : il attela aussi par fois deux cerfs à son coche : & vne autre fois quatre chiens : & encore quatre garces nues, se faisant trainer par elles, en pompe, tout nud. L'Empereur Firmus fit mener son coche, à des autruches de merueilleuse grandeur, de maniere qu'il sembloit plus voler que rouler. L'estrangeté de ces inuentions, me met en teste cett' autre fantasie : Que c'est vne espece de pusillanimité, aux monarques, & vn tesmoignage de ne sentir point assez, ce qu'ils sont, de trauailler à se faire valloir & paroistre, par despences excessiues. Ce seroit chose excusable en pays estranger : mais parmy ses subiects, où il peut tout, il tire de sa dignité, le plus extreme degré d'honneur, où il puisse arriuer. Comme à vn Gentil-homme, il me semble, qu'il est superflu de se vestir curieusement en son priué : sa maison, son train, sa cuisine respondent assez de luy. Le conseil qu'Isocrates donne à son Roy, ne me semble sans raison : Qu'il soit splendide en meubles & vtenfiles : d'autant que c'est vne despenſe de duree, qui passe iusques à ses successeurs : & qu'il fuye toutes magnificences, qui s'escoulent incontinent & de l'usage & de la memoire. L'aymois à me parer quand i'estoy cadet, à faute d'autre parure : & me soit bien. Il en est sur qui les belles robes pleurent. Nous auons des comtes merueilleux de la frugalité de nos Roys au tour de leurs personnes, & en leurs dons : grands Roys en credit, en valeur, & en fortune. Demosthenes combat à outrance, la loy de sa ville, qui assignoit les deniers publics aux pompes des ieux, & de

leurs festes. Il veut que leur grandeur se montre, en quantité de vaisseaux bien equippez, & bonnes armées bien fournies. Et a lon raison d'accuser Theophrastus, qui establit en son liure des richesses; vn aduis contraire : & maintient telle nature de despense, estre le vray fruit de l'opulence. Ce sont plaisirs, dit Aristote, qui ne touchent que la plus basse commune : qui s'euanouissent de la souuenance aussi tost qu'on en est rassasié : & desquels nul homme iudicieux & graue ne peut faire estime. L'employtme sembleroit bien plus royale, comme plus vtile, iuste & durable, en ports, en haures, fortifications & murs : en bastiments somptueux, en eglises, hospitaux, colleges, reformation de ruës & chemins : en quoy le Pape Gregoire treziesme lairra sa memoire recommandable à long temps : & en quoy nostre Royne Catherine tesmoigneroit à longues annees sa liberalité naturelle & munificence, si ses moyens suffisoient à son affection. La Fortune m'a fait grand desplaisir d'interrompre la belle structure du Pont neuf, de nostre grand' ville, & m'oster l'espoir auant mourir d'en veoir en train le seruice. Outre ce, il semble aux subiects spectateurs de ces triumphes, qu'on leur fait montre de leurs propres richesses, & qu'on les festoye à leurs despens. Car les peuples presument volontiers des Roys, comme nous faisons de nos valets : qu'ils doiuent prendre soing de nous apprestre en abondance tout ce qu'il nous faut, mais qu'ils n'y doiuent aucunement toucher de leur part. Et pourtant l'Empereur Galba, ayant pris plaisir à vn musicien pendant son souper, se fit porter sa boëte, & luy donna en sa main vne poignée d'escus, qu'il y pescha, auec ces paroles : Ce n'est pas du public, c'est du mien. Tant y a,

qu'il aduient le plus souuent, que le peuple a raison : & qu'on repaist ses yeux, de ce dequoy il auoit à paistre son ventre. La liberalité mesme n'est pas bien en son lustre en main souueraine : les priuez y ont plus de droict. Car à le prendre exactement, vn Roy n'a rien proprement sien; il se doit soy-mesmes à autrui. La iurisdiction ne se donne point en faueur du iuridiciant : c'est en faueur du iuridicié. On fait vn superieur, non iamais pour son profit, ains pour le profit de l'inferieur : & vn medecin pour le malade, non pour soy. Toute magistrature, comme tout art, iette sa fin hors d'elle. *Nulla ars in se versatur*. Parquoy les gouuerneurs de l'enfance des Princes, qui se piquent à leur imprimer cette vertu de largesse : & les preschent de ne sçauoir rien refuser, & n'estimer rien si bien employé, que ce qu'ils donront (instruction que i'ay veu en mon temps fort en credit) ou ils regardent plus à leur proufit, qu'à celuy de leur maistre : ou ils entendent mal à qui ils parlent. Il est trop aysé d'imprimer la liberalité, en celuy, qui a dequoy y fournir autant qu'il veut, aux despens d'autrui. Et son estimation se reglant, non à la mesure du present, mais à la mesure des moyens de celuy, qui l'exerce, elle vient à estre vaine en mains si puissantes. Ils se trouuent prodiges, auant qu'ils soyent liberaux. Pourtant est elle de peu de recommandation, au prix d'autres vertus royales. Et la seule, comme disoit le tyran Dionysius, qui se comporte bien avec la tyrannie mesme. Je luy apprendroy plustost ce verfet du laboureur ancien,

Τῇ χειρὶ δεῖ σπείρειν, ἀλλὰ μὴ διπλὴ τῷ θυλακίῳ.

Qu'il faut à qui en veut retirer fruit, semer de la

main, non pas verser du sac : il faut espandre le grain, non pas le respandre : & qu'ayant à donner, ou pour mieux dire, à payer, & rendre à tant de gens, selon qu'ils ont deseruy, il en doibt estre loyal & auisé dispenfateur. Si la liberalité d'un Prince est sans discretion & sans mesure, ie l'ayme mieux auare. La vertu Royale semble consister le plus en la iustice. Et de toutes les parties de la iustice, celle là remerque mieux les Roys, qui accompagne la liberalité. Car ils l'ont particulièrement referuee à leur charge : là où toute autre iustice, ils l'exercent volontiers par l'entremise d'autrui. L'immoderee largesse, est un moyen foible à leur acquerir bien-vueillance : car elle rebute plus de gens, qu'elle n'en pratique : *Quo in plures usus fis, minus in multos uti possis. Quid autem est stultius, quam, quod libenter facias, curare ut id diutius facere non possis?* Et si elle est employee sans respect du merite, fait vergongne à qui la reçoit : & se reçoit sans grace. Des tyrans ont esté sacrifiez à la hayne du peuple, par les mains de ceux mesme, qu'ils auoyent iniquement auancez : telle maniere d'hommes, estimants afferuer la possession des biens indeuement receuz, s'ils montrent auoir à mespris & hayne, celuy duquel ils les tenoyent, & se r'allient au iugement & opinion commune en cela. Les subiects d'un Prince excessif en dons, se rendent excessifs en demandes : ils se taillent, non à la raison, mais à l'exemple. Il y a certes souueut, dequoy rougir, de nostre impudence. Nous sommes surpayez selon iustice, quand la recompence esgalle nostre seruice : car n'en deuons nous rien à nos Princes d'obligation naturelle? S'il porte nostre despence, il fait trop : c'est assez qu'il l'ayde : le surplus s'appelle bien-faict,

lequel ne se peut exiger : car le nom mesme de la liberalité sonne liberté. A nostre mode, ce n'est iamais fait : le reçu ne se met plus en compte : on n'ayme la liberalité que future. Par quoy plus vn Prince s'espuise en donnant, plus il s'appauurit d'amys. Comment assouiroit il les enuies, qui croissent, à mesure qu'elles se remplissent ? Qui a sa pensée à prendre, ne l'a plus à ce qu'il a prins. La conuoitise n'a rien si propre que d'estre ingrate. L'exemple de Cyrus ne duira pas mal en ce lieu, pour seruir aux Roys de ce temps, de touche, à recognoistre leurs dons, bien ou mal employez : & leur faire veoir, combien cet Empereur les assenoit plus heureusement, qu'ils ne font. Par où ils sont reduits à faire leurs emprunts, apres sur les subiects incognus, & plustost sur ceux, à qui ils ont fait du mal, que sur ceux, à qui ils ont fait du bien : & n'en reçoient aydes, où il y aye rien de gratuit, que le nom. Crœsus luy reprochoit sa largesse : & calculoit à combien se monteroit son thresor, s'il eust eu les mains plus restreintes. Il eut enuie de iustifier sa liberalité : & despeschant de toutes parts, vers les grands de son estat, qu'il auoit particulièrement auancez : pria chacun de le secourir, d'autant d'argent qu'il pourroit, à vne sienne necessité : & le luy enuoyer par declaration. Quand tous ces bordereaux luy furent apportez, chacun de ses amis, n'estimant pas que ce fust assez faire, de luy en offrir seulement autant qu'il en auoit reçu de sa munificence, y en meslant du sien propre beaucoup, il se trouua, que cette somme se montoit bien plus que ne disoit l'espargne de Crœsus. Sur quoy Cyrus : Je ne suis pas moins amoureux des richesses, que les autres Princes, & en suis plustost plus mesnager.

Vous voyez à combien peu de mise i'ay acquis le threfor inestimable de tant d'amis : & combien ils me sont plus fideles thresoriers, que ne seroient des hommes mercenaires, sans obligation, sans affection : & ma cheuance mieux logee qu'en des coffres, appellant sur moy la haine, l'enuie, & le mespris des autres Princes. Les Empereurs tiroient excuse à la superfluité de leurs ieux & montres publiques, de ce que leur autorité dependoit aucunement, au moins par apparence, de la volonté du peuple Romain : lequel auoit de tout temps accoustumé d'estre flaté par telle sorte de spectacles & d'excez. Mais c'estoyent particuliers qui auoyent nourry cette coustume, de gratifier leurs concitoyens & compagnons : principalement sur leur bourse, par telle profusion & magnificence. Elle eut tout autre gouft, quand ce furent les maistres qui vindrent à l'imiter. *Pecuniarum translatio à iustis dominis ad alienos non debet liberalis videri.* Philippus de ce que son fils essayoit par presents, de gagner la volonté des Macedoniens, l'en tança par vne lettre, en cette maniere. Quoy? as tu enuie, que tes subiects te tiennent pour leur boursier, non pour leur Roy? Veux tu les pratiquer? Pratique les, des bien-faits de ta vertu, non des bien-faits de ton coffre. C'estoit pourtant vne belle chose, d'aller faire apporter & planter en la place aux arenes, vne grande quantité de gros arbres, tous branchus & tous verts, representans vne grande forest ombrageuse, despartie en belle symmetrie : & le premier iour, ietter là dedans mille austruches, mille cerfs, mille sangliers, & mille dains, les abandonnant à piller au peuple : le lendemain faire affommer en sa presence, cent gros lyons, cent leopards, & trois cens

ours : & pour le troisieme iour, faire combattre à outrance, trois cens pairs de gladiateurs, comme fit l'Empereur Probus. C'estoit aussi belle chose à voir, ces grands amphitheatres encroustrez de marbre au dehors, labouré d'ouvrages & statues, le dedans reluisant de rares enrichissemens,

Baltheus en gemmis, en illita porticus auro.

Tous les costez de ce grand vuide, remplis & enuironnez depuis le fons iusques au comble, de foixante ou quatre vingts rangs d'eschelons, aussi de marbre, couuers de carreaux,

exeat, inquit,
Si pudor est, & de puluino surgat equestri,
Cuius res legi non sufficit,

où se peussent renger cent mille hommes, assis à leur aise. Et la place du fons, où les ieux se iouoyent, la faire premierement par art, entr'ouvir & fendre en creuasses, representant des antres qui vomissoient les bestes destinees au spectacle : & puis secondement, l'inonder d'une mer profonde, qui charioit force monstres marins, chargée de vaisseaux armez à représenter une bataille navale : & tiercement, l'applanir & assécher de nouveau, pour le combat des gladiateurs : & pour la quatrieme façon, la sabler de vermillon & de storax, au lieu d'arene, pour y dresser un festin solemne, à tout ce nombre infiny de peuple : le dernier acte d'un seul iour.

quoties nos descenditis arenæ
Vidimus in partes, ruptaque voragine terræ
Emersisse feras, & iisdem sæpe latebris
Aurea cum croceo creuerunt arbuta libro.

*Nec solum nobis blueftria cernere monstra
Contigit, equoreos ego cum certantibus vrfs
Speflani vitulos, & equorum nomine dignum,
Sed deforme pecus.*

Quelquefois on y a fait naistre, vne haute montaigne pleine de fruitiers & arbres verdoyans, rendant par son feste, vn ruisseau d'eau, comme de la bouche d'une viue fontaine. Quelquefois on y promena vn grand nauire, qui s'ouuroit & desprenoit de soy-mesmes, & apres auoir vomy de son ventre, quatre ou cinq cens bestes à combat, se resserroit & s'esuouissoit, sans ayde. Autresfois, du bas de cette place, ils faisoient eslancer des surgeons & filets d'eau, qui reiallissoient contremont, & à cette hauteur infinie, alloient arroufant & embaumant cette infinie multitude. Pour se couvrir de l'iniure du temps, ils faisoient tendre cette immense capacité, tantost de voyles de pourpre labourez à l'eguille, tantost de soye, d'une ou autre couleur, & les auançoient & retiroient en vn moment, comme il leur venoit en fantasie,

*Quamuis non modico caleant spectacula sole,
Vela reducuntur cum venit Hermogenes.*

Les rets aussi qu'on mettoit au deuant du peuple, pour le defendre de la violence de ces bestes eslan- cees, estoient ryssus d'or,

*ambo quoque torta refulgent
Retia.*

S'il y a quelque chose qui soit excusable en tels excez, c'est, où l'inuention & la nouueauté, fournit d'admiration, non pas la despence. En ces vanitez

mesme, nous descouurons combien ces siecles estoient fertiles d'autres esprits que ne sont les nostres. Il va de cette sorte de fertilité, comme il fait de toutes autres productions de la Nature. Ce n'est pas à dire qu'elle y ayt lors employé son dernier effort. Nous n'allons point, nous rodons plus tost, & tourneurons çà & là : nous nous promenons sur nos pas. Je crains que nostre cognoissance soit foible en tous sens. Nous ne voyons ny gueres loing, ny guere arriere. Elle embrasse peu, & vit peu : courte & en estendue de temps, & en estendue de matiere.

*Vixere fortes ante Agamemnona
Multi, sed omnes illacrymabiles
Vrgentur, ignotique longa
Nocte.*

*Et supera bellum Troianum & funera Troiæ,
Multi alias alij quoque res cecinere poetæ.*

Et la narration de Solon, sur ce qu'il auoit appris des prestres d'Ægypte de la longue vie de leur estat, & maniere d'apprendre & conseruer les histoires estrangeres, ne me semble tesmoignage de refus en cette consideration. *Si interminatam in omnes partes magnitudinem regionum videremus, & temporum, in quam se iniciens animus & intendens, ita latè longue peregrinatur, vt nullam oram vltimi videat, in qua possit insistere : in hac immensitate infinita, vis innumerabilium appareret formarum.* Quand tout ce qui est venu par rapport du passé, iusques à nous, seroit vray, & seroit sçeu par quelqu'un, ce seroit moins que rien, au prix de ce qui est ignoré. Et de cette mesme image du monde, qui coule pendant que nous y sommes, combien chetive & raccourcie est la cognoi-

sance des plus curieux ? Non seulement des euemens particuliers, que Fortune rend souuent exemplaires & poisans : mais de l'estat des grandes polices & nations, il nous en eschappe cent fois plus, qu'il n'en vient à nostre science. Nous nous escrivons, du miracle de l'inuention de nostre artillerie, de nostre impression : d'autres hommes, vn autre bout du monde à la Chine, en iouyssoit mille ans auparavant. Si nous voyions autant du monde, comme nous n'en voyons pas, nous apperceurions, comme il est à croire, vne perpetuelle multiplication & vicissitude de formes. Il n'y a rien de seul & de rare, eu esgard à Nature, ouy bien eu esgard à nostre cognoissance : qui est vn miserable fondement de nos regles, & qui nous represente volontiers vne tres-fausse image des choses. Comme vainement nous concluons aujourd'huy, l'inclination & la decrepitude du monde, par les arguments que nous tirons de nostre propre foiblesse & decadence :

Idmque adeo affecta est ætas, affectaque tellus.

Ainsi vainement concluait cettuy-là, sa naissance & ieunesse, par la vigueur qu'il voyoit aux esprits de son temps, abondans en nouuelletez & inuentions de diuers arts :

*Verum, vt opinor, habet nouitatem summa, recensque
Natura est mundi, neque pridem exordia cepit :
Quare etiam quædam nunc artes expoliuntur,
Nunc etiam augefcunt, nunc addita nauigijs sunt
Multa.*

Nostre monde vient d'en trouuer vn autre (& qui nous respond si c'est le dernier de ses freres, puis

que les Dæmons, les Sybilles, & nous, auons ignoré cettuy-cy iufqu'à cette heure?) non moins grand, plain, & membru, què luy : toutesfois si nouueau & si enfant, qu'on luy apprend encore fon a, b, c. Il n'y a pas cinquante ans, qu'il ne fçauoit, ny lettres, ny poix, ny mesure, ny vestemens, ny bleds, ny vignes. Il estoit encore tout nud, au giron, & ne viuoit que des moyens de fa mere nourrice. Si nous concluons bien, de nostre fin, & ce poète de la ieunesse de son siecle, cet autre monde ne fera qu'entrer en lumiere, quand le nostre en sortira. L'vniuers tombera en paralysie : l'vn membre sera perclus, l'autre en vigueur. Bien crains-ie, que nous aurons tref-fort hasté sa declinaison & sa ruyne, par nostre contagion : & que nous luy aurons bien cher vendu nos opinions & nos arts. C'estoit vn monde enfant : si ne l'auons nous pas fouëté & soubmis à nostre discipline, par l'auantage de nostre valeur, & forces naturelles : ny ne l'auons pratiqué par nostre iustice & bonté : ny subiugué par nostre magnanimité. La plus part de leurs responce, & des negotiations faictes auec eux, tesmoignent qu'ils ne nous deuoient rien en clarté d'esprit naturelle, & en pertinence. L'espouuentable magnificence des villes de Cusco & de Mexico, & entre plusieurs choses pareilles, le iardin de ce Roy, où tous les arbres, les fruitz, & toutes les herbes, selon l'ordre & grandeur qu'ils ont en vn iardin, estoient excellemment formees en or : comme en son cabinet, tous les animaux, qui naissoient en son estat & en ses mers : & la beauté de leurs ourages, en pierrerie, en plume, en cotton, en la peinture, montrent qu'ils ne nous cedoient non plus en l'industrie. Mais quant à la deuotion, obseruance des loix, bonté, libera-

lié, loyauté, franchise, il nous a bien seruy, de n'en auoir pas tant qu'eux. Ils se sont perdus par cet aduantage, & vendus, & trahis eux mesmes. Quant à la hardiesse & courage, quant à la fermeté, constance, resolution contre les douleurs & la faim, & la mort, ie ne craindrois pas d'opposer les exemples, que ie trouuerois parmy eux, aux plus fameux exemples anciens, que nous ayons aux memoires de nostre monde pardeçà. Car pour ceux qui les ont subiuguez, qu'ils ostent les ruses & batailles, dequoy ils se sont seruis à les piper : & le iuste estoñnement, qu'apportoit à ces nations là, de voir arriuer si inopinement des gens barbus, diuers en langage, religion, en forme, & en contenance : d'un endroit du monde si esloigné, & où ils n'auoient iamais sçeu qu'il y eust habitation quelconque : montez sur des grands monstres incongneuz : contre ceux, qui n'auoient non seulement iamais veu de cheual, mais beste quelconque, duiſte à porter & soustenir homme ny autre charge : garnis d'une peau luyſante & dure, & d'une arme trenchante & resplendissante : contre ceux, qui pour le miracle de la lueur d'un miroir ou d'un cousteau, alloient eschangeant vne grande richesse en or & en perles, & qui n'auoient ny science ny matiere, par où tout à loysir, ils sçeussent percer nostre acier : adioustez y les foudres & tonnerres de nos pieces & harquebuses, capables de troubler Cæsar mesme, qui l'en eust surpris autant inexperimenté : & à cett' heure, contre des peuples nuds, si ce n'est où l'inuention estoit arriuee de quelque tyſſu de cotton : sans autres armes pour le plus, que d'arcs, pierres, bastons & boucliers de bois : des peuples surpris sous couleur d'amitié & de bonne foy, par

la curiosité de veoir des choses estrangeres & inconnues : ostez, dis-je, aux conquerans cette disparité, vous leur ostez toute l'occasion de tant de victoires. Quand ie regarde à cette ardeur indomtable, dequoy tant de milliers d'hommes, femmes, & enfans, se presentent & reientent à tant de fois, aux dangers ineuitables, pour la deffence de leurs dieux, & de leur liberté : cette genereuse obstination de souffrir toutes extremitez & difficultez, & la mort, plus volontiers, que de se soubsmettre à la domination de ceux, de qui ils ont esté si honteusement abusez : & aucuns, choisissans plustost de se laisser defaillir par faim & par ieusne, estans pris, que d'accepter le viure des mains de leurs ennemis, si vilement victorieuses : ie preuois que à qui les eust attaquez pair à pair, & d'armes, & d'experience, & de nombre, il y eust fait aussi dangereux, & plus, qu'en autre guerre que nous voyons. Que n'est tombee sous Alexandre, ou sous ces anciens Grecs & Romains, vne si noble conqueste : & vne si grande mutation & alteration de tant d'empires & de peuples, sous des mains, qui eussent doucement poly & defriché ce qu'il y auoit de sauuage : & eussent conforté & promeu les bonnes semences, que Nature y auoit produit : meslant non seulement à la culture des terres, & ornement des villes, les arts de deça, en tant qu'elles y eussent esté necessaires, mais aussi, meslant les vertus Grecques & Romaines, aux origineles du pays ? Quelle reparation eust-ce esté, & quel amendement à toute cette machine, que les premiers exemples & deportemens nostres, qui se font presentez par delà, eussent appellé ces peuples, à l'admiration, & imitation de la vertu, & eussent dressé entre-eux & nous, vne fraternelle société

& intelligence? Combien il eust esté aisé, de faire son profit, d'ames si neuues, si affamees d'apprentissage, ayants pour la plus part, de si beaux commencemens naturels? Au rebours, nous nous sommes seruis de leur ignorance, & inexpérience, à les plier plus facilement vers la trahison, luxure, auarice, & vers toute forte d'inhumanité & de cruauté, à l'exemple & patron de nos mœurs. Qui mit iamais à tel prix, le seruice de la mercadence & de la trafique? Tant de villes rafces, tant de nations exterminées, tant de millions de peuples, passez au fil de l'espee, & la plus riche & belle partie du monde bouleuersee, pour la negotiation des perles & du poiure. Mechaniques victoires. Iamais l'ambition, iamais les inimitiez publiques, ne poufferent les hommes, les vns contre les autres, à si horribles hostilitez, & calamitez si miserables. En costoyant la mer à la queste de leurs mines, aucuns Espagnols prindrent terre en vne contree fertile & plaisante, fort habitee : & firent à ce peuple leurs remonstrances accoustumees : Qu'ils estoient gens paisibles, venans de loingtains voyages, enuoyez de la part du Roy de Castille, le plus grand Prince de la terre habitable, auquel le Pape, representant Dieu en terre, auoit donné la principauté de toutes les Indes. Que s'ils vouloient luy estre tributaires, ils seroient tref-benignement traictez : leur demandoient des viures, pour leur nourriture, & de l'or pour le besoing de quelque medecine. Leur remontroient au demeurant, la creance d'un seul Dieu, & la verité de nostre religion, laquelle ils leur conseilloient d'accepter, y adioustans quelques menasses. La responce fut telle : Que quand à estre paisibles, ils n'en portoient pas la mine, s'ils l'estoient. Quant à leur Roy,

puis qu'il demandoit, il deuoit estre indigent, & necessiteux : & celuy qui luy auoit fait cette distribution, homme ayment dissension, d'aller donner à vn tiers, chose qui n'estoit pas sienne, pour le mettre en debat contre les anciens possesseurs. Quant aux viures, qu'ils leur en fourniroient : d'or, ils en auoient peu : & que c'estoit chose qu'ils mettoient en nulle estime, d'autant qu'elle estoit inutile au seruice de leur vie, là où tout leur soin regardoit seulement à la passer heureusement & plaifamment : pourtant ce qu'ils en pourroient trouuer, sauf ce qui estoit employé au seruice de leurs dieux, qu'ils le prinssent hardiment. Quant à vn seul Dieu, le discours leur en auoit pleu : mais qu'ils ne vouloient changer leur religion, s'en estans si vtilement seruis si long temps : & qu'ils n'auoient accoustumé prendre conseil, que de leurs amis & cognoissans. Quant aux menasses, c'estoit signe de faute de iugement, d'aller menassant ceux, desquels la nature, & les moyens estoient incongnuz. Ainsi qu'ils se despeschassent promptement de vuyder leur terre, car ils n'estoient pas accoustumez de prendre en bonne part, les honnestetez & remonstrances de gens armez, & estrangers : autrement qu'on feroit d'eux, comme de ces autres, leur montrant les testes d'aucuns hommes iusticiez autour de leur ville. Voylà vn exemple de la balbucie de cette enfance. Mais tant y a, que ny en ce lieu-là, ny en plusieurs autres, où les Espagnols ne trouuerent les marchandises qu'ils cherchoient, ils ne feirent arrest ny entreprinse : quelque autre commodité qu'il y eust : tesmoing mes Cannibales. Des deux les plus puiffans Monarques de ce monde là, & à l'auanture de certuy-cy, Roys de tant de Roys : les derniers qu'ils en chasserent :

celuy du Peru, ayant esté pris en vne bataille, & mis à vne rançon si excessiue, qu'elle surpasse toute creance, & celle là fidellement payee : & auoir donné par sa conuersation signe d'un courage franc, liberal, & constant, & d'un entendement net, & bien composé : il print enuie aux vainqueurs, apres en auoir tiré un million trois cens vingt cinq mille cinq cens poissant d'or : outre l'argent, & autres choses, qui ne monterent pas moins (si que leurs cheuaux n'alloient plus ferrez, que d'or massif) de voir encores, au prix de quelque desloyauté que ce fust, quel pouuoit estre le reste des thresors de ce Roy, & iouyr librement de ce qu'il auoit reserré. On luy apposta vne fauce accusation & preuue : Qu'il desseignoit de faire souleuer ses prouinces, pour se remettre en liberté. Sur quoy par beau iugement, de ceux mesme qui luy auoient dressé cette trahison, on le condamna à estre pendu & estranglé publiquement : luy ayant fait racheter le tourment d'estre bruslé tout vif, par le baptesme qu'on luy donna au supplice mesme. Accident horrible & inouy : qu'il souffrit pourtant sans se desmentir, ny de contenance, ny de parole, d'une forme & grauité vraiment royalle. Et puis, pour endormir les peuples estonnez & transis de chose si estrange, on contrefit un grand deuil de sa mort, & luy ordonna on des somptueuses funeraillies. L'autre Roy de Mexico, ayant long temps defendu sa ville assiegee, & montré en ce siege tout ce que peut & la souffrance, & la perseuerance, si onques Prince & peuple le montra : & son malheur l'ayant rendu vif, entre les mains des ennemis, avec capitulation d'estre traité en Roy : aussi ne leur fit-il rien voir en la prison, indigne de ce tiltre : ne trouuant point apres cette victoire, tout

l'or qu'ils s'estoient promis : quand ils eurent tout remué, & tout fouillé, ils se mirent à en chercher des nouuelles, par les plus aspres gehennes, dequoy ils se peurent aduifer, sur les prisonniers qu'ils tenoient. Mais pour n'auoir rien profité, trouuant des courages plus forts que leurs tourments, ils en vindrent en fin à telle rage, que contre leur foy & contre tout droit des gens, ils condamnerent le Roy mesme, & l'un des principaux seigneurs de sa cour à la gehenne, en presence l'un de l'autre. Ce seigneur se trouuant forcé de la douleur, enuironné de braziers ardents, tourna sur la fin, piteusement la veue vers son maistre, comme pour luy demander mercy, de ce qu'il n'en pouuoit plus. Le Roy, plantant fierement & rigoureusement les yeux sur luy, pour reproche de sa lascheté & pusillanimité, luy dit seulement ces mots, d'une voix rude & ferme : Et moy, suis ie dans vn bain, suis-ie pas plus à mon aise que toy ? Celuy-là soudain apres succomba aux douleurs, & mourut sur la place. Le Roy à demy rosty, fut emporté de là. Non tant par pitié (car quelle pitié toucha iamais des ames si barbares, qui pour la douteuse information de quelque vase d'or à piller, fissent griller deuant leurs yeux vn homme : non qu'un Roy, si grand, & en fortune, & en merite) mais ce fut que sa constance rendoit de plus en plus honteuse leur cruauté. Ils le pendirent depuis, ayant courageusement entrepris de se deliurer par armes d'une si longue captiuité & subiection : où il fit sa fin digne d'un magnanime Prince. A vne autre fois ils mirent brusler pour vn coup, en mesme feu, quatre cens soixante hommes tous vifs, les quatre cens du commun peuple, les soixante des principaux seigneurs d'une prouince, prisonniers de

guerre simplement. Nous tenons d'eux-mêmes ces narrations : car ilz ne les aduoient pas seulement, ils s'en ventent, & les preschent. Seroit-ce pour témoignage de leur iustice, ou zele enuers la religion? Certes ce sont voyes trop diuerses, & ennemies d'une si sainte fin. S'ils se fussent proposés d'estendre nostre foy, ils eussent considéré que ce n'est pas en possession de terres qu'elle s'amplifie, mais en possession d'hommes : & se fussent trop contentez des meurtres que la nécessité de la guerre apporte, sans y meller indifferemment une boucherie, comme sur des bestes sauvages : vniuerselle, autant que le fer & le feu y ont peu atteindre : n'en ayant conservé par leur dessein, qu'autant qu'ils en ont voulu faire de misérables esclaves, pour l'ouvrage & service de leurs minieres. Si que plusieurs des chefs ont esté punis à mort, sur les lieux de leur conquête, par ordonnance des Roys de Castille, iustement offencez de l'horreur de leurs deportemens, & quasi tous desestimez & mal-voulus. Dieu a meritoirement permis, que ces grands pillages se soient absorbez par la mer en les transportant : ou par les guerres intestines, dequoy ils se sont mangiez entre-eux : & la plus part s'enterrent sur les lieux, sans aucun fruit de leur victoire. Quant à ce que la recepte, & entre les mains d'un Prince mesnager, & prudent, respond si peu à l'esperance, qu'on en donna à ses predecesseurs, & à cette premiere abondance de richesses, qu'on rencontra à l'abord de ces nouvelles terres (car encore qu'on en retire beaucoup, nous voyons que ce n'est rien, au prix de ce qui s'en devoit attendre) c'est que l'usage de la monnoye estoit entierement incognu, & que par consequent, leur or se trouua tout assemblé, n'estant en

autre service, que de montre, & de parade, comme vn meuble reserué de pere en fils, par plusieurs puissants Roys, qui espuisioient tousiours leurs mines, pour faire ce grand monceau de vases & statues, à l'ornement de leurs palais, & de leurs temples : au lieu que nostre or est tout en emploie & en commerce. Nous le menuisons & alterons en mille formes, l'espondons & dispersons. Imaginons que nos Roys amoncellassent ainsi tout l'or, qu'ils pourroient trouuer en plusieurs siecles, & le gardassent immobile. Ceux du royaume de Mexico estoient aucunement plus ciuilez, & plus artistes, que n'estoient les autres nations de là. Aussi iugeoient-ils, ainsi que nous, que l'univers fust proche de sa fin : & en prindrent pour signe la desolation que nous y apportâmes. Ils croyoyent que l'estre du monde, se depart en cinq aages, & en la vie de cinq soleils consecutifs, desquels les quatre auoient desiaourny leurs temps, & que celui qui leur esclairoit, estoit le cinquiesme. Le premier perit avec toutes les autres creatures, par vniuerselle inondation d'eaux. Le second, par la cheute du ciel sur nous, qui estouffa toute chose viuante : auquel aage ils assignent les geants, & en firent voir aux Espagnols des ossements; à la proportion desquels, la stature des hommes reuenoit à vingt paumes de hauteur. Le troisieme, par feu, qui embrasa & consuma tout. Le quatriesme, par vne émotion d'air, & de vent, qui abbatit iusques à plusieurs montaignes : les hommes n'en moururent point, mais ils furent changez en magots (quelles impressions ne souffre la lascheté de l'humaine creance!) Apres la mort de ce quatriesme soleil, le monde fut vingt-cinq ans en perpetuelles tenebres. Au quinzieme desquels fut créé vn

homme, & vne femme, qui refirent l'humaine race. Dix ans apres, à certain de leurs iours, le soleil parut nouuellement creé : & commence depuis, le compte de leurs annees par ce iour là. Le troisieme iour de sa creation, moururent les Dieux anciens : les nouveaux sont nays depuis du iour à la iournee. Ce qu'ils estiment de la maniere que ce dernier soleil perira, mon autheur n'en a rien appris. Mais leur nombre de ce quatriesme changement, rencontre à cette grande conionction des astres, qui produisit il y a huit cens tant d'ans, selon que les astrologiens estiment, plusieurs grandes alterations & nouuelletez au monde. Quant à la pompe & magnificence, par où ie suis entré en ce propos, ny Græce, ny Rome, ny Égypte, ne peut, soit en vilité, ou difficulté, ou noblesse, comparer aucun de ses ouurages, au chemin qui se voit au Peru, dressé par les Roys du pais, depuis la ville de Quito, iusques à celle de Cusco (il y a trois cens lieues) droit, vny, large de vingt-cinq pas, paué, reuestu de costé & d'autre de belles & hautes murailles, & le long d'icelles par le dedans, deux ruisseaux perennes, bordez de beaux arbres, qu'ils nomment, Moly. Où ils ont trouué des montaignes & rochers, ils les ont taillez & applanis, & comblé les fondrieres de pierre & chaux. Au chef de chasque iournee, il y a de beaux palais fournis de viures, de vestemens, & d'armes, tant pour les voyageurs, que pour les armées qui ont à y passer. En l'estimation de cet ouurage, i'ay compté la difficulté, qui est particulierement considerable en ce lieu là. Ils ne bastissoient point de moindres pierres, que de dix pieds en carré : ils n'auoient autre moyen de charrier, qu'à force de bras en traissant leur charge : & pas seulement l'art d'eschaffau-

der : n'y sçachants autre finesse, que de hauffer autant de terre, contre leur bastiment, comme il s'elleue, pour l'oster apres. Retombons à nos coches. En leur place, & de toute autre voiture, ils se faisoient porter par les hommes, & sur les espaules. Ce dernier Roy du Peru, le iour qu'il fut pris, estoit ainsi porté sur des brancars d'or, & assis dans vne chaize d'or, au milieu de sa bataille. Autant qu'on tuoit de ces porteurs, pour le faire choir à bas, car on le vouloit prendre vif, autant d'autres, & à l'enuy, prenoient la place des morts : de façon qu'on ne le peut onques abbatre, quelque meurtre qu'on fist de ces gens là, iusques à ce qu'un homme de cheual l'alla saisir au corps, & l'aualla par terre.







TABLE DES CHAPITRES

LIVRE SECOND.

(SUITE)

	Pages.
De la gloire. Ch. xvi	1
De la presumption. Ch. xvii	19
Du dementir. Ch. xviii	62
De la liberté de conscience. Ch. xix.	69
Nous ne goûtons rien de pur. Ch. xx.	75
Contre la faineantise. Ch. xxi	80
Des postes. Ch. xxii.	86
Des mauvais moyens employez à bonne fin. Ch. xxiii.	88
De la grandeur Romaine. Ch. xxiiii.	93
De ne contrefaire le malade. Ch. xxv.	96
Des poulces. Ch. xxvi.	100
Couardise mere de cruauté. Ch. xxvii.	102
Toutes choses ont leur saison. Ch. xxviii.	116
De la vertu. Ch. xxix.	119
D'un enfant monstreux. Ch. xxx.	130

	Pages.
De la colere. Ch. xxxi.	133
Deſſence de Seneque & de Platarque. Ch. xxxii.	143
L'Hifoire de Spurina. Ch. xxxiii.	153
Obſervations ſur les moyens de faire la guerre de Iulius	
Cæſar. Ch. xxxiiii.	164
De trois bonnes femmes. Ch. xxxv.	177
Des plus excellens hommes. Ch. xxxvi.	188
De la reſſemblance des enfans aux peres. Ch. xxxvii.	198


LIVRE TROISIESME.

De l'vtile & de l'honneſte. Ch. i.	241
Du repentir. Ch. ii	262
De trois commerces. Ch. iii	282
De la diuerſion. Ch. iiii.	299
Sur des Vers de Virgile. Ch. v.	313
Des coches. Ch. vi.	392



1

1



3 2044 036 309 706

This book should be returned to
the Library on or before the last date
stamped below.

A fine of five cents a day is incurred
by retaining it beyond the specified
time.

Please return promptly.

DUE NOV 17 1924

DUE JUN 2 1930

~~OCT 9 '61 H~~

